

171



171

IOANNIS LODO  
VICI VIVIS VA-  
lentinii

DE VERITATE FIDEI  
Christianæ libri v. in quib. de religio-  
nis nostræ fundamentis, contra Ethni-  
cos, Iudæos, Agarenos, siue Mahu-  
metanos, & perverse Christianos plu-  
rima subtilissime simul atq; exactissime  
disputantur: nunc denuò  
in lucem editi.

*Accessit rerum & uerborum in hisce memora-  
bilium locupletissimus Index.*

Cum gratia & priuilegio tum Imperatoris  
Caroli V. tum Galliarum regis Fran-  
cisci, ad quinquennium.

BASILEÆ.



EXIMIO SACRAE THEO  
logiæ Doctōri D. LODOVICO BE-  
RO Basiliensi, Domino & Cognato  
suo in primis obseruando,  
Io. Oporinus S.



CITE à Platone non u-  
no in loco celebratū, iacta-  
tumq; ueteri etiam prouer-  
bio est, LOD. BERE, co-  
gnate multis mihi nomini-  
bus obseruadissime, *οὐκ ἔστιν*  
*τῶν λόγων ἀλλὰ καὶ ἐν τοῖς*

*πολλοῖς τῷ λόγῳ δὲ* : quod honestum pulchrumq;  
sit, iterum id ac tertio repeti sermone debere. Nā  
ut alibi passim, ita hic uel maxime diuina in rebus  
honestis Prouidentia, ac singularis erga genus hu-  
manū Dei amor apparet: dum gratiā illis tantā ad-  
dit, ut semper amatores suos reperiant, qui, quan-  
tumlibet illæ ab alijs negligantur, flocciq; fiant,  
ac se penumero etiam oppugnentur, diuelli tamen  
ab ipsis nullo se pacto ferant, sed perpetuo easdem  
studio consecretantes, nullam sibi adeo ex quamlibet  
frequēti earū usu obrepere satiem, nauseam ue pa-  
tiantur, ut quo easdem uersant crebrius, hoc maio-  
re semper illas amplecti amore, fouereq; pergant.  
Contra in reb. fucatis, honestiq; ac boni dūta-

## EPISTOLA

xat speciem præferētibus euenire uidemus, ut &  
 gratiam omnē statim atq; semel fuerint perspectæ  
 propius, simul cum detracta ipsis larua exuant, &  
 eos quib. principio esse admirationi cœperāt, acer-  
 rimos inde oſores experiātur. Id uero si ulla alia in-  
 re, certe in promulgādis ingeniorū fœtibus depre-  
 hēdere potissimū licet. Vt enim eorū qui uel inanes  
 tantū nugas obtrudunt lectoribus, uel uana solum  
 ostentatione insanabile illud suum scribendi cacoë-  
 thes produnt, momentaneæ ferē commentationes  
 ac ephemerī esse libelli solent: (quorum tamen est  
 nimis etiā ferax hæc nostra ætas: ) ita quorū sunt  
 recta ratione, ueraq; eruditione, hoc est sapienter  
 instructæ lucubrationes, eo quoq; Genio ferē pol-  
 lent, ut quo sæpius ab earum quas tractant scienti-  
 arum atq; artium studiosis legantur, hoc magis ma-  
 gisq; (etiam decies repetitæ, ut ille ait) placeāt: su-  
 binde nimirum proferente se fructu aliquo, certo  
 penitioris inquisitionis, operæq; diligētioris pre-  
 cio. Et quanquam ita sunt quidā anxio, aut iniquo  
 potius iudicio præditi, ut sic de ueterū tantū scrip-  
 tis iudicari tutò posse existiment: haud tamen usq;  
 adeò sterile uideri seculū hoc nostrū debet, ut non  
 & protulisse hætenus, & proferre etiānum in om-  
 ni scientiarū genere clarissimos uiros, quorum mo-  
 numenta cum ueterum præcipuis conferri nō pau-  
 ca, præferri etiā quàm plurima, ac maiori quoq;  
 admira-



## NVNCVPATORIA.

admirationi olim atq; usui esse posteritati possint, citra inuidiā, cā dideq; rē ita ut uerē est expēdenti arbitrandum sit. Atq; ut in aliarū artium ac scientiarū traditione nō immeritō fortē prioribus illis posterior semper et is cōcedat, palmāq; præbeat: ita quid in ea cedere debeat, qua solida certaq; ad omnem uirtutem præcepta exhibentur, quaq; ad sui cognitionem, ac summi adeo boni consecutionē, & Dei opt. max. cultum, uerū illum, nō superstitionibus atq; præstigijs (cuiusmodi à Iudæis, Mahumetanis, Epicuræis, peruerseq; Christianis quibusdā obseruari liquet) adulteratū, rectā cōtenditur, non uideo. Quis enim nō omnē illā, in cate-  
ris quidē certe philosophiæ partib. adeo perspicacē uetustatē, hac in parte præcipua planē fuisse cecā, ac innumeris iactatā erroribus ignorat? Quantū igitur in hac ipsa nostri quoq; seculi homines excelluerint, præter alios cū D. ERASMI Roterodami, tum nostri huius LOD. VIVIS-Valentini, doctissimorum hominū monumenta satis testātur. Sedenim de nostro hoc uti potissimū dicā, quid est à ueterib. illis præstātissima eruditione uiris usquā memoriæ proditum, liberalis saltem hominis studio dignum, in quo nō probē se quoq; exercitum, editis diuersorū adeo argumentorū libris declarauit? Ac liquidò id quidem cū ex alijs eius operibus, tum illo potissimum quod de Corruptis disciplinis



## EPISTOLA

atq; artibus, easdemq; tradendi ratione ante annos  
tredecim protulit in lucem, apparet. Quantū uero  
perfecta diuinæ illius philosophiæ cognitione pri  
ores istos quos dicebā omnes post se relinquat, hoc  
ipso quem de Veritate fidei Christianæ paulo an  
tea quā ē uiuis discederet V I V B S hic noster, in  
ceperat, nemini non patēre, illud ipsum cognosce  
re cupienti potest. Quod si licuisset expolire id e  
tiam, neq; fuisset uelut imperfectum adhuc foetū re  
linquere Fati necessitate compulsus, dii boni quan  
tum eruditionis ueræ pietati coniunctæ thesaurū  
haberemus? Non semel certe tam præclari illius in  
stituti sui, dum adhuc uiueret, consilium, literis ad  
me suis perscribere, meq; ad Spartam illā quam su  
scepiissem, sedulò adornandam exhortari solitus  
erat: magnū se Opus moliri affirmās, in quod unū  
quicquid solidioris sanctiorisq; doctrinæ diuino  
esset beneficio cōsecutus, id omne cōferret, atq; in  
eo absoluendo quicquid superesset uitæ consume  
ret. Atqui uixdum primis adhuc lineamentis cœp  
tam hanc à se Venerem circumscripserat, cū ecce  
indignat tanto uiro, tamq; præclaro eius instituto  
sorte, tollere manum de tabula, ac interruptum re  
linquere opus, extremumq; uitæ suæ actū absolue  
re cogitur: magno certe et bonorum omnium lu  
ctu, et rei literariæ pietatisq; detrimento. Igitur  
quod unum restabat, præcipuū mihi operæ preci

## NVNCVPATORIA.

um facturus uidebar, ut quam in ipso adhuc super-  
 stite singularem erga me beneuolentiā semper intel-  
 lexeram, in ijs etiā quos rerum suarum curatores  
 reliquerat, experirer. Neq; sanē mihi committen-  
 dum esse duxi, quin hortādo urgendoq; efficerem,  
 ne egregium Opus istud, cuius tantam mihi aliquo-  
 ties spem ille fecerat, quamlibet rude atq; impoli-  
 tum adhuc, ita uel negligeretur per incuriam, quo-  
 minus in publicam ecclesię pietatisq; studiosorum  
 utilitatē prodiret: uel plagiarij forte alicuius frau-  
 de interciperetur, qui debita autorem ipsius laude  
 atq; gratia spoliaret. Igitur & Gulielmi Hertze-  
 nij uiri doctissimi, amiciq; mei singularis opera, nē  
 pe quo rerum suarum curatore annis aliquot vi-  
 ues ipse usus esset: & Margarete Valdaure, om-  
 nib. quę in honestissima quauis matrona lauda-  
 ri queant uirtutib. ornatissima fœminæ, eiusdēq;  
 D. Lodouici Viuis relictæ uiduę beneficio, effeci  
 tandem, ut eius mihi Operis in lucem edendi co-  
 pia fieret. Atq; iniuisse me gratiam eo factō sanē  
 non paruam apud uerę pietatis studiosos, abunde  
 res ipsa declarat. Nam quia augustiori charactere  
 ac forma liber hic, quo ea saltē quasi dignitate qui-  
 busdā fieret quoq; commendatior, esset primum à  
 nobis excusus, fuere non parum multi, qui enchi-  
 ridij forma eundem recudendum censerent, quo  
 commodius omniū manibus teri, gestariq; in sinu  
 4      posset.

## EPISTOLA

posset. Itaq; facile serijs illorū hortationibus adduci me passus sum, ut hac etiā in re quā plurimis gratificarer. Ne uero temerè id quoq; à me patratum quisquā existimaret, inueniendū mihi patronum aliquē duxi, apud quē facti huius mei rationes exposita, contra maleuolorū calūnias (ut nihil non uirulētis quorundam morsibus impeti arrodīq; hodie solet) præsens mihi ceu numinis cuiuspiā auxilium parare. Alioqui enim certe nō superuacaneū solum, sed ridiculū quoq; prorsus uideri poterat, ut ego mearū nugarū quicquā hic, uelut asuta regali purpure Sardorum mastruca, ut quidam ait, affigerem: maxime quū per se & rei dignitas, & autoris præstantia, abūde esse apud plerosq; commendata queat: & uerò quicquid hic desiderari poterat, præclare sua ad Paulum III. Pont. max. præfatione, doctiss. uir D. Franciscus Craneveldius fuisset complexus. Verum editionis huius tamen factiq; nostri patronum quærēti, nullus occurrebat te ipso, eruditissime LOD. BERE, cognate obseruādisime, uel gravior mihi, uel dignior. Cum enim ad capefrenda bonarum literarum studia puero mihi adhuc primus, ac perpetuus inde fueris author, proq; ea quā inter nos necessitudinis copula iungimur, humaniter atq; beneuolē semper nostris conatibus, modo ne ab instituto cursu (quem haud infeliciter etiam tum facere subinde uidebar) deflecterem.

## NVNCVPATORIA.

*Et*erem, te adfuturum pollicitus, ita omnino essece-  
 ris, ut quantulamcunq; diuino beneficio eruditio-  
 nis existimationē nactus, neq; dedecori patriæ ha-  
 ctenus, multis uerò exteris etiam honori esse atq;  
 usui potuerim: cur non quicquid id est, optime ac  
 hūaniss. Cognate, libenter atq; ex animo tibi accep-  
 tum ferrem: occasionemq; mihi undecūq; etiam de  
 claradi uicissim erga te animi mei, testandæq; gra-  
 titudinis, captandam ducerem? Atq; utinam non se-  
 culi nostri nescio quo fato, ante annos aliquot cū  
 multis alijs bonis honestisq; iuuenibus, uelut cōmu-  
 ni quodam paroxysmo correptus, à literario stu-  
 dio aliquantisper cessandum mihi esse putassem. u-  
 bi tamen rursus à te, quasi fido Achate, in uiam re-  
 uocatus, paucorum aliquot mensium neglectum i-  
 ta labore atq; industria sarcire sum conatus, ut nō  
 multo pōst magnorum in repub. nostra uirorum  
 autoritate ac iudicio ad Græcas pariter Latinasq;  
 literas publicè docendi munus destinarer: id quod  
 annis plus minus quindecim à me administratū, nō  
 dum fortè reliquissē, nisi hominum quorundam  
 (ne quid grauius dicam) male feriatorū contētio-  
 ni atq; inuidiæ cedendum, & quācunq; potius for-  
 tunā mihi tentandam existimaßem. Ac tum quidē  
 inter alia uitæ honestis saltem exercitijs transigen-  
 dæ genera, quum præcipue mihi arrideret ars ty-  
 pographica, qua & tutiorem me ab inuidia fore,



## EPISTOLA

(sed neq; sic tamen) & bonorum scriptorum editione deinceps literarum studijs, non minus quàm antea docendo, profuturum sperabam: ita mihi eā esse amplectendam curandamq; toto pectore interea putavi, ut quantum liceret, ijs tantum libris in publicum edendis meam operam locarem, quibus minimum lædi quisquam, emolumentum uero certum aliquod magnumq; percipere quàm plurimi possent. In hanc igitur susceptā semel à me prouinciam, siquidem sedulò quantum est mihi ad hunc usq; diem siue industriæ partum, siue linguarum cognitionis qualiscūq; diuino concessum munere, impendam, haud forsitan male etiam sic institutam mihi eam uitæ rationem, iudicaturos bonarum artium atq; humanitatis studiosos: seq; ob id ipsum quoq; gratiæ aliquid debere tibi, opt. Cognate, qui meliorum semper studiorum autor mihi fueris, non grauatim agnituros confido. Proinde ut & huius præclari Operis, nunc demū à nobis enchiridij forma editi beneficium, & aliorum etiam usum, quoscunq; deinceps siue bonarū artium, siue pietatis studiosis gratificaturi promulgabimus, tibi acceptum esse ferendum omnes intelligerent, non absurde me facturum existimaui, si id ipsum publice edito hoc ad te epistolio, quamlibet tumultuariè tamē καὶ αὐτοσχέδιον scripto (neq; enim licebat nunc quidē aliter) testatum relinquere: si-  
mulq;

## NUNCUPATORIA.

mulq; , ut istud qualecunq; animi erga te mei argu-  
mentum , qua soles omnia humanitate , fouendum ,  
& ab iniurijs , quæcunq; intentari à quoquam  
possint , uindicandum suscipias , enixe orarem . id  
quod facturum te , pro singulari in me beneuolen-  
tia tua , non diffido . Christus Iesus humanitatem  
tuam & ad nominis sui gloriam , & Catholicæ Ec-  
clesiæ utilitatem diu nobis incolumem conseruet .

Basileæ , pridie Calend. Iulij , Anno Salutis

M. D. XLIIII.



# R E R V M E T V E R B O R V M

*in libris Io. Lod. Viuis de Veritate fidei Chri-  
stianæ memorabilium Index.*

<b>A</b>	Bdallæ dictū de ho-	Adam ad se oculos à	
mine	566	Deo uertisse	192
Abelis mors	213	Adam an geminæ fue-	
in Abelis morte figura		rit naturæ	400
Christi	256	Adæ flagitium	203
Abrahæ femur tan-		Adæ quare præceptum	
git seruus	504	à Deo datū	207
Abraham Chaldæus		Adæ reconciliatio quid	
227.		profuerit	205
Abraham quædā Chal		in Adam uitiata natu-	
daicis literis consi-		ra nostra	194
gnasse	257	ad olam uox	434
Abraham quare mul-		Adriani edictum de	
tas uxores duxerit		Christo	358
624		ædificatio res ridicula	
Abraham fidei & pieta	56		
tis exordium	496	Aegyptiorū uanitas	118
in Achille optimi prin		Aegyptiorū insanæ ex	
cipis effigies	288	structiones	223
Acta apostolorum pri		in Aeternum, quid si-	
num ædificiū super		gnificet	434
Christi fundamen-		affectiōes uelut mediæ	
tum	290	189	
Adam cōsolatus à Deo		affectus ualidissimus	
post lapsum	214	668	
Adam primus uates de		affectuum ratio	59
Christo	256	Afros multas uxores	
		habe	

# INDEX.

habere	624	ctrinæ pietatis	306
Agarenos à secta Ma-		amoris uis	440
humetica desciuisse		amorem & maiesta-	
650		tem in una sede nō	
Alchorani errores	648	morari	338
Alchorani incōstantia		amores meri uniuersa	
588		hominis pī uita	259
in Alchorano infinita		ambiguitates ex igno-	
esse mendacia	594	rantia uenire	377
Alexātri Seueri edictū		amicitia inter duos ma-	
de Christo	358	xime	622
Alexandro orbis hic		amicū amico alterum	
non satis	476	esse ipsum	140
ama ut osurus, repre-		amnes ingentes aruis-	
henditur	623	se terræ moribus	121
amare quid	71	angelus quare ad uirgi-	
amandi causæ omnes		nem missus	295
in Deo	668	angelus punitus de af-	
amor uerus	178	fectata Dei æquali-	
amor nexus animo-		tate	325
rum	450	angelus unde beatus	
amor unde nascatur		172	
230		Angelum Politianum	
amor cōnectendi uim		scripturam sacram	
habet	139	totam contempsisse	
amor ad bonum sem-		264	
per tendit	73	angeli non apti huma-	
amor quos coniungat		nis conuersationi-	
180		bus, nisi corpore con-	
amor fundamentū do-		recti	336
		ange-	

# INDEX.

angeli & Dei filij	215	animæ actiones perpẽ	
angelorum functio tẽ-		dendæ	149
poraria	175	animæ immortalita-	
de Angelorum lapsu		tem Socrates in incer	
stulta ratiocinatio		to reliquit	358
Mahumetis	615	animæ nostræ contin-	
angelorum nuncupa-		git quod aquæ fonta	
tio	175	næ	151
angelos à deo in semet		animæ intellectus & i-	
ipsos oculos conuer		maginatio	164
tisse	180	animus humanũ esse	
ad Angelos malum nõ		immortalem	148
pertingere	395	animam mortale quæ	
Angelis corporalis u-		fecerint	162
sus quare non da-		animam esse immorta	
tus	190	lem in fide pietatis	
animalium apud Iudæ			170
os iugis carnificina		animam Dei solius be	
	452	neficio procreari	
animantia sua officia			152
præstare	198	animabus sanctis cœlũ	
de mutis Animantibus		referatum ascensu	
& mentibus homi-		Christi	350
num	34	animorum tenebræ	
anima pro homie	489		428
anima cur genitis in ad		Apellis industria in pin	
ulterio tribuatur	152	gendo	356
animas humanas quo		Apostoli unde nomi-	
tidie infundi corpo		nati	274
ribus	337	Apostolis spiritum no-	
		uam	

# INDEX.

uam doctrinam nō attulisse	291	Deo	663
in Apostolis uigor spi- ritus Domini	24	Aristotelis sententia de prudencia ac fortu- na	1
in Apulia homo assue- tus ab infantia in mari degere	217	Aristotelem ponere du- as beatitudines	51
arbor scientiæ	190	Aristotelici ob nume- rū angelorum offen- si	175
arca fœderis admoni- tio beneficiorū Do- mini	480	de Ascensionis Christi utilitate	349
Archimedis Syracusani sphæra	102	Asizini populi cur Chri- stianismo renuncia- runt	617
Aristoteles obscurus, lu- bricus, uaser etiam	163	Astrologorum uanitas	120
Aristoteles à quibus re- prehendatur	22	Ate dea	182
Aristoteles taxatur	60.	Athenagoræ dictum de homine	373
98		M. Attilius Regulus à Carthaginensib <sup>9</sup> cru- deliter necatus	360
Aristoteles Deo adimit libertatem	125	Augusti dictum de He- rode	500
Aristotelis scripta de Moribus	261	Augusti felicissima se- nectus	679
Aristotelis sententia de mundi guberna- tione	96	B	
Aristotelis de felicitate sententia	645	Arcozibas dux Iudæ- orum	512
Aristotelis sententia de		baptismi figura in ar-	ca



# INDEX.

ca Noë	256	C.	
beati immortaliter	180	Acodæmones	184
beatitudo Dei quæ	133	caremonia & ritus	
beatitudo non à fortu-		quare Iudæis dati	
na	52		438
beatitudo Mahometi-		Cæsaris insolentia in fe	
ca	341	licitate	92
beatitudo non sita in		Caligulâ cū dñs simul	
corporis commodis		tatem habuisse	92
	411	Canariæ insulæ	184
ad Beatitudinem semp̃		Canaria insula miracu	
ternam quomodo		lis plenz	316
perueniendum	204	caniculus muriceps	
bellum quid	687		608
beneuolentia Christia		Canrica Salomonis	
nos cõglutinari	688	quomodo intelli	
à Bestijs multis corpo-		genda	425
ris dotibus nos supe		in Canticis translatio-	
rari	200	nes longissime repe	
bona malorum	108	titæ	260
bona quæ Stoicis	52	caro & uirtus in duo-	
bonorum tria genera		bus lancibus positæ	
Aristoteli	51		63
bonus uir qui	62	caro cui præcepto ma-	
brachiũ Domini	418	xime repugnet	688
M.Bruto malus genius		Catonis dictum de hac	
apparuit	184	uita	671
bruta in usum hominũ		Charitas hominum, ar	
condita	105	gumentum magnũ	
brutorum uitam agere		charitatis Dei	307
multi cupiunt	199	Charitas in res plures	
		non	

# INDEX.

non est partienda	dæis adhuc, Iudæo-
307	rum uerbis & more
Christiana religio ue-	locutus 299
nerata à præstantis-	Christus sol, lux & ui-
simis 666	ta ueteris testamen-
Christiani ueri Iudæi	ti 268
spirituales 455	Christus se nec opificio
Christiani tabulæ de-	ulli uel arti addixit
pietæ & peruetustæ	302
comparantur 27	Christus quid nobis at-
Christianorum tyran-	tulerit 481
ni 367	Christus quid locu-
ad Christianismum	tus cum ad crucem
uia certissima 430	duceretur 331
Christus pacis tempo-	Christus homo unitus
re natus 254	Deo 247
Christus in quo ætatis	Christus post resurre-
suæ anno docere in	ctionē se oculis mul-
ceperit 302	titudinis spectandū
Christus salutarem le-	non præbuit 348
gis nucleum protu-	Christus finis legis &
lit 208	prophetarum 269
Christus quid nobis 12	Christus quo ætatis an-
Christus quare uxore	no mortuus 327
nullam duxerit 302	Christi natiuitas 229
Christus cū Mahume-	Christi fratres 285
te collatus 586	Christi hostes 327
Christus melior Mose	Christi tempora 525
579	Christi diuinitas mul-
Christus, discipulis Iu-	tis uerbis probatur



# INDEX.

497	Christum nihil peculi-
Christi actorum ratio	are habuisse 305
quærenda 528	Christum multitudi-
Christi miracula ho-	nis testimonio non
minibus utilia 530	acquieuisse 274
Christi uita omnis per	Christum nihil peni-
stringitur 505	tus scripto reliquis-
Christi lex omnibus	se 272
congruit 447	Christum non statim
de Christi doctrina	post delictum uenit
306	se 252
Christi doctrina qua-	in Christo tria esse cõ-
re nihili putetur 363	sideranda ¶ 320
Christi natura duplex	de Christo quid senti-
in Daniele exponi-	at Mahumetes 599
tur 500	in Christo omnia simi-
Christi reconciliatio	plicia & plena 340
quid reddiderit 209	de Christo Iudæorum
Christo suum honorẽ	fabula 528. & 529
detrahere quale pec-	à Christo lux additare
catum 250	bus 19
Christum suam huma-	cibi nomen 646
nitatem nunquã di-	Cicero de mundo 96
xisse Deum esse 323	Cicero de Deo quid
ante Christum Messi-	sentiat 661. & 662
as nullus 514	Cicero taxatur 672
Christum uerbũ Dei	Cicero multa ore, nõ
esse 604	pectore dixit 684
Christum lucem mun-	Ciceronis sententia de
do attulisse 664	magnis deorũ re-
	bus

# INDEX

bus	99	39	
Ciceronis stultitia de		coningum quorundā	
filiola sua quā deā		continentia	296
facere uolebat	289	consiliū Domini ado-	
ciuitas quid	687	randum	390
ciuitas bonum	587	cōsolatio maxima in	
cœlibum Christus ex-		omnibus periculis	
emplum	303	686	
cœlo nō opus esse		consuetudo recto iudi	
Deo	135	cio officit	401
in Cœlo nullus casus		continētia Iosephi	296
timendus	211	Cornelius Pub. Chri	
cœli ianitor	646	stum irridet	362
cognitio in animali		corpus hominis rectū	
propter appetitū	70	in cœlum spectans	
cognitionis summum		74	
simplex	73	corpus seruire animo	
Colapiscis homo	217	49	
comedere et bibere res		corpus instrumentum	
molesta	56	animi	49
communio	345	corpus an carcer ani-	
cōmunicatio rerū	45	mi	200
conchæ marinæ ubi re		corpus hominis quid	
pertæ	121	in se contineat	187
cōcrucifigi cum Chri-		corpus Christi in sa-	
sto	328	cramento modo	
condita omnia prop-		quodam nobis in-	
(ter hominem	190	comprehensibili	
conditor ex rebus con		344	
ditis agnoscitur		corpus carcer animi	
		6 2	178

# INDEX.

173	Curtij mors ob uanā
corpore nihil turpius	gloriam 391
56	Cyri maioris descrip-
de Corpore & anima	tio 288
simile 78	Cyri apud Xenophon
corporum colores un-	rem dictum, de ijs
de 609	qui sese uirtutibus
corporales res in lege	exercent 64
spiritualiter accipi-	D
endæ 414	Dæmon serpens 181
corporalia animi gra-	Dæmō de Deo ma-
tia 49	le cogitans 186
corporalia homini à	contra Dæmonē reme-
Deo tributa 670	dium 241
corui zelotypia aduer-	dæmones in idolis lo-
sus Noam in arca 401	cuti 184
creare 89	dæmones boni & mali
creata omnia ad ali-	olim culti 184
quem usum 196	dæmonum multitudo
creationis amor 141	in nouis insulis 335
de Creatiōe Adami Ma	dæmoniacos linguas
hometis somniū 609	loqui alienissimas
crucifigete filium Dei	185
334	Damnum deam turba
de Cultello & homine	re cœlum 182
simile 50	desideriū nostrum so-
eupiditas in homini-	lus Deus implet
bus ad flagitia 243	71
curiositas reprobatur	Deus quid sit 80. & 81
in rebus diuinis 387	Deus unionis 84
	Deus

# INDEX.

Deus solus supra natu ram	242	Dei mysteria duorum esse generum	16
Deus factus homo	248	Dei colendi uiam mu- tasse homines	218
Deus Aristotelicus	126	Dei ad uerū cultū cur homines nō potue- rint uenire	228
Deus spiritus simplicif simus	413	Dei ueri cultus	448
Deus medico compa- ratur	445	Deo similes fieri quid	449
Deus est mens ipsa	227	Deo repugnare peri- culosum	239
Deus de Deo iuxta na- turam	227	Deum conueniebat ad nos uenire	295
à Dei amore corpus nos reuocat	74	Deum gerere curam hominum	109
Dei & hominis in Christo qualis con- iunctio	250	ad Deum uiam philo- sophos ignorasse	245
de Dei bonitate ali- quid detrahere	250	Deum in sua essentia nihil pati	251
Dei timorem Epicurū sustulisse	40	ad Deum humana in firmitas non trāsfe- renda	99
Dei uoluntas causa re- rum	87	Deum suam beatitudi- nem alijs communi- casse	133
Dei natura qualis	659	Deum à cura nostri nō esse auersum	112
Dei disciplina facilis	182	Deum nullis instrumē- tis	6
in Dei cognitionem quomodo perueni- amus	38		
Dei cogitatus	89		

# INDEX.

tiſ indigere	102	di	6
Deum omnia condiſſe	88	in Deo nihil niſi Deus	
Deum ſedere ſuper Hieroſolymas	397	39	
in Deum non cadere ea quæ ſunt humanæ miſeriæ	399	de Deo quid ſcholæ ſapientũ ſenſerint	226
Deum nemo deprehendere ualeat	311	in Deo quæ ſint	227
Deum à nobis nõ procul abeſſe	138	Deorum multitudo	
Deum uocare in ius	206	unde	213
à Deo omnia gubernari	95	Deorum numerus autuſ	220
in Deo omnia quietiſſimi	173	Deorum numine cuncta agi	112
in Deo duo actus	228	deos duodecim Athe- niſ fuiſſe	274
cum Deo contentionis modus	106	deos à metu <i>θεός</i> eſſe dictos	168
in Deo omnia præſentia	388	dextera patris	554
de Deo multa Chriſtiana	403	<i>Διὰ τοῦ</i>	10.92
Dij ueterum	32	Diaboli natura & mens	321
à Deo rationem eorũ quæ agit Chriſtianiũ nõ quærere	205	dies nouiſſimi	520
de Deo par omnia cre-		digna & indigna non natura ſeparauit in Deo, ſed ſuperbia	100
		diluuium quare mun- dũ deleuerit	219
		diluuiũ uaria	119
		Dionyſij Syracuſani dictũ de morte	685
		discipuli duodecim & ſep-	



# INDEX.

septuaginta	274	Ecclesia quos libros	
disputandū cum Iudæ		recipiat	293
is quomodo	426	ecclesia columna ueri-	
ex Disputationibus or		tatis	293
ta perrinacia	23	ecclesiam quosdam ter	
diffensio maximū ma		minos cōstituisse	368
lum	687	de Ecclesiæ cursu	368
diuinationis modus		ad Ecclesiæ uēturæ do	
ineptus	319	ctrinā missio spiritus	
diuinitatis præcipuū		sancti pertinebat	252
signum	587	ecclesiam nunquā fal-	
diuinitatis ignoratio		li	29
perniciosos parit er		ecclesiam condolere	
rores	91	Christo	551
de Diuinitate Christi		de Ecclesia uirgine re-	
& miraculis	311	nasci	295
diuitiarum uerus usus		Ecclesiastici scriptores	
670. & 671		unde orti	25
diuortij malum	625	Eccles. locus, Quia exi	
doctrina Christi in cor		tus filiorū hominū si	
dibus exarata	273	cut exit <sup>o</sup> brutorū	405
doctrinæ Christi ca-		edere quid in scriptu-	
put	306	ris	645
dolorem ferre patien-		ēdū	89
ter quorum sit	672	Eleusinæ Cereris my-	
Domitij Calderini di		steria nō uulgāda	112
ctū de missa	264	Endymionis uitā uiue	
dona omnia à spiritu		re an ulli uelint	683
sancto	294	Epicurus an mentes	
E		hominum metu libe	
		rarit	



# INDEX.

rarit	94	de Euangelij uirtuti-
Epicurus signifer im-		bus et excellentia 279
pietatis	154	de Euangelij scriptori
Epicurū secutum De-		bus 168
mocriti sententiā	89	Euāgelio cur multi ad
epistolæ Apostolorum		uersentur 363
explicatio sententia		Euangelistas discrepa-
rum Euangelij	289	re quandoq; in circū-
Esaia locus de Christo		stantijs 278
expositus	486	<i>ἐνθυμία</i> 668
Esa. 3. Stat ad iudican-		exilium Iudæorū 458
dum Dominus, etiā		explanationes Scriptu-
declaratur	563	rarum ad quid con-
Esa. 7. Ecce uirgo con-		ducant 420
cipiet	507	Ezech. 42. caput 506
Esaia locus cap. 50. de-		F
claratus	545	Abula de muliere ri-
Esau quare à Deo re-		F dicula 631
probatus	388	fabulæ Mahometicæ
essentia Dei unitas nō		608
scindenda	231	fabularum poëticarū
Euangelizare pauperi-		fundamentum 183
bus	534	fallaciam mentiri ueri-
Euangelium quid	280	ratem 657
Euangelium nec obscu-		fallere quid 87
rum, nec difficile	281	falsum, uarium & mul-
Euangelium an sit de-		tiplex 36
prauatum	593	fatum omnia uersare
Euangeliiū imposturas		680
satanae detegit	335	de Fato philosophi di-
		scor

# INDEX

scordant	127	ti sacra	54
felicitas quid Platoni		fortuita omnia pla	
60		cent Stoicis	127
de Ferro & homine fi-		fortunæ uarietas	679
mile	65	fortunæ minimum, u	
fides an confirmanda		bi sapientiæ plurimū	
rationibus	14		91
fides an solis sensibus		Furiæ poetarum	243
habenda	145	futurorū incerta mula	
fides Christi catholica		tos turbare	673
dicta	355		G
de Fidei lumine distin		Alien° Cæsaris clas	
ctio	22	siarius	375
fidem aperiri rationi		gemmis prima concili	
bus	27	atio precij quæ	58
in Fide nulla uiolentia		generandi facultas qua	
578		re attributa	188
fiducia comes amoris		generatio hominis pu	
247		denda	201
filius quomodo mis-		Genij gemini homini	
sus à patre	246	184	
filium Dei conuenie-		genus hominum ini	
bat uenire in terram		tio rude	115
244		genus hominum per	
finis quid	46	quam sapientiam cō	
finis omnium rerū	1	ditum	245
finem docere quantū	9	de Gentium uocatio-	
scemina opinionem de		ne	442
se pō negligent	298	gignendi ratio in Deo	
forma unicuiq; animā		601	

# INDEX.

gladius Domini	418	homo primus	17
Gorgiæ dictum de se		homo princeps mun-	
nectute	677	di sublunaris	69
gub ernare quid	97	homo suæ miseræ	
H		causa	46
<b>H</b> Ali filius Abitalib		homo quare conditus	
650		173	
de Hebdomadibus		homo nomie, nō re	55
Lxx Danielis	510	homo caput omniū	6
Hebræa gens uetustis-		homo ad cœlestem ui-	
sima	223	tam creatus	210
Hebræam linguā tro-		homo cur in terrā po-	
pis abundare	259	situs	218
Hebræum nomen un		homo qua lege condi-	
de deductum	223	tus	190
Hebræorū lingua	118	homo unus à princi-	
Helcanæ duæ uxores		pio creatus	18
557		homo magnum mira-	
Herculis magnitudo		culum	152
597		homo nullū finem se	
Herodis crudelitas	300	dignū habet in hac	
Herodes multi	509	uita	65
Hierem. cap. 31. declara-		homo per peccatū car-	
tur	566	neus factus	249
Hieremiæ lamentatio		hominis dignitas na-	
nes	541	turæ	235
historiæ sacræ figuræ		hominis finis ubiquæ	
Christi	266	rendus	53
homo quid	373	hominis miseria	54
item	394	hominis gratia omnia	
		cre-	

# INDEX.

creata	6	Homeri error de dijs	
hominis miseria	197		99
hominis excelsum caput	158	honorem cito euanes-	
hominis duæ partes		cere	58
621		humanũ genus à qui-	
hominis consideratio		bus reparatum	215
42		I	
hominis industria	146	Iacob quare à Deo	
hominẽ longẽ brutam		electus	388
animã excellere	2	Iacob de lucta nomi-	
hominem natura con-		natus Israël	222
didit actuosum	70	idololatria ex odio	
de Homine in utero		616. 617	
materno formato	78	ieiunium quid	629
homines inuenti sine		ieiunij genus Deo cõ-	
literis, sine legibus		trarium	440
etiam, sed non sine		de Iesu Christi uita &	
religione	218	actis	294
homines de se decet		Iesu nomẽ multos ha-	
modice & loqui &		buisse	515
sentire	311	igne omnia purgari	
homines integros ui-		384	
uere in mari	216	ignorantia unde	255
homines probi in hoc		ignorantiam non pur-	
mundo contẽpti	165	gare uitium	8
homines quare cõgre-		ad-Immortalitatem u-	
gentur	687	nica uia	414
ante Homerũ an scrip-		impij à Deo se auer-	
tores fuerint	216	tunt	12
		Indi ociosi	69
		inge	

# INDEX.

ingenia hominum di-		Iudæorum clades	401
uersissima	20	Iudæos corporis uo-	
ingenij uis	43	lupt. somniare	407
ingratitudo		cum Iudæis quomo-	
	13	do disputandū	391
inimicum odio haben		iudex iustus	111
dum	308	de Iudicij die fabella	
intelligentia necessa-		Mahomerica	634.
ria	68	635. 636. & 640	
intelligentiæ dux	416	de Iudicio Christi	385
de Intelligentia	60	L	
inuidia causa mortis		Ares	184
Christi	537	Latronum typus	329
inuēta noua quotidie		lemures	184
prodire	116	leonis figura	418
Ioannes Nestorianus		lex Iudaica data uni	
	618	populo	243
Ioseph Benzara	511	lex insita humano cor	
ira Dei ex effectis	389	di	241
Israel duplex	558	lex tota umbra	266
Iudaica uaticinia	255	lex Mahomerica qua-	
Iudæi impudētissimæ		tuor uallis mūita	654
peruicaciæ	391	lex Christi in quibus	
Iudæi de Deo indigne		sita	688
sentiunt	393	lex charitatis	660
Iudæi à fauore Dei		lex accommodata ad	
cur exciderint	466	ingenium Iudæo-	
Iudæi spiritalia capere		rum	446
non potuerunt	432	lex temporaria usq; ad	
de Iudæorū exilio	458	Messia tempus	434
		de	



# INDEX

de Legis abrogatione	433	lia olim	117
legis ferendæ ratio	436. & 438	literas sacras humanis	208
legis abrogatio quomodo intelligenda	454	uerbis loqui	208
de Legis fine ac præmijs	430	literas nesciuisse Græcos ante Troianum bellum	116
an in Lege quæq; homines possint saluari	651. & 652	λόγος	229
leges politicæ	450	Lucianus sophista prouidentiam Dei irrisit	98
Iethæum flumen quare excogitatum	381	Lucianus hominū & Deorum subsannator	98
libertas mentis homini data	206	Lucianus Samosatensis taxatur	219
libidinosi homines Mahumetici	560	de Lucæ euāgelistę scriptis	276
lignum mortem attulit	328	Lucretius Carus poetata Epicureus	98
à Ligno sæpe salus patribus	545	Lugdunum Neronis tempore, una nocte cōflagrauit	119
de Ligno in uetere lege multę figurę	328	Lunam Mahumetem integrasse	587
linguarum donū quare retributum	354	lupi typus	418
literæ sacræ explanatiōe indigent	417	luto oculos cæci aperire	102
literæ rarissimæ in Italia		lux naturalis	15
		luci quomodo aditus præcludatur	8
		de	

# INDEX.

de Luce fabella Mahu-		non esse disputan-	
merica	563	dum	568
M		mala quæ mundanis	
Agia naturalis	317	hominibus	108
Magia periculū	331	mali cur tam multi	
magi	299		199
magorum incantamē		malos quomodo De-	
ta	317	us punierit	257
Mahumerus qualis ho		malos Deum tolerare	
mo	577	propter bonos	206
Mahumeres muliero-		manes	184
sus, non uinosus	633	in Mari habitare ho-	
Mahumeres qualem		mines	216
Deum faciat	596	Maria cur Iosepho de-	
Mahūetes dicit se mis-		sponsata	293
sum esse à Deo	525	Marius post exilium	
Mahūetes de sua secta		consul	679
disputari uetuit	20	de Matre Christi pau-	
Mahumetis uita	574	ca in scriptura	285
Mahometis consulto		Martyres diabolici	361
res	618	Martyrum sanguine	
Mahumetis legatio		nostra religio con-	
an sit postrema	586	stabilita	359
Mahumeres quo æta-		Martyrj flosculi infan-	
tis anno suos circū-		tes	301
cidat	610	Melchisedech sacerdos	
Mahumeticorum som		Dei excelsi	211
nia confutari sola		de Melchisedech quæ-	
relatione	505	dam	495
de Mahumetana lege		medicina quare reper-	
		ra	

# INDEX.

ta	383	mētem nusquam sub-	
Melitense lintheū	69	sistere	74
mendacium ueritati		mentem separari à sen-	
plerunq; simile	183	fibis	164
mendax emolumentū		in Mēte gemina actio	
quærit	275		76
mentiendi genus tu-		de Mente Aristotelis	
tissimum	571	sententia	666
mens duplex	253	in Mēte hominis duæ	
mens nostra Dei ex-		functiones	43
pressa imago	229	Messias quid	482
mens cæca ducit cæcā		Messias quidam in Hi-	
uoluntatem	8	spania cōbustus	514
mens in qua re dele-		Messia opus	483
cterur	136	gloria	484
mens ad Deum usq;		de Messia Christiano-	
peruenit	150	rum & Iudæorum	
mens solius est Dei			482
152		de Messia Iudæorum	
mens hominis depra-			477
uata	152	de Messia Iudæorum	
mens summæ potesta-		stultæ opiniones	
ti adiuncta	4	408. & 409	
mentis caligo	17	Messia multi falsi	
mentis diuinæ simili-		511 & 512	
tudo duplex	135	Micheæ capitis, . lo-	
mentis est cognoscere		cus	515
70		Minerua dea ingenio-	
mentis munia	159	rum	334
		miner	

# INDEX.

Minerua Iouis filia	298	de Morte uera cōsolatio	685
miracula fingere propter quātum	316	mortuos multos resurrexisse	374. & 375
miracula uera quas habent notas	316	Moses de tribu Leuitica	224
miracula cur Deus faciat	533	Moses à quibus edoctus	306
miracula nulla prodesse incredulis	577	Moses socerum suum in patriā remisit	446
miraculorum fides effectrix	371	Mosi oblocuti sunt Iudæi	238
miraculorum impossura	578	Motus naturales & uoluntarij	4
de Miraculis dæmonū	315	multitudo ex crassis hominibus cōstat	21
morborum animi in Christo medicina	338	multitudo non sequenda in religione	653
mors an fugienda	676	mundana omnia esse uanitatem	473
mors uelut obdormitio	681	mundus aliquando esse se cœpit	115
mors qualis Adæ data pro supplicio	193	mundi condendi causa	132
mors hominis cum ortu comparatur	159	mundum consilio regi	96
mortem corporum ad mentem non pertinere	155	mundum condendi a mor causa	104
de Morte multa præclara	675	mundū æternum esse scribit Aristor.	115
		de	

# INDEX.

de Mundo libellus an	seruū manumississe
Aristotelis 98	Baccho similē 286
mysteria Dei abstrusa	nobilitas inane nomē
10. & 16	590
de Mysterijs religionis	Noē posteri homines
rudes differere peri	rudes 220
culosum 569	O
N	Obedientia Christi
NAbucodrosorus	erga patrem 333
224	obliuio Dei unde 214
nocturna terriculamē	oculus domini 418
ta 184	oculi clausi Adamo
natatui assuefacti pue	194
ri 217	de Oculis corporis &
natura hominum cor	mentis simile 18
rupta 195. & 119	odium quid 308
naturæ nostræ depræ-	odium homines sepa-
uatio 11	rare 139
naturæ plus debemus	odium mali erga Deū
quā parentib. 236	386
naturæ munera pul-	odia unde nascantur
cherrima 71	687
in Natura nihil teme-	opera Dei etiam minu
re factum 2	tissima eius solertiā
Nazarenus Christus	ostendunt 212
dictus 518	de Opibus disputatio
necessitas quid 128	669
necessitates multæ ho-	οπισθεν 182
minib. confictæ 671	optimū omnium quid
Niciam Atheniensem	67



# INDEX

oraculorū intelligētia	peccatum omne uolū
magni faciēda 422	tatis 204
originalis iustitia 202	peccati uis 334
Oseæ 11. Puer Israel eti	de Peccato angeli &
am 518	hominis 177
P	ex Peccato secuta dam
PAnis & uini symbo	natio 208
la 345	peccata multa sola uo
Parcere Dei 246	luntate fieri 111
de Passionis & mortis	peccatorū expiatio in
Christi mysterijs 333	Esaia descripta 486
Paulus Athenis irrisus	pecunia uarijs ex re-
363	bus 57
Paulus grande colu	pecuniæ usus 48
men ecclesiæ 23	persecutiones defugiē
de Pauli scriptis 276	dæ 301
Paulum nullam Ioan	personarum numerus
nis Apostoli mētio-	nō cōfundendus 231
, nem facere 278	Petrus Calaber 263
pax quid 522	Phileni fratres 361
pax cordis 395	Philippus rex quare
pax admirabilis sub	uxorem suam acce-
Christi regno 520	dere nō ausus 297
& 521	Philo Iudæus 426 au
peccare hominem, nō	ctor libri Syrach 259
uoluntate Dei 205	philosophia prima &
peccare non naturæ,	secunda 30
sed uolūtatīs uitio 7	Philosophiæ uniuersæ
peccatum omne unde	cardo 10
245	philosophia an suffici
	at

# INDEX

at ad omnia	243	Plinius in Historia na-	
philosophiam Socra-		turæ taxatur	112
tes primus è cœlis in		Plinij de dijs cauillati-	
terrâ deuocauit	9	ones	662
philosophi multi opu		Plinij Cæcilij de Chri-	
lenti	669	stianis ad Traian. epī	
philosophorum uarij		stola	364
errores	366	Pomponius Lætus ta-	
philosophos diuinas		xatur	264
res occultasse	281	populus suspicax in	
Philostratus uana de		deteriora	348
Christo scripsit	288	porcinæ carnis esus uti	
pietas Christiana au-		lis	414
rea	19	porcus pro immundis	
pietatis cura indita na-		cie	418
turaliter homini	220	possidēda omnia quo	
Plato de filio Dei	233	modo	307
Plato uarij in consti-		posteriora Domini	38
tuenda beatitudi-		de Potentia humana	
ne hominis	47	& diuina	41
Plato Dionysio de di-		in Præcepto omni duo	
uinis rebus scribens		consideranda	342
epistolam iussit decer		de Prædestinatione	388
pi	281	in Prædictionibus sa-	
Plato de Deo	663	tanæ uanitas	318
Plato ab Aristotele re-		prodigia qui exigant	
prehenditur	22		370
Platonis respublica	288	prodigia à Christo edi	
Plinius secundus Dei		ta	318
irrisor 98. taxatur 85		Prophetia qualis uisio	

# INDEX.

552	Prophetæ difficiles &	Ratio quid	14
	obscuri	Ratio mentis opus	
	267	præcipuum	421
	Prophetæ amatoribus	rationis robur	25. &
	267	26. usus	419
	similes	rationibus egisse Chri	
	Prophetarum scriptis	stum cū Iudæis	23
	quæ uis	Rabi Solomō Gallus	
	479	425	
	Prophetarum offici-	Rabini Iudæorū quid	
	um	de Deo sentiant	396
	258	reconciliatio per solū	
	Prophetas uix intelli-	filium Dei facta	246
	gere suas uisiones	Christi regere quid	97
	423	regni Christi umbræ	
	Prouerb. 30. Via uiri	266	
	in uirgine sua	de Regno magno, &	
	507	philosophis de Deo	
	prospera uitæ Christi	disputantibus, simile	
	anos nihili pende-	91	
	672	reges solūmodo tres	
	runt	apud Iudæos obser	
	prudentia rectrix uir-	uatores legis	4
	tutum	religio olim habita	
	61	pro sapientia	219
	psalmus cx. declaratur	religio à natūra homi	
	494	nibus indita	218
	de Pueris domūculas	de religione priscorū	
	cōponētib. simile	hominum	217
	582	religionem omnē qui	
	de Pueris delicatis si-	dam	
	mile		
	110		
	cum Pueris loqui		
	432		
	de Pueris & Iudæis si-		
	mile		
	431		
	puncta Iudæorum in		
	literis		
	416		
	R		

# INDEX.

dam damnant	655	S	
ad Religionem armis		S	Abbati uiolatio 539
nemo cogēdus	576	S	de Sacramēto in cœ-
ad Religionē alijs ef-			na Domini institu-
se exemplo	257	to	342
in Religione Christia		de	Sacrarum literarū
na thesauri laten-			intelligentia 415
tes	20	de	Sacrificio Christi
repudiij libellus quare			547. & 548
Iudæis permissus	446	sacrificia iustitiæ sacro-	
rerum publicarū scrip-		ficanda	442
tores	288	sacrificia Iudæorū ces-	
resurgere perfectos ho-		sasse	472
mines	379	sapientiæ studiū cur in	
resurrectionis Christi		tot disciplinas scis-	
utilitas	347	sum	11
resurrectionem impos-		sapientiæ copia in alte-	
sibilē esse qui contē-		ra uita	163
dant	347	sapientiam finem cer-	
de Resurrectione cor-		tum statuere	3
porū nostrorum	372	sapientis uiri propri-	
Romana respublica à		um	2
Cicerone descripta		Sacracenorum leges	
	288	& uita	619
Romani uarijs arti-		scelera aucta cum ho-	
bis dotati	221	minū cœtibus	214
Romano imperio		Scipionis Africani di-	
quare tēpore Chri-		ctum de dijs	662
sti maxima orbis		scripta gentilium qua-	
pars subiecta	356	re quidam libenter	
		7 3	legant

# INDEX.

legant	262	raz	257
Scriptura ad mores & similitudinem hominū translata	259	Sibyllæ carmina	255
Scriptura diuina quando hominibus data	256	signa panis & uini	343
Scripturę diuinę autoritas	13	Simonidis de Deo dictum	8
Scripturā sanctā quare quidam contemnant	360	ad Sobolis procreatio nem stimulat nos	44
Scytharum regis barbaries	644	natura	44
Seditiosus homo in Hispania punitus	575	Socrates quid de dijs sentiret, dissimulauit	361
Senecę scripra quomodo iudicanda	261	Socrates in carcere disputat de animę immortalitate	155
Senectutis causa defensa	677	Socratis dictum, Quę supra nos, nihil ad nos	37
Senectutis incommoda	676. 679	συνεργ	300
sensus interni	43	spiritus philosophi demones uocarūt	184
sensuum corporalium finis	67	Spiritus sancti effectus	351. officium 554
Sergius monachus	618. & 630	Spiritus S. sensibiliter Apostolis datus	253
Seth filios in colūnis duabus generationē exposuisse cœli et, ter		de Spirituū immortalitate	144. & multitudine 175
		Stoicorum sententia de morte	682
			stula



# INDEX.

stultos multum sapiē-	men	301	
ribus prodesse	109	Thalmud 201. eiusdem	
Suetonius negligē-	somnia	400	
ter de Christianas	Theologi quidam ta-		
loquitur	xantur	22	
superstitio molestares	Theophrasti quere-		
95	la	54	
supplicia scelerum	203	Trinitatis nomina un-	
Suū cuiq; pulchrū	54	de imposita	229
fiderū triplicitas	369	Trinitatis diuinæ men-	
fiderum nulla coitio	368	tionē philosophos	
Sylla proscrip- tus pro-	scripsit	679	post Christum nō
Synaxis	345	respuisse	234
T		de Trinitate diuina	225
Emplum posterius	517	Tyberij Cæsarisan-	
Tentatio	182	mus in Christū	358
terram uniuersam cū		Tyberij felicitas	679
ipso Oceano adiri		Typhon dæmon	1
posse	216	V	
testamenti nomen	290	Alerius Soranus	
testamenti ueteris ra-		in crucem actus	
tio	265	112	
de Testamento utriusq;		Varronis scripta penē	
corruptione	599	omnia intercidiſſe	
de Testamento ueteri		269	
255		ueritas hominum cō-	
Tetragrammaton no-		menta non formi-	
		dat	528
		ueritas rei maior,	
		7 4	quām

# INDEX.

quàm ratio nostra	15	iucundissima	68
ueritatis lux patefacta		uita breuis cur homi-	
demum	12	ni data	163
ueritatis magna uis		uita nostra somnus	80
	360	uitæ cursus hominis	
ueritatis uia unica &		priuati	93
simplex	514	uitæ huius malorum	
ueritatis fontem Chri-		origo	242
stum aperuisse	244	in Vitæ negocijs res mi-	
uestes pudori consule-		ferrima	167
re	56	uitam inesse stirpibus	
uia unica boni & ueri			76
	31	uitæ duæ in brutis	76
de Vicissitudinũ ces-		ultionem Deo tribuif-	
satione	80	se etiam gentes	111
uinũ quare Mahume-		Vlysses uĩri prudentis	
tani non bibant	630	fimi imago	288
uirtus sequenda, sati-		uoluntas quid 70. à uo-	
us sero, quàm nun-		lendo dicta	71
quam	64	uoluntas an legibus	
uirtus præmia deside-		possit puniri	111
rat	240	uoluntas domina om-	
uirtutes	61	nium	567
uirtutum utilitas	113	uoluntatem ex se nul-	
in Viro quid spectan-		lam habere qualita-	
aum	627	tem	43
uita humana nõ sine		de Voluntate	61
recto iudicio agitur		uoluntates nostræ in	
	240	ordinatione naturæ	
uita in nihil sapiendo		liberæ sunt	129
		uolup-	

# INDEX.

uoluptates corporis		moris nomen	615
breues	54	X	
uoluptates commen-		X	Erxes homo delica-
datrarij usus	55	tus	66
usus naturalium exi-		X	Xerxem simultatem ha-
guus	671	buisse cum dijs	92
Vulcanum duos repe-		Z	
riffe amicos	140	Z	Eno de animo Iouis
de uxoribus Mahome		333	
ticis	620. & 621	Zeno Eleates iniqua	
Vxor societatis & ac		morte sublatu	360

FINIS.

PAVLO TERTIO PON-  
TIFICI MODIS OMNIBVS  
summo, Franciscus Craneveldius No-  
uiomagus, iureconsultorum  
infimus, s. D.



**I**NTER tot tātasq; laudes tu-  
as, egregiaq; decora, Paule ter-  
tie, Pontifex maxime, quibus  
ornatus ac suspiciendus ad subli-  
mem illum Pontificiae dignita-  
tis apicē conscendisti, primū clarissima familiae  
tuae domesticis antiquissimisq; ornamentis, dein-  
de eruditissimorū hominū celeberrimis monime-  
tis, postremò innumeris corporis animiq; doti-  
bus, quas uel Dei optimi maximiq; benignitas,  
uel tua tibi parauit industria, nulla te res uerius  
supra ceteros eiusdē ordinis tui uiros extulit,  
aut magnificētius illustrauit, quā quod ad hoc  
summū culmen dignitatū, quo nihil posset homi-  
ni cōtingere praecellētius, parē attuleris morū  
dexteritatē, modestiā, iustitiā, innocētiā. in qui-  
bus moribus nihil insit, quod uel Momus ipse  
possit carpere: nihil in ipsa summi muneris fun-  
ctione, quod nō praecclaris factis & eximijs uir-  
tutibus

## EPISTOLA.

tatibus tuis multo reddatur illustrius. Videmus  
 te summo studio pariq; sapiētia illud semper po-  
 tiſſimū fuisse molitum, assidueq; moliri, ut magis  
 indies magisq; feliciter prouehatur & succres-  
 cat pietas illa uere Christiana, quā superiorib.  
 annis, tū bellorū calamitates toto ferè terrarum  
 orbe coortæ, tū dissidia sectarum magna ex par-  
 te subruerūt. Tu uerò nobis ueluti sidus prospe-  
 rum in hoc tā periculoso salo nauigantibus ita  
 praeluxisti, ut atrocissimas bellorum procellas,  
 quæ iam Gallias Italiāq; propemodū obruissēt,  
 protinus in serenitatem tranquillitatēq; redege-  
 ris, & in sarcinē religionis prouincia alterum  
 nobis Esdrā exhibueris, hoc est solertissimū re-  
 stauratorē atq; architectū, qui non solum uitijſ  
 tāti Operis, si qua uspiā irrepissent, mederi po-  
 ſſes, uerum etiā pristinā firmitatē restituere, &  
 ornamenta uetustati cedentia maiore etiam  
 cum gratia reponere atq; confirmare. Sed aliās  
 dabitur maiore tuba S. tuæ laudes ut commemo-  
 rare liceat. Iam uero paucis intelliget tua Cel-  
 situdo, quæ meres huc potuerit impellere, ut  
 ad eandem scribere non ſim ueritus, homo ig-  
 notus, ex ultimis propè Galliae Belgicæ fini-  
 bus, cuius ne nomen quidem isthic fando sit au-  
 ditum.



## FR. CRANEVELDII

ditum. Existimabat uir eruditissimus, & ueræ pietatis amantissimus, Ioannes Lodouicus Viues, mihi communibus quondam studijs & arcta familiaritate deuinctus, quum complura alia monimenta posteris reliquisset, quæ doctōrū manibus assidue teruntur, sui quoque muneris esse, ut exulceratissimis istis tēporibus, quibus tāta movebātur de rebus ad religionē pertinētibus quæstiōes, tantæq; de rebus maximis tragcediæ, ipse quoque pro sua uirili quantum posset opis adferret, ac in cōmune cōsuleret. Scripsit per aliquot annos sub finē uitæ Opus hoc de Veritate fidei Christianæ, libris quinque, in quib. suauissime disertissimeq; disputa- uit, & omnē ingenij doctrinæq; uim exeruit, ut cygnæū quoddā melos iam iam moriturus cecinisse uideri possit. In quos sanè libros plus il- lum diligentia atque laboris impendisse certū est, quàm in reliquos omnes, quos unquam ante euulgasset. Et tamē hisce uixdum absolutis, calculi, podagræ, febriumq; doloribus abrep- tus est, & ergastulo corpusculi exolutus, quū uixdum peruenisset ad annum ætatis octauum & quadragesimum, exhaustus (ut cōiicio) per- petuis laboribus studiorum, quibus ei nihil fue- rat in

## EPISTOLA.

rat in uita iucundius. Eos libros quū adhuc spiraret Viues, Tuæ S. dedicandos ac nuncupandos censuit, summo uidelicet religionis nostræ principi atq; assertori, cuius scilicet iudicio probari debuissent, quæcunq; de religionis nostræ fundamentis aduersus Iudæos, Ethnicos, Agarenos, & peruerse Christianos plurima subtilissime simul atq; exactissime disputantur: ut si eiusdem S. Tuæ calculus accessisset, maiore cū fructu à cæteris studiosis ea omnia legerentur. Et si quid uspiam fuisset allucinatū, ut nihil est in hominum rebus quod sit ex omni parte perfectum, id omne Sanctissimæ sedis arbitrio censuræq; submitit. Potuisset is quidem, si paulo diutius numina uitam illi condonassent, uel addere quædam, uel mutare, uel demere: sed immatura tanti uiri mors effecit, ut hanc Venerē non penitus absolutam habeamus, cui prorsus absoluendæ uereor ne quisquam penicillum ausit adhibere: quemadmodum de clarissimi quondam Apellis Venere traditur, quam insularibus ille Choïs inchoauerat. Inuidit mors, inquit Plinius, peracta parte, nec qui succederet operi ad præscripta lineamenta inuentus est. Vide mus finem libri secundi in abruptum quiddam  
desi

## FR. CRANEVELDII

desinentem, & præcipitio deterrentem ab ulte-  
 riore ceu nimia rerum diuinarum inuestigatio-  
 ne, quando supra captum sunt humanae mentis  
 atque ingenij. Proinde tum eo loco, tum alijs  
 quibusdam in uniuerso hoc Opere nondum de-  
 dolatis, ne gry quidem addidimus, aut subtraxi-  
 mus, quod hoc ipsum cum nostra professione  
 minime conuenire iudicaremus. Tantum con-  
 cessimus, ut epistolæ nuncupatoriæ describen-  
 dæ vicarium officium ad me ueterem illius uiri  
 sodalē & amiculum deferretur. At noster hic  
 stilus durior sanè & incöcinnior est: sed nega-  
 re nullo modo potui clariss. matronæ Margare-  
 tæ Valdauræ, illius quondā officiosiss. cōiugi,  
 hoc quale quale meum officium per literas fla-  
 gitanti. Et cupiebat illa quidem, ut ipsum apud  
 S. tuā munus, authoremq. muneris, meis orna-  
 rem uerbis: quod ego mihi nulla ratione statui  
 faciendum, ne tam præclari operis, tamq. excel-  
 lentis uiri laudes culpa detererem ingenij. Nā  
 operi quidem ipsi maius multo ex lectione præ-  
 conium accedet, quàm quantum ego ullis pos-  
 sim uerbis consequi. Authoris autem laudes,  
 quibus iusta debetur uoluminis magnitudo, nō  
 solū epistolæ angustias, sed nostræ omnino pau-  
 pertæ

## EPISTOLA.

pertatem orationis reformidant. Quare de illo, ut de Carthagine Salustius inquit, tacere satius puto, quàm pauca balbutire. Huic autem libro tua S. quum præcipuū locum in bibliotheca tribuet, tum eum etiam legendum uulgò publicandumq; curabit, ut hoc ueluti præiudicio probatus, cum ingenti studioforum hominum emolumento fructuq; legatur. Illud uero Deū Opt. Max. precamur omnes Christianæ ueritatis studiosi, ut cuius providētia uerus ille Pauli apostolorum principis imitator Paulus Tertius natus ac datus est rebus mortalium subleuandis, idem nobis eum quā maximè longæuū esse uelit, & in resarcienda religionis nostræ concordia, ueritateq; fulcienda longe felicissimum. incūbente præsertim in idē studiū omnibus neuis, & (quod dici solet) remis uelisq; Cæsare principe inuictissimo Carolo Quinto semper Augusto, semperq; felici. Cætera uero cum pio Lectore transigemus.

AD



AD PIVM LECTO/  
REM PRAEFATIO PER AV-  
THOREM VTCVNQVE  
delineata.



MAGNAS & graues admodum  
plagas accepit humanum genus  
per primum illud primi hominis  
Adæ peccatum, nō in corpore so-  
lum, quod tū factum est imbecil-  
lum, & morbis, senio, mortiq; obnoxium: sed etiā  
in animo, parte hominis longe diuiniore. & quod  
supra modum dolendum est, grauissimum uulnus  
accepit in ipsa uoluntate: quæ quū antea rectā fer-  
retur in amorem summi maximiq; conditoris, tum  
demum auerti cœpit ab illo uero perfectioq; bono,  
& ad res uanas nihiliq; deflexit. Tum in mente, su-  
prema hominis ueluti specula, caliginem quandam  
tenebrosam, hoc est ignorantiam & cecitatemq; cō-  
traxit, ut iam inde per sese non satis perspicere ua-  
leret quid rectū sit, & quò debeat pertingere. Ex  
qua rerum ignoratione subinde nascitur in homi-  
nibus suspicio, ut etiam si à præstantioribus admo-  
neantur meliōrum, ea tamen eiusmodi esse non cre-  
dant, neq; facile pareant: ac ne tum quidem, quum  
Deus ipse quidpiam docet aut imperat. Nam uel  
non credunt homines Deū talc quiddam præscrip-  
sisse,



## PRAEFATIO.

fuisse, uel obliuiscuntur, uel certe negligunt: aut se  
 se non satis intellexisse suspicatur, qualia sint quæ  
 de cultu sui ipsius Deus in uetere nouoq; testamen  
 to nos docere non est dedignatus. Ad quas es quæ  
 alij planè sint increduli, alij suspicaces & dubij,  
 nunquid erit operæ precium, ut eas humanis ratio  
 cinationibus fulciamus ac corroboremus: ut ad cre  
 dendum adducantur ij quibus sola Dei dicentis au  
 thoritas non uidetur ad persuadendum satis adfer  
 re momenti. Nam sunt pleriq; uel inter Christia  
 nos, quorum fides ueluti pictura quædam exoleta  
 uidelicet uetustate, ualidioris persuasionis penicil  
 lo renouanda uideatur. Admirabuntur fortasse nō  
 nulli, quum audierint diuinas præscriptiones rati  
 onibus fulciri, quasi diuina rebus humanis tueri cō  
 stituerimus: & iactabūt, fidei meritum ferme tolli  
 & abrogari, si humana ratione firmetur ac corro  
 boretur. Sed intelligant, rationes quidem fore hu  
 manas, quibus in hoc opere sumus usuri, sed tamen  
 ex diuino fonte sumptas atq; petitas. Tales enim  
 sunt, ut nemini unquā quantūuis ingenioso, quan  
 tumuis erudito uenissent in mentem, nisi pro sua  
 ingenti misericordia Deus ipse nos ueritatem iam  
 tum in abstruso, & (quod aiunt) in Democriti pu  
 teo delitescentem, per Seruatorem nostrum Iesum  
 Christum docuisset. Verum tradita iam & patefa  
 cta ueritate, resolutisq; signaculis illis septem, qui  
a      bus

# IO. LOD. VIVIS

bus olim ob signatus erat liber ille mysteriorū, quē  
 solus agnus ille immaculatus dignus est habitus ut  
 aperiret, iam non admodum difficile est rationes  
 quoq; ad eam ueritatem explicandam adhibere: nō  
 sic tamen ut humanis diuina fulciamus, quid enim  
 uideretur absurdius? sed ut pro uiribus ostēdamus,  
 quā sint hæ inter sese cōformes atq; concordēs.  
 nihil enim est aliud humana ratio, quā radius qui  
 dā diuinæ lucis: ut regius ille Psalter merito dixe  
 rit Deo, Signatum est super nos lumen uultus tui  
 Domine. Non igitur dissident, neq; sibi mutuò ad  
 uersantur, si quis apte norit excutere ac peruesti  
 gare. Nec uerò metuat quīquam, ut fidei meritum  
 sit amissurus, si hæc nostra perlegerit. non enim ra  
 tiones adferentur eiusmodi, quæ perhibeant, ut in  
 quit ille, experimentum sensuum. Et tamen inter  
 has quædam sunt efficacissimæ: in spe tamē & cha  
 ritate maius esse meritum fatendum est, quā in so  
 la fide. Nam uel dæmones, ut Iacobus ait, credunt  
 & contremiscūt: sed nec sperant, nec amant. Neq;  
 uero timeat quispiam, quod hic de fidei ueritate di  
 sputetur: sic enim melius apertiusq; dignoscuntur  
 diabolicæ fraudes atq; præstigiæ, quibus irretire  
 & abducere in gehennam miseros cupit. Quod si  
 spiritum illum sanctum omnes haberemus, & sa  
 cram illā unctionem spiritalē, quæ nos omnia doce  
 ret, hoc ipsum satis esset, nec ullis opus esset ratio  
 nibus.

## PRAEFATIO.

nibus. Quod munus quū tā sublime sit, ut nec omnibus, nec omni tēpore detur, utemur sanē huius loco exquisitis rationibus: quod nec primi, nec sine exēplo facimus. Sic enim haecenus plurimi uirorū uitæ sanctitate nobiliū facere consueuerūt, quorū dicta, ueluti sequentes post terga messorū, in manipulos collegimus, & in hunc usum coaceruauimus. Nec uero quisquam existimet, fidem humanis hisce rationibus perfici, aut in nobis posse generari. Isagoge tātum est, siue introductio quaedam, ut ab ipso summo atq; optimo Deo fidē postulemus, quæ prorsus est donum Dei: ut non sine causa dixerint apostoli, Domine adauge nobis fidē. Quāquam illud nobis certum ac firmum esse debet, minimeq; dubitandum, quin det illam omni petenti, beneficentissime simul ac liberalissime. Fides profectō donum est altissimi. At nos his libris omnibus nihil aliud egimus, nihil conati sumus, nisi ut ueluti manu duceremus, & ostenderemus, à quo ea sit petenda, quomodo postuletur, & per quem, nempe Christum Dominum. Nec ista scripsimus, ut extolleremus Christianam fidem, quæ nullius commendatione aut præconijs indiget: tantum abest, ut nostris operis egere uideatur. sed ad fratres confirmandos, & externos quoq; perducendos ad tantī boni communionem: id quod nescio quā magnō cum fructu, optima certe spe, atq; animi promptitudine fecimus. Quanquā uideamus hodie rem po-

## PRAEFATIO.

vius affectibus geri, sicut in partibus & factioni-  
 bus ciuitatum, quàm ratione ac iudicio. Sic Iudæ-  
 us adheret mordicus suæ sectæ, sic Saracenus, &  
 ceteri, quoniam eas à parentibus acceperunt: nec  
 excutiunt, quò mens & ratio si apte in consilium  
 adhiberentur, eos essent tandem perducturæ. Nos  
 autem in hoc Opere uniuerso dedimus operam, ut  
 argumēta quibus utimur, quiuis etiam possit intel-  
 ligere, si mentem aduerterit. Nam quædam nimis  
 uel intricata, uel arguta, circulis scholarum relin-  
 quimus, quibus ea uidebātur magis conuenire. Vti  
 nam autem liceat nobis omnia tam commodè, tãq;  
 dilucidè orsus explicare, ut ab optimo quoq;  
 possint intelligi. Lactantius ille Firmianus ad hisce  
 similia differēda, dari sibi optabat eloquentiā Tul-  
 lianæ proximam. Ego uero longè aliter de M. Tul-  
 lio Cicerone sentio: qui si de hisce rebus aliquādo  
 dicturus pulpitem conscendisset, intellexisset pro-  
 festò, quanto facilius esset de causis forensibus, de  
 bello & repub. coram populo Ro. in alterā partē  
 dicere, quàm de summo rerum omniū parēte Deo,  
 & rebus ab hominū sensu remotissimis persuaden-  
 dis, apud uniuersas orbis terrarum natiōes cū dig-  
 nitate disputare. Sed iā ad rem ipsam accingamur,  
 precati in primis Christū Opt. Max. ut ipse ma-  
 num admoueat operi, ne sine fructu tantum  
 laboris frustra suscepisse uideamur.

IN-



# INDEX CAPITVM QVIN.

*que Librorum Ioannis Lodouici Viuis de  
Veritate fidei Christianæ.*

Epistola nuncupatoria.

Ad pium lectorem præfatio.

## LIBER PRIMVS, QVI EST DE

*Homine & Deo, siue fundamen-  
tis totius pietatis.*

De fine rerum omnium.	Cap. 1
Quantum est docere finem.	2
Rationibus agendum.	3
Quales erunt nostræ rationes.	4
Consideratio hominis & rerum humanarum, ad inueniendum finem.	5
Qui sit hominis finis, ex ipso homine perscru- tatio.	6
De uita uteri, & de hac nostra, & altera.	7
Quid sit Deus.	8
Quod Deus condidit omnia, eiusq; prouiden- tia omnia reguntur.	9
Quod mundus esse aliquando cœperit.	10
Quæ fuerit condendi mundi causa, & de spiri- tibus.	11
De spirituum immortalitate.	12
De fine hominis.	13
De multitudine spirituum.	14
De peccato angeli & hominis.	15
De hominis corpore, & peccato.	16
Quod hominum natura est corrupta.	17

1 3 LIBER



## LIBER SECVNDVS. QVI

*est de Iesu Christo.*

Dereligionē priscorum hominum.	1
De diuina Trinitate.	2
Quod Deum conueniebat ad nos uenire.	3
Quod filium conueniebat uenire.	4
Quod conueniebat eum humanitate uestiri.	5
De aduentu Iesu Christi.	6
De uetere Testamento.	7
De Euangelij scriptoribus.	8
De uirtutibus atque excellentia Euangelij.	9
De actis Iesu Christi.	10
De doctrina Christi.	11
De Christi diuinitate ac miraculis.	12
De miraculis dæmonum.	13
Rursus de diuinitate Christi.	14
De tormentis & morte Christi.	15
De mysterijs passionis & mortis Christi.	16
De sacramento in Cœna Domini instituto.	17
De resurrectione, ascensione, & missione Spiritus sancti.	18
De apostolis & martyribus.	19
De cursu Ecclesiæ sanctæ catholicæ.	20
De resurrectione nostrorum corporum.	21
De cessatione uicissitudinum.	22
De iudicio Iesu Christi.	23
De prædestinatione.	24

## LIBER TERTIVS, QVI EST

*contra Iudeos.*

Quod Iesus est Messias.

De

## INDEX.

De intelligentia sacrarum literarum.	3
Quomodo disputandum.	3
De fine ac præmijs legis.	4
De abrogatione legis.	5
De uocatione gentium.	6
Rursum de abrogatione legis.	7
De exilio Iudæorum perpetuo.	8
De Messia Iudæorum.	9
De nostro & Iudæorum Messia.	10
Quomodo Iesus impleuit fidem uaticiniorum de Messia.	11
De his quæ post Christum.	12

## LIBER QVARTVS, CONTRA

*sectam Mahumetis.*

Quod sit disputandum de religione.	1
De Mahumete.	2
De armis.	3
Quod Christu cõueniebat uenire postremu.	4
De Alcorano.	5
De corruptione utriusque Testamenti.	6
De historijs Alcorani.	7
De Deo.	8
De Christo.	9
De rerum natura.	10
De ijs quibus persuasit sectam suam.	11
De socijs eius.	12
De legibus & uita Saracenorum.	13
De die iudicij.	14
De beatitudine.	15

De

## INDEX.

De Alcorano.	16
Quod homines possunt in quaque lege seruari.	17
Multi Agareni.	18

## LIBER QVINTVS.

De præstantia fidei Christianæ.	1
Epilogus superiorum.	2
De reliquis doctrinis.	3
Christus attulit lucem.	4
De ijs quæ sunt in animo.	5
De opibus.	6
De prosperis & aduersis.	7
De morte.	8
De republica.	9
De fundamento fidei Christianæ.	10

INDICIS CAPITVM  
FINIS.

IOANNIS LO/  
DOVICI VIVIS DE  
Veritate fidei Christianæ Liber pri-  
mus, qui est de Homine & Deo, siue  
de fundamentis totius  
pietatis.

DE FINE RERVM OMNIVM.



**I**NTER multa qui-  
bus sapiens ab insipiente  
distat, illud est præcipuū,  
quod sapiens quæcunque  
siue agit, siue dicit, in fi-  
nem aliquem certum re-  
fert: stultus uerò, & de-  
mens fertur temerè, nec  
quorsum euasurus sit, considerat. Ac de ipsis sapien-  
tibus quo quis acutior est, ac cordatior, eo certio-  
rem habet in re omni finē, magis q̃; fixum: & quoad  
eius potest perficere, minimum relinquit casui. De  
quo est illa Aristotelis celebratissima sententia, Vbi  
plurimum ualeat prudentia, ibi fortunam minimè  
ualere. scilicet quod illius ditioni atq; arbitrio non  
A multum

multum permittit, quisquis rerum exitus diligenter  
 prouiderit, & expedierit consilia. Est enim pro-  
 prium maxime uiri sapientis, ordinare ac præscribe  
 re omnia, quoad eius fieri possit. id autem nunquam  
 assequetur, nisi oculos & mentem coniecerit in fi-  
 nem, tanquam in album iaculator. Quocirca quum  
 auctore mundi nihil sit sapientius, nec fas est aliter  
 de illo existimari, fieri profectò non potest, quin sin-  
 gula ad suos quæque exitus ac uelut scopos dire-  
 xerit: neque inueniri in natura temerè quippiam fa-  
 ctum, aut frustra sine ullo metæ respectu, ad quam  
 tenderet. Quod iam olim ab excellentibus ingenijs  
 deprehensum, magna argumentorum ui ostensum  
 ac patefactum est, ut superuacaneum sit eorum hic  
 à me rationes repeti: in promptu est ex eorum li-  
 bris cognoscere, adeò ut nihil in physico aiant esse  
 turpius, quàm dicere, factum quid esse sine caussa.  
 Grande utique piaculum esset, humanum ingenium  
 de illo sentire atque existimare, quisquis uel condi-  
 tor est huius tanti operis, uel rector, quod est de ho-  
 mine sapiente penè nefas, ut aliquid aggrediatur te-  
 merè, hoc est, nulla ut destinata causa opus suscipiat,  
 atq; in eo uersetur. Admonent ac docent nos cursus  
 conuersionesq; cælorum, tum uices rerum stæte  
 ac indubiæ, omnia in genera & formas separata de-  
 scriptaq; similitudine nascentiū per uices & caden-  
 tum



DE VER. FIDEI LIB. II. 3

tium perpetua atq; inuariabili, ut ratas firmasq; esse singulorum caussas pro certo habeamus, siue condantur, siue conseruentur, siue intereant: alioqui uel non fierent hæc, uel non perseveraret tanta constantia. Non enim firma esse possunt ac stabilia, quæ mittuntur temere, nec in certum exitum diriguntur. quædere in prima philosophia est à nobis disputatum, & mox nonnulla attingemus. Sapientia igitur finem statuit certum ac solidum, bonitas autem bonum ac utilem. Neq; enim uel sapientis est incertos aut leuiculos fines sibi proponere, instituenti actionem aut opus: neq; eos persequi, in quibus præmium sit opera indignum. Nec boni est, fines rerum proponere animo suo malos & noxios. quippe si hoc fecerit, desinit iam bonus esse. sin uero prius illud, sapiens: ut cuius uel mēs in stultitia uersetur, uel uolūtas in malitia. Quā autē nihil sit Deo sapiētius, nihil melius, utique omnia is in exitus certos parauit & magnos & solidos, & rebus ipsis cum primis salutares: quales scilicet & sapiētia & bonitate illius digni sunt. Quod si docent nos uel sensus ipsi, magnos atq; admirabiles esse rerum minutarum fines atque usus, quantum esse hominis ipsius existimari par est, tanto reliquis omnibus præstantioris? Agens quum in actionem ingreditur, finem sibi præstituit, à quo ad agendum uelut stimulo quodam instigatur, & detine-

multum permittit, quisquis rerum exitus diligenter  
prouiderit, & expedierit consilia. Est enim pro-  
prium maxime uiri sapientis, ordinare ac præscribe  
re omnia, quoad eius fieri possit. id autem nunquam  
assequetur, nisi oculos & mentem coniecerit in fi-  
nem, tanquam in album iaculator. Quocirca quum  
authore mundi nihil sit sapientius, nec fas est aliter  
de illo existimari, fieri profectò non potest, quin sin-  
gula ad suos quæque exitus ac uelut scopos dire-  
xerit: neque inueniri in natura temerè quippiam fa-  
ctum, aut frustra sine ullo metæ respectu, ad quam  
tenderet. Quod iam olim ab excellentibus ingenijs  
deprehensum, magna argumentorum uir ostensum  
ac patefactum est, ut superuacaneum sit eorum hic  
à me rationes repeti: in promptu est ex eorum li-  
bris cognoscere, adeò ut nihil in physico aiant esse  
turpius, quàm dicere, factum quid esse sine causa.  
Grande utique piaculum esset, humanum ingenium  
de illo sentire atque existimare, quisquis uel condi-  
tor est huius tanti operis, uel rector, quod est de ho-  
mine sapiente penè nefas, ut aliquid aggrediatur te-  
merè, hoc est, nulla ut destinata causa opus suscipiat,  
atq; in eo uersetur. Admonent ac docent nos cursus  
conuersionesq; cœlorum, tum uices rerum statæ  
ac indubiæ, omnia in genera & formas separata de-  
scriptaq; similitudine nascentiū per uices & caden-  
tium

DE VER. FIDEI LIB. II. 3

tium perpetua atq; inuariabili, ut ratas firmasq; esse singulorum causas pro certo habeamus, siue con-  
dantur, siue conseruentur, siue intereant: alioqui uel  
non fierent hæc, uel non perseveraret tanta constan-  
tia. Non enim firma esse possunt ac stabilia, quæ mi-  
tuntur temere, nec in certum exitū diriguntur. quæ  
dere in prima philosophia est à nobis disputatum,  
et mox nonnulla attingemus. Sapientia igitur finem  
statuit certum ac solidum, bonitas autem bonum ac  
utilem. Neq; enim uel sapientis est incertos aut leui-  
culos fines sibi proponere, instituenti actionem aut  
opus: neq; eos persequi, in quibus præmium sit ope-  
ra indignum. Nec boni est, fines rerum proponere  
animo suo malos et noxios. quippe si hoc fecerit,  
desinit iam bonus esse. sin uero prius illud, sapiens: ut  
cuius uel mēs in stultitia uersetur, uel uolūtas in ma-  
litia. Quā autē nihil sit Deo sapiētius, nihil melius,  
utique omnia is in exitus certos parauit et magnos  
et solidos, et rebus ipsis cum primis salutare: qua-  
les scilicet et sapiētia et bonitate illius digni sunt.  
Quod si docent nos uel sensus ipsi, magnos atq; ad-  
mirabiles esse rerum minutarum fines atque usus,  
quantum esse hominis ipsius existimari par est, tan-  
to reliquis omnibus præstantioris? Agens quum in  
actionem ingreditur, finem sibi præstituit, à quo ad-  
agendū uelut stimulo quodam instigatur, et detine-  
tur

tur in opere. id nemo non quotidie tum in seipso ex-  
peritur, tum in alijs. Nam qui pecuniæ cupiditate  
nauigationem suscipit, hunc pecunia animo propo-  
sita & in nauem deduxit, & in naui retinet. Ad me-  
tam hanc uel agens ipse perducit opus, nec relinquit  
donec sit eò peruentum: uel uires & facultatem at-  
tribuit, quibus ipsum idem se perducatur. Moles stata-  
rias ac torpentes artifices ipsi perficiunt, machinis  
uerò necessaria apponunt adminicula, quibus mo-  
tus suos cursusq; conficiant. Statuam ut quæ immo-  
bilis est, nec consummare seipsam potest, plastes aut  
fusor absoluit. Horologium aut pistrinum opifex  
suus usq; eò deducit, ut decurrere iam deinceps per  
seipsum ualeat. Motus et actiones quodnam initium  
habeant, & uelut fontem unde proficiantur, no-  
mina ipsa declarant, & quasi tacitus generis huma-  
ni consensus. Sunt enim motus alij naturales, hos e-  
dit naturæ uis ac potestas. Sunt uoluntarij quidam,  
qui & humani nuncupantur: hos homo, seu quæ in  
eo pars est potissima, uoluntas. Illos ergo facultas na-  
turæ ad finem peragit, hos facultas hominis seu uo-  
luntatis. Cuius potestatis munus est supremum in  
homine imperium, omnia in illo regere ac tempera-  
re. Summæ potestati adiuncta est mens, tanquam  
consultrix. Eius porrò qui consulit, nihil est tam  
proprium, quàm ea tenere ac nosse, de quibus solet  
consultari,



DE VER. FIDEI LIB. I. 3

consultari, alioqui nullo pacto recte consulet. Quare mens hæc cuius uoluntas consilio utitur, quæq; illam quid sequendum tenendumq; sit docet, quid contra fugiendum atq; aspernandum, nihil aliud est quam lux animi, in qua necesse est finis eius cui sumus conditi informatam atq; ingentam à Deo inesse notitiam & comprehensionem quandam. Nam si secus foret, parum magister hic atq; consultor sufficeret, querendusq; esset alius magis idoneus, qui nos de re adeo necessaria edoceret, quam unam nescire grauissima esset perniciēs ac pestis. Nec credi ullo modo licet, magistrum hunc qui uoluntati nostræ tanquam pædagogus sit appositus, mancum & destitutum ab ijs esse rebus, quæ nos scire prorsum oporteret. Nec absoluisset opus suum Deus artifex sapientissimus, cui non adiecisset à quo duceretur ad finem quem ignoraret. Nos quoq; ab scopo nostro defletere nullius esset culpa, nempe ab eo quod naturaliter nesciremus. Verum nos qua tandem conditione missi in uitam sumus, mutæ animantes facile declarant: quas omnes quum ad finem suum abunde instructas ornatasq; uideamus, nimirum necesse est copiosius esse homini collatam facultatem metæ suæ pertingendæ. Maior est utique finis hominis, & potior, quam rerum cæterarum, quanto scilicet excellentior is quam reliqua omnia. quapropter si



fini suo consequendo parum res alia fictæ essent idoneæ, leuis fortasse foret iactura: grauissima autem, si homo tum in uniuersitatis ratione, cuius princeps conditus esset optima & præcipua sui parte mancus, tum in diuino opificio, cuius sapientia notā reciperet, & in ea desideraretur aliquid. Si reliqua igitur uires ad destinatam sibi causam sunt sortita, quæ sunt creata hominis gratia, nimirum homo ipse omnium caput, princeps, causa, maiorem ut sit facultatem nactus necessum est, ne frustra sit conditus, & cum aliqua sui authoris (quod absit) querela. An in ijs quæ ad tuendum corpus, uitamq; hanc temporariam propagandam pertinent, tantam curā diligentiamq; Deus adhibuit, tot stirpes, animantes, fructus edidit certo ac statuto tempore, in ijs quæ immortalitatem nobis pariunt, fuerit parcior, & non plenius nos copiosiusq; instruxerit? Itaq; cum de Deo omnia par sit credi, imò pro certo ac comperto haberi summa optima perfectissima: etiam pro comperto exploratoq; est habendum, hominem cæteris rebus quæ constant corpore potiolem, potiore ac præstabiliore conditione esse præditum, ut uoluntati propensio sui finis sit indita, & menti doctrici ac consultrici uoluntatis informata cognitio illius ipsius finis. quæ cognitio augetur & profert se usu, experimentis, doctrina, consideratione mundi

DE VER. FIDEI LIB. I. 7

di huius, et reputatione eorum quæ sunt in homine, quæq; extra. nec aliter indita illa cognitio per hæc adolescit & prodit foras. quàm semen à solo & cælo adiutum herbas, flores, fructus producit. Nec uelim mihi de nomine moueri controuersiam, siue ingenta comprehensio nominetur. siue semē, siue lux, seu facultas, seu naturalis pronitas, qualis est in ingenio ad manifestissimam, quæ etiam quum primū offeruntur, statim arripimus: ut totū esse dimidio maius: si ab æqualibus æqualia detrahantur, quæ restāt esse æqualia. illis enim ita pueri consentiūt, ut appareat informatam eos habere de illis ueritatibus notitiam: quodcunq; horum nominum placuerit, res tamen erit eadem. Apostolus Paulus quemadmodum seu semina illa nostrarum mentium augeant & prodeant, seu lux in animo quæ necessaria sunt monstret, seu facultas exerceatur, & actionem suam educat, docet scribens ad Romanos: Inuisibilia (inquit) Dei per ea quæ foras edita sint, conspici intellecta. idq; non à Mose usque, uel Abraamo, sed à prima mundi origine: nec illa tantum inuisibilia prima, & ceu exposita. uerum illa quoque intima, & tanquam in recessu de sempiterna ui numinis ac potentia, ut excusari nemo possit, deflectens à signo proposito. Vitiū enim peccamus non naturæ, sed uoluntatis, quæ uel relictis bonis monitis applicat se ad deterius, uel

8 IOAN. LOD. VIVIS

monitorem suum ducemq; aspernatur, aut negligit,  
nec curat exerceri in ijs quæ est docturus, ne per ig-  
norantiam aberrans à uia in præcipitia & exitium  
certum ducat. quorum uitiorum hoc est ignorantia,  
illud uerò alterum prauitatis, ut monitori suo non  
obtemperet. Cæterum neque ignorantia purgat fla-  
gitium, quæ desidia tua, uel alienatione ad res leues,  
inanes, superuacaneas contracta est: nō magis quàm  
si in leges humanas deliqueris, quas per socordiam  
ac segnitiam ignores. Hæc enim mentis sacula, quam  
Dei munere accepimus, uel ocio languescit, uel cum  
ad res uiles cuncta conuertitur, obtenebrescit, nec  
metam ostendit, nec uiam qua ad illam itur: & se-  
men malignitate soli, aut quia sentibus, uel quia lapi-  
dibus obruitur, præfocatur. Vnde praua & perni-  
ciosa consuetudo inuadit animum, non assurgendi  
ad contemplanda necessaria, sed superflua modò &  
nihil profutura. Quòd si mens negligentia uel uitij  
obducatur, & tanquam syluescat, præcluditur adi-  
tus luci: iam non in auium transferunt nos tenebræ,  
sed in contrarium prorsum, & planè in exitium.  
Animaduertere est errores, & quàm perniciosi exi-  
stant quotidie in hominum uita, quum ceca mens  
ducit cecam uoluntatem.

QVANTVM

DE VER. FIDEI LIB. I. 9  
Q V A N T V M E S T D O -  
cere finem.

**Q**Uod olim magni illi uiri reputantes, qui Dei beneficio maiorem adepti sunt uim illam, facultatemq; mentis, de qua modò loquebar, quàm alij, eamq; ipsi usu & exercitatione expoliuerunt auxeruntq;, aggregi sunt densissimam hanc solum repurgare, & luci præbere aditum, quo tandem homo aspiceret quid esset, qua gratia missus in uitam, quò illi & quà contendendum. Hoc opere nullum duxerunt pulchrius se aut præclarius posse efficere, nec quo amplius aut uberius demererentur sibi uniuersam hominū gentē. Nec fallebantur indubiè, nam quid est in quaque re maius aut pluris faciendum, quàm usum illius monstrare, & qua causâ sit parata? Homo enim, si quamobrem positus sit in uita nesciat, neu quò eundum sit sibi, an non frustra uidebitur procreatus? Meritoq; consensu omnium laudatur Socrates Atheniensis, qui primus philosophiam in cœlis atq; elementis naturæ immersam ac errantem deuocarit in terram ad inquisitionem uirtutis, & in ciuitates domosq; introduxerit ad usum hominum, & ut quisq; qua tandem causa esset conditus scrutaretur. Non ille philosophiam detraxerat è cœlo, si modò ueram germanamq; uirtutem tradidisset, sed potius uagantem ac uolantem temerè, magnasq;

A S



monitorem suum ducemq; aspernatur, aut negligit,  
 nec curat exerceri in ijs quæ est docturus, ne per ig-  
 norantiam aberrans à uia in præcipitia & exitium  
 certum ducat. quorum uitiorum hoc est ignorantia,  
 illud uerò alterum prauitatis, ut monitori suo non  
 obtemperet. Cæterum neque ignorantia purgat fla-  
 gitium, quæ desidia tua, uel alienatione ad res leues,  
 inanes, superuacaneas contracta est: nō magis quàm  
 si in leges humanas deliqueris, quas per socordiam  
 ac segnitiam ignores. Hæc enim mentis fâcula, quam  
 Dei munere accepimus, uel ocio languescit, uel cum  
 ad res uiles cuncta conuertitur, obtenebrescit, nec  
 metam ostendit, nec uiam qua ad illam itur: & se-  
 men malignitate soli, aut quia sentibus, uel quia lapi-  
 dibus obruitur, præfocatur. Vnde praua & perni-  
 ciosa consuetudo inuadit animum, non assurgendi  
 ad contemplanda necessaria, sed superflua modò &  
 nihil profutura. Quòd si mens negligentia uel uitijs  
 obducatur, & tanquam syluescat, præcluditur adi-  
 tus luci: iam non in auium transferunt nos tenebræ,  
 sed in contrarium prorsum, & planè in exitium.  
 Animaduertere est errores, & quàm perniciosi exi-  
 stant quotidie in hominum uita, quum cæca mens  
 ducit cæcam uoluntatem.

QVANTVM



DE VER. FIDEI LIB. I. 9  
Q V A N T V M E S T D O -  
cere finem.

**Q**Uod olim magni illi uiri reputantes, qui Dei beneficio maiorem adepti sunt uim illam, facultatemq; mentis, de qua modò loquebar, quàm alij, eamq; ipsi usu & exercitatione expoliuerunt auxeruntq; aggressi sunt densissimam hanc syluam repurgare, & luci præbere aditum, quo tandem homo aspiceret quid esset, qua gratia missus in uitam, quò illi & quà contendendum. Hoc opere nullum duxerunt pulchrius se aut præclarius posse efficere, nec quo amplius aut uberius demererentur sibi uniuersam hominū gentē. Nec fallebantur indubiè. nam quid est in quaque re maius aut pluris faciendum, quàm usum illius monstrare, & qua caussa sit parata? Homo enim, si quamobrem positus sit in uita nesciat, neu quò eundum sit sibi, an non frustra uidebitur procreatus? Meritoq; consensu omnium laudatur Socrates Atheniensis, qui primus philosophiam in cœlis atq; elementis naturæ immersam ac errantem deuocarit in terram ad inquisitionem uirtutis, & in ciuitates domosq; introduxerit ad usum hominum, & ut quisq; qua tandem causa esset conditus scrutaretur. Non ille philosophiam detraxerat è cœlo, si modò ueram germanamq; uirtutem tradidisset, sed potius uagantem ac uolantem temerè, ma-

A S gnasq;

gnasq; ambages nequicquam susipientem in coelum  
retulerat, ut eam ibi homines quererent, quò essent  
per illam reuersuri. Neque enim tributa est hominib-  
us diuino munere uis ueri intelligendi ac inquiren-  
di, ut in scrutatione rerum infructuosa consumatur,  
sed ut nos in coelum reuehat, hoc est ad nostram ori-  
ginem. Hinc factum est, ut caput & cardo uniuersæ  
philosophiæ existimetur sententia de finibus bono-  
rum & malorum: qui ea discreparent, tota secta iu-  
dicarentur diuersi. Illa erat ceu nota, qua nationes  
inter se philosophorum distinguerentur ac dignosce-  
rentur: idq; optimo iure. quippe si philosophia lex  
est uitæ ac ratio, necesse est eam esse uiam qua ad me-  
tam peruenitur: ubi diuersæ ac contrariæ proposi-  
tæ sunt metæ, non potest uia esse unica. Exculpsērūt  
isti non pauca ad quæ peruenisse eos facile qui uis no-  
strum admiretur: quoniam naturalem lucem uel na-  
cti sunt maiorem, uel repurgarunt atq; exercuerunt  
diligentius. Sed in plerisq; hallucinati sunt & lapsi,  
& in ijs propter quæ uicissim mirandum sit, autho-  
res atq; inuentores rerum maximarum & pulcher-  
rimarum non uidisse ea, quæ ex illis ipsis sequeban-  
tur quæ iam inuenissent, ita ut uocem ipsi suam non  
exaudisse uideantur. & casu potius incidisse in ue-  
rum, quàm ingenij solertia eò peruenisse. Sed falsa  
est humana infirmitas, partim tarditate cordis ac  
torpore,

DE VER. FIDEI LIB. I. II

torpore, partim inscitia atque inexcitatione, tum ab alijs prauè instituta, uelut à parentibus, educatoribus, magistris ipsis humanitatis, & formatoribus animorum, à consuetudine publica, & receptis uulgo opinionibus, quas perdifficile est in totum reijcere, ubi semel inhæserunt. Accessit his quoq; contradicendi studium, & proferendi nomen, ut & ipsi in inuentoribus haberentur. Fuerunt qui ex uotis ac desiderijs suis opinationes & disciplinam confingeret, ut homines facinoribus, sceleribus, flagitijs mancipati, nolent esse Deum ullum uindictæ malefactorum, ex quo affectu per uitiorum illecebras eò delabuntur, ut nec credant esse. Tot machinis impugnata atque impetita humana imbecillitas ruit: sed casu uel ignoscendo, uel certè miserando. Hinc diffusum sapientiæ studium in tot disciplinas & philosophias, atque adeò in tot sapientias, nam unaquæque gens illorum & factio apud se unos sapientiam esse clamat & contendit: unde tot rixæ inter illos & digladiatio, atque ex omni parte rationes acuminæ ingeniorum exculptæ: magnam ueri speciem præseferentes, quæ oculis mentis præstigias facerent, & tenebras humani ingenij condensarēt, incertioresq; studiosos ueritatis domum ab schola remitterent, quam acceperant. Nam ingenij uis tota dum in hoc solum incumbit, ut malum esse bonum, falsum esse

uerum

nerum euincat, excudat aliquid necesse est, quo id  
 nonnullis uideatur perfecisse. In his cæcæ ignoran-  
 tiæ fluctibus multum & diu est iactatum humanum  
 genus, donec Deus dignatus est nos respicere, &  
 ueritatis suæ lucem puriorem humanis oculis pa-  
 tesfacere. Abrahæ primum, propter magnitudinem  
 & constantiam fiduciæ: tum illius stirpi, per Isaac  
 & Iacob: procedente autem tempore posteris Iaa-  
 cob ualde aucto in Aegypto, data per Moysen lege,  
 sed id paucis. illi enim quota humanæ gentis erat  
 portio? Postremò autem aperuit thesauros bonita-  
 tis suæ, quos uniuerfis hominum nationibus propo-  
 neret, misso in terras filio suo Iesu Christo, quæ est  
 ipsius ueritas & sapientia. Hunc humanitate nostra  
 uestitum, dedit nobis magistrum & ducem uia, ex-  
 emplum uitæ, expiatorem scelerum, interpretem pa-  
 cis, authorem salutis. Sed impij ad tam latum & sa-  
 lutarem nuncium obturant aures, & quod illis si-  
 cut & alijs omnibus fuerat maximè optabile, uo-  
 tisq; omnibus expetendum, reijciunt, & bonitatem  
 ac miserationes Domini repudiant, quibus tantope-  
 re indigent: atque ex seipsis metiuntur Deum, ut  
 quia ipsi sunt & immites, & inuidi, & mali, non  
 alium esse Deum credant. Hi ex uia recta, quæ uni-  
 ca est omnino ac simplex, in auia recesserunt: quo-  
 rum iniri numerus non potest. Fecit enim sibi unus-  
 quisque



DE VER. FIDEI LIB. I. 13

quisque uiam qua ingrederetur, relictoq; duce Deo. ducem seipsum sibi constituit: neque uerò meliorē sui partem, nempe mentem puram purgatamq; . sed prauas animi cupiditates, uel rationes turbulentas ac infirmas.

RATIONIBVS AGENDVM.

**M**edclam quam Deus humano generi saucio attulit, literis consignarunt sancti uiri, dicente spiritu Dei: eaq; demum uera sunt oracula coelestia. Sed neque huic rei fidem habent impij, qui eas literas ut alias quaslibet inuentum esse hominum suspicantur, ad quos parum proficiunt sacra dicta. Et tamen dandum est operam, ut hi quoque ad intuendam ueritatem, quoad eius fieri possit, adducantur: ut ministri simus Dei, qui uult omnes homines uenire ad agnoscendam ueritatē, nempe seipsam. Nihil ergo restat aliud, nisi ut qui ad nouā hanc lucem claudunt oculos, utantur uetere illa & prima, quam homo ingratus naturalem & suam uocat, quasi non etiam à Deo acceperit, sicut hanc alterā, sed quia facultatem eius ab utero secum educit, communisq; est omnibus, non agnoscit authorem illius: ut non frustra uideantur admonere nos sententiae ueteres, Beneficium in puerum non collocandum, non enim meminerit. & altera: Qui uniuersis beneficiat, à nemine reportare gratiam. Sed supersedeamus



mus nunc de impiorum loqui ingratitude: neque enim hic est locus. Naturali ergo luce uerum indagabimus, quando hæc sola inter nos & repugnantes relicta est, tanquã uia qua insistamus ad aliquã uestigationem ueritatis. Cæterum priusquam id agredimur, respondendum est quibusdam piorum hominum, qui nefas esse ducunt rationes adhiberi fidei, aut fidem rationibus confirmari. & adducunt illud sermone uulgi protritum. Fides non habet meritum, ubi humana ratio præbet experimendum. Quod quemadmodum intelligatur, permagni refert, neque enim in totum uel recte dicunt, uel à recto discedunt. Ante omnia constet nobis quid sit ratio, quid fidem rationibus fulciri, à quibus & quatenus. Ratio, ut alibi alio modo exponatur quid sit, in præsentia sic commodissimè declarabitur, ad hoc utique institutum. Ea est uelut radius quidam, quem Deus de fonte illo perenni suæ lucis in humanam mentem deriuauit, de quo Ioannes dicit in Euangelio, quod illuminat omnem hominem uenientem in hunc mundum. Est ergo nostra ratio ueluti riuulus è fonte Dei, quo is amplior ex fonte manat, eo decurrit plenior: quo est propior, eo purior: ut quum malignus fluit & cœnosus, euidentissimum signum sit longè à fonte suo discedere, parumq; ui suppeditari ex sancto illo humore. Ita quo ratio est apertior

tior & dilucidior, hoc propinquiorem & conformiorem origini suæ Deo esse manifestum est: quo minor & obscurior, tanto longius discedere, ac proinde dissimiliorem fieri. Quod si propinquior sit, melius ac facilius cernet diuina, quæq; sunt uera de Deo. Experimentum huius rei non est procul petendum. docti enim homines multo plus de rebus diuinis assequuntur, quàm uulgus. Nec potest uerum ullum à ratione esse alienum, quod est conforme Deo, fonti rationis: imò ab eodẽ fonte uerũ & ratio scaturiunt, idemq; Deus lux est & rationis & ueritatis, ut quum ipse contrarius sibi metipsi non possit esse, nec unquam uera ratio quantacunque hominum aut demonum calliditate atque astutia peruertatur, atque obscuretur, ueritati potest repugnare. mutuo se potius adiuuantes fulciunt, ut per rationem facile perueniatur ad ueritatem. per hanc autem purgetur ratio. Illud nemo ignorat, quæ sint de Deo uera, innumera esse & amplissima: ingenij autem nostri captum angustum, in quod cœlestis illa infusa est rationis lux ad eius mensuram. ita fit, ut in nostra mente non possit esse eadem ueri ac rationis mensura. Maior est ueritas rerum, quàm nostra ratio: sed non quod rationem nostram superat, protinus est & contrarium, inimicum, repugnans. Multo est aliud superari, quàm aduersari. Quocirca  
que

quæ contra pietatem nostram finguntur rationes,  
 uel uanæ sunt prorsum, et primo ipso aspectu deri-  
 diculæ et contemnendæ, uel dolosa aliqua et frau-  
 dulenta specie contextæ atque inuolutæ. Porro Dei  
 mysteria quantum quidem ad captum nostrum at-  
 tinet, duorum sunt generum. Altera ad nostram sa-  
 lutem pertinent, hoc est, illorum cognitio necessa-  
 ria est huic conficiundo itineri, quod ad felicitatem  
 nostram ducit: altera sunt arcana, recondita, quo-  
 rum intelligentia non est nobis necessaria. Ita su-  
 mus à Deo indulgenter tractati, etiam postquam  
 ab illo discessimus, meriti pœnas et supplicia gra-  
 uissima, ut ad minimè necessaria minimum quoque  
 lucis acceperimus: contra ad ea quæ nobis nosse ex-  
 pediebat, plurimum. haud aliter quàm utilissima no-  
 bis in natura in promptu sunt cunctis, cœlum, aër,  
 aqua, fruges, animantes cicures, aditus est cui-  
 libet ad illa non operosus: superuacua uerò seposuit  
 Deus longissimè, raras aues, pisces exquisitos, feras,  
 purpuram, gemmas, metalla. De abstrusis illis my-  
 sterijs dicitur, Altiora tene quæsieris, et fortiora te-  
 ne fueris scrutatus. tum illud, Scrutator maiestatis  
 opprimetur à gloria. et Paulus iubet non plus sape-  
 re, quàm oportet sapere. De necessarijs uerò est a-  
 pud eundem Apostolum: Quod notum est Dei, ma-  
 nifestum est illis, Deus enim illos edocuit. Operæ-  
 precium

DE VER. FIDEI LIB. I. 17

precium est animaduvertere, cuiusmodi à Platone, Aristotele, Cicerone, Seneca sunt scriptis prodita, quæ in tenebris illis reperta admirari satis non possumus. nimirum sapientia Dei, quæ est eius ratio & filius, illuminat omnem hominem uenientem in hunc mundum. Iam de ratione non est definiendum simpliciter. Homo enim quum è manibus egre dederetur sui opificis, pulcherrimus erat, instructus, ornatusq; ijs rebus omnibus quibus esset opus ad uitam, nimirum ut tanto authore dignum erat: mentem illius incredibilis fulgor lucis opplebat, quæ illi monstrabat quicquid expediret. At ubi separans se à Deo lapsus est in hanc calamitatem, obscurata est lux illa, cæcitas & caligo menti obducta, ut nec uera nec utilia satis perspiciat: & si quando intueatur, confestim oborta nubes uel affectuum, uel ignorantiae, uel incōsiderationis densissima, conspectum omnem adimit. Quocirca rationes de pietate tanto pere sibi necessarias, iam ex se non inuenit, aut inuentas per tenebras animi non intelligit, aut omnino aspernatur, carne obruta, aut motibus animi cōcussa & afflicta. interdum quoque ab affectu & tarditate cordis prauissimis consultoribus transuersa impellitur, ut facilius adhæreat & assentiatur ijs quæ stant pro malo contra bonum, sicut quæ pro falso contra uerum. Ex qua mentis caligatione non

B iniuria



iniuria dixit Aristoteles, multa falsa multis ueris esse probabiliora. Sed non protinus ratio est illa, quæ armata est contra uerum & pium, quod à mente nostra proficiscitur, & rationis specie quadam contingitur, sed rationis inane simulachrum: nec riuus ex diuino fonte, sed aqua coenosa ex lacunis dimanans nostræ cæcitatæ. Nam quemadmodum oculis corporis usu uenit, ut magnum lucis splendorem intueri non sustineant, caligentq; , & tenebris inuoluantur: ita oculis mentis in fulgore ueritatis. nec tamē desinit esse lux, quia oculus in eam nequit intueri, aut tenebræ fiunt, quia oculis ita uidetur: ita nec ueritas aut perit, quod eam humana mens non assequitur, aut fit falsitas, quia menti uideatur. Missus est ad nos cœlitus Christus Iesus magister ueritatis, repurgator tanti cœni, corrector prauitatis, instaurator naturæ lapsæ, qui hominem puritati illi atq; innocentie primæ in sentiendo & sapiendo restitueret. Depulit ergo è mentibus suorum ignorantiam & caliginem, quam inuexerat peccatum, & restituit ueros illos atque integros sensus naturæ synceræ atque incorruptæ. Ergo apertis semel à Christo thesauris ueritatis, eæ deinceps rationes ab ijs qui doctrinæ illi cœlesti paruerunt, sunt de pietate inuentæ tam liquidæ, tã apertæ, ualidæ, efficaces, inexpugnabiles, ut miremur nō incurrisse illas in oculos  
eorum,



eorum, qui inter gētes sapientiā profitebantur. Sed nimirum lux addita est rebus à Christo, quam ille cœlitus ad nos detulit, quæ lux illis deerat: quæ si affulisset, maiora & pulchriora indubiè quàm nos excogitassent, ut erat illorum in disciplina omni tū solertia, tum studium ardentius. quod ex ijs licet colligere, quæ sine hac luce inuenerunt. Adhibita enim rebus luce, facile est quid quæq; res, et cuiusmodi sit dicere, & pro ijs quæ dixeris argumenta congerere. Parit, sicuti paulò antea dicebam, rationem cognita ueritas, & ueritatem confirmat adhibita ratio. Quòd si nihil est fide nostra uerius, quid rationes reformidamus? quarū nulla est cōtra nos, omnes stant à nobis. Rationis quidem umbra & imago pugnare quandoque in nos potest, ratio ipsa non potest, & illas umbras leui momento lux nostra dispellet. Aurea est pietas nostra, aurea, nō deaurata. quo magis scarificatur & retegitur, hoc pulchrior & præstantior existit. puriorem ac nitidiorem illam reddit bellum quàm pax aduersus gentes, aduersum hæreticos, qui scoria & rubigine conabantur eam obducere. puritatem excellentiæ suæ magis ostendit, quo est acrius agitata & concussa. Hæc est sapientia quam Dominus daturū se suis est pollicitus, cui artes, ingenia, calliditates, fraudes, atque astutiae omnes hominum non possent obsistere. Non est.

ergo nobis metuendum, ne pietas nostra detractis  
 uelamentis fœditatem ullam oculis contuentium o-  
 stendat. Metuant hoc aliæ religiones falsæ, atq; um-  
 bratiles, in quibus nihil est solidi, ideoq; attingi sese  
 non sinunt. Iudæus grauatur cum Christiano de le-  
 ge sua conferre. Mahumetes de secta sua disputari  
 omnino uetuit. ne attingatis uitrum tenuissimū, fal-  
 sum, inane, leuissimo contactu statim friatur. Nostra  
 religio intus etiam est quàm exterius formosior, soli-  
 dior, firmior. Accedat quiuis, tractet, agitet, scal-  
 pat, modò cum ingenio & iudicio: thesauros inue-  
 niet latentes sub specie egestatis, sapientiam in sim-  
 plicitate, diuinitatem in humanitate. quod & pla-  
 num fecerunt multi alij, & spero me Christo Domi-  
 no & magistro meo propicio, hisce libris patefa-  
 cturum.

Refert præterea non parum qui utantur hisce ra-  
 tionibus, & quemadmodum, ut sunt hominum inge-  
 nia & mentes diuersissima. Alij sunt segnes & tar-  
 di, alij imperiti, alij ratione infirma, alij uitæ nego-  
 ciji ( quæ plurima nos consinximus ) occupati, alij  
 pueri, senes, ægri, mulieres, inexpertes rerum: ij nec  
 inuenire rationes has de quibus iam dudum loqui-  
 mur, nec inuentas possunt intelligere, sed tanquam  
 in excelsis locis, ita in rebus tam sublimibus turban-  
 tur illorum oculi, & intuendo tam fulgentem solem  
 perstrim,

perstringitur eorum acies. quumq; multitudo ex  
 crassis hominibus, & ad usum rationis inexercita-  
 tis constet, ea de caussa sancti authores ab hac tan-  
 tarum rerum inquisitione illam arcuerunt: haud a-  
 liter quàm affectis oculis præcipiunt medici, ne sur-  
 gentem aut cadentē solem inconniuerter aspiciant,  
 ne uisus hallucinetur, et detrimentum accipiat. Nos  
 tamen non fiducia ingenij aut eruditionis huc addu-  
 xit, sed exercitationis tantum, quæ beneficio Dei  
 aliquoties tentata non infeliciter cessit. Simul ut ex-  
 perirer, an aliquam rei utilitatem præbere possem  
 hominibus iuuandis: & in hoc gratificarer Patri  
 illi cœlesti, cuius uoluntas est, ut omnes homines  
 ad sese ueniant. In ijs quoque qui rationibus huius-  
 modi utuntur, non parum est positum. Res enim op-  
 tima & saluberrima, si aliter sumas quàm oportet,  
 nocebit, atq; in contrarium uertet naturam & uim  
 cui est parata. Vel ex ipsis mysticis literis originem  
 errorum multi traxerunt. Sunt qui non minus ra-  
 tionem in abstrusis illis mysterijs, parumq; (ut di-  
 xi) ad nos pertinentibus requirant, quàm in ijs quæ  
 nosse ad pietatem spectat: imò uero in illis quæ no-  
 stra nō sunt, curiosius & subtilius scrutantur, quàm  
 in hæc quodammodo nostra, in quo non pauci no-  
 strorum theologorum culpa non carent. Sunt qui  
 parem in omnibus rationem efflagitent: quodq; in-

dignius est, non plus de religione credituri, quam ratio euicerit. & quod in disciplina earum rerum quæ sub sensus cadunt non facerent, exigunt in pietate, ut ratio sit fidei mensura. Quid, quòd eorum multi nō lucem & rationem diuinam ad diuina hæc uolunt adhiberi, sed humanam istam tot infectam & deprauatam sordibus, ut ea sit uelut fundamentum totius pietatis. Hinc nata est importunissima illa distinctio de lumine fidei, & lumine naturæ, ut quòd alia uera sint hoc lumine, falsa in illo: alia è contrario. quis hæc re & natura coniuncta discreuit, nisi homo aliquis impius & imperitus? An est in rebus una ueritas? Hanc si naturæ uiam ingressus non assequor, an protinus alia existet ueritas, quam naturæ lumen confinget? Age uerò quis est tanto ingenio, tanta eruditione & usu rerum, qui metas possit naturæ assignare, ut confirmare certo audeat non ulterius naturæ uiam se porrigere? Ridiculum est, in quo ingenium alicuius perscrutantis sistat, ibi ut naturam dicas etiam sistere, & imbecillitate humani ingenij transferre in uires naturæ: de qua dementia nihil satis dici potest pro indignitate. Quem porrò uolunt esse mensurā tantæ rei? Platonē. at is ab Aristoteleprehenditur. Aristotelem. at is Academicis & Stoicis non placet, & acriter re-darguitur. atque hæc omnia non in lumine fidei, ne  
quis



quis quid causificetur, sed in naturali, ut loquuntur. Sed redeamus ad alias causas percensendas. Ex disputationibus & contentionibus circularum schoolasticorum orta est pertinacia, & irritatio omnia scalpendi. progressi sunt quidam longissime, & ratiunculis sophisticis, uanis, inualidis, magnū pondus rebus grauisimis detraxerunt. Nostrum hoc institutum multo est aliud. nam de diuinis solum differemus mysterijs, quorum cognitione ac fide salus nostra continetur: tū ex luce quā Dominus noster attulit suis, cuius illustratione omnia redduntur perspicua & certissima. nec postulabimus ut canon & norma fidei sit nostra ratio, sed tantum introductio quedā exteris, & quibusdam nostrorum stabilimentum. Hoc uidemus iam inde ab ipsis Domini nostri temporibus in hunc usque diem actitatum. Christus ipse rationibus egit cum Iudæis, ad eis persuadenda quedam, quibus satis non erat tanta rerum admirabilium multitudo & uarietas: uelut se esse Christum filium Dei, maiorem Dauide rege: inimicum demonibus, amicum Deo. Petrus Apostolorum princeps paratos nos uult agere, ut possimus de spe ac fiducia nostra rationem reddere, & quidem omni poscenti. Paulus grande columē Ecclesiæ non in humanæ sapientiæ uerbis ad persuadendum idoneis fuisse prædicationem suam ait, sed in spiritu Dei & uirtu-



te. Planè ita congruebat fieri, ut lux quæ ad intuen-  
dam fidei ueritatem adhibebatur, non ex rhetorum  
pigmentis & coloribus, non ex humana illa sapien-  
tia cæno & fimo uiciorum corrupta desumeretur,  
sed ex uirtute & spiritu Dei, quæ est doctrina Chri-  
sti Iesu. de qua subdit: Sapientiam autem loquimur  
inter perfectos. sapientiam autem non huius seculi,  
quæ perit: sed loquimur Dei sapientiam, mysterio  
inclusam & reconditam. Ex hac schola haustis ra-  
tionibus agebat cum Iudæis & gentibus, euincens  
Iesum esse Christum Domini, & alia quæ sunt pieta-  
tis: quod est in eius Epistolis uidere. Timotheo præ-  
cipit, ut episcopus potens sit doctrina sana, & eos  
qui contradicant refellere. Equidem non ignoro pau-  
cissimis, & penè nullis rationibus nobis fore opus,  
si Dominus dignaretur nobis eas uires in sermone  
dare, quas per spiritum suum dedit suis Apostolis,  
& ijs qui ab Apostolis erant edocti. Quàm plana,  
quàm simplicia erant illa quæ à primis Ecclesiæ pro-  
ceribus fuerunt tradita: at quàm efficacia ad per-  
suadendum, quod effectus demonstrauit. Nimirum  
ineratim illorum uita & uerbis uigor spiritus diui-  
ni, addebantur quæ naturæ uim superarent prodi-  
gia. ea erant ualidiora quàm innumera rationes. Po-  
steriores autem, quibus diuina illa facultas defuit,  
quia eorum uita ab Apostolica & martyrum dege-  
neraue-

nerauerat, coacti sunt plures coaceruare rationes, & pro fulcimen-  
to uitæ ac miraculorum quo desti-  
tuebamur, ingenij vires atque exercitationem sub-  
stituere, quo in numero fuerunt Tertullianus, Ire-  
næus, Iustinus, Origenes, Anastasius, Chrysosto-  
mus, Gregorij, Basilij, Eusebii, Lactantius, Hie-  
ronymus, Augustinus, Cyrillus, Thomas Aquinas.  
Hinc recentiorum theologorum cœtus & scholæ  
omnes, quorū nos & sequemur exemplum, et tuebi-  
mur nos auctoritate contra istos uel immodicè at-  
que interdum quoque imprudenter pios, & in pie-  
tate meticulosos, uel malitiose aut arroganter deter-  
rentes alios, quorum pars ita de se sentiunt magni-  
ficè, ut credant quò ipsi non penetrarint, inuia esse  
reliquis omnibus, pars nollent ab alijs proferri in lu-  
cem, quæ ipsos latuissent, hi uerò ignominiam suam  
interpretantur, Dei erga alios beneficium. Sed quis  
possit tandem dubitare, quo minus inter eas quæ hu-  
manæ facultates viresq; nominantur, ad ducendos  
homines in eam quam uelis sententiam, maximum  
robur habeat ratio? quæ sola flectit humanam men-  
tem, liberam alijs uiribus omnibus, atque inuictam,  
quæcunque admoueantur. Quid, quòd aliquot in-  
terdum locis & temporibus, & apud nonnullos ho-  
minum efficacior est quoque quàm fides prodigio-  
rum? Hæc enim in controuersiam uocari aliquan-

do possunt, atq; etiam in calumniam: ratio in oculos atq; in ipsum animum ut lux se ingerit, omnia per-  
 uadit ac uincit, modò ne quis uenientem excludat,  
 et uelut oculos claudat ad splendorem. Ergo sicut  
 facultas uegetabilis ad sensus est uia, hi uero uelut  
 gradum substernunt quo ascendamus ad mentem:  
 ita humana hæc & naturalis ratio manum præbe-  
 bit exteris, ut ad diuinam lucem cõtuendam sese eri-  
 gant & confirmentur: ut postquam potentia & bo-  
 nitas Dei ostensæ illis & percognitæ fuerint, ad il-  
 lum solum suspiciant, omnia incipiant de illo crede-  
 re, ac bene sperare optima, pulcherrima, salutifera,  
 perfectæ. Stirpis uitæ succedit in nobis brutalis, post  
 hanc humana: humane adiungetur hæc diuina. finis  
 unius, initium est sequentis: quæ ita se contingunt,  
 ut unū prorsum esse uideatur extrema. Humanā ra-  
 tionē quid appellē, ex superiorib. liquere potest: eā  
 quæ homini relicta est post casum miserabilē. Qua  
 propter necessariæ sunt rationes ingressuris, sicut  
 ingressis superuacaneæ, si modò uerè ac bona fide  
 introierunt: quemadmodū alibi docebo. Tametsi  
 rationes sobrias, & magno iudicio expensas, arbi-  
 tror multis etiam Christum professis bona fide non  
 fore inutiles, & ad corroborandos imbecilles, &  
 ad delectandos firmiores. Libenter enim intelli-  
 gimus quæ credimus, & fortius assentimur. Le-  
 gantur

gaur modò piè ac prudenter, sine curiositate ac scrupulis, non ut his censeamus uel confirmari fidem, uel crescere, sed aperiri ac declarari. Vtinam orbis uniuersus uerè cognosceret atque intelligeret Deum, & Dei sapientiam ac bonitatem Christum Iesum, nihil esset alijs opus rationibus atque argumentis quàm quod ipse dixit. Sed immensus hominum numerus filium Dei & salutem suam partim non nescit, partim non agnoscit: qui sunt extra Ecclesiam. In ipsa quoque Ecclesia quàm multi infirmi et nutantes, partim hoc ipsi nō dissimulāt, partim (quod magis est dolendū) etiā profitētur. alij sic se gerūt in uita, ut aliter appareat eos sentire, quàm loquantur: nec ea uideamur scribē habere persuasa, quæ de bonis malisq; eternitatis sancta docet religio. Itaq; uidetur mihi in pietate uicij hominum inualescentibus illud usu euenire inter eos qui Christo dedimus nomina, quod in speciosa quidem et scitè depicta tabula, sed tamē peruetusta, quæ lucē illā et nitorē coloris primi sensim amisit, locisq; aliquot est subdeleta. quæ si non est pingenda denuò, est certè et puluere ac situ deterso illustranda, et quod interlitū est, instaurandū. Multū obscuritatis et caliginis induxit prauorū morū diuturnitate cōsuetudo radicata, cōsensusq; multitudinis in scelera tam pertinax & obstinatus, tum negligentia

atq;



atque imperitia doctorum Ecclesie, omissa uera ac germane religionis cura inuenta superstitiones plus quam aniles. Iam dissensiones & cum hereticis, & inter nos ipsos plurimis de rebus, dici non potest quantum in animis nostris attulerunt detrimenti. Postremo authoritas Ecclesie diminuta. & uerbum Dei alias neglectum, alias etiam suspectum, turpissimo initiatorum exemplo, ut oratio eorum caret fide, quorum esset uita exosa, grauem nostris peccatoribus plagam inflixit. Renouanda est fides, hoc est corroboratio ueritatis illius producenda atque ostendenda, ut hoc tanquam nouo nitore uetus color resplendescat: nec solis iam diuinis oraculis standum, ut olim quum firmissima esset, altasque in mentibus sanctorum hominum radices egisset. Expendat hoc quisque in seipso, & ijs quibus cum uersatur. intelliget non me frustra admonere, negociumque maioris esse quam pro hominum opinione momenti. Equidem aggredi me arduum opus, & longe uiribus meis impar non ignoro: sed indicibilis tantae rei fructus ingentes animo meo facies subdit, cogitque bene sperare de Domino Iesu, qui adesse huiusmodi conatibus consuevit propitius & dexter, sine cuius ope nos omnino nihil possumus, imò nihil sumus. Itaque iam nunc operis initio doctorem illum diuinae sapientiae, hoc est suipsius, imploro & obsecro, uti lucem



DE VER. FIDEI LIB. I. 29

lucem illam suam dignetur admouere propius, tum mihi ad ea quæ conducant inuenienda & tradenda, tum lectoribus ad eadem ipsa intelligenda, ut ego & illi conseniamus ueritati. & sancta fides ita in nostris cordibus stabiliatur. ut artes omnes impetusq; hostis nostri ad eam siue reuellendam, siue etiam commouendam, minimum habeant roboris ac uirium. Quod si fauorem hunc uel excludunt mea scelera, uel extrudunt, ego uerò nihilominus iam nunc initio profiteor, sententiam mutaturum me edocsum meliora. Ecclesiæ uero iudicio & sto & stabo semper, etiamsi mihi pro parte contraria aperitissima uideatur faceretur ratio. Ego enim falli possum, & fallor sepius: Ecclesia, in his rebus quæ ad summam pietatis pertinent, nunquam fallitur. Vos autem fratres qui hæc legitis, per immensam Christi beneuolentiam erga nos oro & obsecro, ut negotium fraternæ charitatis iniunctum nobis à Domino, reducendi aberrantes in uiam, purè ac simpliciter cum concordia mecum geratis, ne quis in personas respiciat, sed in rem ipsam tanti momenti. In alijs disputationibus de natura, de rebus gestis, de dicendi ratione, de cognitione literarum, contentiones & humani affectus tolerentur sanè: quia quod fit ex cōtrouersijs iacturæ leue est. in pietate deuitentur prorsum, quia perniciosissima.

QVALES

QVALES ERUNT NO-  
stræ rationes.

**A**Rgumenta omnia uel ex rei essentia petun-  
tur, uel ex adiunctis, quæ inherētia nomi-  
nantur, uulgò accidentia. Et quoniam mens nostra  
non ad omnium essentias æqualiter penetrat, neque  
accidētia planè ac liquido cognoscit, fit ut rationes  
de rebus omnibus non queant esse pares: quod quum  
est ab Aristotele traditum, tum facile res ipsa ani-  
maduertenti monstrat. Neque enim in scrutatione  
naturæ tam euidentes probationes afferūtur, quàm  
in mathematicis: nec in prima philosophia, quæ est  
de recōditis naturæ, ut in secunda, quæ de expositis  
sensui disputat. Sed in prima tamē philosophia for-  
tiores sunt probationes, quàm in disciplina morum.  
de qua meritò Aristoteles dicit, Satis abunde quæ illi fa-  
ctum, si rationes adducantur uerisimiles, atque in spe-  
ciem probabiles: nam perspicuæ atque inuincibiles  
non possunt. Ita in disputatione hac de pietate, erit  
quum argumenta inducemus euidentia, atque incon-  
futabilia, erit quum probabilibus tantum coniectu-  
ris debemus esse contenti. Nec quisquam adeò fue-  
rit uel impudens, uel excors, ut sensui subiecta uelit  
esse ea quæ de tantis arcanis traduntur, quod in nul-  
la omnino arte aut disciplina potest præstari. hoc  
sensit ille, qui noluit fidem habere humanæ rationis  
expe-

experimentū. hoc est sensuum euidentiā: & Paulus, res quæ per fidē sperentur, negauit sensibus appare-  
 re. Erunt autē in summa rationes omnes nostræ lon-  
 gè manifestiores ac fortiores, quàm quæ pro parte  
 contraria possent afferri, uel in maximè reconditis  
 & sublimibus mysterijs. quin etiam adeò erunt plu-  
 rimæ illarum probabiles ac inuictæ, ut nec tot, nec  
 adeò firmæ sint pleræque earum, quibus freti ma-  
 gni philosophi dogmata & principia scientiarum  
 immutabilia constituunt: quæ adeò censent natu-  
 raliter esse hominum ingenijs perspicua & certa,  
 ut hominis appellatione indignum cum ducant, qui  
 refragetur. Nec sunt pauca in pietate nostra adeò  
 congruentia cum hominis mente atq; ingenio, ut co-  
 gnita ilicò amplectatur, ut sola illarum expositio suf-  
 ficiat nuda & quasi inermis. Plurimos arbitror non  
 se nobis aggregare hac una de causa, quòd de fide no-  
 stra uel nihil prorsum audiuerunt, uel perparum. de  
 quibus Paulus ait: Quomodo credent ei de quo nō  
 audierunt? quomodo audient sine docente? Cæte-  
 rum boni ac ueri unica est uia, mali & falsi innume-  
 ræ, uidelicet quotquot ab illa unica aberrant. Quo-  
 circa nec uacabit mihi, nec operæ precium lectori fue-  
 rit, omnes omnium uel recensere opiniones, uel refel-  
 lere. Nam quæ cuiq; uenire possent in mentem, cura  
 re aut persequi infinitū est, & hominis nimium ocio

ac studio suo abutentis. Sunt enim quamplurima minuta profecto, & cura indigna: quæ ut ratione nulla fulciuntur, ita nullo in aduersum impellente argumento ipsa per se concidunt. cuius generis sunt quæ à nonnullis sine argumento ullo, sine probabilitate iaciuntur, in hunc modum, Fortasse ita est, fortasse secus, quis scit, quis nouit, fieri posset, nescio, suspicor. Quæ si in humanis ut temerè dicta exploduntur atque exhibantur, quanto magis in ijs quæ cœlitus tradita fulciuntur diuina authoritate, captumq; omnem excedunt humanum? Quare illa solum desumam mihi ad confutandum, quæ minimum sunt peruersa & corrupta, speciemq; rationis aliquam præse ferunt, tametsi fictæ & fallacis. Hinc, quæ ad multos recepta sunt, de quo genere sunt celebres sectæ, & hominum de colendo numine inuenta. Tum, quæ ad paucos, sed eos præstanteis, magnaq; de sapientia authoritatis: qualia sunt philosophorum placita. Neque persequar ex ijs nisi ea tantum, unde uidero iacturam religioni importari, uel ut frigeat, uel nutet, uel omnino cadat. Nam abolita iam, uel satis à maioribus explosa & profligata, ne attingam quidem: ut de Ioue, de Iunone, de Hercule, de Venere, de Marte, alijsq; huiusce notæ. Quis enim adeò nunc insanit, ut illos esse deos suos credat, quales nemo uelit habere liberos aut seruos? Et ad errorem illum conuin-



conuincendum satis sunt olim à sanctis uiris dicta multa, quum is adhuc hominum animos occuparet. Interdum quoque præteritis silentio aduersariorum opinionibus, pro nostris disputasse satis habuero, quippe corroboradis nostris quæ cum ueritate sunt coniuncta, ruent aliena quæ à ueritate discedunt. Nec possunt omnia commemorari sigillatim, nempe infinita. Veritate posita & constabilita, facile huius contraria cadent atq; euanescent. Et in negotio, quo uno uera & permansura continetur salus generis humani, nihil agā uasfrè ac astutè, nullo utar dolo aut captioso argumēto, nō asseuerabo nisi quæ sint mihi primum persuasissima: nec contendam ut ratio recipiatur ulla, nisi quæ prius mihi fuerit probabilissima. non aliter alijs consulam, quàm ut mihi prius consuluerim. Enimuero quid esset immanius alieniusq; ab omni humanitate, quàm fraudē ac fallaciam in eo struere, quod tantopere omnium interest sciri, & sine cuius notitia salui esse nullo modo possumus, imò miserrimi ut simus necesse est. nec illa inducam argumenta uel intricata & nimie subtilitatis, uel cauillosa & fucata, cuius generis excogitata sunt in circulis & disputationibus nostrorum hominum plura quàm deceret. Omnia erunt, ut spero, facilia & dilucida, quæ intelligi à quouis animaduertente queant, quantūq; à me utiq; præstari poterit,



rit, efficacia. Atq; utinam operis huius non nisi doctus atq; ingeniosus mihi lector coningeret. citius enim & promptius sperauerim me ab huiusmodi impetraturum argumentis meis assensionem & fidem. Cum imperitis et crassis hominibus plurimum mihi prospicio futurum negocij. uidelicet creduntur egrè quæ non satis intelliguntur. Quod si nec eruditione multum ualuerit lector, nec corde, at saltem ualeat diligentia: præbeat se attentum disputationi, in qua de salute agitur sempiterna. Et quandoquidem Deus in humanos animos de sua luce lucem deriuauit, etiamq; post naturæ casum tantum reliqui fecit nobis, quantum si conseruaretur et excoleretur, in uia nos profectò sisteret salutis, pro comperto à nobis ponetur, quod uniuerso hominū generi in commune iudicatur ita esse. Recte Cicero, De quo (inquit) omnium natura cōsentit, id uerum esse necesse est. Nam quemadmodum mutis animantib. concessi sunt à natura stimuli quidam, instinctusq; quibus ad utilia impellantur, retrahantur à noxijs: ita in hominum mentibus inditas atq; informatas esse notiones credibile est, quibus ad ea quæ sibi profutura sint, adducantur. Neq; enim peior est belluarum cōditio quàm nostra, etiam nunc post ruinam illam miserabilem. Quæ res efficit, ut iuxta Pauli sententiā excusari malicia hominum non possit.

fit: quæ nimirum esset excusabilis, si non ad ueritatem bonitatis instructi satis informatiq; essemus in uita, natura duce ac magistra. Quò suapte sponc leones omnes feruntur, id dicimus leonibus naturale: quò canes, canibus. eundemq; ad modum in cæteris. Quid ergo dici potest probabilius. quàm esse hominibus naturale, quò nutu suo omnes homines ferantur? Quod si est naturale, non ergo falsum. nam falsum nos inuenimus, natura nō indidit, caligo atq; hebetudo nostrorū ingeniorum illud peperit. Quæ ueritas humani generis in sententia de uniuersalibus intelligenda est. nam in singularib. falli potest. Communes enim illæ animorum conceptiones de generalibus sunt. Secundo loco uidetur posse poni, quod parti maximæ probatur, quod optimæ, quod sanctissimæ, id est ijs qui lucem animi uel constitutione suorum corporum hausierunt maiorem ac puriorem, uel ipsi deinceps studijs, doctrina, meditatione, experimentis, usu rerum probè ac diligenter annotato repurgarunt: quorum interdum utemur testimonijs ad nostra confirmanda, ut qui humanis tantū fidūt libētius et securius acquiescāt, quā rationē nostrā ijs uidebunt cōsentire. quæ naturæ sunt uiribus per excellētes uiros exculpta: et eo utemur crebrius. quo potiores rationes in suam illi sententiam attulerint, ut ratione sternus magis quàm homine,

ne eligere uideamur nostro arbitratu suffragatores: atq; ea de causa si manifesta ratio illorum dictis reclamauerit, corruptum illorum iudicium ostendemus. Quòd si humanæ sapientiæ sectatores inter se dissenserint, quod faciunt sæpius, & ratio à ueritate stabit, & nos secundum rationem pronunciabimus de causa. Aliquibus enim dissentientibus, ut uerum nullus eorum teneat quandoq; euenit, ut autē plures quàm unus teneat non euenit, quia uerū unicū est, falsum uariū & multiplex. Quæ porrò sensibus sunt obiecta, ea ratione non indigent, sed experimento, prouiso, quod doceri à philosophis solet, ut sensorium sit bene affectum, tum sensile ac medium ad sensationem congruentia. Postremò rationes eas in pietate debemus pro potioribus recipere, ad quas potiora & meliora consequuntur: eas autem reijcere, ad quas mala & damna. Nam ut de Deo optimo optima quæq; debemus cogitare ac sentire, ita credibilius est fieri ab eo semper quæ nobis sint utilia, quàm quæ damnoſa & noxia: & ut opus illius est natura & rerum ueritas, utriq; conformius est quod bonum sit & conducibile. Sunt in rebus diuinis penitissima quædam mysteria, ipsi soli Deo nec alteri cuiquam explorata. ad quorum rationem & causam humanā mens non assurgit: uelut de generatione filij, de processu spiritus sancti, quomodo mundus

mundus in hanc pulchritudinem & admirabilitatē  
 extitit ē nihilo, quomodo sustentatur, cur non pri-  
 us conditus, cur non post. tum in ijs quæ sub sensus  
 nostros ueniunt. Quī fit, ut grauiā deorsum, sursum  
 ferantur leuiā, non potius ē diuerso: tot cœli, tot si-  
 dera. non plura aliquot, neque pauciora? quamob-  
 rem homo sic editus, cur imbecillo corpore, & tot  
 rebus indigo, sollicitatus animi affectionibus & cō-  
 motus? & alia, quæ sunt Dei unius ingenium nostrū  
 excedunt. Sapienter Socrates, Quæ supra nos, nihil  
 ad nos: id est, quæ humana mens capere & inuesti-  
 gare nulla arte potest, prætermittamus. Hæc tamen  
 quæ rationem omnem excedunt, ea dicentis autho-  
 ritas, quum fuerit ostensa & confirmata, faciat cre-  
 dibilia. Quid, quod se penumero non succurrit ani-  
 mo ratio in ijs quæ altissima & supra omnem inge-  
 niorum aciem credebantur, postea offert se ultrò nō  
 quæ sita. Sed in his adeo occultis suffecerit & con-  
 trarios refellere, & dilucidè exponere nostra, quan-  
 tum quidem res ipsa patietur. Diuini consilij si quā  
 attulerimus nōnunquam coniecturam probabilem,  
 erit uelut gratuitum auctarium. Nam quum homi-  
 nes & angeli omnes, tum cœli ac mundi uniuersitas  
 opera simus Dei. non possumus per nos ipsos san-  
 ctum illud consilium assequi, quod creationem re-  
 rum anteceßit. eò enim ad res producendas addu-



etuse est Deus. Quæ uerò priora sunt re quaque, ea non potest res illa comprehendere, nisi doceatur ab eo qui ipsam præcesserit. Quapropter diuina illa intima non attingit suis facultatibus nostra mens, non modò hæc quæ nunc est uitijis deprauata, & oppressa densa caligine, sed nec illa purior, quæ principale scelus admisit. Si quid peculiarius à Deo traditur, id cum actione gratiarum accipimus, reliqua in occulto sunt nobis, Deo soli summo & præpotenti exposita & aperta. Mosi petenti diuinam ad contuendum faciem & maiestatem responsum est coelitus: Non uidebit me homo, & uiuet: posteriora mea uidebis, faciem autem meam uidere non poteris. Posteriora Domini, opera sunt illius, per quæ alij alijs sublimius aut demissius ad contemplationem illius quandam uelut per gradus ascendimus. Solem si rectà intueamur, caligabimus: sin obliqui illius utamur splendore, cernemus facile quæ cupimus, & ipsum eundem considerabimus sine offensa nostri. sic Deum nemo rectè intueatur, ne à fulgore ingenti amplitudinis & maiestatis opprimatur. Per res ab ipso conditas, in cognitionem illius quampiam non difficulter perducemur. Quæcunque enim ab authore fiunt aliquo, ad imaginem illius existunt, qui edit, siue ea sit corporalis similitudo, ut in gignente animali, in igni comburenti, & eiusmodi: siue inhercentium



hærentium corporis, ut quum quid ab alio calfit, aut refrigeratur: siue spiritalis ea sit imago, qualis est in pingente, in ædificante, & quæ sunt eius generis. Loquor de ijs quidem qui in operando non feruntur temerè, atque ut fors tulerit, uelut pueri & demètes: sed qui aliquid animo suo præstituerunt, quod sequantur & petant. non quòd domus animo sit architecti similis, sed ei formæ ac figuræ quam ille animo concepit, sibiq; uelut exemplar proposuit, ad quod externam structuram accommodaret. Quapropter quum nihil sit, quod sapientius quæcunque est collibitum instituat & peragat, quàm Deus, sit, ut nec finis certior sit cuiquam, nec magis destinata. idq; si ita est, omnia quæ ab illo exeunt, ut cogitatibus illius respondeant, & similia sint necesse est. At cogitatus illius non sicut in nobis inhærentia sunt, sed ipse idem. nihil enim est in illa sancta natura, nisi ipsa ead: in pura simplicissima, sui semper & ubiq; similis, nihilq; est in Deo nisi Deus. Illius ergo similia sunt omnia, expressius quidem aut dilutius alijs alia, sed certe quidem similia, et uerò. haud aliter quàm quæ imagines ab eodem sigillo & in cera, & in luto, & in membrana, & in argilla imprimuntur, & si non æquè perspicuè omnes, sigillum tamè uerò referunt. Licet ergo ex cõditis rebus conditorè aliquatenus cognoscere atq; intelligere,

ut patrem ex filio, corpus ex imagine, pictorem ex tabula, architectum ex domo. Et quæ de mundo hoc sumuntur ad Deum argumenta, eiusmodi sunt ad ueritatem Dei, quales rerum imagines sunt Dei, tenues certè ac obscuræ, sed tamen ueræ: tametsi turbatur crebrò mens nostra in hac collectione, dum uel non satis quod conueniat attendit, uel parum rectè iudicat de rebus creatis. Nam qui collecturus cogniturus quæ est per effecta causam, si in natura effecti fallatur, & in causa uti fallatur necesse est, quoniam prauum fundamentum posuit. Vnde tot errores de Deo, quòd in censendis illius operibus uehementer est erratum. ut quod cælum agat omnia, quòd fortuna multum dominetur, quòd non prospiciat Deus rebus humanis, & huiusmodi absurdissima: propterea quòd cæli & hominum & siderum naturas atq; ingenia non satis cognita haberent & explorata. Hæc Dei per opera ipsius intelligentia & consideratio augetur luce ad mota, & arte quæsitæ, uel acumine ac bonitate ingeniorum, uel doctrina & institutione, uel usu & experimentis, uel Deo ipso docente. His enim Dei muneribus maiores inueniuntur & efficaciores rationes, tametsi nunquam ad plenum & perfectum. Nam quis perfectionem cognitionis in tanto intervallo postulet, quæ non est in ijs quæ cernimus,

quæ

DE VER. FIDEI LIB. I. 41

quæq; manibus contrectamus & uoluimus? ausuri tamen spondere certiora fore quæ in hac disputatione afferemus, quàm quæ in omni philosophia asseuerantur: quæ philosophia non opinionibus se et coniecturis gloriatur niti, sed scientia & cognitione certissima & compertissima. Quod si furori existimatur proximum, pro falso & uano repudiare quicquid in disciplinis uel naturæ, uel rerum humanarum non assequimur, quanto erit in rebus diuinis furiosius? Nihil est quidem in fide nostra recôditum adeò et abstrusum mysterijs, pro quo non sint rationes magnæ, multæ, ualidissimæ: sed nos parem ad omnia lucem non accepimus.

Meminisse quoque lectores uelim, me & hominem esse, & unum hominem, nec omnia per me assequi, nec omnia quæ alijs Deus ostendit legi aut recordor: ne plus à me uel sperent uel exigant, quàm ab homine mediocris ingenij atq; institutionis: ne ue tantam tamq; indignam faciant iniuriam ueritati, ut illius uniuersæ unius ingenium uelint esse mensuram. Itaque fieri poterit, ut rationes aliquando inueniat lector in hoc opere non satis animi sui expectationi respondentes: non erit hoc pietatis uicium sed uel meum proprium, uel tenebrarum humanæ mentis.

fulciendæ compositioni conducant. tum quibus recuperetur sanitas amissa uel nutans, & dubia confirmetur, quibus singuli sensuum uoluptatibus & delicijs sibi congruentibus titillentur motu quodam suauis & iucundo. Hæc præbuit natura. Nos adiecimus nostra, primum pro teneritudine atque imbecillitate corporum necessaria, indumentum, habitacula, instrumenta exercendæ terræ, & quodammodo cogendæ, ut fructus fundat, ac ueluti debitor reddat creditum: tum quod uires nacti essemus per exiguas, addidimus nobis adiutores, socios, amicos, ministros, tum ex bellorum rabie seruos. & alioqui nati & compositi eramus à natura ad societatem, quod beneuolentia & sermo indicant. Iam ad procreationem sobolis stimulat nos natura, ut conseruetur genus. itaque uxores asciiuimus, unde nati liberi. ab uxoribus affinitates ortæ, à liberis consanguinitates & propinquitates, & charitatis mutue nexus. ex sociabilitate coetus & congregationes hominum concelebrati: unde pagi primum, inde oppida urbesq; extiterunt. non solum amore coniungente homines, sed interdum malis & necessitatibus, dum cogunt se in unum ij quorum alij alijs usui possint esse. Ex malitia & iniquitate hominum leges sunt ortæ, & ad legum æquitatisq; conseruationem magistratus cum potestate constituti ad comprimendā

auda-



DE VER. FIDEI LIB. I. 45

audaciam malorum. ad propulsandam uerò uim hostilem, & iniuriam externam arma inuenta sunt, & multitudo armata effecit bellum. Qui coctui & multitudini illi profuisset, honore afficiebatur, tum ad referendam ipsi gratiam, tum ad exemplum aliorum. Communicationi autem rerum à primo seruiebat commutatio, in cuius locum quum res esset uisa impedita & inexplicabilis, successit numus, qui omnia exequaret. Tum ut homo inter homines agebat ex naturali quadam Dei similitudine, quam nos deprauauimus, orta est cupiditas excellendi: sed excellentia degenerante ad res inanes ac falsas, dum corruptè de bono decernimus. alij enim bonum posuerunt, ac proinde præstantiam in forma, alij in robore, alij in animositate. fuerunt qui in rapinis & cede hominum, qui in lusionibus, qui in honestate generis, qui in nihil sapiendo, & uita belluarum proxima. alij etiam honorem captarunt, non in sua solum ciuitate, sed procul apud externos: non suo tantum æuo, sed ad posteros, quæ gloria nuncupatur. Signa honorum & excellentiæ excogitata permulta, in uerbis, in nutu, in gestu, in toto corpore, in loco, dum sedimus, dum assurgimus, ambulamus, transimus. In his omnibus immergit se & iudicandi prauitas, & cupiditas insatiabilis permiscuit omnia, cōfudit, torfit ad fines tum à natura ipsa, tum à recta inuentione



## CONSIDERATIO HOMINIS ET

*rerum humanarum ad inueniendum finem.*

**H**AEC praefati paulò fufius quæ in rem uehementer erat prædixiffe. aggrediamur iam difputationem ipsam Christo propitio. Ad hominis uerum germanumq; inueniendum finem, operæ precium fuerit, ut hominem ipsum, humanaq; omnia singulatim euoluta atq; explicata proponamus nobis ante oculos. Primum omnium nafci hominem uidemus, tum ali, & crescere, quod uiuere nuncupatur: hoc ei est cum stirpibus cōmune, diftinctū à non uiuentibus. Vis ergo & facultas est in eo aliqua, per quā uiuit, quæ ijs negata est quæ nō uiuunt. Ad hæc utitur sensibus externis & internis, in quo à belluis nihil differt, differt à stirpibus. Aliquis ergo in eo est uigor, cuius ope actionibus illis fungitur, qui nō inest plantis & herbis. Veniamus iam ad ipsius proprium. utitur consilio, ratione, iudicio, sermone, quæ belluis non sunt attributa, uti est à philosophis declaratum, & res ipsa ostendit. Aliquid ergo habet, quo carent reliquæ animantes: per quod animal est hoc rationale, cætera sunt bruta muta, & rationis expertia. Ea uis & facultas Mens dicitur, seu Ratio, qua una homo censetur, alijs omnibus non dissimilis rebus tanto ab homine interuallo separatis. saxis, arboribus,

boribus, belluis. Habet in mente functiones duas: alteram, qua in bonum tendit, uoluntatem: alteram, quam huius uelut consultricem esse nuper diximus, iudicium, siue ingenium, quæ quid uere & bonum & malum sit inquirat. Voluntas ex se qualitatem habet nullam, talis fit omnino quale id quod amplectitur: si bonum, bona: si malum, mala. Illic est uirtus, hic uitium. In ingenio succrescit, quum non exercetur, ignorantia, quæ est uelut tenebræ. quum autem probe exercetur, peritia, quæ est tamquam pura lux. quum autem prauè, peruersitas & corruptela, quæ est ceu lux quæ in lucerna ex oleo ardens medicato, uarias rerum imagines obijcit oculis, ut capita asinina, uitulina, uineam per parietem expansam, fallitque intuentes ea ipsa quæ uera deberet ostendere. In animo, quem communem fecimus cum bestiis, sunt sensus interni, imaginatio, phantasia, existimatio, memoria. hinc affectus uarij de opinione boni & mali, presentis ac uenturi, lætitia, moeror, cupiditas, metus, & alia quæ subtilius exequi non est loci huius. Iam in corpore sunt sensus interni, in illis integritas & uigor. tum integritas membrorum, sanitas, uires, robur, species, habitudo, & per sensus uoluptas infusa. Foris ad nos ueniunt quibus conseruetur corpus, ea ex quibus est concretum et coagmentatum. Sumimus enim ex terra, aqua, aëre, & igne, quæ huic tuendæ ac fulciendæ

fulciendæ compositioni conducant. tum quibus recuperetur sanitas amissa uel nutans, & dubia confirmetur, quibus singuli sensuum uoluptatibus & delicijs sibi congruentibus titillentur motu quodam suauis & iucundo. Hæc præbuit natura. Nos adiecimus nostra, primum pro teneritudine atque imbecillitate corporum necessaria, indumentum, habitacula, instrumenta exercendæ terræ, & quodammodo cogendæ, ut fructus fundat, ac ueluti debitor reddat creditum: tum quod uires nacti essemus per exiguas, addidimus nobis adiutores, socios, amicos, administratos, tum ex bellorum rabie seruos. & alioqui nati & compositi eramus à natura ad societatem, quod beneuolentia & sermo indicant. Iam ad procreationem sobolis stimulat nos natura, ut conseruetur genus. itaque uxores asciuiimus, unde nati liberi. ab uxoribus affinitates ortæ, à liberis consanguinitates & propinquitates, & charitatis mutue nexus. ex sociabilitate cœtus & congregationes hominum concelebrati: unde pagi primum. inde oppida urbesq; extiterunt. non solum amore coniungente homines, sed interdum malis & necessitatibus, dum cogunt se in unum ij quorum alij alijs usui possint esse. Ex malitia & iniquitate hominum leges sunt ortæ, & ad legum æquitatisq; conseruationem magistratus cum potestate constituti ad comprimendâ auda-

audaciam malorum. ad propulsandam uerò uim hostilem, & iniuriam externam arma inuenta sunt, & multitudo armata effecit bellum. Qui coetui & multitudini illi profuisset, honore afficiebatur, tum ad referendam ipsi gratiam, tum ad exemplum aliorum. Communicationi autem rerum à primo seruiebat commutatio, in cuius locum quum res esset uisa impedita & inexplicabilis, successit numus, qui omnia exaequaret. Tum ut homo inter homines agebat ex naturali quadam Dei similitudine, quam nos deprauauimus, orta est cupiditas excellendi: sed excellentia degenerante ad res inanes ac falsas, dum corruptè de bono decernimus. alij enim bonum posuerunt, ac proinde præstantiam in forma, alij in robore, alij in animositate. fuerunt qui in rapinis & cede hominum, qui in lusionibus, qui in honestate generis, qui in nihil sapiendo, & uita belluarum proxima. alij etiam honorem captarunt, non in sua solum ciuitate, sed procul apud exteros: non suo tantum æuo, sed ad posteros, quæ gloria nuncupatur. Signa honorum & excellentiæ excogitata permulta, in uerbis, in nutu, in gestu, in toto corpore, in loco, dum sedimus, dum assurgimus, ambulamus, transimus. In his omnibus immergit se & iudicandi prauitas, & cupiditas insatiabilis permiscuit omnia, cōfudit, torfit ad fines tum à natura ipsa, tum à recta inuentione



inventione hominum alienissimos. Non possum persequi singula, quod esset operis immensi. & in præsens minimè necessarij. Quis hic non cogatur exclamare: O hominem miserum iumentum, quis te adeo oneravit? sed nō est ei onus ab alio impositū, ipse sibi asciuit, & suis manibus imposuit. Hic est homo, hæc humana. Dispiciamus iam ubi est eius finis. Finem uoco, ad quem referuntur cætera omnia, ipse ad aliud nihil. Quod ut exemplo fiat manifestum, præparationi navis finis est nauigatio, sed non postremus: neque enim ibi sistit destinatio animi. nauigationi proposita est pecunia, neque hæc postrema, quam uidelicet alterius rei gratia querimus: nempe ut uestem paremus & alimenta, alijs uerò, ut seruos, domos, rem familiarem amplam: alijs ut gerāt bellum, uel decus sibi concilient & authoritatem, ut est cuiusque animus & cupiditas. Et cibum expectimus, quò rectè ualeat corpus, aut animus: & rectè uolumus habere, ut probè fungamur actionibus quas cupimus. & hæc aliorum tendunt, uel unde uenerant reflectuntur. Non sunt itaque hi fines, quos hic querimus, sed ultimum illum in hominum actionibus inuestigamus, ad quem tanquam summum & præstantissimum tendunt omnia: ipse suum tantum gratia queritur, non aliorum, qui finis bonorum nuncupatur. Olim qui philosophiam profitebantur,



tebantur, partim contradicendi studio, partim sui ostentandi, partim quòd non eodē omnes modo considerarent hominem, uarios depixerunt fines. Fuerunt qui uoluptatem ponerent, quòd ad eam bestiae omnes, ut & nostra animalis pars, ceu nutu suo ferrentur pronae. Adiecerunt alij indolentiam, eamq; praecipuam esse uoluptatem dixerunt: alij sanitatē. Quidam sensu magis populari, nihil esse potius aut praestabilius arbitrati sunt opibus, honore, potentia. Alij penitus inspexerunt hominis naturam, finemq; in animo esse oportere statuerunt, nempe uirtutem, qua componitur ac formatur animus, ne in motus illos inconditos ac turbulentos intumescat ac tumultuetur: hi fuerunt Stoici. Aristoteles altius ascendit ad mentem, & quod in ea existimet esse optimum, uidelicet contemplationem rerum maximarum, id postremum esse censet in bonis. addit uelut appendices corporis & animi, & uitae seu bona, ut ipse uocat, seu commoda, ut Stoici. Hae duae nationes ex disputationibus Socratis sunt natae, quas literis mandauit discipulus eius Plato, qui in constituenda beatitudine hominis uarius est & incertus, tametsi quibusdam locis plus uidit quàm reliqui omnes philosophi. Ait enim alicubi, uirtutem doctrinamq; praecipuum esse bonū: alibi uerò, contemplationē optimi, nempe Dei: alibi sublimius elatus, amorem eius atq;

atq; imitationem esse affirmavit. quod dictum quid ueritati est proximum, ad postremum disputationis reseruabimus. Reliquæ omnes opiniones ac sectæ iam olim aliæ aliarum telis confixæ, & argumentationibus refutatæ sunt. Facilius enim cuique fuit contrà falsum dicere, quàm uerum inuenire. Eorum rationes huc adferre operosum esset nimis, & superuacaneum. Attingam tantum aliquas non ex illis subtilibus atque intricatis, sed cuiusuis captui aptas & congruentes. Constat homo, uti nullus ignorat, ex animo & corpore. Finis ergo illius in externis rebus non potest situs esse, quæ nec sunt in homine, nec quicquam sunt hominis. & ea quum hominis gratia sint quæsitæ & parata omnia, non possunt profectò finis esse hominis, contrà potius homo est illorum finis & causa. Neque enim uel pecuniam uel possessiones & opes alias quærimus propter seipsas, nisi quòd adferunt uel delectationem, uel decus, uel usum aliquem ad necessaria. Hæc igitur ulterius posita sunt, quàm diuitiæ. Quòd si hæc absque numis liceat consequi, pauci numos attingerent: ut reges & procures magnanimi, quibus cum pecuniarum usus omnis abundè suppetat, ipsi pecuniam nec contrectant unquã, ac ne uident quidem. Quòd si externa quia homini seruiunt, eiusq; gratia sunt inuenta, non sunt cursus huius meta & scopus

pus actionū, eadem ipsa de causa nec in corpore utique situm erit hoc de quo loquimur bonum. Corpus enim omnino seruit animo, ut uestis corpori, et animi gratia corpus curatur. Eleganter Salustius: Animi imperio, corporis seruitio magis utimur: alterum nobis cum dijs, alterum cum beluis commune est. Et uolumus bene ualere corpus, & sensus habere integros uoluptatibusq; perfrui, ut melius & suauius sit animo, & liberior ac rectius fungatur suo munere mens. Quis est enim qui quid dementia sit non ignorans, si daretur optio, eligeret firmissimam ualitudinem, uoluptates & oblectamenta sensuum omnium cum dementia, quiq; non multo malit rectè sapere quàm rectissime ualere? imò consensu generis humani constat nullum esse grauiorem morbum quàm insaniam animi, & morbos omnes animi sauiiores atque atrociores esse quàm corporis, magisq; deuitandos. Deniq; uel ipso aspectu hominis & leui animaduersione eorum quæ agat, perspicuum fit cuilibet, in animo esse dominatum, in corpore ministerium. Quod si corpus mancipium est uel administrum, uel (ut alij loquuntur) instrumentum animi, quis in eo quod uilius & abiectius est, beatitudinem collocet præstantioris? Porro si animi gratia sunt corporalia, finis horum animus erit, non è contrario. Sed finem profectò cuiusq; rei proprium

prium ad eam pertinere partē oportet, quæ est cui-  
 que rei maximè propria. nam si in re cum alijs com-  
 munis esset positus, idem esse posset diuersarum re-  
 rum finis, & communis illis cuiq; illarum proprius,  
 quod fieri nequit. Itaq; finem homini peculiarem &  
 proprium ex ea est quærendum hominis parte, qua  
 homo est homo à cæteris rebus omnibus distinctus.  
 Hoc per exemplo commōstrari. si cui uersato in.  
 uita communi, homini acuto & prudenti, qui nun-  
 quam tamen cultellum aut gladium uiderit, cultellus  
 offeratur, nec ullo indicante quærat gladij usum, &  
 quem in finem instrumentum illud sit paratum, non  
 in eo ponet usum quòd sit oblongus, non quòd mu-  
 cronatus (nam & multi bacilli sunt tales) sed in eo  
 quod ei est proprium, nempe in acie: sic in homine  
 quis statuatur ultimum bonorū in corpore, quod cum  
 sit ei cum belluis commune, etiam beatitudo homi-  
 nis brutorum esset beatitudo. quod ijs accidere ne-  
 cesse est, qui indolentiam, qui ualetudinem rectam,  
 qui uoluptatem fecerunt extremum in bonis, ut in  
 beatitudine belluas & homines æquarent, quos natu-  
 ra tanto interuallo seiunxerat. Est ergo summum bo-  
 norum ad mentem pertinens, et in ea collocandum.  
 Quid magis conuenit, quàm ut id quod homini est  
 supremum & optimum, in eo reponatur quod est in  
 homine optimum & præstabilissimum? Id satis intel-  
 legerunt



DE VER. FIDEI LIB. I. SI

lēxerūt Aristoteles, Acadmici, Stoici, et alij, q̄ inani-  
mo reposuerūt hunc finē. Stoici, uirtutē dixerūt esse  
qua mores cōponūtur, et regūtur prauæ animorū per-  
turbationes: sed hæc in parte humili uersatur animi,  
quæ nobis cōmunis est cū belluis. Nec uirtus esse po-  
test ultimū bonorū, qua nihil est propter uitæ incō-  
moda laboriosius, ærūnosius, calamitosius. Bonū e-  
nim in quiete sitū est, et delectatione. Aristoteles spe-  
culatur aliquanto sublimius et lōgius. Huic duas esse  
placet beatitudines ciuilē et politicā unam, alterā sa-  
pientis priuatā: et tria bonorū genera, animi, corpo-  
ris, et uitæ, seu externa. Summū illud sapiētis bonū,  
quodq̄ nomen hoc mereatur sine addito, perfectum  
suisq̄ omnibus numeris constans dicit esse in mente,  
quæ excellentissimum est in homine, & maxime di-  
uinum. Huius uero præcipuum opus est contem-  
platio: hanc ergo esse summam foelicitatem conclu-  
dit. Aliquid fortasse diceret de animis corpore solu-  
tis: sed loquitur de hac uita. in qua quid tandem po-  
test comtemplari animus tanta mole corporis onu-  
stus, & obrutus, tam densis tenebris oppressus?  
quāto minus pulcherrima illa et præclarissima, præ-  
sertim quū eius ipsius nox sit in prima philosophia  
magno applausu ab omnib. cōprobata, aciē mentis  
nostræ non aliter ad manifestissima naturæ caligare  
& hallucinari, quā noctuæ oculos ad fulgorem



solis. Iam quantumlibet uel contemplari conuicta  
 ris, uel uirtutem sequi, auertunt, aut saltem in-  
 terpellant te molestissimæ necessitates corporis in-  
 euitabiles, quibus succurrendum est uelis nolis. Ita  
 speciosa illa & felix contemplatio uel exercitatio  
 uirtutis rebus abiectissimis cedit, & cogitur de cul-  
 mine illo beatitudinis uel deuolui, uel descendere.  
 Quàm uero consentaneum est in eo ponere felici-  
 tatem quod est penè nullius? & in primo libro Mo-  
 raliū dicere, nō dari beatitudinem à fortuna, quod  
 beatitudinem par sit communem esse humani gene-  
 ris, & ad omnes pertinere? Quod si tibi Aristot-  
 eles in mente felicitatem collocare est uisum, cur  
 uoluntatē solam desertamq; omittis? præsertim quū  
 ipse fatearis cognitionē omnē propter appetitū esse  
 à natura tributam, tam in bruto quàm in homine. co-  
 gnoscimus enim bona et mala, ut hæc auersemur, illa  
 expetamus. Stoici noluerūt bona appellare, quæ cor-  
 pori essent utilia: & quæ sunt reperta à nobis in ui-  
 ta, cōmoda nūcuparūt, et utilitates. Sed à Cicerone et  
 alijs satis est ostēsum, quæcūq; usurparēt nomina, rē  
 tamē eodē recidere. Quod si in hac uita uelut cōcen-  
 tus quidā et harmonia exigitur omniū bonorū ad fœ-  
 licitatē, talē utiq; fœlicē cōfingūt, qualis nōdū quis-  
 quam fuit, nunquam erit, ac ne esse quidem potest.  
 Quippe fœlicitas hæc & consummatio bonorum  
 in

in uita hac nulli potest euenire: & si quis hominem intus ac foris inspexerit, facîle intelliget finem nullum habere in uita homine dignum, & in quo possit conuiuiscere. Quod si quæ sine carent ipsis congruenti frustra sunt parata, necesse est profectò aut hominem frustra esse à tanto authore Deo conditum, & in hanc uitam quasi in peregrinationem missum, aut in exilium. Vana sunt quæ usum sui atque utilitatem uel nullam præstant, uel perexiguam, reque ipsa indignam, quæ nihil habent intus quod proffit, nihil quale præ se foris ostendunt, ut uanæ bullæ fontium, & auenæ, & lusus pueriles. quid creatum esset à Deo uanius & inutilius, si præter uitam hanc nihil haberet? Id uerò si de sapientissimo Deo nefas est existimare, alibi ergo querendus est hominis finis, non hic: & ne res uerbi ignorantia claudatur, finem ex consensu omnium philosophorum, quod res ipsa docet, appello, quod perfectum hominem ac beatum reddit. Huius conditionis sunt hæc, ut sit homini proprius, ac ea de causa in optima illius & præstantissima parte situs, ut qui unus satis sit ad selicitatem: quod autem felicitatem beatitudinemque allaturum, maximas ut delectationes importet sine ulla molestia uel perturbatione necesse est. Adde his, ut sit perpetuus, nec auferri potest. Nam si quis metus interueniat ne amittatur, is metus felicitatem

diluet & corrumpet. Ideo in sua cuiusq; manu positum esse oportet, aut certè illius de quo exploratū habeamus, daturū eū quoties nobis libuerit. Si quis hominem contempletur in hac uita, inueniet nihil minus assequi finem suū, quā illum. Corpus est imbecillum sortitus, fragile, & morbis ac mortis generibus innumeris obnoxium: cui breuis ac incerti, cui exitus singulis momentis plurimis & uarijs de causis impendet. Brutis uerò firmiora sunt corpora, minus concussa morbis, & ætas diuturnior: quæ fuit Theophrasti & quorundam aliorū querela, dum in sapientiæ curriculo multas pateremur moras, & interticeretur priusquam metam attingerent. Forma opinionibus constat. unicuiq; animanti sacra est sua forma, & omnium pulcherrima: uetusq; dictū est, suum cuiq; pulchrum. per quod significatur, nō consentire inter se hominum iudicia in statuendo de pulchritudine. Quòd si res coloribus censetur, pauonibus cedamus, & multis auicularum, atque etiā uermiculorum. Deinde quæ nam felicità est, quæ minimum prodest possidenti, plus delectat spectantem quā habentem? Quid, quòd est res momentanea, corrumpitur nulle casibus, morbo, ætate, plaga, ulcere, papula, à sole, à uento, ab æstu, à rigore. Voluptates corporis breues, et planè momentaneæ, nec unquam meræ, semper molestia cōmistæ & contemperate.

perate. Relinquant uerò post se mororem & morbos. Bruta illis & pluribus, & maioribus & diuturnioribus perfruuntur : quippe quæ undiq; uoluptates cōquirunt, & abiectiores sunt ad eos sensus quibus potissimum uoluptates capiuntur, nempe gustū & tactum. Adde quòd eas sumunt securè sine reuerentia, sine respectu Dei & hominum, sine repugnantia mentis, quæ prauis cupidinibus reclamationat. Quòd si in illis esset fœlicitas, fœlicior fieres quo eis & diutius & crebrius uteretur. Atqui tum sis miserior. frangitur enim & debilitatur corpus, animus autē in belluinam naturā degenerat: ut fœlicitas tua nihil sit aliud, quàm uerti in pecudē. Nec illos ipsos suos sensus delectatione afficit uoluptas, nisi moderatus sit eius usus, & rarus : quemadmodum est apud quendā poëtarū, Voluptates cōmendat rarior usus. Cuiusmodi porrò sit uoluptas existimanda, declarat consensus generis humani, qui tegi illas, qui dissimulari atq; occultari uoluit, nec est ullus qui de gula aut libidinis perceptis uoluptatib. gloriatur : nisi fortē insanit, & pudorē omnē excussit, hoc est (ut Cicerō dicit) nomine sit homo. nō re. Nam quisquis humanum habet sensum, quærit tenebras, & ubi delitescat, etiam in ijs quæ sunt lege ac iure permisse, ut quū coniuges dant operā liberis. Quin etiā philosophi Epicurei, qui in uoluptate beatitudinem sum-



mam collocarunt, & si à primo de corporcis uoluptatibus loqui ac sentire se essent professi, ut Epicurus ipse, non tamen & aliorum philosophorum uexationem & uerecundiam humanitatis sustinuerunt. Itaque uelum ei addiderunt honestæ matronæ, præcipuas, & ueras, & solidas esse uoluptates animorum: de illis se loqui, non de hac abiecta & bruta. Contra quos disputât quum alij, tum M. Tullius. Sed ad nos nihil, quibus satis est corporeæ uoluptati premium & dignitatem detraxisse. Iam comedere ipsum, & bibere, quàm res est molestâ, toties, tam diu repetendum: & ubi finitum est, abit delectatio, relinquuntur ructus, excreatio, meiere, excernere, grauitas somni, in quo nihil homo differt ab arbore. Si nimium ederis, aut biberis, aut naturæ parum congruentia, labor, molestia, morbus, dolor, mors. Aedificatio, res ridicula, lapidem lapidi superponere, tignum tigno addere, bacillum bacillo, stipulam stipulæ. Vestes pudori consulunt. Quod bonum esse potest in eo, quo felicius careremus, si liceret? Hæc enim nostra infirmitas inuenit, nō præstantia. Quanto sunt meliore conditione, quibus hæc non sunt opus? Denique quid potest esse circa corpus, aut in corpore bonum aut expetendum, quum ipso nostro corpore nihil sit turpius, nihil tetrius & fœtidius? Tollat quis cuticulam, uidebit quanta subito existet fœditas,



foeditas, quæ undique per omnes corporis meatus, tanquam per cloacas continenter scaturit. Quæ externa sunt præternaturalia, quæ naturalia per pauca sunt & exigua, nempe quæ corpus alitur & tegitur: cætera humana uanitas inuenit, & nos deinceps delicijs & prauo usu auximus in immensum, & effecimus ut illis indigeremus. Multæ gentes his dementiæ nostræ inueniis non utuntur, nec indigent faciliusq; ac felicius ætatem degunt tanti ponderis expertes. Nam opes, honores, dignitates quæ querunt, aut qui quæstas tueri student ac conseruare, quàm multis & uarijs sese molestijs inuoluunt? Quid, quod non sunt in manu & potestate possidenis, fortuita sunt: qui desiderat & affectat, plerumque non consequitur. confluunt uerò ad negligentem, atque etiam interdum aspernantem. Adde his, quàm multarum inimicitiarum sunt causæ ac fomenta, inuidia competitorum. unde nō singulorum modò hominum turbatur quies, sed uniuerse ciuitatis, ac regni, & prouinciæ totius. minoribus uerò quanto sunt odio, qui se ab illis premi censent?

Age uerò, quibus tandem de rebus est tanta digladiatio, tam acerba contentio? de leuissimis ac minutissimis, de pecunia. Atqui ea per se nihil est. alibi ex auro, alibi est ex argento, ex ære, cupro, orichalco, fuit aliquando ex soleis calceorum, est in quibus-

dam orientis ciuitatibus ex fabis, certo numero distributis arbitrio magistratus aut principis. Et modo usus sit idem, quid refert quæ sit pecunia? quæ ad paranda ea est excogitata, quibus corpus quotidie indiget. Nam & gemmis prima conciliatio precij dicitur fuisse, quod uim dicuntur habere salubrem corpori. itaque in multas medicinas adhibentur. Ergo semoto usu, nihil refert aurum habeas an saxum, adamantem an scrupum ex glarea sumptum. Quod si instrumentum est pecunia, res est utique quum ibi sistitur inanis: ut si quis pennas coaceruaret diligenter multas, & uarias, nūquam scripturus. Usus porro necessarius, exiguus est. Quid faciūt centum millia ducatorum, ubi duo aut tres sufficiunt? Usus superuacaneus prauitatem demonstrat iudicij. Quis quis enim superuacaneū dicit, eo ipso nomine uanitatem coarguit uacantem & redundantem. Accedit honor, quid rei hoc est? nam euanescit protinus, si quid ex ea coneris attingere. Aperiri caput, de uia cedere, blandè appellari, duci, & reduci, hæc nihil sunt. Stulta opinio & inconsiderantia efficit, ut aliquid esse credantur. Adde quod alieni prorsum sunt arbitrij, nempe populi, belluæ multorum capitum. is, ut uariè de præstantia iudicat, ita honorem quò non decet applicat, undè non decet detrahit. Quæ potest esse foelicitas in alieno arbitrio sita,

ta, atque eorudi, crasso, ac proinde iniquo? De nobilitate uerbum nullum faciam: quoniam nihil puto ab hominibus stultius & inanius excogitatum, quodq; minus haberet solidi quod apprehendas. Magistratus cura est & sollicitudo, si uelis esse uir bonus: sin malus, quæ potest esse felicitas in tyrânide & odio plurimorum? Si sunt hi hominum fines, si ad hæc est homo conditus, quid eo potest fingi miserabilius? quanto beatiùs uiuitur sine his? quæ aliud prorsum non sunt, quàm fontes omnium curarum, molestiarum, cruciatuum animi perennes & copiosissimi, contra quæ sigillatim multa sunt ab excellentibus ingenijs collecta. ut operæ sit superuacaneæ illa persequi. quæ sunt cuilibet obuia. Denique omnia hæc quæ ad uitæ huius excogitauimus subsidia, quomodo beabunt nos, quum ne tueri quidem possint à morbis, doloribus, molestijs, anxietatibus, fame, siti, algore, æstu, morte? Hæc circa corpus, aut in ipso corpore. Scrutemur, si placet, animum. In cuius parte ima, & ea quæ corpus attingit, sunt motus illi, perturbationesq; qui affectus uocantur. His uerò quid turbulentius, atrocius, sæuius? qui minimo excitantur flatu, sæuasq; tempestates in toto homine concitant, ut non uideatur iam homo esse, sed planè pecus aut fera: uitamq; uniuersam tantum abest ut beatâ efficiant,

ciant, ut reddant prorsum insuauem atque amarissimam. Omnisq; moralis philosophiæ in hoc uersatur cura & labor, ut sedentur, ut conquiescant hi motus. Altera superior pars ac melior, mens dicitur. Quæ sunt illius bona? Duo, uti & functiones due. in intelligentia est peritia, in uoluntate uirtus. In intelligentia humana tantæ sunt tenebræ, ea nox, ut quod acutissimus & peritissimus homo assequitur, non multum abesse uideatur ab eo quod nocte obscurissima cernimus lucernis remotis. Scilicet memoria est angusta, fluxa, infidelis, acumen autem ingenij retusissimum, segnis diligentia & tarda. Quomodo constitues in eo felicitatē, quod uel nullum est prorsum, uel adeò tenue atque exiguum, ut pro nihilo sit habendum? Quo magis Aristotelis sententiam miror, qui quum non ignoraret quàm infirmæ essent etiam circa corporalia quæ sub sensus ueniunt ingenij nostri uires, finem hominis in contemplatione posuit rerum supremarum, & quidem in hac uita: ut nihil uideatur fecisse aliud, quàm excitare hominibus cupiditatem eius rei, quam cōsequi non ualerent. Ecquis tandem in cæco, aut homine uisus hebetissimi dicat fœlicitatem esse, multa acutè cernere? hoc irridere potius fuerit uicium, quàm ostendere quid habeat optimum natura. Quanto sapientius Plato? qui fœlicem eum uocat, cui uel in senectute



## DE VER. FIDEI LIB. I. 61

te contigerit, non ut scienciā habeat, sed ut rectas opiniones de rebus. Altera pars est uoluntas, atq; ea potior. huius perfectio est uirtus. quocirca in excelsso loco residere dicitur, domina & regina omnium. Equidem ad uirtutis nomen non possum non assurgere, & multum ei deferre. Agnosco rem esse unam omniū pulcherrimā & præstantissimam, cui omnes meritò plurimum tribuant: sed ipsam non propter se, uerū propter beatitudinē illam sempiternā, ad quam per uirtutes uenitur. Nam si ad hanc uitam referantur omnia, nec ulla sit alterius spes, memoria, respectus, profectò nihil est uirtutis nomine inanius, nec aliquid intus continet, nisi fortè apud callidos astutiam commodè ac suauiter uiuendi. Virtutes censentur hæc, iustitia, fortitudo, continentia. accedit prudentia, quæ magis rectorix est & moderatrix uirtutum, quàm uirtus ipsa. Non eripis cuiquam suum, reddis depositum, non fraudaris, non circumuenis, præstas pietatem patriæ, parentibus, propinquis, necessarijs, benefactori gratiam, iustus es: ad hunc eundem modum in actionibus aliarum uirtutum. subis pericula intrepidè, persers incommoda fortiter, obijcis te morti animose, fortis es. Si hæc facis omnia ut uir bonus habearis, ut sis in precio, ut bene uolentiam, ut honorem, ut decus colligas, quibus ex rebus dignitas, opes, & uita iucundissima comparatur.

tur : ex contrarijs autem ignominia, dedecus, damna, poenae legibus constitutæ : an non uirtus tua cautio est, seu cauponatio uerius, non aliter quàm nauigatio & negociatio, & bellum quod milites mercede perferunt? Ita habebō in bono opere uoluntatem pessimā, nec minus assequar. imò magis multo quàm is qui simpliciter habet optimam, & sequitur bona fide rectam conscientiam. At dices, hic est uerè uir bonus, non ille : uanæ sunt uoces. Quid est enim uir bonus, si hæc uita sola spectetur, nisi inane nomen? quis est iudex, quis est uindex rerum intra cuiusque pectus occultarum? Non minus diu uiuit uir malus quàm bonus, & magis ex animi sui sementia ac uoto. confecto autem cursu, nihil utrinque remanet : imò sæpenumero mali hominis restat fundatum patrimonium astutia & calliditate honestati, liberi etiā fama illius tanquā boni ac præstantis uiri. Sed natura tamen & imago ueritatis adeò sunt apud animos nostros fortes, ut uel falsam & degenerantē uirtutem propter ueræ similitudinem quandam & uelut umbram, non possimus non admirari, quia ueræ uirtutis uenerationem ac beneuolentiam Deus humanis pectoribus indidit. Itaque contra ueram uirtutem, cuius ope sempiterna bona consequimur, nihil dici potest : contra fictam hanc & adumbratam, plurima acutè ac uerè. Nanque si ad hoc solum

euum

æuum respexeris, utique uita nostra, uita erit  
 corporum. At corpori nihil est perinde inimi-  
 cum, ac leges & præcepta uirtutis, per quam om-  
 nia illa prohibentur & interdiciuntur quæ corpori  
 allubescunt: ut non immeritò carnem & uirtutem  
 in duabus lancibus statuerint, quarum altera alteri  
 conaretur prægrauare quantum posset. Quòd si  
 corpori uirtus est contraria, & huic uitæ: si huic ui-  
 tæ, profectò & ipsi homini. Equidem de ijs qui om-  
 nia uita concludebant, libens audierim, quorsum il-  
 le uoces pertinent magnificæ sanè & amplæ, sed ue-  
 lut bullæ: si deos atque homines speremus posse nos  
 fallere, nihil tamen agendum iniuste, nihil prauè, ni-  
 hil non ex uirtute. Cuius tandem rei gratia? Ut si-  
 mus (inquiunt) boni. Quorum ea bonitas? quis eius  
 fructus? Nam bonitas molesta est, cui corpus & ani-  
 mi affectiones repugnant. Atqui nihil molestum se-  
 cundum naturam, & proinde nec efficiens beatitu-  
 dinis. Sin ea captatur bonitas, ut compositis animi  
 affectibus iucundius uiuatur, ea certè spectatur &  
 captatur iucunditas, non uirtus: quæ negligetur  
 prorsum, si iucunditatem hanc consequi detur sine  
 uirtute. Dicunt præterea: Nōne sapiens, si fame ip-  
 se cōficiatur, abstulerit cibum alteri homini ad nullā  
 rem utili? Minimè uerò. Non enim est mihi uita mea  
 utilior, q̃ animi talis affectio, neminē ut uiolem com-  
 modi

modi mei gratia. Mirum est, eos quibus spes est post hanc uitam nulla, nō ridere, quum hæc scribunt aut loquuntur. Quid quæso tantopere profutura est talis animi affectio sapienti, ut mortem is malit subire, quàm illam uiolare? aut quomodo est magis contra naturam, quæ uocatur iniustitia, quàm mors, quum prima nature commendatio sit cuiusque erga semetipsum? Sed pergunt loqui magnifice: Præstare diem unum bene, & ex uirtutis præscripto transactum, quàm totam immortalitatem uirtute seposita. Tum adhortantur nos, ut relictis rebus omnibus sequamur uirtutem, & citò sequamur, & satius esse aliquando tandem serò, quàm nunquam. Omnia hæc sunt uana, & infructuosa. Cedò, paucis antequam morior diebus renuncio uoluptatibus & uitæ deliciose, dedo me seueræ atque asperæ uirtuti, paulo post decedo è uita, quid nanciscor ex uirtute? quis fuerit illius fructus? In tauro Phalaridis (inquiunt) exclamabit sapiens, Non curo, non sentio: quorsum id, si ilico totus moritur? profectò fundūt uoces inanes, & uidentur uelle grandia quædam effundere, ut in tragædijs quæ populus admiretur. Quanto rectius apud Xenophontem Cyrus, & sensui communi appositius? Equidem inquit, ita sentio, nullam ab hominibus exerceri uirtutem, quo nihil magis habeant probi, quàm improbi



bi. quicquid uoluptatibus ad tempus abstinent, non id ea gratia faciunt, quo ne unquam postea delectentur, uerum ut per eiusmodi continentiam amplioribus deinceps uoluptatibus perfruatur. Sic ille. Quia propter cordatiores ex philosophis satis intellexerunt, uana et infrugifera esse omnia, si huc modo referrentur: ideoque uirtutum et uitiorum premia ad alteram uitam remiserunt, ut Socrates, et hunc sequutus Plato, et Platonem Cicero, et alij complures. quod quia natura duce ac magistra probabile erat in uulgus, poetæ quoque tenuerunt. Sed hæc ita sunt leuiter dicta ac frigide, ut idem ipsi non satis uiderentur credere, quæ affirmabant, quemadmodum alibi docebo. Sed profectò ita est, nullum habet homo finem in hac uita se dignum. quod si nec habet in altera, frustra est. non est autem frustra: conditus est ergo ad alteram, et ibi est quies, et finis, et beatitas illius.

#### QVI SIT HOMINIS FINIS, EX

ipso homine perscrutatio.

**V**erum ex homine ipso probe attenteque considerato, non fuerit profectò operosum, quis illius sit finis, aut quæ certè eius ratio, inuenire. Non aliter quam si quis in extremis illis Oceani insulis, ubi nullum est ferrum, gladium uideret ab aliquo nostrorum hominum allatum, multum uolendo et uersando,

uersando, & ad rem aliquam accommodando atque experiundo, usum tandem illius inueniret, in quem esset paratus. Sic homo inspiciatur diligenter intus ac foris. Quæ in se, quæq; extra se habeat recensuimus paulò antea. Ex naturæ præstantia & ratione usus facile intelligetur, non huc eum spectare, neque huic esse uitæ conditum. altior enim est naturæ conditio, quàm pro his rebus, nec usus earum tam præstans instrumentum postulat, nec usus instrumenti huius hisce est rebus aptus & accommodatus. Dicamus hæc apertius & explicatius, ut ab omnib. possint intelligi, modo mentē atq; attētionē adhibeāt. Nihil unquā assumitur in usū et finē alterius, quod sit potius et præstabilius eo propter quod sumitur. Id nec in uita cōtingit unquā inter sapientes, nec in natura, quæ summa sapientia regitur. Semper enim quod alterius gratia ab aliquo expetitur, minus est illi quàm id quod expetit, alioqui contrario potius modo expeteret. Omnes pecuniā damus propter cibū, et hūc uolumus propter uitā: uita ergo melior cuiq; quàm cibus, et hic quàm pecunia. nam qui uitam impendit propter honorem & famam, charior & melior est huic fama quàm uita. Appetitus enim noster natura sua in id fertur, quod sibi censet esse bonum. Quo ergo melius & potius existimarit, eo ferretur pronius et uehemētius. Ita-  
que

que in quod potissimum, & propter quod aliud faciet, id censebit sibi esse omnium optimum. Quod si sit uoluntas sapiētis, non fallitur: & id re uera erit optimū, quod maximè omniū expetet, & in cuius gratiā sumet alia. Natura ergo quæ est sapiētissima omniū, nempe à sapientissimo cōposita, cōstituta, instructa, ea quæ re uera sunt præstātissima et optima statuit summo loco, & horū gratia cætera, non uice uersa. Creauit ergo quicq; & ei attribuit hūc finē, ut bene sit illi. hoc enim nō potest dari aliud potius aut melius, et in eo cuiusq; rei appetitus cōquiescit, dignūq; id est in quod sumātur & referatur alia. Sēsuū ergo corporaliū finis est, ut bene sit eis: mētis uero, ut bene sit illi. Sēsus meritò in reb. uitæ huius occupātur, in esu, potu, calfactione, refrigeratione, & huiusmodi: quoniam per hæc bene est ipsis. integrior res sūt enī, acutius noscūt, et perfruūtur suis uoluptatib. Mēs uero si in reb. uitæ huius occupetur, quis erit fructus? nō ei bene erit, ut quæ nec clarius intuebitur res excelsas uel abditas, nec perfruetur uoluptatib. cognitionis: imò lōgius aberit ab intelligētia rerū se dignarū, quò attētius et diligētius innauauerit reb. uitæ huius, nempe parādis ijs quæ postulat corpus. Itaq; quod melius est, fieret instrumētū deterioris, nēpe mēs corporis: et sēfib. seruiret intelligētia. cū omnib. ē cōtrario potius natura informationē hāc indi-

derit, extrema esse condita propter corpus, hoc propter animū: & in animo quæ sunt inferiora propter superiora, uidelicet propter meliora sunt minus bona. Adde quod est huic uitæ organū minimè necessariū mēs. Sensibus quidē est animāti opus ad uitam, homini eundem in modum ad parandum uictum: nihil aut quàm minimum eget intelligentia, certè non maiore quàm habet uel canis, uel elephas. argumēto sunt fatui homines, qui non minus uiuunt, nec minus perfruuntur uitæ gaudijs, quàm sapientes, nec illis mente est opus: imò si uitam hanc solam spectes, nō iniuria dixerit Græcus ille, In nihil sapiendo uita iucundissima. Vbi enim multa scientia, ut inquit Solomon, multa afflictio, & curæ, et cogitationes, & sollicitudines graues ac molestæ, queis dementes carent. At necessaria est intelligentia (nam hoc dicet quispiam) ad hunc uitæ cultum, in uestibus, in condituris ciborum, in poculentis, in habitatione, in suppellectili, in nauigatione, in uesturis, etiam (si Deo placet) bello ad honores & dignitatem, & alia quæ sunt huius generis. Hæc non dedit natura, sed excogitauit uanitas, graue onus super filios Adam. Imò hæc ipsa sunt de quibus conqueror, quæ auertunt mentem à cognitione sua, & cogunt ancillari rebus indignissimis, & quod erat in res altissimas consumendum, consumitur circa uilissima. Profectò opus est



est ad illa intelligentia, sed misera, & de excellentia sua deturbata. Si quis Militense lintheum, ut olim dicebant, aut quod hodie Hollandicum dicitur, tenuissimum & candidissimum uiderit, num existimabit paratum ad cœnum inuoluendum, aut uerrendum pauimentum? minimè uerò, sed ad usum honestiorē corporis. sic intelligentiam mentis nostræ si quis attentius contempletur & consideret, erit ne tam ab intelligentia & mente alienus, ut usum existimet sue re calceū, macerare piscem, extruere lapides? Quid, quòd nec opulenti & primores dignatur illa facere aut scire, & sapientes aspernantur, excutientes curam illarum rerum omnium, ut uacent potioribus. An ne tanta rationis & cogitationis uis eò est homini tributa, ut paret metalla, ut cædat lapides & ligna, quærat alimenta & tegumenta corpori, ut paret per quæ alij assurgant ipsi, & nudent caput, & cedant de uia? O miseram & deplorandam conditionem uitæ. Homo res omniū nobilissima, & princeps mundi sublunaris, occupatur toto die in conficiendo calceo, in tondendo crine, in uerrenda toga, in coquendo cibo, in uoluendo secum uel ultionem, uel fraudem, uel cædem & stragem. Vah miserum genus seruitutis. huccine te conditum existimas? Quid ergo? dicet aliquis. nihil omnino agemus, ut Indi illi ociosi sine habitationibus, sine cultu agro-

rum, pecorum more? Est quidē uita illa suauissima, et procul ab omni cura. Sed eam natura damnat, quæ nos a studiosos condidit. Nec istis hominib. opus erat mente, itaq; nec hi utuntur mēte, ut nec nostri benè utuntur. Perget forsan urgere: Erit quod ait Aristoteles, exercebitur mens in contemplatione ac scientia rerū maximarum. Quorsum id uerò, nihil profuturæ. Luctabitur cum difficultatibus ingenij sui, cum quo durissima illi erit cōtentio. Itaq; magis se torquebit, quàm delectabit, nec finē unquā et requietem inueniet in eo quod inquireret. Sed rectā spectemus iam hominem. in eo est corpus, cui seruiunt externa nō ergo in externis finis, quandoquidē non ibi sistitur: sed ulterius est progressus, nēpe ad corpus, hoc est sensuum gratia. non ergo ultimum corpus. Sensus ad animum referuntur, quæ in animo ad mentem. mentis autem est cognoscere: erit ergo ex notitia appetitus aliquis menti coniunctus. Nam cognitio omnis in animali propter appetitum est. Non enim expetit quis ut norit, sed nouit ut expectat. incognita enim expetere non possumus. Is appetitus mentis uoluntas nominatur, cuius est ipsa mens consultrix et ductatrix. In uoluntate ergo tanquam postrema et summa est finis, et uoluntatis finis hominis est finis. At uoluntatis finis et beatitudo est, illi esse optimè. Non est autem ei  
optimè

optimè in cessatione ab omni actu, alioqui tor-  
penti & dormienti melius esse posset quàm uigilan-  
ti & agenti. Quòd si cessanti esset optime, quorsum  
spectat uis, & uigor, & uita, & motus, & proni-  
tas ad actionem, quæ sunt naturæ munera pulcher-  
rima, quæq; nos meritò tãti facimus. ut uicissim tor-  
por, & stupor, & ocium, & cessatio turpissima ac  
deuitanda sunt, illorumq; munerum orbitas ac pri-  
uatio. Nec ad eam fœlicitatem quæ esset per torpo-  
rem, opus esset mente, & cognitione, & uolunta-  
te, sed saxo aliquo. Quumq; à uolendo sit uoluntas  
dicta, quomodo optime erit ei, si desinat uoluntas es-  
se? Velle ergo melius ei quàm desiderare, & melius uel-  
le quàm nolle. uelle enim uoluntatis actio ad suum  
bonũ, nolle auersio à suo malo. Itaq; & amare, quod  
est uolendo adherere, melius quàm odisse, quod est  
nolendo auerti. In amore igitur optima & præstan-  
tissima uoluntatis actio. Amor autem desiderium ha-  
bet coniungendi & fruendi re chara. Quod si uo-  
luntas assequitur, acquiescit, & bene sibi esse putat.  
Quale ergo fuerit quod amat, & quo fruetur, tale  
erit bonum eius, & talis fiet ipsa. Non ergo optimè  
erit ei, nisi fruatur re optima, & quæ implere possit  
amplitudinẽ desiderij eius. Nihil autẽ implere desi-  
derium illius potest, nisi solus Deus. Reliqua enim  
quibuscunq; potest capi & teneri, uil' a sunt, diluta,

breuia, momentanea, exigua. In coniunctione ergo sola & fruitione Dei optime est illi. ibi ergo finis eius, & proinde finis hominis. Ex cognitionis quoque ratione idem ipsum potest colligi. Habet homo sensus corporis, per quos facies rerum externas praesentes cognoscit. habet sensus internos, per quos res easdem, sed absentes. habet rationem, quae per causas & abditissima naturae totius uagatur, & discurrit, per caelos, per elementa, per mixta & compacta ex elementis, per effectiones rerum, per ea quae corporis sunt immunia. spiritalia nominantur. Dicant mihi, an haec cognitio, quae est pulcherrima, aliquid ad uitam hanc degendam faciat? nihil profecto. Iam homo erectus super res conditas transcendit caelos, & uniuersitatem mundi, usque ad authorem omnium Deum. Maligna quidem & perobscura notitia, sed tanta quanta satis est ad consulendum uoluntati, & eam excitandam, ut sic erga quicq; horum afficiatur, quale ipsum sit. ita & ex ijs omnibus cognitionibus amores nascuntur, nempe rerum corporalium praesentium, rerum corporalium absentium, rerum spiritalium, Dei denique ipsius. Deus est ergo optimum et praestantissimum quod mens assequi potest, quodq; ostendere potest uoluntati, & huc tendunt omnes cognitiones. nam cognoscimus praesentia, per quae uenimus in cognitionem absentium: cognosci-



mus corporalia, ex quibus transitur ad incorporea. cognoscimus composita, ex quibus ad simplicia, ex mortalibus ad immortalia, ex rebus conditis ad conditorem. Summum ergo cognitionis est simplex, incorporeū, immortale, cōditor, nec est quicquā ulterius, et hoc implet solū. nā reliqua immensum relinquit uacui. Porro id efficit beatum, quod implet, & satiat, & quietat, idq; est optimum & supremum, quod illa potest amare. Et quemadmodū per cognitiones alias ad Deum ascenditur, ibiq; sistimus, ita per amores aliarum rerum ad amorem Dei, supra quem nullus est alius. Quod si amare potest Deum mens nostra, quia cognitum amare debet, quia optimum (amor enim ad bonum semper tendit) assequi profectō potest: alioqui uanos appetitus indidisset natura menti nostræ, et in præcipuis defecisset. Neque enim amor beatum facit, nec quiescat, nisi per coniunctionem fruatur re amata, torquet uidelicet absentia et desiderium. Nihil reliquorum nos satiat, inter manus elabuntur quum possidentur, quum delectant diluta sunt & diffugiunt, ut in eis bonum illud quod querimus non possit esse comprehensum. Atqui conjunctio cum Deo non potest esse in hac uita talis, qua efficiamur beati. restat ergo altera uita, in qua sit. Quippe in uita hac propter magnas huius corporis tenebras, nec tantū nouimus Deum,

nec tantum amamus, quantum esset opus: & subinde à notitia & amore reuocat nos corpus uel esuriens, uel sitiens, uel dormitans, uel languens, uel dolens, uel delassatum. Nec fruimur bonis illis Dei: imò quò ardentius hic amamus, eo torquemur acrius desiderio coniunctionis. Illic uerò deposito corpore, aut mutato, & clarius cernemus, & ardentius amabimus, & coniunctissimi erimus, & perfruemur bonis incredibilibus. Hic est hominis finis, aut nullus est alius. Atqui ostensum est esse aliquem, hic certe est. Ergo & argumentum hoc, quo conficitur nō esse hic hominis bonum, & aliquod utiq; esse, tantum est, ut multos philosophorū coegerit affirmare post hanc uitam futurū bonum quod expetimus, tametsi timide, & quasi diffidenter. Astipulatur huic nostræ sententiæ corporis nostri status rectus, & spectans in cœlum, tanquam in patriam ex peregrinatione aut exilio. Iam uitæ nostræ ratio quæ nusquā sistit, nec acquiescit præsentibus, intenta semper & prona in futurum. Bestiæ acquiescunt præsentibus, & fruuntur hac uita: quod sensus nostri declarant, qui præsentibus sunt cōtenti. mens uerò perennis in modum fluminis nusquam subsistit, semper in futurum agit suspensa & anxia. Pueri parant se iuuentæ, hæc ætas senectuti, senectus ulterius mittit cogitationes. nulla ætas sibi prospicit, sed uenturæ. Patres de filiis sunt

DE VER. FIDEI LIB. I. 75

sunt solliciti, hi de nepotibus, hodiernus dies seruit  
 crastino, hæc hora seruit sequenti, hoc momentum  
 alteri momēto. Etiam in medijs uoluptatibus si quid  
 cogitationis & mentis admiscemus, nunquam præ-  
 sentem carpinus nisi cum expectatione continuo  
 mox secuturæ, quousq; est penitus consumpta. Ita  
 prius recessit, quàm desijt sperari. Omnino quæcun-  
 que in uita cogitamus, dicimus, molimur, agimus,  
 non stant recta in præsens, sed prona in futurum,  
 & pendent ex spe: arare, serere, scribere, legere, co-  
 medere, bibere, & reliqua omnia: ut sciamus pere-  
 grinari nos atque aliquò tendere irrequieto motu,  
 non huc pertinere. Iam uerò natura summi illius,  
 in quo est finis bonorum, omne malum excludit,  
 ac proinde curas, mœrorem, dolores, quod contin-  
 gere in uita non potest. uel ipsa certe cogitatio si  
 cui bene sit, illud tamen mutari posse aut finiri o-  
 portere in morte, non sineret uitam esse iucundam,  
 nedum beatam, nisi quis obliuionem uellet animo  
 infundere, ne unquam de uarietate casuum &  
 exitu uitæ ueniret in mentem: quod fieri non po-  
 test in tot exemplis quotidianis. & sicut cor-  
 pus erectum admonet nos cœli, ita compactio  
 molestiæ ac uanitatis huius. Habemus corpo-  
 ra multarum rerum indiga, obnoxia casibus,  
 morbis, molestijs, uarijs de causis, &  
 penè

penè quotidie. Quid animum? perturbatum, irritabilem, mentem ignaram: quæ potest inter hæc esse foelicitas? Illa quoq; est insita persuasio toti serè generi humano, aliquid aliud futurum post mortem melius hac uita: & id commune desiderium expectat, ut existimari necesse sit à natura esse inditum.

DE VITA VTERI, DE HAC  
nostra & altera.

**Q**uemadmodum in matris utero paramur huic luci ac uitæ, ita in hac uita (quæ ad alteram relata similis est utero) angustia & tenebris illi alteri paramur sempiternæ. Quam sententiam nemo existimet elegatius esse uel subtilius excogitatam, quam uerius. Quippe in stirpibus uitam inesse unam deprehendimus, quæ uegetatrix appellatur, qua nutriuntur & augentur: in brutis duas, illam ipsam uegetabilem, & alteram sensus: in homine tres, illas scilicet duas priores, & rationabilem. quæ est mentis. Et in mente gemina est actio, siue intelligetia, quem admodum Aristoteles docet, & cæteri studiosi sapientiæ, resq; ipsa ostendit. altera est quæ in faciendo uel agendo est occupata, uelut in artib. quæ manuum exercentur opere, & in prudentia, & circumspeditione locorum, temporum, personarum, quibus quæq; res aut negotium accommodari conuenit: hæc rationem adhibet ijs, quæ sensuum cognitio

ne



DE VER. FIDEI LIB. I. 77

ne percipiuntur. altera est superior, & excelsior, quæ naturæ causas : & abditas procul à sensibus ueritates inquirunt, scrutantur, erunt, cōtemplantur, quæ beatorum nominantur, hoc est diuinum quiddam. Ea uerò ratione & iudiciū adhibet ijs quæ sensuum limites excedunt. Videmus hominem aliquando degere uitam uegetabilem in locis maternis, hinc egressum uitam sensualem, hoc est bruti. Progressus autem ætate discit artes, exercet se in re priuata aut publica, et usu atq; experimentis colligit prudentiam. Restat ut aliquando proficiat homo ad diuinam illam mentis sue portionem, quod nunquam fit in æui huius decursu. Paucissimi enim mentem excolunt, aut de illa prorsum cogitant. plerique omnes habeant mentem nec ne uix sciunt. qui uerò ad curam mētis aliquam magnam uel & conuictu sese erigunt, non sistunt ibi, sed retrahente mole corporis relabuntur ad curas & cogitationes uitæ huius. Qui paulisper sistunt, impediēte corporis caligine densissima nihil uident, nihil assequuntur. Vita ergo hæc alterius est æui melioris ac præstantioris, alioqui frustra esset nobis concessum tantum bonum. Quod si rerum uiliorum usum & perfectionem aliquam uidemus, utiq; huic adeo excellenti deesse sua perfectio non potest. neq; enim peritior aut melior est Deus artifex in paruis ac uilibus, quàm in magnis & præcellensibus : aut

uilia

uilia perficit, præstabilia relinquit m̃ca & inchoata. Et quemadmodum homo quum in utero formatur, quia uiuit more plantæ, clauditur angusto gurgustio, quod eiusmodi uitæ generi sufficit: ita egressus ex utero, quia sensibus est usus, prodit in amplitudinem & lucem functioni atq; officijs sensuum necessariam: sic etiam hinc discedens, quia usus mente transit in tanto maiorem & præstantiorem lucem, quanto est mentis cognitio amplior & capacior & excellentior quàm sensuum. Nascens foetus deponit inuolucra, quibus erat tectus in utero, & ea per quæ alebatur, exit nudus: sic homo abiens ex uita deponit hic illa sua ceu inuolucra. moriuntur foetus nascentis inuolucra, moriuntur & hominis ad alteram uitam migrantis. Nascitur infans quasi inuitus cum labore & cruciatu, ita & qui ab hoc corporis domicilio discedit. Egressus autem infans lōgè alia utitur uitæ ratione, quàm prius: sic animus relicto corpore. Cæterum sic habitudo ac tota penè uitæ huius ratio ex illa in matris utero formatione & constitutione ducitur, ut tali quisque sit corpore, habitudine, uoletudine, statura, forma, uiribus, qualem in prima illa fictione accepit: sic etiam uitæ sequentis conditio plurimum ex actionibus huius sumitur, ut talis sit illic deinceps animus, qualem se formauit & instruxit in uita corporis

poris, nempe humilis, abiectus, miser, si cœno & sordibus se dedit corporis, aut prauis cupiditatibus ac libidinibus: sublimis autem, erectus, cœlestis, fœlix, si menti præclaris cognitionibus uirtutibusq; excolende. Conspicit infans modò natus lucem, & in ea formas rerum nouas sibi & inusitatas, eoq; admirabiles. conspicit item animus renascens, hoc est discendens è corpore lucē, et in ea nouas omnino atq; admirabiles rerum facies, quales nunquam hic esset antea suspicatus. Et in utero quidam foetus adeò sunt uiuidi uigentesq;, ut subinde se commoueāt, & quasi sensum quendā uideātur præ se ferre: alij torpētes, penitus immobiles, nunquā aliter sentiūtur. quā timore. ita & in hac uita, alij nullū ostēdunt alterius uitæ sensum, caligini huius immersi, et tanquā obruti alto gurgite: alij intelligētia & uirtutibus innixi, iam hic quales postea futuri sint declarāt, & gustū quendā nobis præbēt æui uēturi. Huius quoq; & in sequentis uitæ magnā quotidie cernimus imaginē in ijs quæ per somnū, quæq; per uigiliā aspiciamus et cognoscimus. In quiete regnū est phātasia, illa sursum & deorsum uersat, miscet, cōfundit, perturbat omnia, quales sunt uitæ huius cogitationes, desideria, cupiditates, in quib. omnib. sensib. ducimur, ac proinde phātasia & rōne ualde tenui, atq; ea turbulenta. ad quā cōfusiōnē et tenebras si hæc cōferas, quæ  
uigilantes

80 IOAN. LOD. VIVIS

uigilantes cognoscimus atq; intelligimus, in promptu erit colligere, quàm alia futura sit altera illa uita mētis, quàm hæc nostra sensuum. Somnus est hæc uita nostra. nec aliter transit quàm somnus. & similiter præterita hæc afficimus, ut quæ animo per quietem occurrant. Multa etiã uidemus somniantes, quæ non minus certò & efficaciter iuremus nos intueri & agere, quàm quæ spectamus uigilantes agerimus. Itaq; & qui somniauit, putat se uidisse: & qui uidit, somniasse. uidelicet non minus uigilantibus densa offunditur animis caligo, quàm dormiētibus: & memoria nostra non pauca in se cōdita reseruat, quæ nesciat cognitio diiudicare dormiēs ne illa asperit an uigilans. adeò sunt pleraq; omnia in nostris animis pressa obscuritate, & confusa. In sequenti uero æuo lux erit maior, & mentis cognitio atque exercitatio expeditior atq; liberior, eoq; erunt omnia perspicua magis, distincta, certa.

QVID SIT DEVS.

**P**Aranti mihi explicare amoris huius uim & rationem quo cum Deo coniungimur, obijciunt se mihi quæstiones aliquot, quas prius conuenit summouere, quàm ad alia pergamus, ne sint nobis in uia impedimento. Multa diximus, & bonam fecimus spem de uita altera immortali, tum de Deo ipso summo & præpotenti. Querat aliquis, cuiusmodi hic sit



sit Deus? tum, an aliquid remanet nostri post fata?  
 Nam si nihil plus restat quàm oculis cernimus, quo-  
 modo esse altera uita poterit? De Deo dicamus  
 prius: nā id exposcit ordo disputationis. Multa sunt  
 nobis in prima Philosophia aduersus eos disputata,  
 qui de summa illa & infinita natura parum rectè  
 sentirent. Hic dicemus, quantum proposito satis e-  
 rit, reliqua illinc petentur. Agemus hoc loco simpli-  
 cius & apertius: quippe disputatio illa doctorum  
 erat accommodata auribus, hæc uerò etiam uulgi.  
 Primum omnium, de Deo facilius est quid non sit di-  
 cere, quàm quid sit: superat enim ingenij nostri ca-  
 ptum. meritoq; responsum Simonidis cōmendatur,  
 qui quid esset Deus interrogatus à Hierone Syracu-  
 sano, dies aliquot dicitur ad cogitandum postulasse.  
 his transactis, alteros tanto plures: ita duplicasse  
 subinde numerum. quum tyrannus cur id ageret ad-  
 miratus quæsiuisset, Quoniam, inquit, quo magis in-  
 quiro, eo minus inuenio. Plura indies occurrunt ani-  
 mo, & difficiliora. uidelicet ingreditur mens nostra  
 pelagus immensum, in quo nullæ prorsum apparent  
 terræ, sed quemadmodum Poëta inquit, Cælum un-  
 diq; & undiq; pontus. Et tamen magnos & perni-  
 ciosos errores ignoratio diuinitatis parit in homi-  
 num uita, non quidē inscientia quid sit, sed uel igno-  
 rantia socors prorsum & secura de numine, ut non

libeat illud qua datur cognoscere : uel praua opinio  
 eius quod non est. quæ perniciēs latè per humanum  
 genus sese diffudit. Nos tamen ex rebus ab eo condi-  
 tis utcunq; illum inuestigabimus. nempe authore ab  
 opere, uti aliàs diximus, & ex ijs rebus quæ non est  
 id quod est eliciemus : obscure sanè ac tenuiter, sed  
 quantum nobis satis erit ad eum & colendum et a-  
 mandum. nam hoc ut necesse est nobis, ita etiam suf-  
 ficit. Quæ porro erinus consecuti, expromemus  
 uerbis nostris. Nam propria quibus uerè apteq; es-  
 sentia illa declaretur, nulla habemus. nec mirandum  
 est non suppetere homini uerba, in eo quò eius intel-  
 ligentia non peruadit. Eas quidem quæ hic inter nos  
 animaduertimus excellentias attribuimus Deo, ille  
 autem excellentias nostras omnes longissimè sub se  
 relinquit. Nec protinus falsæ aut reiiciendæ sunt no-  
 minationes nostræ, quæ nobis congruentes sunt, &  
 ad qualemcunq; intelligentiam de illo nostram appo-  
 sitæ ac sufficientes, certè ad illam quæ illi amando  
 sit satis. Sit hoc principio nobis positum, quicquid  
 in specie aliqua seu forma, seu quo alio nomine appel-  
 lare libeat, quicquid inquam in ea sit naturale, id  
 imaginem aliquam uel similitudinem uel uestigium  
 authoris sui referre. quod in nostris opificibus anno-  
 tamus, ut quæ arte aut ingenio ab illis sunt perfectæ,  
 imagines sint interiorum animi cogitatum. Iam  
 pri-

primum Deum eorum omnium quæ sunt præcipuè quiddam esse ac summum aimus, nec eo aliquid posse maius esse. Quippe si quid inueniri maius posset, non iam hic Deus esset Deus, sed illud alterum amplius atq; præstantius. Aimus quoq; esse unicū. Hæc nanq; est summi ratio, ut unum sit ac solū, nec essentialium pluralitas uel entium uel rerum. Exponenda sunt hæc uarijs uerbis, quo intelligatur facilius. Hæc igitur pluralitas in natura illa & regno esse non potest, ut à multis est ostēsum. quomodo autē, aut quæ sit illic pluralitas, mox aperiemus loco suo & proprio. Omnia uerò siue naturalia, siue quæ arte constant, referri, quoad eius facere possunt, ad unitatē cernimus. Enia naturæ sectio ac diuisio tradit corruptioni, ideoq; quoad eius possunt efficere, coniungunt sese ac coadunāt, atq; in unione ad sui tutelam persistunt, uidelicet hoc indidit eis opifex natura, ut norint quodāmodo in unione positā esse salutem, cōtrā in distinctione perniciē. Quin et ea quæ ex se ipsis plura sunt numero, ad unitatē quandā rediguntur, ut ligna et lapides in domo uel in cumulo, et grana in aceruo. Domus ad unū familiæ patrem reduci tur, ciuitas ad unū principē. etiam quæ aristocratia uel democratia utuntur, unū nihilominus sibi præficiunt magistratū temporariū: aut si plures, hoc certē spectāt, ut cōformitate sententiarū ac uoluntatū,

plures illi unum fiant. Quod si quemadmodū corporibus, ita & memib. diuersi sint, intereat ciuitas necesse est, excitatis in ea factionibus atq; intestina discordia. Belli gerendi ratio quæ exactā conseruandi exercitus disciplinā præcipit, imperatorē unū requirit, ad quē rei totius summa referatur. Quod si sint duo, uel partiūtur exercitū, ut Q. Fabius, & Minutius: uel alternis diebus imperāt, ut L. Paulus, & Terentius Varro: uel cōmuni utūtur cōsilio & uno, ut alij permulti. Hic autē Deus unicus, qui mūdo quem cōdidit præ est, potentia maximus est ac summus: et quemadmodū unus mundus, ita et rector illius unus. ac uice uersa, sicut unū corpus uni animæ, et una anima uni corpori. Neq; est aliquid quod Dei uirib. queat obistere. Est item omnipotēs, ut omnia quæcūq; sit collubitū, possit perficere. Nam si nō efficeret, in eo esset impedimentū, aut in rebus. Ipse quidē sibi nō repugnat, qui simplex est, et sui ubiq; similis: neq; ex rebus cōflatatur uel aduersis, uel diuersis. Porro si est in eniib. resistētia, aliquid foret ei par, quod nefas est cogitare, neq; esset maximus & supremus omnium. Quid, quòd in rebus omnibus resistētiæ causa & ratio hinc oritur, quia contra naturam suam aliquid patiuntur. At qualem Deus quamque rem iubet esse, & uult, ea est cuiusque rei natura, uis, pronitas, : neque enim aliud est natura. quicq;



quicq; ergo is in re quapiam uult fieri, id fit secundum rei ipsius naturam, nō quidem iuxta hanc consuetam ordinariam, sed secundum extraordinariam naturam, tamen non ergo uolente, nec adhibita ulla resistantia. Cæterum illius omnipotentia in eo sita est, non ut patiatur quod nolit, sed ut efficiat quod uelit. Neq; enim corpus esse potest, aut moueri, cædi, dolere, augere, minui, delassari, obliuisci, cogi, uim pati, uinci, interire. Non sunt hæc potentia, sed imbecillitatis, quippe nihil horum pateremur nos si possemus. Sed neq; illa sunt potentia, facere aliquid & esse, & non esse, album pariter ac nigrum, quæ Plinius Secundus non posse Deum facere cauillatur, unde inepte se contra eius omnipotentiam collegisse aliquid autumat. Hoc uerò incōstantia foret, non uirium, nempe eodem temporis puncto uelle ac nolle, approbare & improbare. Nam si quid facit currere, uult id currere: sin idem ipsum sedere, non uult currere. Nec potest duos habere motus uoluntatis contrarios, & duo aduersa iudicia, faciendum & non faciendum, hoc tale, & non tale. Sed nec potest agere, quod non potest uelle, ut seipsum occidere, aut miserum facere. non enim accidere quid potest, ut id uelit. Quod si omnipotens est, nec aliquid ei uel nocere potest, uel obsistere, nec uoluntatem habere potest ut intereat, immortalis certe est, tum

etiam eternus. Nam si quis hunc creasset Deum, ille utiq; Deus fuisset & mortuus. quod est nefas. Hic item Deus beatissimus est, & bonis omnibus cumulat. Nam si quicquid uult efficit, quid cause unquam fuerit, quo minus beatissimus sit? Miseria est enim in ijs quæ aduersa nostra uoluntate accidunt. nec re ulla extra se indiget, per se sufficiens & plenus: alioqui esset quod fœlicitatem eius posset impedire, nèpe res illa exterior: nec esset beatissimus, cuius beatitudinis fons atq; origo non in ipso eodem esset, sed foris adueniret. quod in homine nemo concederet, ut beatum eum quæ exterius sunt reddant, quanto minus in Deo. Accedit his summa sapientia. Nouit enim omnia, nec ulla cognitioni illius interponitur nubecula, quo minus omnia liquidò prospiciat. Quòd si sapientissimus non esset, neq; omnipotens, aliquid uidelicet posset uelle, quod perficere per ignorantiam non ualeret, quemadmodum pueri, aut rudes atq; inexperti, aut etiam homines prudentes, quos tamen latent & fallunt permulta. Et quia beatissimus est, fit ut sit optimus quoq;, hoc est beneficentissimus ac munificentissimus absque omni prorsum inuidia: nec res ulla naturam illam potest peruertere, ut sit malus, hoc est noxius ac maleficus. tales enim sumus uel irati quia læsi, uel metuentes ne ledamur, uel ex malitia, uel errore mētis. Deū  
nihil

nihil potest ledere, beatissimū & omnipotentē, & magnitudinis suæ probè conscius nihil timet. Quid, quòd uel ipsa ledendi cogitatio acerbæ est animo, & quietem illius interrumpit. At quemadmodū infinita illa sapientia nō fallitur, ita nec potest fallere. fallunt enim qui aliquid concupiscunt, quod obtinere nisi à deceptis non queunt. Bonitatem uerò habet, quàm singulis momentis experimur: quam quòd ab alio non acceperit, sit, ut natura sua habeat. neque enim à rebus conditis potest accipere, quæ posteriores sunt illo, quæq; omnes ab illo acceperunt, nihil dederunt ei, pleno per se, et perfectionis numeris omnibus absoluto: nec ante illum præcessit Deus aliquis, cuius tanquam hereditatem adiret sapientiæ aut bonitatis. Cui uerò bonum est naturale, malum erit profectò contra naturam. nihil autem facit contra suam naturam: id enim faceret inuitus et coactus, & uim patiens, quod contingere non potest. Et quoniā Dei uoluntas causa est rerum, uoluntatēq; eius mouere non potest malicia, sed bonitas omnia facit, ut prosit, ut uiuet, ut beneficiat. Itaque ex eius operibus atq; effectibus quos uidemus, colligere est rationem uoluntatis illius, quòd ita decebat moderate sapientia, quòd ita expediebat hortante bonitate. Ex alijs ad alia uenietur quasi per gradus, quorum omnium erit bonitas suprema.

QVOD DEVS CONDIDIT OM-  
nia, quodq; eius providentia omnia  
reguntur.

**N**on capit humanæ mentis cogitatio, rem ul-  
lā fecisse semetipsam: facta est igitur ab alio.  
Neque uerò extitit fortuito, & casu quodam: cui  
commento Epicuræorum ordo & constantia uni-  
uersitatis magna uoce re clamat. & consensus gene-  
ris humani hoc attestatur, eū qui summus sit in mun-  
do, autorem parentemq; esse omnium. Ratione sunt  
certe condita omnia, & maxima ratione: qualis in  
eo est solo, qui est maximus. Sapienter M. Tullius:  
Non solum ea quæ sunt in mundo, ut fierent ratione  
eguerūt, sed intelligi qualia sint, sine summa ratione  
non possent. Hunc qui hæc omnia confecit, par est  
esse æternum. ut superius diximus, à nullo æditum,  
& immensæ potestatis. Etenim eum qui omnia hæc  
quæ intuemur in hanc faciem & pulchritudinem  
produxit ex nihilo, uiriū esse oportet infinitarum.  
quippe à nihilo ad aliquid interminabile est siue spa-  
cium, siue interuallum: sicut uicissim terminabile est  
ab aliquo, quantumcunq; maius sit, ad aliquid quan-  
tulumcunq; minus. quo autem res est separatio-  
rior, hoc maiore opus est ui ad eam perdu-  
cendam quò agens destinauit: ut maior est uis adhi-  
benda ad lignum crassum & uiride uel accenden-  
dum



dum, uel secundum, quam stipulam arentem. Quo-  
 circa præter diuinam potestatem nulla omnino po-  
 test de nihilo aliquid producere, quod nostri creare  
 uocant. Sed ea operatio qua ens à non ente prodit,  
 ut maxima & summa, ita est etiam summi agentis  
 ac potētissimi. Sed non in his tantum, uerum in alijs  
 etiam permultis hallucinati sunt homines munda-  
 næ sapiētiæ studiosi: quorum alij omnia reuocarunt  
 ad sensus corporeos, tanquam mentis penitus exper-  
 tes: alij uiribus ac limitibus naturæ huius claudunt  
 ea quæ sunt diuinæ omnipotentiae, quæq; naturam  
 hanc omnem excedūt. Vetustissimi philosophorum  
 nihil considerarunt aliud, quam mera corpora. itaq;  
 omnia existimabant è corporibus fieri ac cōstare,  
 mutatis solum inhaerentibus: uelut Democritus, Leu-  
 cippus, Anaxagoras. Democriti sententiā Epicu-  
 rus est secutus: posteriores, uelut Plato & Aristote-  
 les paulò plus habuerunt mentis, hoc est hominis,  
 studioq; & industria penetrarunt introrsus ad con-  
 templationem effectuum, quæ ēdū nuncupātur,  
 formæ à nostris, siue effectiones: de quibus in pri-  
 ma Philosophia disputauimus. sicut & illud est à no-  
 bis eodē loco tractatū, nihil in mūdo temerè aut for-  
 tuitò agitari, omnia diuinæ mentis geri consilio:  
 quod etiā maximi & nobilissimi philosophorū do-  
 cuerunt. Nam casus & fortuna ab ijs est nata, qui  
 F s causas

causas rerum uel non perpendunt, uel non assequun-  
 tur: quæ plurimorum est origo errorum in omni ui-  
 ta & cognitione. Hi uerò quam cecitatem in inge-  
 nijs suis gestant, transferunt ad regimen naturæ, ut  
 nulla ex causa fieri opinentur, quorum ipsi causam  
 non inueniunt, terminisq; sue ipsorum ignorantie  
 administrationē mundi diffiniunt: haud aliter quàm  
 pueri, aut fatui, de operibus sapientum censent. Sed  
 merito, qui deos aut nullos posuerant prorsum, aut  
 segnes ac torpentes, casui & fortunæ permiserunt  
 omnia, ne dii meliores habeant ministros, quàm sint  
 idem ipsi. Nam si mentem aliquam & rationem at-  
 tribuerent administram, hanc certè omnes malle-  
 mus Deum esse. Et quemadmodum qui particulam  
 quampiam magni regni contemplantur, quia non  
 omnia uident euenire, quemadmodum ipsis expe-  
 dit, damnant ilico procurationem & consilium  
 regni illius, quum tamen optimè & saluberrimè,  
 & sicuti uniuerso corpori conducit, gubernetur:  
 quiq; unum aut alterum diem accepti sunt hospitio  
 in ædibus prudentissimi ac diligentissimi patris fami-  
 lias, animaduertūt nihilominus aliquid quod parum  
 probent, damnant ilico apud se cōstitutionem illius  
 familie, quum rector domus non ad unum illum aut  
 alterum diem referat rationes & constitutionem  
 domus sue, sed ad totum annum, aut longius tem-  
 pus:

pus: Ita qui portionem aliquā mundi ad breue quodam tempus considerant, aut ad utilitates seu libidinem potius aliquorum referunt, sic improbant, ut agi temerè arbitrentur & sine numine: quum diuina illa sapientia non omnia ad unum aliquē angulum, uel ad certos aliquot homines, nec in unū annū aut seculum describat & referat sua opera, sed incredibili ratione ac consilio ad omnes regni sui partes in æuum omne. quæ si perpenderemus, si interrogaremus sapientes, & priscam consuleremus memoriam, multo iudicaretur tantis de reb. & uerecundius & cordatius. Nunc uerò pueri nati heri aut nudiū tertius, imperiti, inexperti rerum, inexercitati, pleni prauis studijs atq; animi affectionibus, uacui atq; inanes ab omni doctrina et eruditis cogitationibus, sententiā ferimus de maiestate tanti opificis: & quos pudere oportebat de rebus humanis uerbū ullum facere, nō pudet de diuinis quicquid collibitum est statuere, abrogare Deo regnum mundi, & tribuere fortunæ temeritati, quam nullam quidē uiderunt in mundo, sed ex inconsiderantia suarū actionū, ex impatientia euentuum inuexerunt, ut meritò illos satyrica maledicentia Iuuenalis perstringat, dicens:

Nullum numen habes, si sit prudentia, sed te

Nos facimus Fortuna deam, cœloq; locamus.

Et Aristoteles: Vbi plurimum sit prudentiæ ibi mini

mun

inum fortunæ. sicut rursum, ibi fortunæ plurimum, ubi prudentiæ perparum. In multis ea est superbæ atq; arrogantie impotentia, ut curam omnem terrarum in se unos conuerti oportere censeant. si quid ipsis accidat quod nolint, continuo faciant ingens Deo conuicium, imò ipsum præesse mundo negent, aut prauè atq; iniquè res administrare, & audent illum iurgio laceßere. Prætereo insanorum regum dementias, ut Xersis & Caligula, qui similitatem sumebant cum Ioue & Neptuno, quos esse Deos rebantur. Lucanus uerbis Cæsaris dictatoris, quàm aptè ad arrogantiam principis ex fœlicitate insolentis?

Nunquam se cura deorum

Sic premit, ut uestre uitæ, uestraq; saluti

Fata uacèt, procerū motus hæc cūcta sequuntur.

Humanum paucis uiuit genus.

Quasi uero regi naturæ, cuius leges sunt fata, aliquid sit in mūdo uniuerso magnū, aliud paruum, nedum in hominum reculis ac negociolis. Ille enim imensus, infinitus, æqua proportionē excedit reliqua omnia quæ sunt definita, magnum, paruum, humile, excelsum. nostra sunt hæc omnia inuenta, non illius: quæ non solum ipse non nouit, sed nec eius ministra natura in plurimis. cui tam facile est aurum producere, quàm plumbum, ligustrum quàm rosam: sicut pictori



DE VER. FIDEI LIB. I. 63

pictori. æquè est leue togam sericam pingere, ut laneam: & in hominibus creandis tanta difficultate nascuntur plebeij, ut nobiles. ex eisdē omnes constamus elementis. Regit quidem Deus ciuitates & populos per principes ac procures: sed non minus priuati hominis cura tangitur, quàm principis. & si præsentius ostendit se adesse rebus principum, non propter eos, quorum quiuus unus est homuncio, sed quia illis tam multa hominum millia coninētur. Et tamen si quis expendat uniuscuiusq; priuati hominis uitæ cursum, manifestam deprehendet curā Dei de illo. Quidam uerò nollent esse Deum tam ubiq; præsentem, prouidentem omnia, cernentem omnia, testem, iudicem ac uindicem malorum, tanquā obseruatorem quendam actionum nostrarum, uerborum, cogitatum. & quemadmodū mali facinorosiq; homines libertatem esse ducunt abolitionem magistratum & legum, ne à quoquam scelerum suorum poenas expectent aut metuant: ita & hi libertatem incredibilem fore sperant, si nullum consilium præsit mundo, sed omnia casu & temerè ferantur, & sine arbitris peccent. Ea mente Lucretius Carus poëta Epicuræus, Epicurum ait magno metu liberasse humanas mētes, quòd superstitiones sustulerit, & fortuitu geri omnia cōfirmarit. deos ipsos nempe beatissimos, nec habere negocij quicquā, nec exhibere alijs:

alijs: scilicet in diuis adeò delicatis interruptum iri  
 quietē illam beatissimam, si quid rerum molirentur.  
 Age uerò, an ne est libertas ciuitati, nullum haberi à  
 quo regatur? est libertas naui, sine clauo & guberna-  
 tore undis ac uento permitti? libertas ergo erit, nul-  
 lum esse in schola præceptorem, nullum in domo pa-  
 trem familiæ, nullam mentem in homine, sed solas cu-  
 piditates miscere, ac turbare omnia pro libito. Id ue-  
 rē nec pecudes cuperent, quarum interest pastores  
 habere, à quibus deducantur in pascua, atq; in eis de-  
 fendantur ab iniuria ferarum. Deniq; dicant mihi, cu-  
 ius coetus libertati cōducatur sine magistratu, sine re-  
 ctore, sine consilio & legibus uiuere, ita sanè magna  
 metuliberauit Epicurus humanas mentes, sed pesti-  
 mas & flagitiosissimas. Nam bonis quid nunciari  
 potest acerbius, quàm Deū terras non respicere, nec  
 homines curare? quāta licētia præbetur malo ad om-  
 ne facinus, quāta desperatio bonis omnibus. quòd  
 careāt eo, cui mentē & cōscientiā suā sint approba-  
 turi: quā hominib. approbare uel nō possunt. uel non  
 curāt. Vir bonus siue exulet, siue expiletur, siue affli-  
 gatur, siue pro beneficio maleficiū recipiat, quanta  
 est illi & quā efficax cōsolatio, scire præesse mun-  
 do, qui falli nō possit, optimus ac potētissimus, cui mē-  
 tes nostræ apertæ atq; expositæ sint, sub illius ocu-  
 lis atq; arbitrio fungi se officio probi uiri, illos mali.

At

At molesta res superstitio est, fateor: eā sustulit Epicurus. Rectè Cicero, quasi difficile sit tollere superstitionem, ubi religionem sustuleris. perinde ac si quis dicat, Liberaui hunc profusione, auarum enim reddidi, liberaui temeritate, quia timidum: liberaui dolore, nam occidi. Sed opinio hæc minutorum est philosophorum. illi uerò quasi maiorum gentium, Socrates, Plato, & Socratici omnes, asserrunt diuinæ mentis procuratione terras & cælos gubernari, nec quicquam ferri casu aut fortuitò. Nam quid magis temeritati fortunæ aut casus contrarium atque inimicum, quàm ordinis perpetui series & constantia? In toto uerò mundo uidere est ordinem inuariabilem atque admirandum. Facies uniuerſi qualis est nunc, talis fuit omni hominum memoria. Non aliam uidere patres, aliam nepotes Aspicient: inquit Manilius. Motus cælorum & actiones sui semper similes, rerum inferiorum species eodem modo procedunt. Nam & si in singulis rerum uariant nonnunquam inherentia, ut in aliquibus hominum, in aliquot frugibus, hoc aut illo tempore uel loco, in uentis, inundationibus, incēdijs: natura tamē speciei eadē est perpetuò, & inuariabilis, eadē formæ, eadē facies rerum, eadē cupiditates, appetitus, actiones, opera. Vbi ergo est casus, ubi temeritas in natura, in qua est tātā, et  
tam

tam perpetua constantia, tam omnia certis adeo  
 legibus descripta & constituta? temeritatis enim et  
 fortuiti casus propria sunt uarietas, incōstantia, mu-  
 tationes crebrae sine causa, & diuersissimae. Nam si  
 tu quod uenti mutantur, quod facultates & fortunae  
 hominum & regionum, protinus casum colligis, ca-  
 su etiam dices fieri, quod in aestate aliud sumas pal-  
 lium, quam in hyeme, & alijs utare ciborum generi-  
 bus. Ad eundem modum casum esse affirmabis muta-  
 tiones quatuor anni temporum: nō enim semper est  
 idem habitus coeli & soli, quum nihil ordinatius co-  
 gitari possit aut descriptius. mutantur enim rerum  
 perpetuarum & immutabilium actiones, prout ex-  
 pedit ijs ad quae referuntur. Quam illud prudenter  
 & magno est ab Aristotele iudicio animaduersum,  
 si quis ex tenebris prodiret in hanc lucem coeli &  
 mundi, quem nunquam antea conspexisset, nec de il-  
 lo audiuiisset, consideraret autem cursus & actiones  
 rerum, nullo penitus modo dubitaturum hunc, quin  
 haec omnia cura consilioque tenerentur principis  
 sapientissimi & potentissimi. Addam his Marci  
 Tullij argumentum: Quaecūque consilio reguntur,  
 melius & aptius reguntur quam quae sine illo, nihil  
 uerò melius, nec pulchrius mūdo regitur: cōsilio ergo  
 nō fortuito regitur. Assignet uerò mihi aliquis quip-  
 piā in mūdo uniuerso, quod nō ordine & sapientia  
 procedat



procedat, siue cœlos, elementa, siue animâtes, herbulas, plantas, & alia quæcunque: omnia suos habent cursus, suos fines destinatos ac certos. Regere autem est, rem in finem dirigere, & quasi cursum eius moderari, quo finem pertingat. hoc idem est gubernare, ut nauem aut equum. Quis ergo uerius res conditas regit ac gubernat, quàm qui condidit, qui metam assignauit, qui uires attribuit, quibus ad metam perueniant? an non regit equum, qui illum in uia dirigit? non nauem, qui clauum torquet & moderatur? Vnde sunt initia, progressus, fines, uires, facultates rerum, si non à seipsis? ab aliquo ergo summæ uirtutis atque artis, quæ temeritatem omnem excludit. Is ergo summæ potentiæ, seu uerius immensæ, conditor est, rector, gubernator, moderator omnium. neque enim temerè reliquit ab se condita, sed attribuit cuiq; uires, quibus se tuerentur, & actiones exercerēt sibi utiles, ut uiuerēt, uigerēt, ualerēt. Videmus annis tribui à Deo, p quæ uita propagatur, p quæ sensus oblectantur, mētes pulcherrimo atq; admirabili spectaculo detinētur. Age porrò, ponamus Deū qualis est à nobis euidentissimis rationibus descriptus. quæramus iā ab aduersarijs, quid causæ esse dicant, quo minus qui sit eiusmodi, non regat, & procuret mundū. An deerit ei regendi scientia, qui est sapientissimus? an uis

& potentia, quæ est in illo immensa atq; intermi-  
 nata? Quid ergo? cælum, aut fortuna, aut casus po-  
 terit & sciet mundi procurationem sustinere &  
 exequi, princeps mūdi tanta illa ui & sapiētia ne-  
 sciet, aut non ualebit? Quidam Epicuræo more ni-  
 mis occupatum fore Deum atq; anxiū caussantur,  
 si in eius humeros uniuersitatis administratio in-  
 cumbat. qua ratione prouidentia Iouis deridet Lu-  
 cianus Sophista, & Plinius Secundus, in regnum  
 mundi frigidissimis cauillis uterq; ludens. idcirco  
 pœnas euenire maleficijs seras ait Plinius, quod  
 princeps naturæ occupatus tanta regni mole, non  
 potest omnibus pariter consulere. omitto Lucia-  
 num, hominum & deorum subsannatorem. nam  
 irridere omnia, multo est facillimum. Loquar de  
 Plinio. an non uidetur uobis homo grauissimus in  
 re tāta scurrari? Si Deus est homini similis & par,  
 & ad normam nostrarū uirium diuinas metimur,  
 iure prouidentiam Dei rident, & illius miseren-  
 tur, in quem tanta premat regni moles, atq; adeo  
 molestia. Sed quis fingit sibi cogitatione talē Deū,  
 nisi qui nec cogitationem, nec mentem omnino ha-  
 bet ullam? Aristoteles quoque non minus ineptē ac  
 absurdē in libello de Mundo, si modò eius est hoc  
 opus, cuius phrasis reclamatione titulo: sed cuiuscunq;  
 est, is Deum facit similem magno Persarum regi,  
 Xerxi

Xerxi puta, uel Cambysi, uel Dario, qui ipse per se maxima & pulcherrima regni obeat munia, minora & sordida mandat alijs. indignum ducēs, tantum principem manus ollæ, aut scopis, aut strigili admouere. Ita principē naturæ affixum cælo extremo per ministros procurare hæc terrena, à quibus certior fiat quid agatur. Cui simile est illud apud Ciceronē II de Nat. deorū: Magna dii curant, parua negligūt. Malè profectò agitur cum pietate numinis, quoties humana infirmitas ad Deū transfertur. non enim fit homo Dei potentissimi ac optimi similis, sed è cōtrario creditur, Deus malus atq; imbecillis homini similis. Hic est error Homeri & poetarum de dijs, confutatus à philosophis, explosus atq; eiectus illustratione ueritatis, quā Christus attulit secum è cælis. Ecquid tandē simile aut commune habet Deus cum Xerxe? Xerxes homo delicatus, uitam quandam instituerat uoluptariam: quā lēdi & interturbari autumabat, si ipse uel culinam suam, uel equile aspiceret, uel uestes suas detergeret, aut se ipse pecteret. ille ita agebat. Cyrus autem rex eiusdem gentis, multo aliter: & Fabricius, & Annibal, & Marius, & Cæsar, & Alexander, qui primi in exercitu duris & difficillimis operibus admouebant manus, & quid militi agendum esset exemplo sui edocebant. Sed quid

hæc tamen ad Deum? quasi illi quicquam sit maius aut minus, sordidum uel nitidum, & non omnia in finito paria, & spiritui æquæ munda. At indigna sunt tanto principe eiusmodi ministeria. Quis fecit indigna? Nam digna & indigna non natura separauit in Deo, sed superbia in hominibus. Indignum est, ut locuples malus & inscius uerrat cubiculum: non est indignum, si uir bonus & sapiens pauper id faciat. Vides esse prauitatis iudicij, & superbiæ, quæ ex opulentia nascitur. Sed quæ tandem sunt istæ sordida atq; indigna manibus Dei, ne coinquantur? sublunaria scilicet uaga, fluxa, inconstantia, mille mutationibus per horas singulas obnoxia, tum ortibus & casibus perpetuis. Ceu uerò non supra lunam motus sint incitatiores, & mutationes crebriores, quàm sub luna. Nasci autem & interire multa, ea est mundi huius ratio: sicut oriri solem & reliqua sidera, tum abscondi, coniungi, & separari. Nec magnitudo & sapientia minus elucet in his paruis, quàm in illis uastis corporibus. Quanta est admiratio artificij diuini, & ueneratio maiestatis ex contemplatione apicula, aut formiculæ? quod idem ipse Aristoteles in libris de Animalibus fatetur. Quid, quòd cœli & sidera stabilitate sua, cognitisq; authoris sui legibus uadunt, ut parum uideatur esse opus providentia.

Hæc



Hæc uerò quæ tu fluxa, & uaga, & inconstantia nuncupas, nisi magno consilio & prouidentia temperentur, confundentur breui & peribunt: ut magis se quotidiana Dei prouidentia in infernis quàm supernis proferat. Non ergo sunt indigna Dei procuratione, quæ illa tantopere indigent, quæq; sapientiam procurantis ad cultum & uenerationem illius euidenter præ se ferunt & monstrant. At regit hæc, & nouit per interpretes. Difficile est cogitare, quemadmodum illa perfectè norit. Si aliorum relatu intelligit, quis terminauit scientiam illius? qui locus, quæ regio potuit impedire, ne illius cognitio progredereetur ulterius? Hæc præscribere hominibus aliquem, & definire, quantæ & quàm proiectæ est insolentiæ? Tu ergo quum ingenio tuo coneris penetrare terras & maria, etiam cœlos ipsos transcendere, diuinam mentem cœli carceribus coercere? quanto esset congruentius, affirmare aliis omnes mentes per illum nosse, quæ nouerint, quàm è diuerso illum per eas? aut sic ipsum in se nosse omnia, & aliis mentes in eo, & per eum quantum ipse permittat. Quamuis ipsum ministris uti uerum est, attestante diuino oraculo: Qui facit angelos suos spiritus, & ministros suos flammam ignis. & alio in loco: Millia milliū ministrabāt ei. quemadmodum instrumento cœlorum inferiora hæc

gubernari, opinio est multorum. Ille tamen qui omnium est conditor, nullis instrumentis indiget. Nā si id continuo fit, quicquid ipse uult, uelle illius erit author atq; instrumentū. nec magis ad hæc regenda astris indiget, quā quum luto aperuit oculos cæci: sicut refert historia Euangelica. lutum enim magis uidebatur obturaturū oculos quā aperturum. Sed ipse ostendere nobis uoluit omnem naturam esse sibi instrumentum ad quiduis, quantumcunq; alienum. Itaq; si princeps ille naturæ uellet, tam regeret mundū saxi quā sideribus. Archimedes Syracusanus mathematicus spherā composuit automatam, quam multi adhuc imitantur. Poterit ergo sine angelis mouere spherā suam homo, non poterit Deus? Ministros ergo ad ordinem & concinnitatē naturæ Deus condidit, non ad necessitatem suam. Neque enim est Deus uel imperitus, uel inualidus, ut homo. Quas res ipse per se absq; instrumentis creauit, eas res solus potest tueri ac regere. Quā alienū esset ab omni ratione, ut quod maius est, posset, impos eius quod esset minus ac leuius. Iam uerò quæ ipse per ministros suos, quæq; per instrumenta sua gerit, num non ipse idem dicendus est gerere, ut princeps à quo iussus minister aliquid agit? An non ego scribo, quia penna in scribendo uior? Quocirca curat terras, qui per ministros

ministros, quiq; per instrumenta curat: non aliter, quam qui horologium et quamcunq; machinā automatā instruit. vires enim et motus instrumenti ab eo ipso sunt. De scientia et potestate diximus, restat de uoluntate: quæ etiam duabus illis prioribus propemodum est manifestior. Quid enim potest despiciere, aut sua cura indignum ducere, qui procreauit omnia? Non enim procreasset, quod inter opera sua nollet reponi: non conseruaret, quod indignum duceret sua cura. Quis enim uel obsistere eius uoluntati potest? aut ab eo rationem reposcere, cur ita agat? qui omnia agit iustissime, refertq; omnia ad utilitates nostras, nihil ad suas, quas nullas prorsus habet. Cedò autem, quid ille usquam condidit tam abiectum nostra existimatione, et despiciatum, in quo non uarijs modis reliceat similitudo sapientiæ, maiestatis, bonitatis ipsius? ut appareat nihil ab eo contemni atque sperni, quod tanto artificio crearit. Ad hæc cauſſe omnes effecta sua curant, et quantum est uirium suarum conseruant: atque eò diligentius, si cognoscendi facultate sint præditæ. quod quum sit naturale, profectò ad aliquā Dei similitudinē est rebus insitum. Neque enim aliunde sunt naturæ nostræ omnes, q̃ ab eo: omnia illuc se dirigunt et referūt, ut quantum efficere possint, Deum in se reddāt ac

representent. Accedit huc, quod opifex omnis sapiens, opus quod fecit quamdiu approbat conservat, si potest: certe ad curam suam censet pertinere. Deus uero non solum sapiens est, sed etiam optimus: omniaque illius opera, quoniam illius, bona. At quo quis excellit probitate, eo pluribus uult prospicere, et plura in curam suam recipit, eaque dexterè et scienter tractat gubernatque, si bonitati adiuncta sit industria. Adde quod amor causa fuit condendi mundum. Amat Deus omnia, quia sua, et idcirco bona. Quid porrò amatur, quod non etià curetur, et quidem sedulo? Quod si curat omnia, si nihil omittit penitus, si etiam procul (ut sic loquar) disita, et tenue sui uestigium referentia: quanto magis et peculiarius hominem, qui magna de causa quum reliqua sint opera, is unus propter communicationem mentis filius dici illius possit? Itaque in sacris literis non solum dicitur conditus ad similitudinē Dei, quod est commune omnibus, sed ad imaginem quoque. quumque illi uni ex rebus omnibus quæ corpore essent uestitæ, curam indiderit colendi et amandi sui, manifestior est cognatio Dei ac hominis, à quo uult nosci se, coli, diligere, eumque idcirco peculiari esse etià Deo curæ. Quod si quæ magis amantur, curantur diligentius: perfectio apparet, magnam curam gerere Deum de rebus



bus hominum. Quid enim manifestius ostendit se Deus diligere, quàm nos, quibus omnia hæc inferiora tanquam domesticam supellectilem parauit? Nam si quis brutorum uitæ rationem, conditionē, mores contempletur, facile deprehendet illas non domi suæ habitare, sed nostræ, illasq; propter nostros usus esse conditas: & si quid habent suum, hæcenus habent, quia nobis inseruiunt. sicut in Psalmo scriptum est: Qui dat iumentis fœnum, et herbam seruituti hominum. Nec aliquid sumunt ex mundo ad uitæ cultum, sed in diem uiuunt, atq; adeò in horam, & ea solum capiunt, quæ sustentando corpori sufficiant: omnisq; illorum opera & labor, & fructus usibus nostris seruit, non eorum: ut canum, ouium, equorum, boum, apum. uel quæ noxia existimantur, usum sui aliquem uel in edulijs præbent, uel in medicinis. At uerò cum curam Dei dico, loquor hominum more: nam proprijs et appositis uerbis diuina illa exprimi à nobis non queunt. non enim cura est in Deo, qualis in nobis, cum labore, anxietate, defatigatione: nec maior aut minor de alijs rebus cura. Sed de rerum euentis transferimus in Deum ea quæ sunt propriè nostra, ut aliàs declarabitur. alioqui nemo posset rectè de diuinis uerbum unū uel proferre uel intelligere, sicuti dudum dicebam. Curæ autem præcipuæ ac be-

inuolentiae Dei erga hominē hae sunt signa, quod  
 monet, quod docet, quod assuefacit eum uiae qua  
 peruenturus sit ad se, hoc est ad immortalem beati  
 tudinem, cui est conditus. Docet ad se unum accur  
 rere in prosperis gratulatū, in aduersis remedium,  
 in necessarijs opē atq; auxiliū petitū. ab illo enim  
 sunt nobis bona omnia. Nam si Deus terras negli  
 git atq; aspernatur, quò tandē miserum hominum  
 genus confugiet? quanta in calamitatibus afflictio,  
 imò desperatio? si rex naturae nos non ex audit, si  
 est inexorabilis, quid nobis opus est tali Deo? qui,  
 ut rectē dicit apud Ciceronē Cotta, si nulla gratia,  
 nulla in nos charitate tangitur, ualeat. Accurrere  
 autē ad Deū in rebus difficilibus, eiusq; fidem atq;  
 opem implorare, tam est uerum ac naturale, ut om  
 nes afflictione pressi ad coelū statim monstrante na  
 tura oculos attollant, et manus. illic enim propter  
 loci excellentiam residere putant sanctam illam et  
 omnipotentem maiestātē. qui si non audit nos, nec  
 precibus et affectibus nostris tangitur, sed sedet du  
 rus atq; indeprecabilis, quid potest hominibus tri  
 stius accidere, uel acerbius? an non meritò cū eius  
 modi Deo sic expostularet homo? Siccine deseris  
 nos rerum omnium parens & author sanctissime?  
 siccine ualere nos iubes foeturam tuam? Cedò igitur,  
 cui nos tandem tradis? temeritati ne casuum

& fortunæ? quid cogitari potest crudelius? Genui-  
 sti hominem, quo pulchrius aut præstabilius nihil  
 esse uoluisti inter omnia quæ cernuntur, & tam ex-  
 cellentem sortum tuum tradis educandum non nu-  
 trici probæ, non sapienti pædagogo, sed stultissi-  
 mæ fortunæ & casui dementissimo, per mille peri-  
 cula & calamitates miserè iactandū. casui inquā,  
 quo nihil est magis sapientiæ tuæ contrarium. Iu-  
 bes coli te, sectari uirtutem: quorsum, si nihil in-  
 de præter erumnas expectamus? nam uitæ huius  
 commoda impij, conscelerati, audaces occupant:  
 istis fortuna est blandior atq; indulgentior, quàm  
 probis & moderatis hominibus, hoc est tui simi-  
 libus. Quas ergo agemus tibi gratias, quòd in  
 mundum inuexeris, quos necesse sit uel malos es-  
 se, uel afflictos, reatricemq; omnium nostrarum  
 actionum temperariam fortunam esse iusseris? Hæc  
 quidem querela iusta est de istorum Deo. in nostrū  
 uerò non competit, qui nos egregia & singula-  
 ri conditione misit in uitam, inq; ea conseruat, ut  
 summo suo beneficio facile sit nobis si uelimus deis  
 esse, unā cum illo. Porro quidam ex istis dilemma  
 se adferre putant sanè quàm acutum & indissolu-  
 bile, quo homines de ui & mente diuina incertos  
 dimittant. Si Deus est, inquiunt, unde mala? sin ue-  
 rò non est, unde bona? Versiculus est græcus,  
 quem

quæ citat Cic. in eandē propē sententiam. Si curent  
 dij benè bonis sit, malè malis. Quid potest dici in  
 uerborū contrarietate concinnius aut uolubilius?  
 quoniam nihil sit inanius in sensu. Quæ nam sunt tan-  
 dem bona ista, & mala? Bona uocant nostris cor-  
 poribus utilia, nostro appetitui congruentia: ma-  
 la autem, contraria, ut eluuiiones, incendia, pesti-  
 lentiam, sterilitatem, famem, bella, euerfiones ur-  
 bium, captiuitatē, paupertatē, infamiam, dedecus,  
 dolorē. morbos uocant mala, & miseriā. Rursum  
 affluentiam, diuitias, libertatem, gratiam, decus, di-  
 gnitatem, prosperam ualeitudinem, bona & beati-  
 tudinem: ut bona dicantur utilia, mala incommo-  
 da & noxia, non menti, sed corpori, & ijs qui af-  
 fectu annexi sunt motibus animorum inconsultis.  
 Creat hæc quidem Deus omnia, sicut Hesaias uer-  
 bis illius dicit: Ego sum Deus creans lucem, & fa-  
 ciens tenebras, bonum & malum: hoc est, & aspe-  
 ra & iucunda sensui. Sed refert consilio suo inæsti-  
 mabili in finem aliquē nobis utilem, ut nos uel me-  
 liores reddat, uel à sceleribus deterreat, transfe-  
 ratq; ad frugem meliorem. non enim copias uel ste-  
 rilitates agrorum propter animantes mutas creat.  
 Nunquid curæ est Deo de bubus? inquit Paulus.  
 Ad nos ea cura dirigitur, non ad boues, equos, as-  
 nos, qui in usum nostrum sunt conditi, quemadmo-  
 dum



dum modò declarabam. Quid, quòd mundi rector non uni aut alteri anno prospicit, sed diuturnitati seculorum. Prouidentia illius ad longè pòst uenturos se porrigit, ut diutina continuatione in aliquè egregium exitum perueniat eorum qui digni sunt illa ipsius cura: nempe hominum bonorum, à quibus anatur, & quos redamat, hisq; omnia per ambages & circuitus admirabiles in bonum semper, atque id quod ipsis maxime conducit, uertit: non ad ineptias præsentium utilitatum, sed ad sempiternam felicitatem, quod unū est hominis bonum certum & uerum. reliqua enim, sicuti philosophi uocant, ἀδιαιρέτα, seu neutra, ut uerò Paulus, nihil. Non malè Cato senior, stultos dixit multum sapientibus prodesse, quòd ab ijs cautiores ac meliores fierent: prudentes nihil conferre stultis, qui illorū rectè facta non animaduernerent. Quæ qui considerauerit attentius, inueniet, quocirca nullum esse cui piā querelæ locum relictū, ut bonis mala, malis bona eueniāt: quod dictū ex malorum et bonorum ignorantia est natū, in quo sapientes à uulgo uehementer dissentiant. Vulgus enim omnia metitur corpore, sapientes animo. ideoq; inter illos mirā diuersitas, dum aliàs populariter, aliàs philosophicè loquimur. Aiunt enim, Socrati Atheniensi & M. Regulo in medijs tormentis ac morte non ma-

le fuisse, ne danapalo regi Syria in rosa bene.  
 Sed de hoc non in loquendo & sentiendo inconstan-  
 tia infinitum esset dicere. Nimirum uersabatur in  
 tenebris: Christo gratia, à quo deducti sumus in  
 lucem & diem. Itaque homines qui in tantam latitu-  
 dinem consilij non mittunt oculos, nec bona &  
 mala uera regula dignoscunt, statim ex uno uel al-  
 tero exemplo quod ipsis parum probatur, damnant  
 in uniuersum cuncta. tanto autem proiectius &  
 desperatius, si ipsis, aut ijs quibus bene cupiunt, con-  
 tra sententiam res cedant: quemadmodum pueri  
 delicati, quum quid à parentibus eorum sit, quod  
 ipsis displiceat, ilico in eis & prudentiam requi-  
 runt, & charitatem erga se. Nihil est in rebus qui-  
 dem quæ sub cognitionem nostram ueniunt, regno  
 mundi similis, quàm uita quæ corpori nostro ab a-  
 nima præstatur. Nam ut anima corpus uniuersum  
 singulasq; eius partes sustentat, uegetat, uiuificat:  
 ita Dei præsentia salutem uitamq; adfert rebus om-  
 nibus. magnumq; Dei simulachrum, mundum gu-  
 bernantis, est humanus animus, corpori suo uitam  
 & sensum tribuens: atque adeò hic ad imaginem  
 illam est conditus Dei mundum temperantis, sicut  
 angelus ad imaginem Dei seiuncti à cura mundi cor-  
 poralis, de quo mox loquemur. Et quandoquidem  
 ille præsens est omnibus, omnia intuetur, uidetq;  
 non

non solum corpora, sed animos item quos ipse condidit: isq; est demum uerus & iustus iudex, cuius sapientiam nulla res potest fallere, cuius equitas singula perpendit, cuius potetia nemo poterit eximi. Nam humanis legibus & magistratibus potest fieri fraus atque impostura per uafros & callidos homines, illi non potest. Cato apud A. Gellium in oratione quam habuit pro Rhodiensibus, negat legibus puniri uoluntatem, sed actionem: nec legibus ad hunc modum cauere, si quis tantum agri uelit possidere, ea multa esto, sed si quis possideat. At Cicero & alij philosophi, peccata multa sola uoluntate fieri, non negant: quale est illud secunda Actione in Antonium, Si occidisse Casarem scelus est, et uoluisse erit scelus. Dic mihi, quis erit sceleratae huius uoluntatis iudex, & animaduersor, nisi is solus qui eam intuetur? nam homo externa tantum cernit. Sunt etiam quaedam crimina, quae illi ad Dei ultionem remittunt: ueluti apud Senecam ingratitude, primo libro de Beneficijs. & Cicero de Legib. 2. Ad diuos adeunto castè pietatem obseruato, opes amouento: qui secus faxit, Deus ipse uindex erit. Atqui uindicare haec omnia non potest Deus, nisi cogitatus perspiciat, & nostrarum rerum cura tagatur, et imperium habeat in uita sanctos. Ita est profectò: alioqui nihil fuerit uita hominum,

nisi

nisi merum latrocinium, aut uirtutum simulatio, suorum commodorum causa. Plinius in Historia naturae ait, Deorum numine cuncta agi, ex usu esse uitae ut credatur, ideoque inductum per homines sapientes. O proditorem generis humani. nam si id secretum tanti refert nostra ignorari, tu qui profers, an non prodis nos omnes, & uinculum illud dissoluis, quo societates coetusque hominum continentur? Valerium quendam Soranum doctissimum togatorum in crucem esse actum scribit Macrobius, quod uerum urbis Romanae nomen enunciarit: tu Plini, qui tantum & tam salutare arcanum euulgas, quam multiplici dignus es cruce? Impij sunt, et dijs sacri, qui mysteria Eleusinae Cereris in Attica terra diuulgant: tu qui tantum mysterium profanas, quam tandem mereris poenam? Sed non est mysterium, nec arcanum, neque ab ingeniosis uiris excogitatum ad utilitatem uitae, sed à natura insculptum, & infixum omnium animis. Quid tu, an censes tam male agi cum genere hominum, ut homines esse homines nisi per mendacium non possint? Neque enim relinquitur in uita quicquam homine dignum, si Deus à cura nostri est auersus. An iustitia, an charitas hominum inter se, & amicitiae, an pietas in patriam, in parentes, an gratitudo in benefactores? Quid opus est illis omnibus ficta simulatio? pro illis omnibus suffecerit,



suffecerit, quantum rebus atque usibus tuis expediat: ut mercaturæ sint uirtutes omnes, non uirtutes. Quorsum enim aliud, quandoquidem nemo est qui animum spectet, aut iudicet? An non pudet philosophos, post sublatam prouidentiam uerbum ullum de uirtute & pietate facere, aut omnino eam nominare: quæ nulla omnino sit amplius, si Deus nos in suam curam non recipiat? sed pergunt ineptire, Etiam si nulla sit (inquiunt) remuneratio uirtutis, si nullus sit Deus: tamen quietius & iucundius & securius uiui secundum uirtutem, quam secundum uicium. O uoces hominum seipsum non exaudientium uæcordes. Si nihil habiturus sum unquam aliud quam uitæ huius cursum: si nullum respicio qui conscientiam meam speculetur, aut norit, iubetis me relinquere mea commoda propter res fictitias? quod satis est à nobis superius ostensum. Est etiam qui pronunciet, nullum uerius colere uirtutem, quam qui amisit famam boni uiri, ne amitteret conscientiam. Hoc nihil potest dici uerius, sed parum congruenter, si Deus non sit scrutator cordium. Quid enim hoc illi prodest, aut quem habet fructum, aut cui se tempori reseruat? Sequitur enim solum speciosa quedam nomina, sed inania, & flosculos amœnos sine fructu. At iucundius uiuitur cum uirtute, et securius: ita place, cum simulatione uirtutis, cum externis actioni-

bus ad obsequium humanarum legum accommodatis. Neq; enim pœnam metuis, quia leges non uiolas, & habebis uir bonus: Vnde accedit tibi precium, & decus, & bona opinio. fidunt tibi omnes, credunt & commendant negocia publica & priuata, itaque ars ea quæstiuosa est: uoluntatem qualem inter hæc geras, nihil refert. Quid, quòd si uirtutem sequeris, ut iucundius & quietius & securius uiuas, iam ut alij opes ad quietem suam, alij rura & hortos parant, alij uxores diuites & industrias, alij sacerdotia: ita tu uirtutem consecraris tanquam quietis tuæ instrumentum. ut appareat, nundinari te uirtutem, & plurius facere quietem, quàm illam. Ita apparet, si aliter quietem & securitatem posses nancisci, te longum uale dicturum uirtuti, qua dicis nihil esse in mundo pulchrius, amplius, præstabilius. Est hoc planè enervare in animis hominum Dei & pietatis respectum, si uirtutem censeas debere parari ad uitæ certis. utilitatē, etiam si non esset Deus qui nostra cerneret. refrigescit enim cura Dei colendi, et uirtutem omnem non ad animi probitatem, sed ad ostentationem quandam transfers.

Quid, quòd multi non bene agere uirtutem esse hanc censent, quæ laboriosa est & difficilis: sed ne mini malefacere, ne uicissim mali quid accipias. quæ uirtus non est, sed ad uitæ quietem cautio & callidi-  
tas

tas: de quibus etiam uolumine quinto dicemus. Iustitia ergo, & pietates omnes. & amicitie, & gratitudines, & fortitudo, & continentia, & quæcunque sunt in hominibus magna & præclara, respectu Dei continentur atq; exercentur quemadmodum decet: quæ omnia uana, stulta, ridicula sunt, illo semoto.

QVOD MVNDVS ESSE ALI  
quando cœperit.

**C**Aeterum nonnulli ut concedant facile Deum omnium conditorem rectoremq; negant tamen mundū aliquo temporis initio incepisse, sed esse æternum, cōditori suo parem. Huic sententiæ Aristoteles accedit, instructus suis axiomatis: Ex nihilo nihil fit: cuius est generatio, est interitus: & eiusmodi. Quàm stultum est de mundi creatione ex legibus naturæ huius statuere, quū creatio illa naturam antecesserit? tum enim natura est condita, quando & mūdus: nec aliud est natura, quàm quod iussit Deus: alioqui minister esset Deus naturæ, nō dominus. Sed progressus mundi apertè nobis illius originem ponit ob oculos, quo progressu uidemus eum haud aliter quàm hominem unum uel populum aliquem adulescere. Reuoluamus ueterem omnem memoriam, & seriem ac continuationem rerum: uidebimus liquido ab hinc tria annorum millia hominū genus adeo rude atque impositum, ut à fr̃is non multum dista-

ret. Habitabatur in speluncis, in solitudine, sine re-  
ge, sine lege, sine iure ullo, & confederatione æque  
cōsociacionis: seorsum quisq; per se, aut ad summū  
cum uxore & liberis, crexerunt paulatim tentoria  
è ramalibus arborum, & cœperunt casas & taber-  
nacula conferre. unde uici & pagi extiterunt: qua-  
lis fuit habitatio non ferarum modò & barbararū  
gentium, sed ipsorum Græcorū per tempora Troia-  
ni belli, sicut Thucydides refert. Apud scriptōres  
Græcos inuenio heroas illos qui exercitus Græco-  
rum ductarunt ad Troiam, literas nesciuisse, ac ne  
fuisse tum quidē, nisi rarissimas: quod Homerus sub-  
significat in tesseris eorū, qui jngulari certamine e-  
rāt cōgressuri cū Hectore. Certe ante Homerū ipsum  
nec scriptores fuerūt ulli penē gentiliū, neq; literæ,  
nisi apud Hebræos: quemadmodum ex ratione tem-  
porum manifestò colligitur. Secutæ sunt urbes, et in-  
genia literis disciplinisq; exculat: & quotidie noua  
prodeunt inuenta, ut in re bellica, in edificijs. cal-  
cographiam habemus, gentes & insulas inuenimus  
cunctæ uetustati incognitas & inauditas, et reliqua  
eiusmodi permulta, tanquam mundo semper profi-  
ciente, ut homine quantumuis sene. Augetur quoti-  
die uniuersus uitæ cultus atque expolitur. Videlicet  
mundus, ut homo senex, pluribus indies uitæ instru-  
mentis indiget. Olim, ut iuuenis, facile se quocunque  
culm



cultu uictuq; tolerabat. Iam & morbi sunt plures, et corporum infirmitas indies maior, eoq; necessitates etiam grauiores ac plures. Quid, quod rerū omnia inuenta, quorum sint, annotatum est memoriæ: quæ omnia in mundi æternitate, non nunc primum, sed ab infinito tempore oportuit reperta, aucta, exculpta. Adde huc, quod si æternus est mundus, & gentes nationesq; æternæ erunt: uelut Italia, Hispania, Gallia, Germania. Atqui nos origines earum gentiū, auctus progressusq; nouimus, & ex inuentis quā non diuturnæ fuerint facile deprehenditur. In Italia rarissimæ erant literæ, quo tempore ceperunt Romanam Galli Senones. eodem tempore nullæ erant uites in Gallia. Quā multarum rerum notitia atque usus in Gallia, in Hispania, natus est memoria patrū, aut nostra, in uestitu, in habitatione, in uictu, in omni denique cognitione rerum necessariarum, in herbis, in animantibus. Pueri sumus, planè nunc incipimus: omnia hæc cum infinita diuturnitate pugnant. & infantia, quā in multis mundi partibus annotamus, quid aliud testatur, quā mundum ipsum non modò infinitum non fuisse, sed nec admodum uetustum? Hominum in istis nouis insulis uictus nihil differt ab illo qui erat toto orbe ab hinc tria millia annorum, supra quod tempus nulla est historia gentiliū. Vnde refutatur Chaldeorum & Agyptiorum

*nan'tas, qui tot millia annorum cōfinxerunt : in qui-  
 bus si quid gestum dicerent Græci scriptores, ut alia  
 ab Aegyptijs, ita & res eas gestas cupidissime sum-  
 pssissent et retulissent in literas. sed anni illi erant ina-  
 nes, & somniati. Nam antiquissima Aegyptiorum  
 de Phoroneo et Iside, non multum ante Troiana bel-  
 la cōtigerunt. Quid, quod lingua Hebræa, quæ mul-  
 tis & euidentibus rationibus ostenditur fuisse de pri-  
 mis, monstrat clarissimam infantiam mundi. ea enim  
 similis est linguæ puerorum, pleriq; uerbis amphi-  
 bola parum diserta, non bene cōiungit partes, et uer-  
 borum tempora cōfundit. Quin & ex ea quæ est an-  
 tiquissima, licet sumere testimoniū antiquitatis mun-  
 di, quam ipsa non ante quinq; millia annorū ponit.  
 Dicunt infinities eadem esse reperta, & toties con-  
 cidisse nationibus sublatis, apud quas illa uigebant,  
 partim incendijs, partim eluuiionibus, quæ statis tē-  
 porib. ad motus et progressiones siderum necesse est  
 accidere: ita hominib. extinctis perire illa inuenta,  
 rursum usu atq; ingenio paulatim reparari ac redi-  
 re. Quiduis potius, quàm ut cū pietate cōsentiāt: et  
 quam semel arripuerūt opinionē, tuentur mordicus  
 per fas & nefas. Commentū hoc ad eludendas inui-  
 cibles rationes est excogitatum. Quæ enim apertis-  
 simè de cōdito aliquando mūdo proponūtur, quæq;  
 cogūtur ipsi admittere sine mutatione sentētiae, per  
 eductio-*

eluuiones & exustiones recipiūt: ut hoc nō ad ueritatis inquisitionē excogitarint, sed ne de sentētia cogantur discedere. Primū. qui sciunt necesse est esse eluuiones illas & exustiones euenire ex cursibus siderū? Vt donē illis, cōiunctiones aut separationes errantiū siderū modō ad humoris redundantia uergerē, modō ad siccitatē et incēdia. qui scient tamē hēc fore uniuerso orbe, ut id possint asseuerare tā intrepide? nā cōstare inter eos uideo, qui huiusmodi rerū cognitionē profitētur magis q̄ pręstant, certa quedā orbis loca cōiunctiones has respicere, & illis uel bona uel mala portēdere, nō cuncto orbi. At fortasse experientia duxit eos ad hoc affirmandū. Nihil minus. Quā enim eluuiōē orbis, aut incendiū uiderūt, aut legerunt, aut est omnino traditū ulli memorię? Nos ex sacris literis unū habemus diluuiū, quod pleriq; gentiliū ignorāt. Postea eluuiōes & terrę motus & incēdia cōtigerunt, nō orbis, sed regionis cuiuspiā: ut in diluuiō Ogygis inundata est Attica & Boeotia, sub Deucalione Achaia. Lugdunū Neronis temporib. una nocte cōflagrauit, Delphi in Bataua paucis horis. similes deinceps calamitates multas legimus, uel audiuiimus. sed his casib. supersuerūt earū regionū atq; urbiū plurimi, qui secū literas artesq; ac memoriā inuentorū conseruatā et exercerēt ipsi, & posteris traderent: ut iactura facta esset edificio

rum et diuitiarū, nō artū, neq; inuentorū humani ingenij. Illud quoq; Noë diluuiū nō siderū cōmitionibus assignatur, sed ultioni numinis. Verū isti solita temeritate sub certū horoscopū reducunt eluuiē illam orbis, & similē horoscopū contigisse ferunt anno uicesimo quarto, qui annus orbē ferē totū insanis istorum prædictionib. terruit, quū nullus annus memoria eorum qui uiuerent aut mitior aut serenior fuerit, aut suis omnibus partibus tempestiuior? Primum in tanta uarietate, tamq; incertis ijs qui annales scribunt, quem annum possunt ipsi annotare quo diluuiū contigerit? Ita non dicunt hoc euenisse, quia hic erat astrorum coitus: sed quia id contigerit, talem affirmant fuisse. Hoc uerò non est ab experimentis scientiam colligere, sed ad tuendam temeritatem assertionis confingere sibi experimenta. Verum irrisit istos natura, qui quo tempore natatura in aquis omnia erant minati, serenissimi ut si quando antea fulserunt soles, & uer fuit omnium amenissimū. Iam ut nos eluuiōem unam terrarū ostendimus, proferant ipsi uel alteram, uel exustionem terrarum quampiā. An uerò nulli erunt tanto malo superstitēs, an ne aliqui? Si nulli, quomodo reparabitur humanum genus nullo semine? hoc difficilius erit explicare, quā mundum non esse conditum. Sin aliqui, hi certē de suis maioribus, de artib. atq; ingenijs



nijs illorum posteros edocebūt. quod & fecit Noë, qui posteritati suæ mundi exordia usque ab Adam ipso patefecit. Etiam si hi qui remanserūt, ignorarēt eas artes; certè fuisse eas non poterant ignorare, & hoc saltem tradidissent posteris. Quid, quòd literarum usus, quem necesse est in mundi æternitate æternum fuisse, non fuisset uitæ mores ac consuetudines ignorari. ex quarum tamen narrationibus apparet, mundum adhuc nouum ac rudē fuisse. Conchas marinas dicunt longissimè à mari repertas: Mela & Ouidius id tradunt. Quid inde colligitur? mare illic fuisse aliquando. Quid tum? Prætereo, quòd in montibus possunt fieri crustæ aliquando conchis similes, & quòd ille potius sunt diluuij de quo sacræ loquuntur literæ uestigia atq; indicia. Quid uerò sequitur, etiam si mare demus illic fuisse aliquando, ubi nunc agri ingentes à mari procul reducti? an hoc arripiet pro argumento æternitatis mundi? quasi uerò non quotidie hoc uideamus in Galliæ huius Belgicæ æstuarijs contingere. Quid, quòd terræ motibus sæpe est factum, ut ingentes amnes exaruerint, conciderint montes, ex quorum ruinis repletæ sunt ualles, alibi uerò montes subito extiterunt. Requiritur hodie montes, fontes, amnes, urbes, maria, quæ ueteres in mundi descriptione posuerunt. nec est opus ad tantam mutationem seculis infinitis, una uel altera

etate contingunt. Querunt tamen de nobis isti, si Deus ante mundi fabricationem æternus fuit, quid agebat immensa illa æternitate? quid molebatur rerum? quid ei derepente noui accidit, ut quod nunquam antea nouam mundi molitionem susciperet, cur non antea multis seculorum millibus mundum protulit, cur non post. Maximum additur impietati & falsis opinionibus robur, si homini ad confirmandum negandumue quicquid libuerit, satis est contrariam rationem non assequi, aut non inuenire. Tu ergo quia tantum diuinæ uoluntatis mysterium non capis, ilico in aduersam transibis partem, ut eundem habeant limitem ueritas & ingenium tuum, quodq; indignius est in rebus diuinis. Non est fas homini causas & rationes scrutari, quibus Dei uoluntas uelut adducitur ad agendum: nam scrutator maiestatis, ut inquit Sapiens, opprimetur à gloria: sed uelle & parere & adorare quicquid illa iusserit. Verum hoc tamen quod in præsentia à nobis queritur, non relinquemus dubium & alligatum, ne homines queruli & iniquè suspicaces deesse rationes putent ueritati, quas illorum questionibus opponat, tametsi deesse nobis quis posset mirari. Quod nō intelligamus diuina, ea præcipua causa est quod de Deo sentimus nimis humanè, & illius tempora metimur ut nostra, & cōmotiones animi adiungimus

gimus ut nostris principibus, et indigētia uel necessitate premimus. Nisi quis enim se ad considerationē crexerit eternitatis, ut illam uniuersam quatenus fieri potest cōplectatur cogitatione ac mente, impiē in multis sentiet, et nō dignē ad illā sempiternā maiestatem ac naturam. In eternitate nec prius est, nec posterius, nec antē nec pōst. omnia sunt, nunc etiā multo magis quā explicari sermone ullo humano potest: quin etiā hoc nostrū Est uix Deo cōgruit, ut Plato affirmat in Timæo. Qui hoc ergo in animo suo reputat, nō habet quod tēpus ut durationem ullam in eternitate partiatur, ut quēdā sint antē, alia pōst: sicut in uacuo illo immēso atq; incōprehēsibili quod est extra mundū, neq; est hic neq; illic. Nanq; ad eundē modū queri possit, cur hic potius mundus positus quā alibi? hæ nanq; loci et tēporis distinctiones in mūdo sunt solo, et cū mūdo genitæ, antē aut extra illū nullæ sunt. Quod uerō queritur, quid agebat antea: idē rogari posset, quid agit Deus extra mundū? Nō erat antea, sed si quod antea, tu imaginaris homo in tēpore genitus et uiuēs. Agebat ante mūdum, et sine mūdo, quod nunc cū mundo, in sua felicitate seipso contentus, et sufficiens, plenus bonorum omnium, et ab eterno constituit mundum pro creare, atque ea condere quibus beatitudinem communicaret suam: sed tunc, non antea, nec pōst,

quia

quia sic illi est uisum. Quòd si nos uix aut nullo pè-  
 nè modo quæ ab illo sunt condita intelligimus, quo-  
 modo rationem uoluntatis eius capiemus aut equam  
 conderet, sed iam in illa reuoluimur Dei æternitate  
 indigna. Et mundum ab æterno esse compositum ac  
 constitutum magis defendebatur olim philosopho-  
 rum concertationibus, quàm persuadebatur popu-  
 lo. Simul primum Christus aperuit quis creasset,  
 quando, quomodo, id continuò ab uniuerso est hu-  
 mano genere receptum, non Christianis solùm, sed  
 Iudeis, Agarenis, etiam philosophis de mundo. Fa-  
 cit ad Dei magnitudinem, scire mundum esse à Deo  
 aliquando constitutū, ut intelligamus quid & quan-  
 tum sit, quod ille possit agere. Quis enim potentiam  
 illius queat expendere in æternitate? quæ æternitas  
 uires auctoris abscondit, quasiq; obruit. Quid, quan-  
 tum, quatenus, quomodo fabricatus sit singula, latèt  
 omnia hæc in æternitate uastissima altitudine de-  
 mersa, nec quantus ipse per se esset satis iudicari pos-  
 set in æternitate operis. Pertinet quoq; ad Dei boni-  
 tatem, existimari aliquando conditum, ut intelliga-  
 mus quemadmodum se uoluerit communicare. Nam  
 in æternitate necessitas quædā includitur, quæ præ-  
 cium bonitati detrahit. Aristoteles, quum mundum  
 æternum affirmasset, Deum supremo affixit cœlo na-  
 turaliter operantem, pressum necessitate, ne quid ali-  
 ter



ter possit agere, quàm sicut agit, ut fata & leges non ipsum minus quàm res alias astringant, & sit quod Poëta dicunt,

Fato stat Iuppiter ipse. & Lucanus:

Se quoq; lege tenens, & secula iussa ferentem.

Admit Deo Aristoteles id quod in entibus ratione atq; intelligētia præditis est optimum, libertatem: & ex principe mundi facit ministrum naturæ, cui in agendo seruiat. At uerò ubicunq; sunt actio naturæ & uoluntatis, potior semper atq; antiquior est uoluntaria: ut in homine. At tantus rerum scrutator quod potius est & melius Deo detrahit, cogitq; in ordinem, non saltem à seipso admonitus cum politica scriberet, regem non esse legibus subditum: quam sententiam à iure & constitutione iustitiæ, ipse idem acuta ratione quare id fieri oporteret communiuit. Quòd si par est humanum principem ignorationi, imbecillitati, mutationibus subditum, non teneri legibus, quāto minus decet illū teneri sapientissimum, omnipotentem, & in bono immutabilem? Iam quòd sepsit necessitate, abstulit ab eo cultum omnem, charitatē, gratiam. Quis enim ei quicquā debeat, qui quæ agat, non possit aliter agere? quis igni habet gratiam, quòd carnes coxerit, & aquam feruefecit, aut aquæ quòd nos humectarit ac refrigerarit? naturalia sunt eorum opera, nec possunt aliter agere.

Coco

Coco & ministris gratiam habemus. qui quæ poterant non præstare si libuisset, præstiterunt tamen nostra causa. Si quis Deum illum Aristotelicum imploret atq; oret supplex, ut quid uel tribuat commodi uel auertat damni, quid censetis illum responsurum? Tu uero frustra consumis tempus & uerba, qui mihi supplicas. Non enim ea quæ tu poscis, in manu mea est tribuere, legibus definitis præfixisq; uado, nec minore premor necessitate in agendo, quam tu in patiëdo. Si quæ largiar, proderunt tibi, utere: sin secus, fer tu necessitatem tuam æquo animo, sicut ego fero meam magno. O sortem natura & maiestatem Dei indignam. Et cæteris quidem mentibus inferiores cælos Aristoteles attribuit: Deo uero summo, præpotenti, immenso octauum, hoc est supremum, eam illi quasi prouinciam delegauit, quàm in æquali proportionem? Quanto enim maiore interuallo excedit Dei natura reliquas mentes, quàm opus Dei opera aliarum, & orbis Dei orbcs reliquos? Quod nec poëta Homerus non animaduertit, qui Iouem suum facit denunciantem reliquis dijs omnibus, ut si restim è cælo demittant, è qua dij omnes pendeant, se unum tracturum in cælum restim cum uniuersis dijs. Sed ab Aristotele libens quæsierim, si mentes cælorum motrices sunt finitæ, quomodo mouent tempore infinito, quandoquidem sempiternus

ternus & fuit mundus, & erit posthac? Sed hæc magis ad philosophiæ disputationem pertinent, quàm pietatis, sicut illa de numero mentium. Dicat aliquis forsan, Quid uos? num non Deum ab eterno statuisse omnia affirmatis? ergo aliter non possunt euenire. Statuit quidem, uerum liberè, ut hoc posset agere & diuersum. Hic est quæstio de fato & necessitate. Si enim ille facit, omnia necessariò euenient, nam quis poterit mutare? si præuidet, necessariò euenient, alioqui fallitur: nihil ergo est medium, ut Cicero concludit in secundo de Diuinatione. Hæ opinioniones de fato & fortuna & necessitate adeò sunt in tota gentilitate uariæ ac pugnantes, ut quid dicendum de illis aut sentiendum sit, non possis elicere. Vulgus aliter sentit, quàm poëtæ, hi aliter quàm philosophi, isti inter se discordes. Democritus necessitate censent omnia euenire. Peripatetici idem prope aiunt. casum enim & fortunam non rerum esse, sed nostrarum actionum ac deliberationum. Plato necessitatem ponit, & fatum, & casum. Stoici non admodum ab hoc discrepant. Epicureis fortuita placent omnia. Facile in tanta discordia magnam uersari ignorantiam deprehendas, & alij alios suis telis cõfoderunt. nimirum quæ esset Dei natura & uis ignorabant, idcirco tantis in tenebris alios alias uias esse ingressos, mirandū non est.

est. Nos uerò Deum ostendimus autorem esse uniuersorum, & liberè actiones suas obire, & exequi: tum esse sempiternum, in cuius eternitate si quis more nostro, ut dudum explicabam, fuisse aut fore contempletur, in multos & graueis errores incidat, necesse est. Neque enim est in illo aliud quàm solum esse, & uix illud ipsum. Quocirca omnia sunt Deo præsentia, nec egit aut aget, nec uidit aut uidebit, aut præuidet, sed agit aut uidet, ne quis semel illum iussisse arbitretur, deinde se posuisse curam, quam in naturam cælorum & elementorum reiecerit. Qui ad hanc se cogitationem atq; intelligentiam non sustollit, nec cogitet quidem de fato aut de providentia Dei, aut uerbum omnino faciat. nam perniciosum hoc ei fuerit, si humana mensura, aut etiam angelica Deum uelit metiri. Et quandoquidem ille agit omnia siue solus, siue per instrumenta, minimè tamen necessaria, quid aliud potest esse fatum, aut fortuna, quàm eius uoluntas, quæ naturam rebus statuit? Sed urgent odiosius: Atqui ex hoc ipso fit, omnia necessitate euenire. Necessitas autem uel est id quod nulla prorsum ratione fieri aliter potest: ita nihil naturale, nec solem oriri, nec cælos uerti est ex necessitate. sed ea tantummodo quæ sunt Dei, ut esse illum bonum & beatissimū & æternum. ostendimus enim ipsum liberè in suo uersari opere, & posse



posse aliter agere, si sit collibitum. Vel necessitas est id quod ille iussit, definiuitq; in ordine naturæ ac cursu, quæ sic semper solet procedere, & perpetuis naturæ causis constant. ita cursus hic naturæ necessarius est: mutatur tamē, etsi raro, at non nunquā, ut solē sistere, mortuū resurgere, lucē rursus eum aspicere cui sint oculi effossi. Necessitas etiam est in eo quod aliter nō solet euenire, etiā si possit, ut non nungere sub æquinoctiali. Adde huc necessitatē conditionis: ut sit homo, habere rationis facultatem. Necessitas quoq; naturæ gemina est. altera simplex ex prima constitutione, ut solem uolui in zodiaco: altera ex causā, quum causā parit causam, uelut de lassari qui ualde laborarit, irasci eum cui sanguis effruescat. In ordinatione naturæ uoluntates nostræ libere sunt, ut cogi à nulla omnino causa possint, non ab his inferioribus, nec à cœlis ipsis, quia origo nostra excelsior est, sicuti mox differemus. Et loquor, tanquā cœli agant regantq; hæc inferiora. nam quidam hoc aiunt. contrā alij significare solum, sunt qui neutrum: quæ disputatio non est huius instituti. Itaque cogi non possunt mentes à causā inferiore ipsis, licet possint incitari & sollicitari, ut à corpore ac sensu. Libertas uerò nostræ uoluntatis ipso experimento ostenditur. quam ad rem pertinet uis consultandi & eligendi.

gendi, quam Aristoteles iure quasi superuacaneam  
damnavit, si non sit libera humana mens. Nec es-  
set ulla seruitus maior aut grauior quam animi hu-  
mani, si non haberet imperium in eo quod est pro-  
priè ipsius, nempe in intima uoluntate. Non enim  
tam est seruire nihil possidere in fortunis, nihil ha-  
bere iuris in suum corpus, quam non habere in uo-  
luntate. Qui mœror, quanta desperatio, si nos te-  
neri & alligari nodis insolubilibus crederemus,  
ut non essemus quales uellemus, sed præpediremur  
plagis necessitatis, ut belluæ: quibus hoc molestum  
non est, quia non intelligunt. & ex hominibus quo-  
quis ingenio & iudicio minus ualet, hoc alligatio-  
rem habet uoluntatem, minusq; libertate utitur,  
sed fertur plerunque, rarò ipse sua sponte ingredi-  
tur. Quapropter uoluntas nostra ex necessitate  
naturæ, hoc est certis constitutisq; naturæ legibus  
libera est, & liberè se huc applicat, uel in diuer-  
sum. Itaq; multa eueniunt, quæ possent nō euenire:  
quæq; solent euenire, neutra sunt, uel indifferen-  
tia. Falletur, inquiunt, Dei sciētia & prouidētia,  
si quid homo agat quod possit non agere. quippe  
si Deus uiderit nauigaturum Paulum cras, is uerò  
non intret nauim, falsus est Deus opinione sua:  
imò uerò falsus est, quisquis futurū attribuit Deo.  
Non enim uidet Deus aliquid euenturum, sed iam  
esse.

esse. Quo fit, decipi ac errare ut nullo possit modo. nec continuò ex necessitate id euenit, utique non magis quàm quum te deambulantes cerno, aut necessitatem ipse tibi adfero, aut tu mihi deceptionem. Deambulas tu, & potes quiescere, & utrumque Deus intuetur, nempe actum tuum & potestatem. Nec quia prædixit Christus fore aliquid, ideo contigit: sed quia futurum nouerat, prædicebat. Hæc quum ita se habeant, nihil profectò est in rebus fortuna. neſtuntur enim cauſis cauſa, nec quicquam accidit sine ulla cauſa. Nos uerò ex cauſarum ignorantia fortunam finximus, sicut quod euentus rei aliquis non erat nobis destinatus, casum: ut fodientem incidisse in theſaurum. cauſa enim fuit, reconditum illic fuisse theſaurum, & me ligonem aut palam in eum impegiſſe. Nam & quæ à nobis proficiſcuntur, quæ uoluntaria nominamus, cauſis carent, nempe noſtrum uelle. hoc uerò aliàs magnas, interdum & graues, nonnunquam leues, sed aliquas tamen non neceſſarias, uerum quas uoluntas tanquam ſibi expedientes approbat, quum poſſit diuerſas, aut etiam aduerſas. Preces etiam fiducia erga Deum quantum proficiant, intelliget liquidò, quiſquis ad ueram Dei conſiderationem ſe ſuſtulerit. ille enim in ſtatuenſo rerum curſu pias preces multis

I 3

poſt

pòst annis futuras, iam cernit præsentes sibi: ideò-  
que accommodat ad eas non pauca, quæ rogatum  
iri ab se amico: suos uidet. Mutantur quoque ad  
preces ea quæ ex naturæ causis erant sequutura,  
quemadmodum in Ezechia contigit, rege Iuda,  
cui quòd naturales caussarum progressus mortem  
minabantur, dictum est à propheta Dei, Morie-  
ris, & non uiues. sed is decursus naturæ ad regis  
preces mutatus est, & mutaturum se Deus præui-  
derat, & non tum moriturum regem, id quod in se  
rie rerum posuerat, sed quasi diuerticulum à trita  
atq; usitata naturæ uia.

#### QVAE FVERIT CONDENDI

mundi caussa, & de spiritibus.

**Q**ui magnitudinem & sapientiam Dei, ma-  
iestatemq; illam Dei immensam conside-  
ret, tum corporum utilitatem, sordes, abiectiōē,  
eaq; sola inter se conferat, quo magis ea uersarit et  
compararit, eo minus causam inueniet condignā,  
cur conditus sit à Deo mundus tanta solertia, tan-  
ta molitione, tam uisendo atque admirando ope-  
re, quid aliud in eo reperiet quàm uanitatem me-  
ram? Sicuti duo sapientissimi homines exclama-  
runt, Solomon & diuus Paulus. Maior ergo ali-  
qua & Deo dignior erat caussa, quæ illum ad ta-  
lem adduxit structuram. Nempe quod quum esset  
optimus,



optimus, uideretq; se beatissimum, uoluit eam beatitudinem communicare alijs. Natura nempe boni est, ut se diffundat & impartiat multis. Præbet ergo sese Deus ad bonitatis & beatitudinis participatum uniuerfis entibus, quantum cuiusque uis & capacitas capere ac sustinere potest. Sed communicatio rerum uita carentium prætenus est, adeo ut nulla esse uideatur: quæ autem mutis animantibus, exigua & leuis, & in qua exprimi atq; apparere non queat tantæ beatitudinis communitas. Alia ergo procreasse illum est necesse, capaciora suæ felicitatis atque aptiora, quibus se uerius tribueret ac plenius, & in quibus imago existeret illius tanti boni expressior ac manifestior. Dei beatitudo nihil est aliud, quàm ipse Deus. neque enim ita est ea consideranda, ut quam in hominibus beatitudinem appellat uulgi ignorãtia, pecunias, possessiones, amicos, patriam, decus, quæ extra beatum sunt. neque beatus esse Deus potest re ulla ab ipso aliena, ut per se non esset plenus perfectusq; , sed per accessum rei alterius. Quòd si ipse est sua beatitudo, se ipsum communicando, communem facit sortem illam suam & conditionem felicissimam. Communicatio autem hæc fieri non potest partitione aliqua, quam Deus nullam habet. unus est enim simplex, absque omni prorsum mole. commu-

nicat igitur, quum sibi adiungit & applicat, ita ut in se qui est infinitus absorbeat, ut sic loquar, & unum secum reddat. Tum enim simillimi effecti naturæ ac conditionis diuinæ, quasiq; deificati, uerè participes fiunt felicitatis illius inæstimabilis. Et quoniam quidem non est Deus corpus, nec molem aliquam habet, uel magnitudinem, non tangitur per partes, nec adherere quicquam parti alicui potest, in quo nullæ sunt partes. Condidit ergo entia idonea huic coniunctioni, seu unioni uerius. Unionem hanc facit similitudo naturæ, quæ duplex est: in essentia, & in qualitate: in essentia, ut simplicia sint & spiritalia, quemadmodum Deus ipse: in qualitate autem, ut eam habeant qualitatem, quæ maximè & artissimè spiritus coniungit, & facit unum. Corpora quidem multis modis iunguntur, spiritus autem uno tantum, nempe amore: quemadmodum uicissim odio distinguuntur & disseparantur. Et entibus quæ erant amatura, rationem & mentem dedit, unde amor & charitas nascitur. nam quæ est brutorum charitas, cæcus est potius impetus, quàm certa & iudicio destinata beneuolentia. Explicemus singula eorum quæ proposuimus, paulo diffusius. Congruebat res condi spirituales, ut creationis circulus ab spiritu Deo per corpora rediret ad spiritus  
qui

qui Deo coniunguntur atque uniuntur. Tum ubi erant tenuissimæ ac confusissimæ opificis imagines, par erat edi alias expressas, et quasi ad uiuum effectas, quæ sunt spirituales, & ratione præditæ. Etenim igni huic maior est cum igne altero similitudo, quàm cum suo ipsius calore. Similitudo autem diuinæ mentis duplex est: altera Dei in æternitate sine mundo, altera eiusdem mundum gubernantis. illam angeli referunt incorporei, hanc humani animi corpore uestiti, cui præest. Angelis cælum attribuit, dignum locum illa excellentia. hominibus, quàm diu in corpore agunt terreno et corruptibili, locum illis congruentem, nempe terram, quoad reparetur atque instauretur spiritualius & Deo dignius. Omnia deprehendimus horre & torpescere, nisi habitentur, atque excolantur. Annotare est in omnibus mundi huius partibus uitas esse positas & constitutas, non dubium quin & cœlis uitas quoque attribuerit author naturæ, à quibus habitentur tanto præstantiores alijs uitis, quãto locus est amplior ac præstabilior. Deo uerò nihil opus est cœlo, nec ullo loco, felicissimo in seipso et perfectissimo. Nec esset causa congruës extendendi supra nos cœli tãti operis, quod uidēdo et contēplando exatiari non possumus, si nullus esset eius alius usus quàm ut his reculis inferiori-

bus seruiret, gignendis pluuijs, uentis, tempestatibus, frugibus, atque eiusmodi. rei certè maiori & excellentiori tanta & tam speciosa moles est parata: angelis scilicet, & animis nostris, item corporibus nostris puris & defecatis per renouationem uniuerſitatis mundi. Non eſſe ergo res alias quàm quas uſurpamus ſenſibus, omni proſectò mentis iudicio repugnat. Nam ſi Deus eſt author horum, non eſt opus dignum tanta potentia & ſapientia. ſin rector, non eſt hoc regnum illius maietà congruens, & condignum. Vel ipſe intuitus cœlorum abundè teſtatur, non ſeruire tantam pulchritudinem huic deformitati, nec humilitati excellentiã. Nos quoque ipſi ad utrum mundorum ſpectemus, in promptu erit iudicare, ſi quis animum aduertat. Sunt enim ſenſus ex hoc mundo corporali, mens autem ex illo ſpiritali. Oſtendunt hoc appetitus, cognitio, & delectatio. Senſus expetunt, cognoscunt, delectantur ijs ſolis quæ materia ſunt et corpore ueſtita. mens autem ad ea ſemper fertur, quæ nuda ſunt molis: in ijs libenter uerſatur, eorũ cognitione & quaſi uſu delectatur magnopere, quod uidere eſt in præſtantibus & generoſis mentibus. Nam quæ in peiorem naturã degenerarunt, non præbent indicium ingenij, & naturalis ſuæ qualitatís: quemadmodum in natura uel belluæ cuiuſquam,



cuiusquam, uel stirpis, uel radicis, uel floris, uel fructus inquirenda & peruestiganda, non facimus censuram ex ijs quæ in deteriore conditionem degenerauerunt, sed quæ in illa sunt nota perfectissima. Ex horum etiam duorum sensus mentisq; comparatione licet colligere, quanto est incorporeus mundus excellentior. quàm enim humilia & abiecta sunt crassa hæc, circa quæ sensus occupantur? quanto altiora & nobiliora, quibus mens ornatur? Quæ opes sunt illæ nostri ingenij, collectæ ex mundo spiritali, & quidem tenuiter ac malignè, tanquam aquæ pluuiæ guttatim destillantes? quid fiet quum ex pleno & uiuo gurgite hauriemus? Declaratur quoque mentem nostram non hinc esse, sed è mundo incorporeo, quod in hoc corporali posita tanquam in loco alieno, non potest quiescere, semper aliquid desiderat & requirit, uelut deserta & destituta: intelligit sibi deesse aliquid, sed ignorantia & tenebris huius corporis ac mundi obstupefacta, quid illud sit non assequitur, quoad lux ei admouetur aliqua quæ caliginem illam discutiatur, & ignorantiam edoceat: tum demum se totam ubi sit, unde uenerit, quò tēdat spectetq; recognoscit, & magna hæc sublimia admiranda tanquam cognata sibi intuetur, ad quæ sensus non modo non penetrant, sed tanquam fabulas, & rem impossibilem

possibile aspernātur ac deridēt, quoniā eò nō possunt ulla ui. assurgere. non aliter q̄ si leonibus, aut ursis, aut lupis, aut alicui brutorū nationi daretur loquēdi facultas, et sermonis aliqua intelligentia, si quis in eorū coetu de rebus hominum, de eo quod mente iudicio ratione consequūtur et consciunt, differeret, irrideretur, ac reijceretur tanq̄ fabellarū incredibiliū confictor, nimirū à metiētibus homines ex sese. At spiritus et angelicos et humanos amore coniūgi Deo, seu potius unū cū illo fieri, id uerò existimarit quispiā tale esse, quale quū medicorū quidam ad curationē morbi difficilis ac penē deplorati, iubēt nos herbas aut ossa animantiū ab extrema India uel Scythia petere. Quomodo uniūtur tā diuersa, angelus et deus? et quod plus est, homo et deus? dicet aliquis. Ceterū deus non ideo à nobis procul abest, quia non cernitur, quia in cœlis dicitur habere sedē suā: ille autē re uera ubiq; est præsens, atq; adest: nec minus est cuiq; nostrū intimus, q̄ anima ipsa qua uiuimus, atq; etiā penitior. Neq; uerò nobis tantū est præsens, sed cœlis, sideribus, elemētis, arboribus, animantib. quippe qui est magis uita cuiusq; et essentia, q̄ animæ uel effectiones, per quas quicq; est id quod est. Nihil ergo loci interuallū obstat. Ratio autē connectēdi spiritus, et nodus aptissimus est amor: sicut uicissim re  
soluendi

Soluendi & discindēdi, odiū. Omnis enim facultas quæ cognoscit, ob hoc ipsum cognoscendi uim est nata, ut si quid iudicarit esse bonum, appetat & sequatur: sin malū, auersetur et fugiat. quæ diffuse sunt in amoris natura explicita: non enim sunt loci huius. Appetitio hæc boni, uocatur amor: mali aut auersio, est odium. Quæ expetimus, assequi uellemus, ut coniūctio illius desiderii nostrū impleret. quæ odimus, ab illis uellemus fugere, ne per præsentia illius torqueremur. Amor ergo applicandi & connectendi uim habet. quod non tantū in hominibus, sed in feris quoq; ipsis animaduertimus, quæ sobolē suā diligūt, nollētq; ab ea discedere. Feræ bestiae, in syluis & solitudine natæ atq; educatæ, hominē, quia metuūt, tanq̃ sibi noxiū oderūt: & quia oderūt, defugiūt ac deuitāt. cicures aut, ut feles et canes, quia nos diligūt, uersantur inter nos placide: & si quò recedamus, sequūtur. Homines etiā quid coniūgit, qd detinet, nisi amor? qd separat, nisi odiū: ita ut absentia instar mortis esse ducāt. quūq; absunt, quantū possunt efficere, reducūt se in præsentia memoria, literis, mētionē: et quem odimus, de eo non libēter meminimus. Sed hominis amor q̃ ratione est præditus, lōgē diuersæ est ratio nis, q̃ brutorū. horū enī charitas uel ex impetu est quem natura indidit, uel ex delectatione sensuum.

Et in hominibus qui non aliter uiuunt quàm bel-  
luæ, amicitia amorq; omnis ex eodem fonte ma-  
nat, nempe sensuum, absque iudicio rationis. Qui  
uero amor ex consilio et mente oritur, ex eo bo-  
no trahit originem, quod mens iudicauit esse tale.  
ideo liber est amor, et scit quid amat: et quum a-  
mico suo fruitur, nouit quantum est quo fruatur,  
et quale: nec est ulla satietas, ut in sensu. Iam amor  
mentis ut est in intimis, ita ad intima amati pene-  
trat. amor sensuum exteriore hac facie est conten-  
tus, sicut in mutis animalibus: nec quale quidque  
intus sit considerat, nec alijs uult coniungi quàm  
externis, non intimis. Ideo canes, feles, et homi-  
nes aspectu tactuq; acquiescunt. Mentis autem a-  
mor ad unionem ducit. uellet enim amici animus  
in amicum immigrare. Scienterq; ficta est à uiro sa-  
piente fabella, Vulcanum reperisse amicos duos,  
qui optime inter se cuperent. eo amore delectatum  
Deum, obtulisse illis quicquid optassent. illos re-  
spondisse: O Vulcane, tu qui faber es deorum, fac  
ex nobis duobus unum prorsum. Aristoteles acutè  
amicum amico alterum ipsum esse dixit. Huiusmo-  
di charitas est coniunctioni cum Deo et beatitudi-  
ni illius idonea, non charitas sensuum. Primum ra-  
tionem, mentem, iudicium, consilium Deus largi-  
tus est spiritalibus naturalis, per quæ intelligerent  
quod



DE VERIT. FIDEI LIB. I. 141

quod tandem esset uerè suum bonum, ut illud expe-  
terent, expetitur sequerentur, & cuperent cum  
eo copulari atque uniri: ad quod sequitur æterna  
beatitudo. quam adepti, scirent quantum essent as-  
sequuti, & uerè frueretur cōiunctione Dei. nam  
ubi non est hoc iudicium, nec ratio atq; expansio  
tanti boni, quæ potest esse beatitudo? Quid, quòd  
beatitudo illa quum sit Dei incorporalis, non con-  
gruit solis sensibus, qui corporalibus solum capi-  
untur, sed mentibus: & amor qui efficit unum, is  
demum est qui spiritus beatos reddit, nempe unio-  
ne cum beatissimis, in qua redeunt ad illum spiri-  
tus eadem uia qua erant profecti. Amore scilicet  
impulsore nos condidit, amore reuocat ac reducit,  
amoris ianua ab illo exiuius, eadem ipsa est re-  
uertendum. Nam gignendi mundi causa non fuit  
aliqua indigentia authoris Dei, sed copia, affluen-  
tia, diuitiæ summæ & incredibiles: quòd quum se  
beatissimum uideret, bonitas adduxit eum, ut con-  
deret res illius beatitudinis: quo in opere & bo-  
nitas apparet communicantis sua, & amor erga il-  
la quibus tanta bona statuit largiri, haud secus  
quam declarat mater charitatem erga foetum quē  
gestat in utero, quum illi parat crepundia, nutri-  
cem, cunas, ludicra, & alia quæ ætati illi censet  
conducere. Amor autem creationis patet in con-  
serua-

seruatione . quæ enim non amaret , neque conser-  
 uaret . uoluntas illius omnipotens , & creatio est ,  
 & conseruatio . Aliquid horum procul aspexerunt  
 uetustissimi sapientes , Mercurius , Orpheus , Hesio-  
 dus , Parmenides : qui amorem antiquissimum di-  
 xerunt esse rerum omnium , à se ortum , consultissi-  
 mum , & locatum in sinu Chæus antequam mun-  
 dus conderetur . cum quibus Plato consentit in Ti-  
 mæo , & in Conuiuio . Habemus connexionis &  
 coadunationis rationem ac modum . eam uerò nos  
 posse consequi , argumento est qualitas ipsa & con-  
 ditio mentis nostræ , quæ ita est facta & informa-  
 ta , ut naturaliter in bonum & pulchrum feratur :  
 qui motus , ut dixi , amor nuncupatur . Quod si da-  
 ta est homini intelligentia Dei obscura quidem &  
 maligna , sed aliqua tamen , cognoscit utique nihil  
 cogitari posse pulchrius , præstabilius , maius , me-  
 lius . Ergo in eum qui talis esse iudicetur , accendi-  
 tur statim amor . nam si has nostras leues & dilu-  
 tas uel probitates , uel formas diligimus , quid de  
 fonte , de origine , de copia decoris , bonitatis , sapi-  
 entię , potentię infinita existimandum est ? Hunc  
 si amat , coniungi profectò cum eo cupiet . id uerò  
 si assequi nulla queat ratione ac uia , non superua-  
 caneum tantum fuerit eiusmodi cognitio , sed mole-  
 sta quoque & acerba . Quorsum attinet gladium  
 ad

ad scindendum diligenter exacuere, si nihil potest scindi? Quid famelico aut sitibundo edulia uel portiones proponere, tanquam Tantalo, quæ non ualeat attingere? Tale esset hominem conditi cum intelligentia, & ex eo, desiderio æternæ felicitatis, si peruenire ad eam non posset, quid foret aliud, quàm eum crudeliter eludere? monstrare quæ expetat bona, & in quæ toto nisu feratur, arcere tamen à possessione & usu illorum. Bestijs quòd est datum illis bonis frui, ideo nec desiderare, illis se bonis carere non ferunt grauitè, ac ne intelligunt quidem. Illud porrò animaduertisse operæ precium fuerit, nos & per calorem esse in utero matris paratos huic luci ac uitæ, & in ea per calorem uiuere ac conseruari, & per calorem ad alteram illam redire: sed ut hæc uita est corporalis, per calorem hinc corporalem, ad alteram uerò quæ spiritalis est, per calorem mentis. Homo à Deo prodit per amorem, admonetur, ut ad eum se conuertat luce adhibita. Si id faciat, accenditur positus ob oculos tantis bonis. accensus autè, toto nisu illuc fertur, ut uniat. unitus, sit beatissimus, quia uelut Deus quidā. Conuersio est amoris ortus, illustratio est amoris alimentum, accensio est amoris incrementū. sequitur actio animi ipsius in expetendo, in unione uerò est absolutio bonorum omnium.

## DE SPIRITVVM

immortalitate.

**S**ed quando spiritus omnes ad sui cognitionem  
 & amorem, indeq; ad unionem & participa-  
 tum sempiternæ suæ felicitatis Deus condiderat,  
 immortales quoque esse uoluit, quæ est in beatitu-  
 dine illa non exigua gaudij pars, scire se nunquam  
 nec bona illa sibi defutura, nec se illis bonis. Nec  
 fas erat, ut qui semel ad tantam unitatem coniuncti  
 essent cum Deo, amplius ab illo ad interitum diuel-  
 lerentur, qua affectione uniuerſa penè dilueretur  
 beatitudinis lætitia. Creauit ergo Deus mentes sui  
 capacitates immateriatas, ne quid haberent inimi-  
 cum aut contrarium, cuius uolentia perimi pos-  
 sent, nisi idem ille Deus uellet, qui procrearat.  
 quemadmodum Plato loquentem inducit Deum su-  
 premum dijs minoribus atque inferioribus, quos  
 ipse procrearat, futuros illos uoluntate sua æter-  
 nos: quæ uoluntas Dei maius sit uinculum ad eo-  
 rum perpetuitatem, quàm illa quibus essent quum  
 gignerentur connexi & colligati. Eadem est hu-  
 manæ mentis conditio & natura, quæ non ut reli-  
 quæ brutorum animæ cum suo cadit corpore, sed  
 proprio ac peculiari munere ad æuum est immor-  
 tale à Deo condita mens ac spiritus, ut superiores  
 illi cœlestes. Sed hæc tamen disputatio molestior  
 est



est facta, atq; intricatior, ex hominum partim ignorantia, partim malicia & prauitate, qui omnia corporis sensibus metientes, induxerunt animum nihil credere, nisi quod sub illos caderet. Alij delicijs immerfi ac uoluptatibus, omnia cuperent cum illis pariter concidere, hoc est cum corpore, nec esse ullum iudicem, qui uitæ huius rationem à nobis reposceret. Sed nos quando locus hic in uniuersa uita & pietate, immò in hominum beatitudine aut extrema miseria tanti est momenti, fusius paulò eum prosequemur: neque est attingendum leuiter, quod periculosum est non perfici. Nec pigebit me disputationem integram in libris de Anima à me tractatam, hic retractare. Si solis sensibus habetur fides, & intra illorum limites concluduntur omnia, ut quibusdam uidetur nimis crasse de rebus statuendis, nec animas tribuimus mutis animantibus, quippe quas nec cernimus, nec sensu ullo percipimus: neq; effectiones siue formas esse in rebus naturæ censebimus: nihil deniq; præter molē, quam aspicimus & attrectamus. quod est disciplinæ omni contrarium, tum ab omni iudicio humanæ mentis uehementer alienum ac abhorrens. Parui pueri si uideant armatū patrem, postea ea ipsa arma constituta recta in stipite, existimant esse eundem ipsum patrem, adeunt, colloquuntur, et non moueri ac respondere admirantur, terrentur, in

K dignan

dignantur, deniq; etiam in fletum prorumpunt. Pueri ijdem, & homines fatui, pictas imagines in tabula uel tapete uiuos esse homines iudicant, & ad loquendum prouocant, & ad epulas inuitant, & de cibis offerunt ut edant. Idem iudicium est bestijs, ut ficta et simulata pro ueris accipiant. Alios quoq; fallit circa hæc communis loquendi forma. Nam ut populus est sermonis dominus, et ducitur magis sensib. quàm iudicio mentis, fit, ut ex præscripto sensuum loquamur. Itaq; picturam hominis, & cadauer hominis, hominem dicimus: & iam multi eum uestitum qui totum corpus amiciat eum ipsum uocant qui uestitur, et iacere illum quum iacet uestitus. Verum qui in statuendo de abditis rebus sensibus tantum ducuntur, ab infantibus & morionibus nihil distant, ne dicam à beluis, qui corpus hoc torpens ac brutum hominē esse aiunt: & quum cadauer proiectum aspiciunt, nihil fuisse aliud hominem suspicantur, tametsi oculi & sensus isti corporei, quomodo aliquid in clauso loco deprehendunt latēre, nisi ex ijs quæ foras prodire conspiciunt: ut ignem ex fumo, animans ex uoce, morticinum ex foetore. Quis uerò non annotat, quantum sit inter hominem et brutum interualli ut inferiora alia prætereā. Homo tot artes manu exercet, tam uaria profert, tot opera admiranda magno ingenio inuenta & exculpta: uagatur mente per naturam

turam uniuersam, habet rationem & sermonem, in  
 quibus omnibus diuini ingenij uis quædam atque ima-  
 go elucet. Quòd si hominem propter similitudinem  
 corporis parem in nascendo & moriendo facimus  
 beluis, necesse est, ut propter mentis tantam tamq[ue]  
 euidentem differentiam faciamus præstantiorem.  
 Et si renunciatur tanto bono immortalitatis, renun-  
 ciendum est quoq[ue] ingenio, rationi, menti, per quam  
 sumus immortales: & si ea uidemus signa in homi-  
 ne, quæ testantur illum coelestis ac diuinæ esse origi-  
 nis, consequens profectò est ut aliquid in eo insit ma-  
 ius ac præstabilius, quàm quod spectari possit oculo-  
 lis, aut manibus tractari.

Nullus, inquiunt, redit ad nos ex altera illa uita,  
 qui nos certiores reddat, qui sit illic status rerum, quid  
 agatur. Hoc quidē dicit uulgus, aliquid se acutum inue-  
 nisse ac protulisse existimans: sed hoc est, qualia e-  
 ius ferè omnia. Trāseo quòd multæ animæ fato iā de-  
 functæ in sua sunt reuersæ corpora, aliæ uiuentibus  
 sunt locutæ, et aliquid eis significarunt, quæ sunt no-  
 stræ pietatis, hoc est suprā naturā. Ceterū si nullus  
 in Indiā cōmearet, nullus ab Indis ad nos, nec India  
 esset protinus, neq[ue] Indi tot annorum millibus usq[ue] ad  
 hanc ætatē nemo ad nouū istū orbē nauigauit, nec ul-  
 lus ad nos eorum, neque ultro & citro alteri de al-  
 teris audiuius, aut cognouiuis: quid miram, si

nec inter animos corpore solutos, & nos corporeos  
 nullum sit consuetudinis commercium? Magna qui-  
 dem & uaria & difficilis inter nos & nouos istos  
 homines uia: sed confici tamen potest, & est confe-  
 cta: inter nos uerò, & cœlos, aut inferos, naturæ le-  
 gib: impossibilis. Inter corporea et incorporea nulla  
 esse potest cōuersatio, neq; nos illorū cōditioni apti  
 sumus, quā diu corpore hoc claudimur corrupti-  
 bili. Adde quòd mortuorum animi maioribus uel bo-  
 nis perfruuntur, uel premuntur malis, quā ut de  
 rebus terrenis, hoc est de nugis uacet cogitare, uel  
 libeat. Quid, quòd nos alij nolunt reuifere, alij non  
 possunt. Si quis in sua ciuitate factus esset magistra-  
 tus, nollet utiq; ad exilij sui insulam reuerti. itaq; hic  
 non expetit. qui uerò in carcere aut ergastulo deti-  
 netur uinctus. non potest. Sed sanè quocunque nos  
 conuertamus, sursum deorsum, circum circa, omnia  
 docent, testantur, clamant immortalē esse animam  
 humanam: natura & necessitas causarum, propor-  
 tio & similitudo, uita & congruentia, dignitas ho-  
 minis, Dei bonitas, utilitas nostra ex illius beneficen-  
 tia. Principiò rerum omnium ueræ germaneq; essen-  
 tiæ ipsæ per se non cognoscuntur à nobis, abditæ la-  
 tent in penitissimis cuiusq; rei, quò mens nostra in  
 huius corporis mole & tenebris uite non penetrat.  
 Ex inhaerentibus & actione potissimum, quid &  
 quale



quale quicq; sit, ratio nostra colligit. Nam sicuti est ab Aristotele animaduersum acutè, res omnis sic habet se ad esse, quemadmodum ad operari. eius uidelicet opera & actus qualitatem quantitatemq;, & ingenium essentiae declarant. Primum omnium actiones ipsas animae perpèdamus. de quibus actionibus prima est, cognoscere: id uerò est quodammodo capere, comprehendere, concipere, hisq; nominibus consignatur. Nulla est porro cognoscendi facultas, & uis, quæ id cognoscat, quod proportionem non habeat cum natura sua aliquam. Cognitio enim uelut imago est quædam rerum in animo expressa, tanquam in speculo. Non potest autem reddi ab speculo corporali quod sit spiritale, aut quæ aliorum sunt sensuum quàm uisus. neque id exprimitur, quod proportionem est ipso speculo maius: ut mons totus proximè admotus, nisi procul recedat, ut ex internallo nascatur proportio: neque id, quod non est ei obiectum è regione. Sensus nostri externi, nempe extensi & præditi quantitate, non capiunt quæ sunt quantitatis immutabilia: nec quæ molem habent ampliore, quàm pro eorum ambitu, neque absentia. Sensus interni non capiunt spiritualia, nempe angelos & Deum. Mens ergo quæ hæc capit, cognoscit, comprehendit sola ex rebus sublunaribus, spiritus est, ut illa i-

psa: et quæ intelligit illorum immortalitatem, immortalis quoque. alioqui nullo caperet modo id, à quo infinita amplitudine excederetur. Apertius hoc ostendit, quod ex uniuerſa æternitate illam, quæ immensa duratione nos præceſſit, non posſumus cogitatione comprehendere, & obruitur magnitudine mens noſtra. hanc uerò quæ interminatis poſt ſeculis ſequetur, facile capimus & intelligimus: ut liquidò appareat illam uaſtiorẽ eſſe noſtra anima, nec ullam habere cum ea ſiue proportionem, ſiue analogiam: hanc uerò alteram habere. illi non eſſe aptam, huic eſſe. Ex eodem cognitionis fonte facile colligitur, plantarum & brutorum animas ex ui & potentia materiæ aptas inſtructasq; produci, mentem noſtram peculiariter à Deo gigni in corpufculo ſupra uires materiæ ac naturæ huius. Nihil enim aſſurgit aut tranſgreditur id, à quo accipit eſſentiam & uires. alioqui non iam ab illo acciperet, ſed à priore aut ulteriore aliquo, in quo tenderet. Senſus noſtri interni atq; externi, tum belluæ, quæ illis ſunt ſolis præditæ, nihil cognoscunt aliud, quàm quæ ſunt naturæ huius quam cernimus, non aſcendunt ſuperius. Mens noſtra non contenta cœlis, ſideribus, angelis, uſque ad Deum ipſum peruenit: nec ulterius poteſt progredi. Quid hoc arguit aliud, quàm animas mutorum à natura hac progigni, ſupra quam ſe

se non attollunt? nostram uerò à Deo supra naturæ huius potestatem? Itaque animæ nostræ contingit, quod de aqua fontana dicitur, ut tam alte assurgat, quàm descenderat, nec possit altius. Nec aliter quàm mens nostra non modò intra Dei cognitionem sistit, uerum etiam multo inferius. Sic sensus multum infra naturæ huius opera subsistunt, neque intima illius penetrant, sed in extima semper facie uersantur. Moses in mundi originibus non obscuris uerbis uidetur hoc significasse. Nam quum alia omnia solo Dei dicto narret esse condita, ubi ad hominem uenit, non naturæ eam tribuit potentiam, ut hominem procrearet, sed Deo soli. dicit enim, Faciamus hominem ad imaginem & similitudinem nostram. et paulò post, inspirauit Deus in faciem Adæ spiraculum uitæ. per utranque sententiam & originem à Deo propriam, & animorum immortalitatem denotauit. Ceterū ne quis in hoc fallatur, tametsi supra uires naturæ huius siue elementaris, siue cœlestis, siue angelicæ sit, animā hominis à Deo creari, naturaliter tamē creatur à Deo, hoc est lege ab illo ordinata atque statuta, non secus quàm alia omnia. Non enim quoties homo conditur, nouum edit Deus miraculum, hoc est præscriptæ legi uel contrariū uel diuersum: nisi quis fortè naturæ huius miraculū uocet, in quo nō dissensio. ut nō immerito

Mercurius Trismegistus, siue quis est alius, magnum miraculum esse hominem dixerit. Deus in materiam preparatam iam atque aptam immittit animam, supra materiam ipsius et opificis naturæ uires, sed lege ab ipso statuta. Quocirca et genitis in adulterio ac fœdo incestu animas tribuit, quoniam hi, quanquam contra bonum et pium, non tamen contra legem illam à Deo positam gignuntur. quod fieret, si cinædis id quoque concederetur, aut eiusmodi. Et animam nostram non à naturæ facultate, sed Dei unius procreari beneficio, non solum est uerum, sed interest humani generis uerum esse: et quia interest, uerum est indubiè. Inducta enim anima in corpus, non naturæ ope, sed propriè ac peculiariter à Deo, debet homo præcipuam et potissimam partem sui non naturæ, sed Deo, illumque tanquam unicum mentis suæ parentem agnoscit, quam soli ipsi deuoueat, et consecret, neque in eam iuris quippiam alteri ulli impartiat, quàm Deo, summo et præpotenti patri spirituum unico. Multum in corpus hoc et sensus omnes uendicant sibi potestatis et iuras parètes corporum, tum liberi, natura ipsa, patria, necessarij. mens uerò solius est Dei, eamque sibi uni reseruari iubet ad fœlicitatem nostram, quoniam illius ipse unus est author et progenitor. Quod si anima non à natura hac Dei administra et opifice profertur, sed



sed à solo Deo , consequens profectò est , ut nihil in natura sit, quod eam possit extinguere , solus id potest Deus. Non est autem credibile Deum ipsum per se condere, quod mox sit perempturus. quid enim attinebat id fieri? Quin potius humane animæ & progignendæ & corrumpendæ , sicut aliarum animantium. potentiam naturæ concedebat? cur sibi uni reseruabat , quod cõmuni lege ac conditioni erat subditurus? Hæc de cognitione, iam de appetitu. Cognitio omnis, ut aliàs est sæpe & à nobis, & ab alijs ferè demonstratum, propter appetendum aut fugiendum est animanti indita . Esse nunc sensus nostri capiunt, quemadmodum & muta. Nam quale sit belluarum ingenium , & quemadmodum sint affecta, ex nostris tum externis sensibus, tum internis, certissimam coniecturam licet sumere : uidelicet quos habemus cum illis communes , ac prorsum similes. Itaq; feruntur pecudes solū ad nunc. appetitus enim conseruationis est in illis non ex cognitione rerum, sed ex artificio naturæ . Ideo facultas progignendi non est principalis officij , nempe cognoscentis , sed uegetantis, hoc est infimi. Homo autem esse interminabile cognoscit, quod quia uidet conducibile sibi esse ac bonum , expedit quoq; . Itaq; naturalis est hic appetitus . si naturalis, ergo de re nobis congruente atq; apta , nec frustra ingenuus. Expleri igitur po-

test, & ut expleatur aliquādo necesse est. alioqui nō solū inanis est tāti boni ostensio, sed crudelis. Expetitionis huius essentia perpetua, quæ nunquā intermoriatur, indicium est auiditas prorogandi nominis in omnia secula post uentura. quod adeo est à natura insitum humanis pectoribus, ut etiam qui extinguere omnia arbitrantur cum uita, famam nihilominus affectent, & bene audire uelint iam sepulti. uelut signifer impietatis Epicurus, natalem suum diem celebrari testamēto cavit, et epulum sectatorib. suis dari luna uicesima. Naturalis enim illa ueræ immortalitatis cupido infecta et corrupta tenebris, mētis prauis animorū cupidinibus in hanc alteram degenerauit cupidinem famæ: haud aliter quā quum bonum semen in solum uiciosum incidit. Affectus item ipsi, qualis sit & mentis nostræ & sensuū natura, declarant; quodq; sit inter illos discrimen, & sensus dico tam internos quā externos. Si enim incipiat animus de morte sua cogitare, sensus interni & phantasia modò longā uitam hanc fore imaginantur, de altero illo interitu non admodū permouentur, imò facile eiusmodi cogitationē sine sensu aliquo deglutiant. mens uerò ipsa ijs tenebris inuoluitur, tantopere confunditur, ut nihil magis expauescat, & refugiat. Vel ipsi illi qui in maximis uersantur malis, & impetu quodam animi ceco mortem appetunt, cupere nōq;

perem' que sese aboleri penitus, si paulisper à desperatione in se uacaret redire ac cōquiescere, deq; animi extinctione cogitarent, damnarent prorsum sententiam priorem, interitumq; illum horrerent, maius que id esse malum ducerent, quàm illa omnia quibus uexantur atque affliguntur. Contra uerò quum de hac morte corporis uenit in mentem, sensus omnes ilico percelluntur: mens uerò si sana sit et quieta, stat immobilis, & errorem trepidationemq; illam sensuum ridei & castigat. Idcirco apud Platonem in Apologia acutissimus philosophorum Socrates, ad iudices & populum Atheniensem uerba faciens de morte sua, quòd multitudo sensibus ducitur, in incerto reliquit animæ immortalitatem, dilemmate tantum usus. Si non moritur animus, maiora me expectant bona: sin moritur, nihil sentiam. In carcere uerò inter discipulos rerum cognitione excultos, & sapientiæ studiosos, nihil posuit in dubio, sed constanter, multis que argumentis conatus est euincere, ac persuadere, animos nostros corporibus suis superstites perseverare. Quid ex his efficitur? an non manifestò mortem mentis contra ipsius naturam esse? idcirco illam eius mentionem reformidare ac exhorrere: sensus uerò de hac tantum uita esse sollicitos. mortem hanc corporum ad mentem nihil pertinere:

cor

corporis esse, et eorum quæ sunt corpori annexa, sensuum uidelicet interiorum ac exteriorum. Quid quod mens in prauo habitu corporis, uelut si affectu sit perturbata, phantasmatis confusa, imperita, flagitiosa, scelestæ, impia, magis ad recordationem corporeæ mortis cõcutitur, quàm quum sobria est, sana, serena, quieta, docta, innocens, pia. Queramus iam utrius iudicium certius sit ac uerius, perturbata an quieta, ægræ an sanæ, indoctæ an erudite, in recto corporis statu, an prauè affecto, scelerate ac impie, an pie et sanctæ. Ex delectationibus quoque essentia deprehenditur humanæ mentis. delectationes enim eo sunt maiores, suauiores, diuturniores, magisq; stabiles, quo res eæ quæ uoluptatē adferunt, similiore sunt facultati animi, quæ oblectatur, maioremq; cum illa et uicinitatem et proportionem habent. Quum de genere est aliquo uel forma iudicandum, ab ijs sumitur specimen ad pronuncian- dum, quæ sunt in illo genere optimè affecta et constituta, id est maxime secundum generis eius ueram atq; incorruptam naturam. Non ignoro multos esse homines brutali ingenio, qui uoluptatibus sensuum capiantur unice. sed nos præstantissimas ac generosissimas mentes contemplemur. Ille uerò plus delectantur internis sensibus quàm externis, plus mente quàm phantasia: et ex mente potissimum contem-  
plando,



DE VER. FIDEI LIB. I. 157

plando, & ex rebus quas contemplantur, ille eas incundissimè capiunt, & diutissimè tenent, quæ sunt supremæ, quæ corporeæ molis expertes, quæ æternæ. hæc enim animus avidius expetit ac retinet, minusq; illis perscrutandis atq; intuendis defatigatur. Hæ igitur spirituales res & sempiternæ conformiores sunt menti, quàm corporales. illarum naturæ ac ingenij magis est consors & particeps, quàm istarum. in illis enim mirifice acquiescit, tanquam suis similitudine ac proportionē: quemadmodum interiores & exteriores sensus rebus corporatis capiuntur, nec alias uel coniectando assequi possunt. Quòd si mens tam esset quàm sensus mortalis, non minus mentes excellentissimæ & diuinis proximæ, caducis rebus tenerentur ad ueram & solidam uoluptatem, quàm sensus ipsi. Iam ipsa corporum nostrorum constitutio, & facies in cælum erecta, cœlestes nos esse testificatur, intentos semper illuc tanquam in patriam, ad quam proficiscimur. Et corpus ipsum, quemadmodum se habet animus, ostendit, erectus est enim hic & sublimis magis multò quàm corpus, ascendens per gradus rerum inferiorum, nec conquiescens, donec ad cœlestia & diuina peruenerit: ibi demum sistit & acquiescit, ut ex motu, & ex quiete manifestum fiat, quemadmodum in rebus omnibus naturæ, quis sit ei locus naturalis. Ceteræ animantes,

mantes, ut terrestres, terram semper intuentur, in  
 qua est bonum ipsarum. nostrum uero bonum, si  
 non est in illa cœlesti æternitate, quorsum pertinet  
 excelsum caput in homine, et oculi in cœlū suspectā-  
 tes? an ut in tanta uitæ huius calamitate, & asper-  
 rinis rebus locum illum speciosissimum, atque à mi-  
 seria omni remotum intuentes, magis nos uita di-  
 scruciet, & exacuatur uanum illius felicitatis de-  
 siderium? atq; eò uehementius & acrius, quo quis-  
 que ingenio uel eruditione plurimum est præditus  
 atque excultus, uel uitæ huius incommodis ac mi-  
 serijs pressus, & diu uexatus. nam fortassis homi-  
 num aliqui pecorum more sine sensu hæc prætereunt,  
 siue ex mentis torpedine, siue ex ebrietate fauen-  
 tis fortune. Et de nascendi modo in hac mortalita-  
 te intelligi potest, qualis sit modus ille renascendi  
 in æternitate. Nam sicut in locis maternis huic lu-  
 ci fingitur ac formatur homo, ita in hac luce para-  
 tur illi alteri, præ qua lux hæc nostra tenebræ sunt,  
 & nox obscurissima. Nec aliter quàm quum tem-  
 pus nascendi appetit, flaccescit uita uteri, quasiq;  
 infans emoritur, illo utique uiuendi genere: ad eun-  
 dem modum quum homo è uita orbis huius excess-  
 surus est, & tanquam pariendus ad uitam alteram,  
 moritur hac uitæ ratione, ut uiuat altera tanto  
 præstantiore, quanto hæc est lucis huius melior,  
 quàm

quàm illa uteri. Itaque paramur in utero uitæ corporis, in corpore autem uitæ mentis. Horret animus discessum ex hac uita, propter ingentem mutationem: & sic est affectus, quemadmodum infans nasciturus, si ei sensus aliquis daretur noscendi & cogitandi. Exit enim & infans nascens, & homo moriens, uterque in lucem nouam, faciē quæ rerum admirandam, qua nouitate uterque perterre factus, nollet ex suo gurgustio prodi, nisi urgeretur artificio nature. Non est profecto dubitandum, quin hominis mors nagnam habeat cum ortu cognitionem & similitudinem, propter eam imperfectionem quæ est infanti in utero, & homini in hac uita. Nam si perfectus esset suis omnibus partibus, atque absolutus infans in locis maternis, nihil ei esset opus ortu: sed quum ei sensus sit tributus, & facultas cognoscendi, quæ exercere non potest in utero, egreditur in hanc spaciosam lucem, ubi sentire possit & cognoscere. Hactenus quidem communia nobis omnia cum beluis. At uero quia be-luæ hic funguntur muneribus suis omnibus & facultatibus à natura inditis, hic uiuunt ac intereunt. homo, cui donata est mens, qua nihil aut parum utitur in hac uita, profecto ortum alium habet, in qua mentis obeat munia, quod in libris de Anima docuimus. sicuti et de illo quoque disputauius, si ani-

ma sit mortalis, omnia ad uitam hanc pertinere, frustra; hominem esse conditum: quandoquidem nullo penitus fine proposito, uel non eo certe qui excellentia eius sit dignus, atq; adeò res omnes in cassum essent à Deo productæ. Quorsum enim creare attinebat? scilicet ut postea quàm paulisper sese ostendissent, subducerentur? ut bibat homo, edat, dormiat, uoluptuetur, nihilq; absit à bestiis, lōgè etiam quàm illæ miserior? qui quod potissimum ipsi est, atq; optabilissimum, nunquam assequitur: quod Aristoteles & Theophrastus fatentur. Quòd si homo, cui corporea sunt parata omnia, qui solus uti potest, & uult, & nouit, frustra est inductus in uitam: quanto magis ea omnia quæ illius sunt gratia procreata? Vana ergo omnis creatio, & Dei maiestate immensa; sapientia indigna. quod absit. imò nec ulla est rectoris mundi prouidentia. Hæc enim tria ita sunt connexa & coniuncta existimatione ac persuasione, diuelli ac dissociari ut nullo modo nec possint, nec fas sit, Dei religio, Dei prouidentia, animæ nostræ immortalitas. Quisquis unum istorum tentarit labefactare, aliorum quoq; fidem cōcutiet. Nam si animæ non sunt immortales, bene aut secus factorum nullæ sunt pœnæ, nulla præmia. Hæc enim omnia in decursu præsentis æui permista & confusa cernimus, ut nihil aliud sit hominum uita, quàm merum latrocinium.



nium. Nulla est ergo Deo cura de nobis. Quod si nos non curat, quorsum à nobis coletur? uana & stulta persuasio fuerit religio Dei ac pietas. At nos tamen homines omnes & nationes quantumcunque barbaras, & ab humanitatis institutione alienas atque abhorrentes, animaduertimus adduci naturaliter ad religionem aliquam, laudare ac probare modestiam, moderationem, gratitudinem, pietatem, mansuetudinem, patientiam, æquitatem. Fieri ergo non potest, quin hæc sint bona, & contrarijs potiora. cuius rei nulla est ratio, si Deus non sit spectator ac iudex. testantur igitur nos illi curæ esse, et pietatis præmium alibi expectandum. Quod si illic est uirtutis præcium, & hominis finis, anima profectò illic uiuet. & retro idem ualet: si anima illic uiuet, finis hominis illic est. finis enim ad ultimum & perfectissimum pertinet, qui ea de causa nominatur finis. Quod si plurimorum & sapientissimorum hominum authoritatibus aliquid tribuimus, præter tacitum illum humani generis consensum, habemus expressum alterum & manifestum. quandoquidem non solum doctis & ab humanitate instructis nationibus, sed feris ac barbarissimis, ut Getis, Scythis, Indis, & in hunc nouum orbem tam diu sepositis & latentibus, persuasissimū est, animas hominum hinc in alia emigrare loca,

L digna

digna ijs rebus quæ in uita gesserint. Ex professori-  
bus autem sapientiæ ignobilissimi, & qui in deli-  
cijs extremum bonorū suorum posuerāt, animam  
fecerunt mortalem. scilicet ijdem illi, qui religio-  
nem omnem, qui cultum & amicitiam diuorum,  
qui prouidentiam, qui diuos ipsos funditus extir-  
pauerunt. Post hæc autem per prauam persuasio-  
nem euersa, non erat animorum immortalitas in-  
columis mansura, quæ coniuncta & complicata  
est cum causa prouidentiae & pietatis. Sapien-  
tissimi uerò & sanctissimi philosophorum nun-  
quam sustinuerunt animam mortalem affirmare,  
& quasi damnare capitis: ut Pheresydes Syrus  
antiquissimus in Græcia mentis cultor, Pythago-  
ras, eius discipulus Socrates, Plato, Zenon Stoi-  
cus, & innumerabiles qui ab his ueluti fontibus di-  
manarunt. Socratis unū ex argumentis est in Phæ-  
done Platonis, naturale esse hominibus desiderium  
sciendi & sapientiæ: quæ quum in uita hac con-  
tingat exigua, uel nulla potius, futurum esse absq;  
dubio, ut desiderium hoc alibi expleatur. Quippe  
quod naturale est, de nihilo esse, ac superuacaneū,  
non potest. Nam quemadmodū frustra essent oculi  
astructi animalibus, si nunq̃ daretur cernere sem-  
per in nocte ac tenebris uitā acturis: ita & cupidi-  
tas ueritatis, si nunquā essemus illam assequuturi,  
super-

*superuacanea res esset, ac deridicula. Qua in repu-  
 tatione ac persuasione certissima cessat Theophra-  
 sti querela, quòd natura longissimā mutis animan-  
 tibus uitam concessisset, quarū nihil interesset diu  
 uiuere: homini uerò perbreuem, cui tantum expe-  
 diret longam uitam degere, ad assequendam sapien-  
 tiam, maximum hominis bonum. Nunc uerò cū  
 incipimus sapere, morimur. non haeret in diuinam  
 sapientiam & bonitatem iusta ulla querimonia. Sa-  
 tis longam aetatem accepimus, ut hic quantum cō-  
 ueniat discamus. in altera erit copia sapientiae, &  
 satietas. In hoc enim æuo quantulum esset, quod in  
 sapientiae curriculo promoueremus, etiam si qua-  
 druplicaretur nobis uita, & ad quingētos aut mil-  
 le annos perueniret? Non perfert sapientiae fulgo-  
 rem mens nostra, angustijs huiusce corporis & ob-  
 scuritate oppressa, haud aliter quā noctuae ocu-  
 li lumen solis: quæ est Aristotelis magistri simili-  
 tudo. Quocirca tantus philosophus non accusa-  
 tione naturæ, hoc est Dei sapientissimi & optimi,  
 debebat sistere, sed ex ea admoneri sapientiae hu-  
 ius, cuius tantum & tam acre desiderium humanis  
 pectoribus natura indidisset, alibi profectò esse lo-  
 cum, & explendæ auiditatis oportunitatem. De  
 Aristotele, quid senserit, nihil habeo dicere, obscu-  
 rus est, lubricus, uasfer, in hoc etiam, ne à more suo  
 L 2      discedat.*

discedat. Vno in loco dicit, Si intelligere potest mens absque phantasia, separari potest ab ea: sin secus, non potest. quod ab eo non satis est pro acumine ingenij illius animaduersum. Anima enim in hoc corpore non potest nisi corporaliter omnia intelligere, hoc est per corporea instrumenta, quæ exteriora sunt, sensus. Interior autem imaginatio, non aliter, quàm qui per uitrum aliquid intuentur, non possunt aliter cernere, quàm ut illud finit uitrum. Alio tamen in loco idem ait Philosophus, separari mentem à sensibus ac corpore, ut immortale à caduco. In hanc præstantissimorum philosophorum, imò philosophiæ totius sententiam optimus quisque mente ac sensu uadit. Nam mortalem esse animam malis & desperatis hominibus optatur, & expedit: boni auersantur, & tanquam noxium refugiunt. Si enim (quod paulò ante dicebam) cogitatione reuoluat quis, absumi prorsus omnia in morte, quasiq; in perpetuas tenebras absorberi, quis bonus & generosi cordis non exhorreat mortem? quæ huic consolatio suffecerit, aut animatio, quo minus mortem reformidet, & refugiat modis omnibus, eamq; cum summa impatientia expectet, & perserat, quum necessitas coget? Vel in ipsis medijs cruciatibus, quum in uotis est mors, & inuocatur tanquam portus è tantis



tis tempestatibus, est tamen quies in illis aliqua, &  
 intercessatio, & concitatus animus mortem incla-  
 mat: qui ubi paulum resedit, consolatur semetip-  
 sum spe, uel quod cessabit dolor, uel quod tempus  
 & assuefactio leuiorem reddet. Denique grata est  
 quomodocunque lux hæc, etiam miserrimis. quid  
 illis, qui nullis corporis aut uitæ incommodis ue-  
 xantur? Age porro, quæ desperatio homini pro-  
 bo, si ueniat illi in mentem suorum recte cogitato-  
 rum aut factorum, qui nullum in uita præmium ce-  
 perit: imò contrà, quod sæpius euenit, malam pro  
 beneficio gratiam, uelut paupertatem, infamiam,  
 dolores, morbos, cruciatus, supplicium, nullam uir-  
 tutis compensationem reliquam esse post uitam,  
 nec plus eum accepturum, quàm improbum & sce-  
 leratum? Nam memoria nominis nec semper con-  
 tingit, & iniqua est, quæ & prauis facinoribus  
 laudem & gloriam tribuit, & uirtuti ac probita-  
 ti uel neglectum, uel (quod indignissimum est) dede-  
 cus. Nec ampla est propter diuersitatem ingenio-  
 rum, morum, sententiarum in nationibus. alijs e-  
 nim alia uidentur pulchra & laudabilia. Nec diu-  
 turna esse potest, omnia consumēte uetustate. Nec  
 quicquam ad uita sanctos pertinet. nec Achilli pro-  
 dest sua gloria, uel Socrati: nec Catilinæ aut Ther-  
 sitæ nocet sua ignominia. Quid porro? posteaquā

uir sapiens per cœlos, per sidera, per elementa omnia sit animi intentione ac uigore peruagatus, per stirpes, animantes, homines, angelos, usque ad regem mundi, per res ueteris memoriæ que gesta sint, quæ contigerint, quid illi acerbius potest nunciari, aut quod minus consolationem admittat, quàm si in hac tanta pulchritudine, tam amœno atque admirabili spectaculo extinguenda sit mens tantarum diuitiarum spectatrix, receptaculum, thesaurus? ut nullo amplius futura sit sensu, nullo in loco, non magis quàm bruti animus abiectus, uilis, torpens, nulliusq; capax excellentiæ? Quis est qui post hanc considerationem mortem non pertimescat, etiam in grauissimis uitæ malis positus? Contrà uero, quanta bono & sapienti consolatio ad casus omnes uitæ atque infortunia, scire paratum esse locum quietis, non priuationis atq; orbationis omnium, ut somniarunt stulti, (quomodo enim quod non est quiescit?) sed foelicitatis constitutæ à Deo æquissimo, potentissimo, optimo? quam eis largietur, qui ad bene & sancte uiuendum bonam uoluntatem attulerint uerè atq; ex animo. Hæc quæ de hominum sententijs atque autoritate attulimus, eò pertinent, ut fiat liquidum, ab ea parte naturam & uerum stare, à qua stant boni & sapientes, nempe à nostra. Re-  
ctius

citius uidelicet atque integrius est horum iudicium,  
 quam malorum aut dementium. Accedit iudicio  
 & maximorum hominum & maximæ partis hu-  
 mani generis iustitia, probitas, religio, & uir-  
 tutes omnes, quæ omnia immortalitate animæ  
 nituntur. Ac hæc quam in partem inclinant, &  
 ueritatem eodem inclinare necesse est. pro his e-  
 nim citius faciet ueritas, quam pro sceleribus, fla-  
 gitijs, improbitate atque impietate: quæ mor-  
 talitatis animæ comites sunt certissimæ. Sed nec  
 mirandum est magnopere, in definienda atque sta-  
 tuenda animæ natura falsos philosophorum quos-  
 dam minutos, ut inquit Cicero, ac ignobiles,  
 quum alij amplioris nominis in ijs quæ sensibus  
 usurpamus, tam fœdè sint prolapsi. ut quòd  
 nix esset nigra, quam uiderent candidissimam:  
 quòd ignis frigidus, quo nihil tangerent arden-  
 tius. Illud porro est in uitæ negocijs senten-  
 tijsq; miserrimum, & non fictis lachrymis de-  
 plorandum, quòd ad uerum & bonum nulli  
 sunt authores satis locupletes, & firmæ fidei:  
 ad falsum & malum quiuis sufficit. ut non iniu-  
 ria sit illud à Mimographo dictum, Ad tristē partē  
 strenua est suspicio. Nimirum, ut Ouidius inquit,  
 quòd nos in uitium credula turba sumus: mali ui-  
 delicet, & obscuri, idcirco ad falsum & malum

tanquam nostri simile procliues. Quam multi sunt, qui Epicurum derident, Plinium refellunt, imperitos uocant, ut ea quæ in rebus uel uitæ, uel naturæ adferrent, non satis habere explorata. At eosdem ipsos quum prouidentiam & religionem tollunt, iidem illi amplectuntur & collaudant: adeo inualuit in eorum mentes caligo uitiorum & scelerum. Sunt qui aiant esse e re uitæ, credi animam esse immortalem, quemadmodum etiam deos esse, quod aliter homines nec conseruaturi essent sanctam societatem, nec quicquam recte facturi, nisi cohiberentur metu illo, restare alteram post hanc uitam, & deos iudices; quos ideo à metu *θεοῦ* esse nominatos, quasi *θεοὶ*. Quid dicitis? Magno igitur mendacio opus est, ut homines uelint bene agere. O miserandam conditionem uirtutis, si non potest hominibus nisi per ingens mendacium persuaderi: quum nullæ duæ res tam sint inter se amicæ & concordēs, quàm uirtus & ueritas: nempe germanæ à Deo genitæ, & humanis mentibus sicut utilissimæ, ita etiam integris iucundissimæ. Ergo Deus potentissimus, sapientissimus, optimus, ea lege & conditione creauisset hominum genus, ut induci per ueritatem ad bene agendum non posset, sed per mendacium: & tantus artifex ad perfectionem operis sui instrumentum non è domo atque opu-



Opulentia sua ipsius desumpsisset, sed ab inimico suo diabolo mendacium, quo nihil est à Deo alienius, qui est mera ueritas. Quid restat igitur, nisi ut qui ingenij aut doctrinae bono deprahendisset mendacium, ueluti qui hoc dixerunt, & ab eis edocti ac moniti soluti essent eo metu, quo prius alligabantur: & ut quisque esset doctissimus uel acutissimus, ita & pessimus quoque, quando superstitione iam esset liber, nec deos ullos metueret, nec aliud quicquam nisi poenas legum. ita quo propius accederet ad hominis perfectionem cultu ingenij atque institutione, hoc & ad maliciam & scelera esset armator ac procliuor: quippe cui arcanum esset detectum, ficta & simulata esse omnia, quae preciperebantur de uirtute ac probitate. Atqui existimatio haec maxima est humani animi corruptela, & à perfectione auertit. ideoq; sententia haec se metipsam refringit, ut quo quis sit perfectior, eo imperfectior: quo melior, tanto peior; quo magis homo, ac uerius, hoc naturae ferarum similior, & ab homine remotior. En quanta rationum acies pugnat pro nobis, id est pro ueritate. Nam nos quid sumus? Veritas est fortissima, maximis uiribus fulta & communita. Quid expectamus? An ut animas ipsas exiliētes cernamus è moribundis corporibus, tanquam fumum è flamma? Neque tum

deessent, qui præstigias se dicerent metuere, & imposturam oculis suis fieri: ut quum niuë albam cer-  
nerent, & ignem ardentem. Quid enim satis fue-  
rit ei, qui animo obstinavit non assentiri? ut iam nõ  
agatur res apud tribunal rationis, sed affectionis  
prauæ, ac pertinacis. An tot unquam adducta sunt  
à philosophis argumenta ad id corroborandum,  
quod tam exploratum certumq; nos habere credi-  
mus, quàm ea quæ manibus contrectamus, aut cer-  
nimus oculis? Si decima argumentorum pars sta-  
ret ab aduersa parte, quis posset istorum sustinere  
importunitatem atq; insolentiã, qui nunc inopes  
ac destituti ab omni ratione, iudicio, mente, magna  
tamen adhuc fastidio nos aspernantur & contem-  
nunt, nostramq; ueritatẽ quasi stultitiã deridẽt,  
quod rationibus habemus fidem? quum illi nihil a-  
liud pro se habeant, nisi forsã, Non ita est, suspi-  
cor, aut credo non ita esse. Quibus de causis & ra-  
tionibus adducor, ut existimem sententiã hanc de  
animæ immortalitate, quum sit tanti ponderis, to-  
rius probitatis ac religionis fundamentum, non es-  
se inter fidei articulos relatum, quod scientia pos-  
sit comprehendì. Nam quibus tandem, aut quot ar-  
gumentis assequemur scientiam, si hæc non suffice-  
rint? Quidam affectantes uideri philosophi, aiunt  
in fide pietatis animam esse immortalem, in lumi-

ne autem naturæ mortalem. Quo quid dici potest imperitius aut demētius? Quasi nos quid uideatur disputemus, non quid sit. Nos uerò nec fidei lumē, nec naturæ inquirimus, sed ueritatem ipsam: quæ non gemina est, sed unica. Age uerò quid est naturæ lumen? num non humana ratio? Cedò, an plures aut euidentiores inuentæ rationes sunt pro ijs quæ scire nos arbitramur ex causis naturæ, ut sententia nostra fert, certissimis ac perspectissimis? & adferri aliæ possent permultæ, & allatas esse ab alijs non dubitādum. Latissima enim res est ueritas. Sed ego eas tantum posui, quæ mihi in mentem uenerunt. Velim autem mihi ad postremum dici, cur alia omnia quæ de anima traduntur, paucissimis et leuissimis coniecturis fulta, recipiuntur pro indubitatis: hoc unum tanto rationum agmine stipatum ac munitum pro infirmo habetur. & illa quidem stabilia atq; indubitata nobis esse, nostra nihil interest: hoc unum tam ualde interest, quantū est iam declaratum. Profectò liquidò apparet, uim esse aliquam homini infestam atq; inimicam, quæ ueritatem nobis tam necessariā procuret uertere in controuersiam, à cuius perniciosissimis tenebris tueatur nos Deus, lux uera & immensa.

**I**nuentum est tandem quod tantopere & qua-  
sierunt ueteres, & sciri totius humani generis  
interest, qui sit finis cui conditus est homo. Hunc  
demonstrauimus eum esse, qui sit anima, & ex ani-  
ma qui sit mentis, & ex mente in uniuersum homi-  
nem dimanet. Mentis autem est id, per quod fit bea-  
ta. Beata uerò effici non potest à rebus istis sublu-  
naribus, caducis & diarijs, quum sit ipsa immorta-  
lis. Porro nec ea immortalia, quæ ipsa in se beati-  
tudinem non habent, reddent eam beatam, ut cæli  
& stellæ. quomodo beata fiet coniunctione illius  
quod beatum non sit? Sed nec angelus potest ei suam  
beatitudinem communicare, quam ipse per se non  
habet suam, sed alieno beneficio, neque enim ange-  
lus aliunde est beatus, quàm ex coniunctione atque  
unione cum Deo. quòd nisi eam ipsam unionem  
communicet, nec beatitatem poterit communica-  
re. quòd si coniunctionem impartiat, non iam  
angelus eam fecerit beatam, sed Deus per coniun-  
ctionem suam. Quumq; & cæli & angeli finitas  
uires habeant, non poterunt mentis nostræ captum  
implere, qui ad recipiendum immensus est. neque  
enim quantolibet terminato ac finito expletur.  
quod uidere est in multis qui maiorem potiorēq;  
felicitatis conditionem expetunt, quàm angelicā:  
dij



dij fieri cuperent, & si quantus est Deus possent  
 dimetiri, etiam plus appeterent. certe expetūt quo  
 amplius non possunt cogitare. Condidit Deus ho-  
 minem non propter superiora, quæ illo non indi-  
 gent: nec propter inferiora, quod esset indignum:  
 nihil ergo inter hominem & authorem suum est  
 interpositum. Creatus est igitur homo propter se-  
ipsum, ut à solo conditore suo bonum omne ipsius  
 & beatitudo dependeret. Quocirca solus Deus,  
 qui solus implet mentis nostræ limites & excedit,  
 ipse animam nostram potest beare qui est beatis-  
 simus, qui immortalis, qui infinitus, qui quam beati-  
 tudinem habet, ex seipso habet, non nactus aliun-  
 de: & communicare potest, nec comunicās de-  
 perdit. Et in omni peregrinatione quasiq; exilio  
 reditus in patriam dulcissimus est atque optabilis,  
 eo magis si molesta sit peregrinatio & turbulen-  
 ta, uel exilium turpe ac difficile, patria autem quie-  
 ta & suavis. Animi nostri in hanc uitam ceu in pe-  
 regrinationē & exilium à Deo egressi, quàm mul-  
 ta perferunt graua, iniqua, laboriosa, acerbæ, &  
 dignitate sua indignissima? ut philosophorum qui-  
 dam non iniuria corpus hoc uincula & carcerem  
 animi nuncuparint. In Deo autem quæta omnia,  
 pulcherrima, beatissima, plus quàm possumus non  
 eloqui modò, uerùm etiam optare. Illuc ergo mirè  
 cupit

cupit animus reuerti, & suspirat, & clamat. sed interdum nec potest diserte quæ sentit proferre, neque seipsum intelligere, obrutus densissimis tenebris ignorantia. Quod si eò perueniat, compos fit uoti, & expletur eius desiderium, nec potest aliter. Adde his, quod quæ opera authori suo possunt esse similia, eorum operum perfectio est, illi effici multo simillima. nos uerò mentes sumus ad intelligendum & amandum idoneæ, ad beatitudinem aptæ, ut author noster: nostra ergo absolutio est, ijs ipsis dotibus, intelligentia, amore, & ad postremum beatitate, Deo fieri perquam similes. Ad hæc motus circularis perfectissimus est omnium. nos non à natura exiimus, ut est superius ostensum, sed à Deo ipso. quod si ad illum eundem reuertamur, perfectum utique cursum confecerimus. Ceterum nec similes possumus Deo fieri, neque ad illum redire, nisi cum eo iungamur, & unum fiamus (sicuti demonstratum est) & quasi dii: quod supremum est eorum quæ uel optare uastissimus atque ardentissimus appetitus potest. Is est ergo hominis uerus finis & dignus, quum eo recipiente, tum largiente authore ac principe uniuersorum.

## DE MULTITUDINE

spirituum.

**Q**uestionem hanc Peripatetica schola nobis obijcit, Quot sint angeli, quot animæ? Aristoteli haud plures esse placet, siue mētes, siue (ut nostri homines loquuntur) intelligentias, ipse appellat *νοῦς*, quàm quot sint orbes & motus cœlorum. quasi in hoc unum conditi sint angeli, ut cœlos circumuoluant. Ipsi uerò, quemadmodum et homines, ad immensam illam beatitatem sunt ex authoris bonitate progeniti. Angeli autem ex ministerio quod regi suo præbent, nuncupantur. Omnes sunt administratores spiritus, inquit Paulus, propter eos qui hæreditatem accipiunt salutis. Quàm diu enim durat cursus æui huius, angeli sunt, & famulantur in negocijs regni huius. Id uerò non est naturæ illorum finis, sed functio temporaria. Numerum illorum & munus multo melius expressit Daniel, qui uidit. Millia, inquit, millium ministrabant ei (de Deo loquitur) & decies centena millia à dextris illius. de quo sanctus Dionysius sic inquit: Supremos humanos numeros in semet ipsos replicans per hos cœlestium ordines mentium, numerabiles nobis non esse docet. Hæc tam numerosa multitudo Aristotelicos offendit: sed multo magis animarum, si sint immortales.

Qqo

Quò enim abít tanta illarũ multitudo, nascentibus  
et cadentibus tot corporibus in morem foliorum,  
quum uestiuntur et exuuntur arbores uere atque  
autumno? Quòd si mundus æternus sit, ut autu-  
mant, infinita erit animarum multitudo: quod est  
principi sectæ contrarium, qui negat infinitam es-  
se multitudinem posse entium per se existentium  
separatorum. Primum non esse æternum mundũ,  
iam est à nobis demonstratũ. Deinde magna est et  
intricata in scholis disputatio de axiomatico illo Ari-  
stotelico, non posse existere interminatam entium  
summam: quod ad corpora, non ad spiritus refer-  
ri, consensus est penè omnium. Sed tanta animarũ  
multitudo obruit illorum animos: et Deum ipsum  
obrueret, si esset eorum similis. Verũ non consi-  
derant, infinitati Dei quantamcunque multitudi-  
nem esse exiguam. Nam et istos nostros reges pro-  
pter quandam humani animi cum Deo siue cogni-  
tionem, siue similitudinem, et si tenuissimam et  
longinquam, quantumcunque magna regna non  
exatiant. Quis eorum non putat se regni amplio-  
ris capacem? quis non optat, et quantum est uirũ  
suarum, procurat? Alexandro in regno Macedo-  
niæ nato, hoc est Græciæ angulo, orbis hic non e-  
rat satis. Illachrymasse dicitur ad mentionem plu-  
rium mundorum, quum de hoc ipso philosophi  
apud



apud eum disputarent. At philosophi illi qui non plus res modo mundos, uerum infinitos quoq; in infinito posuerunt uacuo, quanto uerius & propius Dei magnitudinē concēperūt animo, quā hi nostri pusilli, qui multitudine hac animorū perturbantur? quasi solliciti et anxij uicem Dei, ne nimium sit occupatus & districtus tot animorū cura. O stulti, in regno agitis illius, cuius potentia & sapientia nullos terminos habent. Etiam si infiniti sint spiritus, pauci sunt Deo. Prætereo intimam illam uim & magnitudinē, cuius uel portio tenuissima omnes hominum & angelorum intellectus exuperat. Quiescant mētes nostræ, quando tam crassæ sunt & segnes. Attollite in cœlum oculos corporis, ac reputate cuius multitudinis sit capax tanta moles, quæ orbe hoc quē incolimus ea proportionē est uastior, cuius iniri numerus non potest. nec unum est cœlum, sed multi: quanto magis, quod spiritus loco non indigent, ac ne ipsa quidem corpora, si Deus uelit illa ubicunque uisum fuerit constipare.

DE PECCATO ANGELI  
& hominis.

**V**T autem spiritus illi amarent uere, atque ad beatitudinem quam illis parauerat, congruenter dedit illis parens omnium Deus meentem, qua cognoscerent, intelligerent, iudicio & consi-

lio uterentur, & ex libertate consilij ac deliberationis sequerentur quod amandum censuissent, nempe sibi bonum & conducibile. Is demum & uerus est amor (nam sine libertate impetus est potius quàm amor) & aptus beatitudini, ut nec inuitus reluctans que teneat in bonis, & sciat quanta sint ea bona. Scire enim, & libenter morari, facit beatos: inuitos autem detineri, uel in summa foelicitate faceret miserrimos. Verum & naturalem amorem, qui que delectare summè possit, & ex Deo beatos reddere, ex iudicio cuiusque amanti nasci est necessum. Si humanum animum Deus ad se amandum cogeret, non is amor esset, sed animi uiolentia: quemadmodum contingit in amoribus per philtrea & artes maleficas extortis. nec talis amor delectationem posset amanti adferre, ut qui non oritur ex iudicio rei pulchræ, delectabilis, expetendæ, sed cæco impetu rapitur: nec gratus esse Deo posset, qui non eliciuisset, sed extorsisset: sicut nec hominibus cordatis & intelligentibus rerum gratus est amor, quem amatoria pharmaca expresserunt. ex nostro autem sensu de diuino possumus facere coniecturam. Qui amatur ex iudicio, gaudet amatorem suum estimare bona ipsi inesse amari digna, & que reputatio allicit ad redamandum eum qui ita de nobis

bis sentiat . illud uero iudicium non est in eo qui impulsus, qui tractus, qui coactus amat. Quid quod etiam circa belluas eadem ualet ratio? quæ quum erga nos sunt bene affectæ, uelut canes, feles, puli gallinacei, aut columbini, equi, muli, placent nobis, quia ideas aliquo cum iudicio facere arbitramur: uidelicet quòd credant bonos esse nos sibi, & aliquam à nobis ad ipsas manare utilitatem. Quod si quæ alienæ & ignotæ nobis blandiantur, minus est id gratum, quia casu & errore id scimus contingere. Itaque & angelis & homini tempus aliquod attribuit Deus, in quo iudicij ac deliberationis usum exercerent, quid sibi foret bonum & expediens, quid persequendum, ubi adepti essent tenendum ac conseruandum. Non dubium quin homini maius multo concessum sit tempus, quanto mens nostra segnior est & tardior, quàm angelica. In eo ipso tempore quantulumcumq; fuit (nam neque nos scimus, neque scire attinet) edocti sunt à Deo atque illustrati, ut magnam admirabilemq; illam naturæ diuinæ maiestatem, uim, sapientiam, bonitatem, quantum suarum esset uirium conciperent animo atque intelligentia, ut eum solum ducerent esse suum bonum, illi que magno amoris ardore adhererent, ut unum fierent cum illo. Expediebat & angelo & ho-

mini nusquā omnino oculum mentis diuertere, quin in lucem illam & bonitatem intentissimū haberent sine conuiuentia: quousq; tantas concepissent ardoris flammās, per quas Deo suo unirentur immortalī auro beatitudinis, nec usquam amplius possent diuelli. Sed homo & angelorum non pauci oculos à Deo in semet ipsos reflexerunt. intuiti autem excellentem suam naturam, grande cōceperunt ex sui contemplatione gaudium: unde à Deo in semetipsos amorem conuerterunt. amoti à luce oculi, prolapsi sunt in tenebras, & excœcati sunt, ut Dei obliti, fœlicitatem quam à Deo erant expectaturi, naturæ & uiribus suis arrogarent. & quum quantus esset Deus iam eorum animis excidisset, pares se illi esse sumtrati. Amor ea coniungit inter quos commeat. angelus amorem suum si in Deum misisset, iunctus fuisset illi: misit ad se, iunxit se sibi, separauit à Deo. Abiunctus ergo à luce, collapsus est in tenebras: abiunctus à Deo bono & beato, in maliciam & miseriam. Idem accidit homini, ut post dicetur. Alij uero angeli nihil de se cogitarunt, sed de suo uero bono, illum semper habuerunt præ oculis, & plusquam seipsos amauerunt. Hi sunt immortaliter beati, illi autem immortaliter miseri: qui deprehensi in cæcitate illa mentis atque ignorantia, in prauo & peruerso amore sui, in eo manent perpetuò,



nec unquam resipiscunt, nec se peccasse agnoscunt. Habent quidem illi ad alia acumen ingenij magnum, cognitionem atq; intelligentiam rerum promptam, & amplam: sed quoties amor ille sui furiosus opponit se ante uigorem mentis, rapit eos transuersos ad prauissimas sententias, ut quoties de Deo cogitant, & de seipsis. ita enim se amant, ut adduci non possint ad agnoscendum scelus, nec ut se uel malos fateantur, uel aliquid commeritos, tantè que illius suæ cladis culpam non finit amor sui, ut in seipsos conferant, sed in Deum. ab illo iniuriam sibi fieri conqueruntur, eum que uocant iniquum, & quantum possunt conantur uoluntati illius resistere: & homines quos Deo uident gratiores, quàm se, infestare uexare que multis malis ac incommodis, partim odio, partim inuidentia erga nos, aliàs quoque rabie quadam aduersus Deum, ex qua res uniuersas oderunt, quia ab illo conditas. In casu autem illo è cœlis alij remanserunt in aere, alij in aquis, alij ad ima terrarum detrusi sunt. Nocent quacunq; illis permittitur, & homines ad desciscendum à Deo in mille scelera sollicitant uarijs & incredibilibus astutijs atque artibus. Norunt enim uel naturæ suæ solertia, uel diuturno ac uario usu rerum atque experimentis nim cuiusque herbæ, arboris, lapidis, animar-

tis . per hæc mouent humores humani corporis ,  
 per quos mouetur phantasia , à qua sollicitamur  
 ratio & uoluntas . Ipsi quoque ut spiritales in fa-  
 cultates inferiores animæ occultas quasdam actio-  
 nes possunt inuehere , quod in libris de Anima fu-  
 sius declaratur . Hæc uerò infestatio & sollici-  
 tatio ad deficiendum , tentatio à nostris nomina-  
 tur . Hæc ita contigisse , ita est ab ultima uetu-  
 state traditum per manus humano generi , ut du-  
 bitari non magis possit , quàm de re gesta , qua nihil  
 existimetur certius . Homerus antiquissimus scri-  
 ptor Atam ponit , hoc est Damnum deam , turban-  
 tem cœlum : eamque ob causam deiectam illinc à  
 Ioue in terras , ubi infestat & inquietat hominum  
 genus . Aegyptij in suis mysterijs perhibent , Io-  
 uem impuriore dæmonas è cœlo eiecisse , qui &  
 homines pro uirili parte sua secum quoque ad ima  
 conantur detrudere . A Plutarcho quoque poni-  
 tur Typhon quidam dæmon Aegyptius , qui ter-  
 ras ac maria infestavit . Pherecydes Scyrus scri-  
 bit fuisse dæmonem serpentem , qui maxima ter-  
 ris damna attulerit , eumque nominatum ὀφιογυνή .  
 Hunc casum uel à primis authoribus humani ge-  
 neris patres quasi per manus tradiderunt filijs ,  
 uel ipsi iidem dæmones ijs quibus essent familia-  
 res , ut alia de se ac natura sua permulta , & hoc  
 quoque

quoque retulerunt . At quidam totam eam rem derident , quia Homeri & poetarum fabulis sit similis : ipsi magis ridiculi , qui ignorant id quod doctorum omnium consensu est receptum , fabulas omnes ex rei gestæ ueritate ortas esse , nec aliud esse fabularum poeticarum fundamentum , quàm uerum . Quàm uerò esset peruersum & ineptum aliquid fabulosum existimare , quia fabulam uideat ei similem : quasi ueritas pro mendacio habenda esset , quia mendacium ueritati est plerumque simile . an non ea quæ finguntur & simulantur ad imaginem , quantum efficere authores possunt , & ceu normam ueritatis accommodant ? Ita ergo si quis uirum aliquem fingat magna sapientia , probitate , rerum contemptu , quæ de Socrate scribuntur , fabulosa erunt , quia fabulæ illius similia : aut quæ de patientia & moderatione probæ alicuius matronæ dicuntur , uana erunt , quia fabulæ de Griselide similia , quam Boccatius est cōmentus . Nec Homero et alijs scriptoribus hæc potuissent in mentē uenire . ad fingendū rē tantā , tā reconditā , tā admirabilē , nisi aliqua auditione eā à suis maioribus accepißent . Sed dimittamus poetæ et fabulas . Plutarchus et Pherecides philosophi sunt . Addo his Euclidē , Platonē , Ciceronē , Apuleiū , Lamblachū , Plotinum , Porphyriū , Martianū Capellā , et uniuerſā gētilitatē ,

cui demones fuerunt familiarissimi. Spiritus omnes gentilitas, & philosophorum scholæ demonas nuncuparunt, hoc est sapientes, medium quoddam genus inter deos & homines. Horum duo fecerunt genera, ἀγαθὸς δαίμωνας & κακὸς δαίμωνας, bonos ac malos. bonos colebant ut prodesse, malos ne nocerent. Eidem generi sunt nuncupati & lares, & manes, tam boni quàm mali. Euclides geminum cuique genium attributum esse ait, bonum & malum, malus importat quæ potest damna, bonus à uolentia mali tuetur. Plutarchus refert, M. Bruto in bellis civilibus apparuisse uelut faciem æthiopis tetram et horribilem, quam quum Brutus rogaret quis nam esset, responderit, se illius esse malum genium, quem uisurus esset in Philippis Macedonia, ubi commissum est prælium, & Brutus uictus. Cacodæmones sunt lemures, & terricula nocturna, quæ turbis miscent omnia, & tumultibus: quorum philosophi omnes meminerunt, & in unaquaque ciuitate sentiuntur, ut nihil sit notius atque exploratius, ut mirum sit esse aliquem qui dubitet, nisi qui nihil esse credat, præter id quod ipse uiderit aut senserit. In insulis fortunatis, quas Canarias uocant, priusquam in ditionem Christianorum uenirent, demones in idolis apertè loquebantur populo, & se iuebant adorari ac coli. In nouo hoc orbe



orbe recens inuento nihil est tritius aut uulgarius, quàm non de nocte solum, sed medio die ac luce occurrere manifestò demonem in urbe, in agro, qui aliquid loquatur, iubeat, uetet, infestet, terreat, feriat? Quid inter nos? an non omnes sepe numero uidimus homines à nefario demone arreptos, loqui linguas alienissimas, quorum ne uerbum quidem noscent sibi restituti? Qui rem ignorant, furori atque agitationi mentis concitatissimæ tale monstrum assignant: quod nulla ratio patitur. nam loqui unum aut alterum ignotum uerbum, fuerit sanè mentis emotæ: eloqui uerò totum sermonem, atque etiam comptè, & uersus in eo facere, & sensum & numerum, maioris est potentie seruire, quàm furoris humani animi. Demon est, qui per instrumenta illius edit uoces illas tanquàm per fistulam. Miretur porrò aliquis cur Deus, è cuius solo nutu pendent omnia, patitur hos suos inimicos uiuere. Si tam Deus illis esset inimicus, quàm ipsi sunt Deo, punctum profectò temporis non persequerent. Sed demones quidem oderunt Deum, Deus illos non odit. abest enim à sancta illa & beata natura odium, affectus tam teter & deformis. Nocere illis Deus potest, sed non uult: illi contrà nocere Deo cupiunt, quod non possunt. Amiserunt illi quidem, quantum discessione à Deo pote-

poterant amittere, nempe magna et æterna bona: retinuerunt autem, qua essentiæ naturæ illorum Deus erat in ipsorū origine elargitus, ut essent ingeniosi, & immortales. Quæ ergo acceperunt damna & detrimenta, à seipsis acceperunt, non à Deo: qui quum sit mera bonitas, prodest omnibus, lædit neminem. Malus est demon, & mala eius opera omnia, & de Deo male cogitans: Deus tamen artifex sapientissimus, malum hoc in bonum eorum conuertit, qui ipsi sunt amici. Corporalia seruiunt spiritalibus, spiritalia omnia propter participationem beatitudinis suæ cōdidit Deus. eos ergo habet charissimos, qui eiusce sunt beatitudinis consortes. Ideoq; omnia propter istos sunt, & bona & mala, qui hæredes sunt æterni boni: bona istis prosunt, & mala in bonum cedunt, Deo procurante, et ipsis præbentib. se obsequentes, sicut à Paulo apostolo scriptum est: Diligentibus Deum, inquit Paulus, omnia cooperantur in bonū. Quocirca habent sancti angeli ex demonum ruina gaudium ingens, quod in partib. Dei permanserūt. Habent hic homines exemplū, ne à Deo desciscant. habent iusti, à quibus eorum exerceatur uirtus: & quum uident se manus cum tam ualido hoste conserere, diffisi suis uiribus, quæ nullæ sunt, discunt Deo confidere, ad eum confugere, illius opem serio ac bona fide implorare, se que illi magis & magis

gis adiungere, agnoscere auxilium, & illum diligere, qui nos à seuitia tam potentis atque immanis hostis propugnat. Et quoniam opera Dei omnia iustitia & bonitate sunt temperata, in sanctis elucet eius bonitas, in sceleratis iustitia.

## DE HOMINIS CORPORE

& peccato.

**C**reatio rerum talis fuit, qualis impressio sigilli in multis materijs, ut prima quæque maxime referret annuli figuram, postremæ dilutissime. Ita Deus ab angelo sibi propinquo progressus est ad molem illam inconditam atque informem, quæ est à Deo remotissima, proxima nihilo. Et quum se omnibus uellet impartiri, communicauit se plenè spiritibus, qui erant eius capaces. ut se autem materialibus etiam, quantum eorum uis & facultas caperet, communicaret, adiunxit materiale corporali, nempe hominis corpus animæ: quod sanè corpus omnem rerum naturam, materialium quidem, in se complectitur, ignem, aërem, aquam, terram, uitam uegetabilem, cui additus est sensus. Itaq; in hominis beatitudine uelut beata redditur tota uniuersitas. Et hominem Deus à principio unum procreauit, cui nomen fuit Adam. ex costa eius eduxit uxorem Euam, sicut antiquissimæ Hebræorum literæ referunt, de quibus statim loquemur.

Ex

Ex his duobus reliqui homines promanarunt . nam  
 materiæ huius ratio generationibus est apta . Por-  
 rò qui apti essent ad generandum , eos non oportebat  
 condi uniuersos pariter . nam superflua fuisset  
 generandi facultas attributa . Angeli , quibus gigne-  
 re datum non erat , uno sunt uelut partu editi . Ac-  
 cedit huc , quòd homines quoniam geniti erant ra-  
 tionales , & ad amorem idonei , coniungi inter se a-  
 more congruebat . Huic porrò nexui resistit corpus .  
 ideo ex uno uelut trunco producti sunt omnes , ut  
 tanquam propinqui & iuncti sanguine omnes in-  
 ter se bene cuperent , nec ullæ uiderentur esse natu-  
 rales inimicitie . Hic conditus est homo , & data  
 ei uita corporalis , tum quòd esset corporatus , tum  
 quod par erat ut uiueret quoque corporeum inter  
 corporea , postea spiritus inter spiritalia cum Deo .  
 & qui amore erat unum futurus cum Deo ut an-  
 geli , huic quoque tempus est assignatum , in quo in-  
 telligentia amorem extimularet , amor autem in-  
 flammaretur , plus temporis homini quàm angelo  
 propter affectus & corpus , quæ impedimento sunt  
 rationi : non utique tanto ut nunc , sed alicui certe  
 impedimento erant . quod quidem hinc nascitur . Cõ-  
 ditor enim ut omnium est parens , omnia diligit , om-  
 nibus se uult impartiri , quantum uniuscuiusque es-  
 sentie uis & facultas capere ac perferre potest .  
 quumq;



quumq; sit ipse spiritus, ut id fieret facilius, aptius, plenius, corpus adnexuit spiritui, nepe animæ rationali, quæ Deum intelligeret, amaret, caperet, quæ beatitudo redundaret in corpus. Animæ coelestes sunt, & diuinitati propinquæ, spiritus scilicet: corpora uerò crassa & densa, à coelo & diuinitate remotissima. Fertur quicq; ad suam naturam & originē. Anima spectat sursum ad res coelestes ac diuinas: corpus in terram, et procul à diuinitate animam detrahit, & quantum potest detrudit. Affectiones autem, quæ uelut mediæ sunt, et quasi nexus inter corpus & mentē, ad partem corporis defleunt. unde tanta in animis nostris procliuitas ad corporalia, id est ea quæ sensibus corporis usurpantur, tanta segnicies ad pulcherrima & coelestia quæ sola mente comprehenduntur, tanta sollicitatio ad desciscendum à lege spiritus, hoc est Dei, ad concupiscentias corporis & uitæ huius: & eo maior, quo grauius est pondus noxiarum, ut post peccatum, & inualescentibus in humano genere uicijs. Ergo tametsi appetitus erat tum ante delictū menti subditus, non tamen adeò, quin haberet obiectū suæ delectationis aut auersionis, quo incōsulta mente impetu impelleretur. Non enim mutata est prorsum essentia naturæ, et si deprauata & prolapsa longissimè à puritate atq; excellentia primæ originis. Sed si tum mens aliquid iussisset,

iussisset, fuisset ilico appetitus audiens dicto: quod  
 nunc est multo secus. Et erat homo conditus ea lege,  
 ut quemadmodum quum ex utero post nouem men-  
 ses in nouam lucem uenit sine morte, ita et tum post-  
 quam hic aliquandiu uixisset, transferretur in cœ-  
 lum. In hac uita ut assuesceret conditorem suum nos-  
 se & amare, multa sunt ei ostensa per quæ ad illum  
 se erigeret. Varietas rerum cōditarum propter illius  
 corpus: quod ut est compactum ex uarijs, ita uarijs  
 eget, siue ad usum, siue ad delectationem. Tum mens  
 ex illa uarietate facilius authorem intelligit. ille enim  
 est tantus, & in simplicitate tam multiplex, ut uni-  
 co opere non posset humane menti declarari. Pluri-  
 bus opus fuit & ad manifestationem atq; expressio-  
 nem illius naturæ: & tanti tamq; uarij artificis fuit  
 multa fabricari, quoniā multa animo conceperat. Il-  
 la autem animi similitudo expromenda fuit operib.  
 Tota quidem filio exprimitur: sed quantū sat illi est  
 uisum, per res creatas, in quarum unaquaq; impres-  
 sit uestigium aliquod sui, hoc est bonitatis, potentiæ,  
 sapientiæ. Horū autē corporaliū usus non est illis da-  
 tus qui non indigerent, ut angelis. Sed neq; ijs qui uti  
 nescirent, ut belluis. Ei ergo solū cui esset opus, ut ho-  
 mini ex corpore, quī que uti sciret ex mente. Quo-  
 circa propter hominis usum hæc sunt cōdita omnia.  
 illum Deus præfecit dominum principem que ho-  
 rum

rum omnium, cuius gratia sunt ex nihilo producta. quibus de causis amor in Deum, et reuerentia, et cultus nasci atq; augeri poterat: quòd tam bonus Deus, qui tam multa condidisset propter ipsum: quòd tantus & tam admirabilis, qui de nihilo protulisset, & conseruaret. Ex tam multis sensui obuijs, tum causis occultis, quas industria sua humanum ingenium inuestigat, melius se hominis contemplatio attollit ad cognoscendum Deum, ut amet & colat, quàm faceret ex una aliqua, aut altera: propterea quòd cognitio nostra, ut corpore inclusa, sequitur corporis naturam. Ex uarijs melius subsistit & roboratur, quàm ex aliquo uno: ex uariorum atq; sparsorū collectione facilius peruenit quòd intendit. Et quia non expediebat homini seipsū scrutari, ac pernosce, nec quantum uel posset uel non posset in se ac res alias expendere, ne (quod demoni acciderat) ex ea reputatione insoleceret, solummodo autem uersam suam intelligentiā in authorem suum conuertere, ita demum futuro beatissimo: uetitus est de fructu arboris scientiæ gustare, siue is fructus eam habebat uim, ut ad considerationem rerum conferret, sicut multa sunt etiamnum quæ spiritus cordis & cerebri dilucidant, & mentis subtilitatē pariūt: siue illud summonebātur, ne à Deo ad dotes suas contēplandas, rerūq; sibi subditarū experimentum

iussisset, fuisset ilico appetitus audiens dicto: quod nunc est multo secus. Et erat homo conditus ea lege, ut quemadmodum quum ex utero post nouem menses in nouam lucem uenit sine morte, ita et tum postquam hic aliquandiu uixisset, transferretur in celum. In hac uita ut assuesceret conditorem suum nosse & amare, multa sunt ei ostensa per quæ ad illum se erigeret. Varietas rerum cõditarum propter illius corpus: quod ut est compactum ex uarijs, ita uarijs eget, siue ad usum, siue ad delectationem. Tum mens ex illa uarietate facilius authorem intelligit. ille enim est tantus, & in simplicitate tam multiplex, ut unico opere non posset humane menti declarari. Pluribus opus fuit & ad manifestationem atq; expressiõnem illius nature: & tanti tamq; uarij artificis fuit multa fabricari, quoniã multa animo conceperat. Illa autem animi similitudo expromenda fuit operib. Tota quidem filio exprimitur: sed quantũ sat illi est uisum, per res creatas, in quarum unaquaq; impressit uestigium aliquod sui, hoc est bonitatis, potentie, sapientie. Horũ autẽ corporaliũ usus non est illis datus qui non indigerent, ut angelis. Sed neq; ijs qui uti nescirent, ut belluis. Ei ergo solũ cui esset opus, ut homini ex corpore, qui que uti sciret ex mente. Quocirca propter hominis usum hæc sunt cõdita omnia. illum Deus præfecit dominum principem que ho-  
rum



rum omnium, cuius gratia sunt ex nihilo producta. quibus de causis amor in Deum, et reuerentia, et cultus nasci atq; augeri poterat: quòd tam bonus Deus, qui tam multa condidisset propter ipsum: quòd tantus & tam admirabilis, qui de nihilo protulisset, & conseruaret. Ex tam multis sensui obuijs, tum causis occultis, quas industria sua humanum ingenium inuestigat, melius se hominis contemplatio attollit ad cognoscendum Deum, ut amet & colat, quàm faceret ex una aliqua, aut altera: propterea quòd cognitio nostra, ut corpore inclusa, sequitur corporis naturam. Ex uarijs melius subsistit & roboratur, quàm ex aliquo uno: ex uariorum atq; sparsorū collectione facilius peruenit quòd intendit. Et quia non expediebat homini seipsū scrutari, ac pernosse, nec quantum uel posset uel non posset in se ac res alias expendere, ne (quod dæmoni acciderat) ex ea reputatione insolesceret, solummodo autem uersam suam intelligentiā in authorem suum conuertere, ita demum futuro beatissimo: uetitus est de fructu arboris scientiæ gustare, siue is fructus eam habebat uim, ut ad considerationem rerum conferret, sicut multa sunt etiamnum quæ spiritus cordis & cerebri dilucidant, & mentis subtilitatē pariūt: siue illud summonebātur, ne à Deo ad dotes suas contēplandas, rerūq; sibi subditarū experimentum

mentum animū deflecerent: debere confirmari primum in cognitione Dei, ut illum amaret solum, hinc ad usum rerum aliarum transiturus, quum esset iam extra periculum. Sed ille instigatus est arte maligni, qui serpentis forma illum aggressus, ex gustu pomi scientiam & magnitudinem Deo parem promittebat: nec aliā fuisse aiebat Deo uetandi causam, quā ne in regno naturæ uelut socium habere hominem cogeretur. Calumniatur apud homines Deum, apud Deum homines, ideo *διὰ βόλος* dictus. Verba stulta, sed apud animum cupidum tantæ magnitudinis facile nacta sunt fidem. Iam uxor re ipsa accesserat consilio dæmonis, et pomum ederat, offerebatq; coniugi Adæ. Ita superbiæ adiungebatur amor societatis. Nam Euam ex costâ Adæ dormientis Deus eduxerat, dederatq; ei uelut adiumentum uitæ, forma ac ingenio similibus. adiumenta enim dissimilia habebat haud sanè pauca. Ergo gemino stimulo instigatus Adam, consensit in partes & factionem contra Deum: tanto præmio opinione sua proposito, gustauit de pomo scientiæ, hoc est, uertit oculos à Deo ad se, ut dæmon fecerat. ilico obtenebratus est, & se dilexit oblitus Dei. Quo admissio, separauit se à complexu illo diuini fauoris. Condicio erat dicta in lege, ut quacunque hora ex uetito frustum ederent, morerentur. quod ita contigit. Nam  
 si

si quis hominem nunc consideret, plane iudeat gra-  
uissimo laborantem morbo & insanabili, ut iam  
desperatus & deploratus sit. Corpus infirmum, o-  
mnium rerum iniuriæ obnoxium, morbi singulis  
corporis partibus cum acerbissimis dolorum faci-  
bus horis omnibus minantes atque impendentes:  
mens sicut in extrema uale tudine inualida, cæca,  
improvida, nec se illustrari sinit uoluntas, ut pala-  
tum ægri noxia semper appetens, pro futuris ini-  
mica, sananti aspera atque intractabilis: affectus  
commoti omnes. ipse homo seruus rerum quibus e-  
get, quarum erat natura dominus. In hac ægrota-  
tione paucos annos moribundi agimus, donec om-  
nino efflamus animam, quod mori dicitur: quum  
uerius ortus ipse dici possit mors, ut acute dixit  
Manilius,

Nascentes morimur, finisq; ab origine pendet.  
Talis mors data est Adæ pro supplicio sceleris a-  
cerbior multo, quàm ilico extingui corpus. Statim  
peccatum, hoc est cognitio sui, ostendit ipsis, non  
esse tales eos quales rebantur. nam qui se excellen-  
tissimos esse existimabant, eos puduit sui ipsorum  
& erubuerunt suam nuditatem: tales se esse iudi-  
carunt, tam fædos & turpes, ut existimarent alios  
libentius ipsorum tegumenta conspecturos, quàm  
ipso eosdem. decerptisq; folijs ex arbore, texerūt

ea quæ ab illo tempore fuerūt pudenda, prius non erant. & intelligentes se peccasse in legem authoris sui, inter arbores confertissimas abdiderunt se, fugientes illius conspectum. Clausi erant prius eorum oculi ad alia, præterquā ad Deum: nunc clausi ad Deum, aperti ad alia. amissa est simplicitas illa innocētiae, & iam qui solum curaturi erāt Dei iudicium de se, relicto diuino curant humanū. operiunt pudenda: & qui erat antea in mundo liber, incipit alienis iudicijs seruire. sequitur caligo, & tenebræ mentis. fugiebant Domini conspectum, obliiti omnia esse nuda et aperta coram oculis illius, uimq; illius omnia regere, omnia replere. hoc enim ante miserabile illum casum non ignorabant. Tum Deus denunciauit homini, amisisse illum potestatem in res inferiores, & laboriose quæsiturum necessaria. terram ipsam pro bono semine, pro mercede laboris repensuram ei spinas & tribulos, res prorsum inutiles atq; insuauēs. Quæ noxa non solū de terra intelligenda est, sed de ijs omnibus in quæ patet humana diligētia, aqua et aëre, siue naturaliter proueniāt, siue arte fiant atq; industria. omnibus propositus est labor & sudor, si uelit uti. Et quoniam parēs est Adam omniū mortalium, in eo fuit uitata natura nostra, ut nunquam deinceps integra ueniret ad posteros.

QVOD



## QVOD HOMINVM NATVRA

est corrupta.

**C**orruptam esse naturā nostram, tam manifestō ipsamet ostendit & clamat, quā e-  
grotare se quū tenetur graui morbo. Quæ enim  
condidit Deus, ea in usum aliquem parauit. nam  
quid minus cadit in sanctam illam & æternam sa-  
pientiam, quā temerē & sine fructu & sine ullo  
quicquam procreasse? In familia bene instituta  
nullus uacat officio, ut est uetus uerbum: uacabit  
in mundo, quo nihil est sapientius descriptum atq;  
ordinatum? Porro usus non potest esse, nisi eius  
qui & indiget, & potest uti. Deus nulla prorsum  
in re indiget, extra se angelis qui meri sunt spiri-  
tus nullus est usus mundi corporalis. Belluæ uerò  
paucis contentæ, nempe satisfacisse uentri, reliquis  
omnibus nec uti sciunt, nec possunt, ac ne curant  
quidem. Homini ergo sunt parata hæc, qui eget  
propter corpus, & mēte ac ingenio præditus sciet  
uti. Sapiens & optimus artifex Deus, homini, cui  
ex bonitate sua mundum suum attribuebat corpo-  
reum, ex eadem ipsa bonitate facultatem quoque  
erat largitus, ea inter quæ uersabatur accommodan-  
di ad usus suos, nempe cognitionem & scientiam  
eorum, imperiū quoq; in illa ipsa & dominatum,  
quo non minus apte posset uti quibus uellet, quā

N

facile

facile & quandocunque libuisset. Dominum ergo illum constituit eorum quæ propter ipsum creauerat. Quale enim esset hereditatem filio parare, eamque ita recondere, ne uel inueniret, uel postquam inuenisset, eam addere difficultatem possessioni, ut capere & tenere uix posset? Tale esset omnino munus à Deo homini concessum plantarum, animantium, lapidum, si ipse quid & quatenus ex ijs sumendum haberet, quum usus posceret, ignoraret. Iam autem ut sciret assequi illa, non posset tamen magnis uiribus renitentia ac repugnantia. Est ergo diuinæ bonitatis ac sapientiæ, omnia hæc muneri homini tradita cum facultate, hoc est scientia & dominatu. Atqui nos & misera illorum omnium cecitate atque ignorantia ab usu eorum excludimur atque arcemur, tum ea ad quæ peruenimus capere & possidere non possumus, quia procul disita, quia recondita, quia reluctantia, quia damnum nobis mortemque adferentia. Dicunt, Voluit nos Deus exercere, imò quantumcunque exerceamur uniuersi, minimam partem eorum quæ ignorabimus non assequemur. At saltem necessaria sciremus, ut belluæ. Quid, quod non solum ea non obtemperant uoluntati nostræ & iussibus, sed insidiantur omnia, ut noceant si qua possint. Aestus & rigor cæli nobis, frugibus, & animantibus nostri  
usui

usus, ignes incendijs, aquæ eluuiionibus, ædificia  
 quæ nos ad tutelam nostram extruimus ruina sua  
 nos opprimimur, in mari mergimur dū piscamur,  
 dum aliquò traicimus, uestes arrodit tineæ, puluis  
 & humor corrumpit metalla, rubigo consumit.  
 nullæ sunt fruges quibus terra eadem non produ-  
 cat hostem, à quo suffocentur & pereant. aues, tal-  
 pæ, mures, formicæ, uermium incredibiles formæ  
 fructibus & frugibus pestiferæ. feles & canes in-  
 ter nos educati penum uniuersam diripiunt, insi-  
 dianter corti martes, uulpes, mustelæ, caulibus lu-  
 pus; ut transeam rariores feras, leones, ursos, a-  
 pros, tigres, pardos, pantheras, nobis & nostris  
 gregibus hostes capitales. Quid referam uenena-  
 tam multifaria, tam præsentis exitij? Ex homine  
 uerò quanta homini mala? plura ex illo uno, quàm  
 ex cæteris omnibus domi, priuatim, publicè, in ci-  
 uitate, calumnijs, pugnis, digladiationibus, furtis,  
 rapinis, mutilatione. Postremò foris bello, quod u-  
 num omnes facies & formas crudelitatis, immani-  
 tatis, inhumanitatis complectitur, ut id solum eui-  
 dentissimo atque efficacissimo sit argumèto depra-  
 uatæ ac uitiatæ naturæ nostræ. Quæ animantes  
 inter se turmatim ad internecionem concurrunt?  
 nullæ sanè: sed, ut Plinius inquit, Congregari ui-  
 demus, & stare contra dissimilia. Quæ fera tanta

rabie scuit in feram sui generis? nimirum manet in illis primigena illa natura, in nobis degenerauit in peius. Itaque non nos domini sumus rerum, sed illæ nostri: & nos illis seruiamus, quanto labore, quam assidua sollicitudine? ut hominum plerisque nihil sit omnino aliud negociū in uita, quam quærere quæ futura sint usui corpori, & quæ sita conseruare, uel ne perdantur, uel ne pereant. Quod si amittantur, quis dolor, quanta afflictatio? ita nihil minus quam id agunt, propter quod missus est homo in hanc uitam: & sicut Ennius loquitur, præter propter uitam uiuitur. Aliquid ergo egimus, aliquid commisimus, propter quod amissa sunt ea munera, quæ excellenti naturæ nostræ fuerant ab authore concessa. Iam uerò in re omni est aliquid optimum & præstantissimum, unde res ea nomen speciei suæ sumit. bestię omnes statim ut natae sunt, uel breuissimo post tempore præstantissimū illud suæ naturæ usurpant, & opera edunt illi præstantiæ conformia, & ut quædam paulò diutius tardent, usurpant certè tandem, & re ipsa demonstrant se huius esse naturæ ac ingenij. quod si non faciunt, certè indubitatum facimus iudicium, corrupta ea esse ac deprauata ex causâ aliqua uel interna uel externa. Homo autem quâdiu bona mente non utitur? quàm pauci aliquando, quàm mul-  
ti



ti nunquam: ut appareat, à rectitudine naturæ suæ declinasse. Quid, quòd animâtes omnes statim uer-  
gunt quasi nutu quodam ad inclinationem perfe-  
ctionis suæ, soli homines à sua sunt auersi et abhor-  
rēt, nèpe à cultu mētis & sapiētia. Bestiæ naturæ  
ductu nollent uiuere uitam plantarum, & ne illuc  
relabantur exercent semetipsas. At quàm multi ho-  
minum cupiunt uitam brutorum agere, immersi  
delicijs & corporeis uoluptatibus, sine ulla cura  
aut respectu mentis, ac ne cogitatione quidem, sit  
ne mēs aliqua, an nihil homo distet à bestia. Quòd  
si sibi ipsi homo permittatur & cōmendetur semo-  
ta educatione ac disciplina, quomodo ferretur pro-  
nus præceptisq; ad ea quæ minimè sunt hominis? cu-  
ius rei statim ab ortu suo tota infantia & pueritia  
manifestissima edit signa. Quid enim querit aliud  
quàm delicias, uoluptates, lusus, indulgentiam?  
Quid ei magis est instar mortis, q̃ prima illa ad li-  
teras & formandos mores institutio? mens nostra  
natura expetit uera, uoluntas bona: adeò ut *Quin-*  
*tilianus* mirandum esse ducat, malos esse tam mul-  
tos, quòd sit contra naturam. At quanta est facta  
inclinatio à ueritate ad fabulas, à bono in malum?  
Degenerauit ergo natura nostra à recta sua condi-  
tione ac uia. Age uerò, quæ tandem natura integra  
expetit interitum sui? Atqui in solo hominum ge-

nere sunt qui sibi manus adferant, multi qui mortem optent & inuocent, plurimi sani & ualentes tædio uitæ ob leuiculam agitationem bilis. Accedit his, quòd homines positi sumus à principe nature inter bestias & angelos, propinquiore tam angelis mente ac intelligentia, propinquiore brutis corpore. At uidere est, quàm maiore nos interuallo superant angeli, quàm nos bruta. & loquor de angelis in sua natura, nec miseria deiectas nec sublimata beatitate. Corporis uerò dotibus à multis bestiis superamur, integritate, uiribus, celeritate, agilitate, ualetudine, uita, sensuum acumine ac uigore. Deinde non est credibile, à Deo optimo & nobis amicissimo conditum esse de principio hominem tam infirmo corpore, obiectum tot incommodis uitæ, & animam nobilissimam intrusam in uincula, ubi torqueatur perpetuò: sed esse indubiè quod Sapiens ait, se id solum inuenisse, à Deo esse factum hominẽ rectum, sincerũ, integrũ, & ipsum se his calamitatibus inuoluisse quibus premitur. Aliquid istorum uiderunt in suis illis tenebris Pythagorici, & eos sequutus Plato, ut solet, quum dixerunt corpus hoc sepulturam esse & carcerem animæ, eamq; hic deuinctam dare magnorum scelerum poenas. Hic uideo adesse quosdã multis questionibus, tanquam tendiculis instructos.

flos. Atqui Adam peccauit solus, cur in nos redun-  
 dat flagitij illius supplicium? Planius est faciendum  
 hoc quod de prima uia noxa & principe dicimus.  
 Mens hominis & illustrata erat magna luce Dei,  
 & amore accensa, ut sursum ferretur: caro uerò  
 beneficio illius lucis & ardoris subdita menti, &  
 omnia homini. Homo uerò per peccatum auertēs  
 se à Deo, transijt à mente in carnem. Caro, cuius  
 natura est deorsum trahere, nēpe ad suā originē,  
 procul à Deo trahit, nempe ab spiritu, habet enim  
 caro natura atq; ingenio suo desideria sua & cupi-  
 ditates alienas ab spiritu, sed quæ beneficio fauo-  
 ris diuini reprimebantur. Ita amisit homo ea mu-  
 nera, quæ gratia numinis erat nactus, & ex spiri-  
 tali ac diuino factus est carnalis terrenusq;. Inde  
 caro omnis ex illa carne desumēda, damnata, tanq̃  
 Deo inimica: & caro omnis propter consortium  
 & coniunctionem cum illa inimica Dei carne non  
 tam facta est inimica quàm aliena. Ita in Adam pro-  
 pter peccatum, tanquam in semine uel radice, om-  
 nis humana caro damnata est. Et quemadmodum  
 uitiato semine aut radice omnes deinceps fructus  
 nascuntur uitiati, sic in uitio Adæ, quoniam ex eo  
 omnes sumus. Quapropter generatio hominis fa-  
 cta est pudenda: quod ostendit naturalis pudor in  
 ostensione genitalium, ideoq; ea solū texerunt

Adam & Eva. nāq; ubi senserunt uitiiū, de illis erubuerūt. Atqui sacris oraculis est proditum, Anima quæ peccauerit, ipsa morietur, pater nō portabit iniquitatē filij. Ita est. Sed omnes quodāmodo in Adam peccauimus, nō aliter q̄ omnes futuri fructus uitiatī sunt in uitio seminis aut radicis. Iustitia aut illa prima quæ originalis nūcupatur, non erat munus à Deo Adæ peculiariter tributū, sed humano generi. ideoq; cū ij qui erāt tū humanū genus, facinus cōmiserūt, uniuersū humanū genus beneficiū illud perdidit: quemadmodum quod ciuitas pusilla adhuc & infrequens decreuit ac statuit, eadē mox aucta & numerosa seruat, & pauci patres copiosam suam in posterum sobolem obligant & deuinciunt. Adde huc, quòd quæ peccamus ratione, cōsimili punimur, non acrius. Omnes quidem in Adam hætenus peccauimus, ut fauoris & gratiæ Dei dona amitteremus, per quæ ad coniunctionem illius uenitur. Cares tu illis, non cruciaberis propterea, sed carebis illa coniunctione. Nihil fit ergo iniuriæ cuiquam, quandoquidem non punitur acerbo sensu, qui ipse peccādi sensum non habuit.

Querit alius, Si Adam uno crimine tam immanem fecit casum, cur nos tot flagitijs tot sceleribus cooperti & obruti, non grauius multo cadimus, quā ille? Quia unicuique rerum dedit Deus

eam



eam naturam, per quam esset res illa: quam si tolleretur, non iam amplius ea res esset, sed alia quæpiã diuersæ formæ. ita dedit Deus homini, quo esset homo: tum ornauit eum atque instruxit amplissimis donis, ut diximus, scientia & cognitione rerum, latissima ditione in res omnes, sano & integerrimo corpore, & uita pro libito diuturna. prima illa debebantur naturæ hominis, sine quibus homo nō esset: hæc autem posteriora gratuita sunt, ex fauore conditoris. Quo ergo die à gratia & fauore principis sui homo est deuolutus, eodem ipso amisit ea quæ gratia & fauor dederant, & conseruabant. qui enim ab igne calorem recipit, si abscedat refrigescit. Itaque cecidit Adam ex fastigio illo beneficiorū Dei: nos qui humi iacemus, nullam habemus unde cadamus altitudinē. amisimus enim dona gratuita, ideoq; alterū Adæ flagitiū, si quod admisit, non nocuit nobis: nec nostra ingenii tollunt naturale, tametsi non pauca importāt incommoda, grauiā profectò et peracerba, obscuratiōem mentis, & quandam uelut in belluas degeneratiōnem, morbos, debilitates, procliuitatē ad pessimā, tarditatē ad optimā, quæ omnia uidemus indies gliscere, ea uerò scelerū esse supplicia dubitari nō potest. Quantū est enim, & quam dolendū, circūcludi hominem tenebris ignorantie, & quidem rerum  
maximē

maximè necessariarum? uinciri manibus & pedibus, morbo & debilitate, auerti innumeris cogitationibus à cura colendi & amandi numinis, angitantur rerum quas quotidie augemus sollicitudine? Sed pergunt quidam interrogare, an non peccatum omne uoluntatis est? Ita planè. & peccatum hoc uoluntatis fuit in Adam, hoc denigrauit illius animam, & corpus contaminauit. huius autem corruptio dimanauit ad posteros, & orbatio puritatis illius, quam nostri iustitiam originalem uocant. Quocirca priuatio magis est in alijs boni, quam contractio mali seu culpæ, & animæ infectio ex contagione corporis quia illi iungitur, ut corpus nostrum in aërem pestilentem ingressum noxam sibi à loco accersit. Querunt hic alij, Quid ergo fiet de ijs qui fato sunt defuncti ante annos quibus possent Deum cognoscere? Ad sempiternam beatitudinem non peruenitur nisi per charitatem Dei, ut antea dixi. pueri qui hanc beneficio Christi non sunt adepti, arcentur ab æternis illis bonis: nec ulla tamen fit illis iniuria, si non assequuntur; quod nec illis est promissum: nec sentiunt tamen plus incommodi, quam ex sutore aut fabro natus si non fiat rex, aut homo quod alas & pœnas non habet. fruuntur tamen, ut credibile est, amplissimis bonis: nempe naturalibus liberis atque expeditis.

tis. non enim uersantur in malis, graui & tetro  
 corpore exuti: uigent animæ cognitione libera,  
 gaudent contemplatione aperta rerum omnium  
 & dilucida. Additur aliud quæsitum: Peccatum  
 Adæ nocuit tantopere, quid illius reconciliatio?  
 cur non per reconciliationem eximuntur ea noxa  
 quam propter delictum merebantur? Si execrabi-  
 les filij Adam, cur non bonorum uirorum filij gra-  
 ti? Quia in reconciliatione Adæ non est execratio  
 carnis sublata, sed anima à seruitute carnis libera-  
 ta, & reposita in gratiam cum Deo. ita contigit ei  
 quod alijs bonis uiris, ut manente uitio in semine,  
 fructus sit ad meliorem odorem aut saporem con-  
 cinnatus. Ascendunt quidam altius, & se in pene-  
 tralia diuinæ sapientiæ ac uoluntatis temerariò  
 ingerunt. Cur, inquiunt, dedit Deus homini præ-  
 ceptum, quod sciebat iri ab ipso uiolatum? Simile  
 est illud, Cur eos creat quos malos fore prænouit,  
 & sibi inimicos? Hoc uerò nimis est impudenter  
 Deum ad reddendam eorum quæ agat rationem  
 accersere: quod à principe aut uiro prudentis-  
 simo facere reformidares, deterritus uel magni-  
 tudine uel authoritate. Tu uerò in Rege mundi  
 omnipotenti & sapientissimo, nec magnitudinem  
 reuereris potentiæ, nec sapientiæ authoritatem.  
 Peccat homo non uoluntate Dei, sed sua ipsius.

bellus

belluis libertatem non dedit mentis, homini dedit,  
 & ante eum proposuit uitā & mortē, ad quodcun-  
 que uoluerit porrigat manū. Sed nec desunt qui bo-  
 num hoc libertatis animi, quo amplius aut pręsta-  
 bilius dari nullū potuit, calumniētur, quasiq; Deū  
 in ius uocēt, quōd id dederit per quod peccamus:  
 quasi uerō nō etiā bona omnia, ut mētis intelligen-  
 tiā, phantasiā, sensus, ualeitudinē, robur, diuitias,  
 potentiā, decus in pessimos usus conuertamus. Ni-  
 hil ergo dedisse fuerat satius, quia nos bonis & be-  
 nē attributis prauē abutimur: & quod ingentium  
 est ex se bonorum instrumentum, nos in instrumen-  
 tum peruertimus malorum omnium. Sic ille Cice-  
 ronius Cota quasi deos uocat in ius, quōd homi-  
 nibus rationem sint largiti, quam multi tanquam  
 in artificium uertunt scelerum & flagitiorum. Est  
 ne author in culpa, si tu inde es malus, sine quo es-  
 se bonus non poteras? Et dæmonibus naturæ excel-  
 lētia occasione præbuit miseriæ. culpet igitur dia-  
 bolus Deum, quōd se tam excellentem condiderit.  
 Atqui sciebat, inquit, me malē usurum. Atqui &  
 alios sciebat benē usuros, idcirco dedit omnibus e-  
 iusdem generis eadem: & malos tolerat propter  
 bonos. omnia enim sunt propter hos, qui hæredi-  
 tatem accipiunt salutis; ut Paulus inquit. Sed o-  
 cū nostri in comparatione nostri temporis & æter-  
 nitatis



nitatis non solum caligant, verum densa nebula inuoluuntur. Imaginandum est, in illa eternitate perinde esse Deum facere aliquid & præsire, ut nos agere aliquid, & actum uidere. Trado tibi gladium, hoc prius est natura: tu traditum uertis in tuam perniciem, hoc posterius est: tum uideo te male usum. sic Deo prius est dare tibi amplissima munera, posterius te illis abuti, & eum hoc cognoscere non quidem tempore, sed cursu quodam rationis, & uelut gradibus naturalibus existit ad postremum. Quid ergo tam seuius est punitor Deus, ut tanta bona unius ilico præcepti transgressione eripiat? hæcne est illa à uobis nunquam satis depredicata bonitas? Non est considerandus Deus, ut iudex aliquis humanus, qui maleficiū punit. Homo enim infligit poenā, et ira percitus, uel abductus odio scelerū in corpus noxiū exercet legē, aut exerceri imperat. Deus uerò mitissimus māsuētissimus, optimus est: qui ut uerē & appositē loquamur, non dederat præceptum Adæ, & poenam addiderat: sed ut pater amātissimus præmonuerat ne ab ipso oculos defleceret ad res alias. futurum si id fieret, ut in maximis calamitates & miseriae sese induceret. haud secus quā qui uoraginem digito indicat, in qua sit præsentissima perniciēs cadentibus. Itaq; Adam prauitate & dementia sua in id exitium

exitium incidit, à quo præmonitus fuerat ut caueret. Non finxit Deus præceptum, nec ante pedes Adæ tetendit ut pedicam: neque post transgressionem impulit Deus illos in tantas calamitates, tanquam uiolatores suæ legis: sed ipsi quia ultro recesserunt à bono, necessariò in malum inciderunt, quoniam à beatissimo in miseriam, quod ostendit sacræ narrationis series. Nam ubi de uetito gustasset fructu, statim senserunt quid admisissent. & antequam Deus illis loqueretur, & fœdum facinus exprobraret ad manifestaticnem supplicij, iam inter se supplicium experiebantur, & præ se ferebant: Nec Deus damnauit terram & carnem, sed damnatio secuta est ex peccato, & discessu à Deo ad diabolum. Sacræ uerò literæ humanis uerbis & more hominibus loquuntur: & præsertim uulgo gentis Hebrææ, quod erat ad altiora mysteria consequenda tardissimum. Et tamē ruinam hanc adeò miserabilem & acerbam, pater indulgentissimus Deus in grande illi bonum conuertit. Nam homo percussus morbo grauisimo, quo per amorem sui cæcum atque immodicum à Dei amore ac fiducia discesserat, quo alio erat curandus modo, quàm ne in sui amorem recideret, & ad amorem Dei assuesceret redire? Cæca mens, multisq; tenebris obruta, admonent atque stimulant eum, ut sibi diffusus querat

querat ducem uiae, magistrum actionum suarum omnium, qui nec falli possit, nec uelit fallere: nempe Deum, cui uni fidat, animus tanta perturbationum tempestate concussus, cogitur sedatorem & tranquillatorem implorare, & quietem optare aliquam, qualis contingere in hac uita non possit, in solo Deo est speranda. Corpus infirmum, tot morbis & doloribus affliclum, uita tot molestijs impetita adducit hominem, ut minus se amet, assurgat si fiducia atque amore ad illum, à quo dabitur nobis requies tantis malis. etiam inter has spinas, inter tam grauias incommoda multi uitam hanc mordicus tumentur, & ab altera abhorrent, & in Dei cogitatione rarissimi sunt ac segnes, in amore autem frigidissimi. Quid facerent, si hic & corpus esset firmissimum, dolorum & defatigationum expers, & delectationes in uita plurimae ac perpetuae, omniaq; ad uoluntatem nostram fluere? Si ergo sanari se hic aeger cupit, quomodo erat aliter sanandus? pater amantissimus quod aliud potuisset remedium excogitare praesentius? Quærunr, Cur si peccatum Adæ tantam inuexit cladem et ruina, reconciliatio Christi non eximit nos ea noxa, & in pristinum statum reducit? Christi aduentus & reconciliatio reddidit quod expediebat, nempe uiam ad aeterna bona: non reddidit ea bona quæ

non expediebat nos recuperare. Si enim homo esset solum ad uitam hanc conditus, bonus & beneficus Deus tum Adæ ipsi iam reconciliato, tum alijs qui ipsi se peccato suo non contaminassent, prima illa sua excellentissima munera reddidisset. Sed quoniam nos ad cœlestem immortalitatem Deus creauit, bonus & liberalis Deus specimen etiam horum bonorum in primo homine protulit, fecit illum non solum dignitate naturæ admirabilem, sed instruxit & ornauit amplissimis uitæ bonis. & sic illum posterorūq; eius reliquisset, si in Dei gratia perseuerasset. Sed Adam tam celeri defectione à Patre ac Domino, fecit & angelis & hominibus postea nascituris manifestum, non conducere & illi & nobis omnibus tantam patris indulgentiam: melius nobis esse omnibus, ut hic tanquam peregrini uersemur, non tanquam ciues in patria, ut alteram illam ueram & perpetuò duraturam patriam toto pectore concupiscamus & queramus: ne si bene sit nobis peregrinè, patriæ nos non solum capiat obliuio, sed neglectus et auersatio. In illo enim rerum statu tam felici, & tam undique bonis constipato & accumulato, quousquisque uel cogitasset ad cœlum se esse factum & appositum: uel curasset uel expetisset, nisi uis mentis magno conatu altè spectantis, sensum tante



re felicitatis sub se reliquisset? quod fuisset factu  
 difficillimū in tanta dulcedine rerū uitæ. Itaq; ex-  
 perimentum sumptum est in uno, quid uniuerſis  
 expediret: & Christus Dei filius iacturam quam  
 nos in casu Adæ fecimus, resarciit: non reposuit ea  
 bona quæ & illi fuerunt caussa ruinæ, & nobis  
 omnibus fuissent. reponet tamen, quum iam am-  
 plius non poterunt esse ad noxiam occasio: nem-  
 pe quum euecti in cælum ita erimus cum Christo,  
 & per Christum cum Deo, ut nullus sit deinceps  
 casus timendus, nec uis ulla possit nos à Deo diuel-  
 lere. Occurritur hic à pertinacibus alia quæstio-  
 ne. Quandoquidem ad cœlestem uitam est homo  
 factus, cur Deus hic eum posuit in terra, hoc est in  
 peregrinatione, & non in patria ubi erat perman-  
 surus? quorsum opus erat hoc decursu uitæ? quor-  
 sum hoc corpore tanti & tam mirabilis artificij?  
 Hoc uerò perinde est ac si quis quærat, Cur format  
 nos Deus prius in locis maternis, & non potius in  
 hac luce in qua sumus uicturi? cur creat flores an-  
 te fructus, cur fructus crudos ante maturitatem?  
 cur animalia oriuntur paruula, sensim deinceps  
 adoleſcunt? quæ persequi esset infinitum. Voluit  
 Deus res quæ materiam haberent, & contineri di-  
 mensu loci, & fluxu temporis procedere. Corpus  
 autem ad hanc uitam magnum & mirificum habet

opificium, uidelicet omnia deinde opera etiam minutissima solertiam sapientiamq; testantur conditoris. Miramur artificium huius corporis ad uitam, id est ad rem temporariam: quantum est artificium foetus in utero ad nouem menses? quantum formicae & muscae, & papilionum, & flosculi eodem die perituri quo nascitur?

LIBRI PRIM  
FINIS.

IOAN

IOANNIS LO/  
DOVICI VIVIS DE  
Veritate fidei Christianæ liber  
Secundus, qui est de IESV  
CHRISTO.



**N**OVVM mihi oritur  
uolumen cum aduentu  
Dei & Domini nostri,  
in quo ostendendum est,  
quemadmodum lapso ho-  
mini Deus statuerit sub-  
uenire. Quantopere af-  
flixerit Adamum acer-  
bissimus ille casus, reputare quiuis facile per se po-  
test: quum ex eo uideret se ingentibus Dei tam  
corpore quàm animo donis orbatum, & incredi-  
bili cum ægritudine transegisse ætatem, calamita-  
tem reputantem quum suam ipsius liberorum &  
coniugis, tum illam quam in cunctam suam poste-  
ritatem inuexisset. Mouit eum acerrimè inter alia  
mors Abelis filij, quæ fuit in hominum genere pri-  
ma, posita ob oculos imagine tam horribili speciei  
illius, quam quisque esset propter delictum illud  
O 3 suum

suum subiturus, Sed cōsolata est eum Dei bonitas, ostensa procul mentis oculis reparatione atq; instauratione tantæ ruinæ amplissima & copiosissima: quæ spe fretus maiore animo ferebat tantum pondus laboris, eamq; ipse spem & fiduciam filiis ac nepotibus quasi per manus tradidit, simul cum aliqua ratione pietatis, quæ illi tãquam stellula inter nubes densissimas conseruata est: Deum unicū qui uniuersa condidisset, colendum esse ac reuerendum, huic obtemperandum, hunc amandum, in illo inesse bona omnia, procul autē ab illo calamitates, labores, cuncta mala. Sed posterī illius cū ruditer æuū degerēt, sine disciplinis & cultu animorum, solis corporis sensibus ducebantur, quumq; nec præsens numen aspicerent, neque ea per quæ intelligi posset, considerarent, subiit in eorum mentes grandis obliuio Dei, tum & iustitiam illius neglexere, eadem causâ qua etiā nū plurimi, quod non cernerent paratam ilico malefactoris ultionem. Ergo uelut repagulis omnibus pudoris ac diuini respectus amotis, effusissime se in flagitia omnemq; turpitudinem proiecerunt, non illa quidem animi flagitia, arrogantia, odij, iracundia, inuidentia, quæ apud illos nondum inualuerant: hæc enim orta sunt & aucta cum hominū cœtibus, opulētia, honore, dignitatibus: sed in ea quæ corporis libido expeteret.



peteret. In has obscenitates & maximi et minimi  
 uelut facto agmine irruerūt, adeo ut & qui nonnā  
 bil ingenio ualerēt, haberētq; eas animi dotes, qui-  
 bus se ad Dei cognitionē cultūq; facile extollerēt,  
 quos angelos et Dei filios appellāt mysticæ literæ,  
 etiā cum alijs obbrutescerēt sectādis uoluptatibus.  
 Depressa uī omni mentis ac iudicij, & quasi de-  
 mersa in corpus, lōgissimē à similitudine Dei reces-  
 serūt: eaq; fuit continuatio flagitiorū, ut quū nihil  
 restaret amplius bonæ spei, ultione numinis deleti  
 sint uniuerſi, laxatis aquis undiq; supernē, infer-  
 nē, à mari, à fontibus, à fluminibus. Cuius inunda-  
 tionis gentiū quoq; scriptores meminere, uelut Pō-  
 ponius Mela, qui Ioppen Aegypti conditam ante  
 diluuium tradit. quod de diluuiō uel Deucalionis  
 uel Ogygis accipi non potest, quorum neutrum at-  
 tigit Aegyptum: fuerūt enim utraque in Græcia,  
 Deucalionis in Achaia, Ogygis in Bœotia, et huic  
 uicina Attica. Repertus est tamen in tanta multi-  
 tudine Noë, qui à rationibus uitæq; aliorum insti-  
 tuto longissimē recederet, & numen purē ac san-  
 ctē coleret. Hunc cum uxore & tribus filijs, ac to-  
 tidem nuriſibus à clade illa Deus seruauit: unde po-  
 stea humanum genus reparatum est, tanto breuī  
 prouētū, ut quingentis annis post & amplē urbes  
 sint frequētate, & magni exercitus ad bellū geren-

dum collecti. Sed hoc non de quingentis modo annis, uerum nec de ducentis fuerit mirandum, si quis ad comparationem reuocet, quanta possit ex uno coniugum pari breui tempore multitudo procreari. Ab uno intra uiginti annos, ut paucissime dicam, uiginti: à uiginti post annos totidem, quadringenti: ab ijs deinceps ea turba, cuius iniri iam numerus non possit. Et hæc ante annos sexaginta, quod facile est computatione colligere. Verum dubitarit aliquis, quemadmodum ex hac nostra regione culta et habitata ad diuersam, seu ad uersam potius transierint homines per loca inuia, exusta perpetuis cœli ac soli ardoribus. Sed ea quæstio ex uetere ignorantia nascitur. Ostensum est enim nostra ætate, uniuersam terram cum ipso Oceano adiri et penetrari posse, etiam sine difficultate, nec obstare uiam illam sub signifero à sole semper tritam et accensam. At sunt etiam homines in mari, sicut in terra: quod pro indubitato est habendum, uiuere homines integros in mari, sicuti Plinius tradit. quorum unus captus est ante annos duodecim in Batauia, quem uiderunt plurimi: etenim detentus est supra duos annos mutus, et incipiebat iam fari, quoad ictus bis pestilentia in mare est remissus, gaudens et exiliens. Sed isti quoque ex terrestribus sunt hominibus progeniti.

Nam

Nam sunt in quibusdam locis maritimis homines maximo opere dediti natatui, cui exercitationi assuefaciunt pueros suos, ut hi diutissime possint durare sub aquis. Filij horum in aquis pene geniti, nati, educati, habitatione huiusmodi non aliter delectantur, quàm pisces. ita quemadmodum alij homines in arido, sic hi uiuunt in mari. cuiusmodi esse in extremis illis insulis Oceani, locis calidissimis, ex ijs quæ relationibus nostrorū hominum accepi mus, coniecturare licet. Raphael Volaterranus refert, fuisse in Apulia ab hinc annos ducentos iuuenem, quendam, assuetum ab infantia in mari agere. Itaque inter marinas belluas complures dies uersa batur, & conuiuiebat illæsus, haud aliter quàm si una esset ex eis. penetrabat maris intima & remotissima, reuertebatur sæpe ad littus, & nautas de futuris tempestatibus præmonebat: Nicolaus prius dicebatur, postea Colapiscis, quasi Nicolaus piscis. Sed ad cursum redeamus historiæ.

## DE RELIGIONE PRI-

scorum hominum.

**P**ORRÒ Noë filios suos quàm ipse à suis accepisset maioribus pietatem, & colendi numinis rationem edocuit. Sed illi cum liberis & familia ad diuersas mundi partes digressi, quod erat naturale facile retinuerunt: colendum quidem esse

O 5 numen,

numen, modum tamē & uiam mutauerūt, quisque  
arbitratu suo. unde decorum & religionū tāta mul-  
tudo ac uarietas exorta. Religionē uerò à natura  
esse humanis pectoribus inditam, ostēdit consensus  
generis humani: dicam hoc uerbis Ciceronis, lib.  
de Leg. primo. De ipsis quidem hominibus inquit:  
Nulla gēs est neq; tam immansueta, neq; tam fēra,  
quæ non etiam si ignoret qualem habere Deū de-  
ceat, tamē habendum sciat. Depræhensum est hoc  
non solum in nationibus terræ huius nostræ, quam  
continentem uocant scriptores, sed in nouo hoc  
orbe, ad quē magnis nauigationibus Hispani pene-  
trarūt. Inuenerūt enim nostri homines gētes per-  
multas, quæ sine literis, sine legibus, sine rege, sine  
republica, sine artibus cum degerent, non tamen  
sine religione. ut appareat, uerius esse ex natura re-  
ligionem, quàm reliquas hominū artes atq; inuen-  
tiones. Nam sicut facultates omnes atq; appetitus  
animi & corporis inditas à natura cēsemus, quo-  
niā tametsi non eadē semper appetūt aut agūt, ali-  
quid tamen & agunt & expetunt: ita de religio-  
nis est cura sentiendum, non eadem omnibus reli-  
gio, aliqua tamen cuiq;. sicuti non omnes eadē co-  
medunt, nec omnes rebus eisdem capiūtur & dele-  
ctātur: quia tamē esse omnes ac delectari animad-  
uertimus, id esse naturale pronūciamus. eundem in  
modum



modū religio naturalis est in genere. species autem  
 formæ, qualitates hominum sunt. Olim religio sola  
 habita est pro sapiētia, nec sapiētes alij q̄ qui illam  
 mortalibus traderēt atq; explicarēt, apud Aethio-  
 pas, Indos, Aegyptios, Græcos, Romanos, quorū  
 catalogū longū esset recēdere. Nec Deus de sui co-  
 gnitione humanis mētibus plus cōcessit ac reliquit,  
 q̄ quod pietati satis esset. Pessimē Lucianus Samo-  
 satenus sophista, q̄ adimēs hominibus ueterē ac re-  
 ceptā religionē, non saltē reponebat nouā aliquā.  
 Quod irrideret antiquas demētias ac insanias, re-  
 ctē id quidē: sed alia debebat substituere potiora.  
 Sublatis enim prorsum religionibus, qd aliud q̄ ho-  
 minē sine humanitate relinquebat? Sed quid aliud  
 decebat Epicuræū facere, & eū qui à luce se in te-  
 nebras recepisset? idē faceta rabie philosophiā irri-  
 sit, & curā omnē uirtutis. Cedò si potes aliquādo  
 loqui amoto ioco, qd tandē uis homines facere? tol-  
 lis deorū cultus, subsannas eruditionē, etiā uolupta-  
 tes corporis quas secta tua profitetur insectaris,  
 quam humano ingenio relinquis occupationē? &  
 tamen hic nonnullis (si Deo placet) sapiens uide-  
 tur, nempe ijs qui magna inuidiæ rabie oderunt  
 quicquid non habent, aut per quod alios magnos  
 & claros effectos esse uident: ut Lucianus ipse,  
 quem ad insectationem & proscindendam philo-  
 sophiam

Sophiam inuidia Plutarchi Cheronensis impulit, quem in magno esse honore apud Traianum Cæsarem inuitus & dolens cernebat. Ergo ut ad propositum sermonis reuertamur, pietatis cura indita est naturaliter homini. quod si ita est, monstrum profectò est hominis, non homo, qui sine religione ulla uiuit. Sed posterì Noë homines crassi ac rudes, non Deum illum naturæ dominum uenerati sunt, quem non uiderent, sensibus tamen omnino ducerentur, sed quæ intuitu pulchra atque admirabilia in orbe spectarent, aut utilia depræhenderent, iudicio illo suo hebetissimo ac tardissimo pro dijs habuere. Is error à parentibus manauit in posteròs, & auctus indies, magnas de uetustate uires accepit: cui ætates insequutæ nefas existimarunt repugnare. nam posterì maioribus suis tanquam filij patribus eam se reuerentiam censent debere. Ergo alij propter speciem & magnitudinem cælos, sidera, elementa adorauerunt: alij animantes brutas, à quibus aliquid commoditatis acciperent, sicut Aegyptij boues, & feles, & ibes: alij homines quos honoribus diuinis uel ob beneficium, uel ob metum atque assentationem affecerunt. Hæc omnia magna & miserrima humani generis calamitate in deorum numerum atque existimationem uenerunt. Ita indies augendis huiusmodi insanijs religio-

ligionum, magnum densum que sibi homo murum  
 circumdabat, ne ad uerum Dei cultum perueniret,  
 & ad uiam suæ beatitudinis. Eos uero qui uel bo-  
 nitate aliqua ingeniorum, uel disciplina atque in-  
 formatione humanitatis uidebat demon ad sanio-  
 rem mentem posse peruenire, magnis occupationi-  
 bus propositis auertebat ab ea cogitatione ac cu-  
 ra. Græcis & Romanis ingenijs dedit poësim, hi-  
 storiam, studium bene dicendi, cognitionem natu-  
 ræ, mathematicas, exercitamenta corporis, bellica  
 negocia, nobilitatem, rem publicam, rem priuatā,  
 opulentiam, decus, dignitates, ambitionem, famā,  
 gloriam. Inter hæc tam multa & uaria ecquæ tan-  
 dem esse poterat religionis cogitatio, & cura se-  
 ria & bonæ fidei? Assentiebantur modo receptis  
 iam olim opinionibus de dijs, & eorum cultu, reli-  
 quas omnes cogitationes ijs occupationibus impē-  
 debant, quæ satis essent quibuscunque ingenijs di-  
 stringendis & obruendis. Longo æuo post Noam  
 extitit Abrahæ Chaldæus, qui cæli numen & na-  
 turæ regem coluit, adorauit, illi obsequutus est, ac  
 toto fudit pectore. Erāt indubiò atate illa, & prio-  
 ribus fuerant, qui more ac ritu Noë Deo cæli of-  
 ferrent sacrificia, uelut Melchisedech, qui in pri-  
 mis illis Hierosolymorum fundamentis regnabat,  
 sacerdos Dei excelsi: sed quæ esset Deo habenda  
 fides,

fides, quāta fiducia, quæ charitas, fortasse nec præ-  
 starent, nec assequerentur. Primus inter illos A-  
 braam deprehendit authorem rectoremq; uniuersitatis mundi, non solum externis sacrificijs colendum, sed amore & fiducia, ut illum chariorem habeas quā teipsum, illiusq; uerbis & bonitati fidē non minorem præstes, quā ijs quæ cernis aut tangis. Qui quum ea esset mente abominatus deos patrios, & magna inuidia apud populares suos fuit, et Deus illum colloquio suo dignatus est. à quo monitus, ut domum & rem familiarem transferret, sine ulla cunctatione Deo sese cunctum concredidit, & cum uxore ac familia transijt in Mesopotamiam prius, inde in Palestinam. Hunc tantum uirum, tam promptum obsequio, tam fiducia constantem ac stabilem delegit sibi Dominus, ex cuius progenie nasceretur Christus, salus orbis per diti ac profligati. quumque ex Sara uxore sua nullos genuisset liberos, dedit ei seni admodum, & coniugi sterilitatis siue natura à principio damnatæ, seu ex æuo iam decurso, filium Isaac, quem patris non absimilē uehementer dilexit Dominus. Huic duo fuerūt gemini precibus à Domino impetrati, Esau, et Iacob, qui postea de lucta nominatus est Israël. hic fuit uir quū auitæ imitator pietatis, tū uerò mansuetudinis incredibilis, quæ illum magnopere



gnopere commendabat Deo. Itaque ex duobus, *et* si erat Esau natus paulo ante quam Iacob, tamen hic est à Domino electus, ad propagationem sanctæ sobolis. Huic filij fuerunt duodecim mares, cum quibus urgente publica annonæ penuria, in Aegyptum migravit, pastoritiam uitam agēs cum filiis: quod uitæ genus M. Varro ex Dicæarcho scribit antiquissimum fuisse, priorem quam agricolarum. Vnde apparet uetustissimam esse Hebræam gentem, quin *et* Hebræum nomen nonnulli existimāt à pastura pecudū deductū esse. Ceterum Iacobi propago mirificè est multitudine aucta, adeo ut terrori iā esset Aegyptijs, edixissetq; is Pharaos, qui tunc Aegyptum tenebat, ne mares Hebræorū tollerentur, sed abijcerentur in Nilum. Et Hebræi ipsi quotidianis substructionum operibus, supra quam dici possit premebantur, erigendis ut puto insanis illis regum extructionibus, quarum multa est mentio apud rerum scriptores. Contraxerant illi quoque ex Aegyptiorum conuictu, plurimum impietatis: *et* oppressi laboribus, intenti que semper præsentī necessitati, longa hauserant obliuia Dei illius, cuius religionem à suis maioribus acceperant. Quumq; maturum iam consilio diuino uideretur, *et* Palestinam stirpi Abraæ sicuti erat pollicitus tradere, *et* populum

pulum suum à seruitute corporum atque idololatria liberare, Moſen Hebræum de tribu Leuitica delegit, ducem ſui populi. Hic Pharaonẽ tum prodigijs & portenſis uictum, tum damnis & afflictione fatigatum atque obrutum, coëgit populo ueniam dare, ut ad ſacrificandum Deo ſuo Aegyptũ egrederetur. Quumq; ad mare rubrum perueniſſent, mutata ſubito Rex ſententia, decreuit illos reducere, & ingenti armata manu perſequutus eos, quum ueſtigia illorum urgeret, ingreſſus per ſiccas in mari rubro apertas uias, Hebræis iã in aduerſo littore cõſiſtẽtibus, ipſe Dei nutu innolutus eſt mari in priorẽ curſũ reuerſo. Hæc omnia tãetſi huic rerum ſtatui, ac proinde captui noſtrorũ ingeniorum grandia atque admirationis plena, quantula ſunt tamen, ſi ſpectetur iſ à quo fiebant? nempe ille qui nutu ſolo ſuo cœlos atque elementa & de nihilo protulit, & conſeruat, ne ad nihilum, hoc eſt originem ſuam relabantur. In Arabiæ deſertis, quadraginta annos ſub tentorijs tranſegere, & legem acceperunt quam Dominus Moſi dedit. Poſtea duce Ieſu filio Naue ingreſſi ſunt Palæſtinam Syriæ, quam poſſederunt uſque ad Nabocodroſorum regem Chaldiæ, qui populum illum Babylonem traduxit, unde ſeptuaginta annis poſt domum ſunt edicto regis Perſarum reducti. ibiq; manſerunt uſque

usque ad Vespasianum Imperatorem, à quo gens illa est penè internecioni data. Sed res tanto temporum decursu gestas longum esset breuiter enarrare, quæ quum à profanis compluribus, tum à sacris authoribus memoriæ sunt mandata, nostra uerò aliò properat oratio. Annis autem aliquot ante captas & dirutas Hierosolymas, misit Deus filium suum Iesum Christum, per quem hominis miserabilem ruinā fulciret ac repararet. qui humano generi lucē, sapientiā, redemptionē secū e cælo attulit. Is Christus et homo est et Deus, Dei filius, patri æqualis & par, eadē cū illo essentia & natura.

## DE DIVINA TRINITATĒ.

**I**S ad nos coelitus ueniens attulit ea, quæ nec habebat in se homo, nec in terra erat inuenire. Illud inter cætera, qui & cuiusmodi sit Deus in sua illa intima essentia, quod sit pater, filius, & spiritus sanctus: hoc nulla unquā hominis ratio, nullū iudiciū, nullus mentis uigor esset per se consequutus, Christus edocuit. Iuxta diuinam Ioannis Apostoli sententiam, Deum nemo uidit unquam: qui autem esset, tradidit nobis filius, & quidem unus conscius paterni secreti, quippe qui habitat semper in sinu patris, id est, in intimis & reconditissimis arcanis illius, quò ne angelis quidem est accessus. Ne expectemus dum hæc nobis ab humano in-

omnia. ex cognitione nascitur uoluntas posterior, sicut est in quauis mēte. Ergo sapiētissimus, & qui errare nulla ui, nullo casu potest, diligit naturaliter se, quia nouit naturaliter se, et uidet atq; intelligit nihil seipso melius uel fieri uel cogitari posse. Duo hi actus in Deo cognitionis & amoris sui, uoluntatis scilicet ac mentis, naturales sunt Deo, ac proinde sempiterni atque infiniti. cessare enim nō potest natura illius diuinæ mentis. Sunt ergo actus duo in Deo, illi coēterni, & ut sic dicam coinfiniti: eaq; de caussa Deus est uterq; illorum, ut Deus ipse. nec enim in Deo uniusmodi & simplicissimo res ulla potest esse alterius naturæ, et essentiæ, quæ esset mixtura & compositio, qualem in immensam illam naturam posse cadere sapientes omnes negauerunt. Neque tamen plures sunt dii, ut nec plures essentiæ in illa simplicissima & unica. Non enim per aliud intelligit, aut amat, quàm per seipsum, ita nec quod ex uolūtate & mēte in ipsa nascitur, aliud unquā erit, q̄ idē ipsemet. unica igitur est siue essentia, siue natura: & in illa tres sunt eiusdē essentiæ, ipse intelligēs & intellectus & amor, qui sunt non essentia distincti & diuersi, sed actionum rationibus intelligentiæ ac amoris. Sed nec plures esse possunt. Nam & si extra Deum plurimæ sunt Dei actiones uoluntariæ, in Deo ipso intima ac natu-



naturales. plures esse quàm duæ non possunt, intelligere & amare : sicuti nec in mente nostra, quæ Dei est certa & expressa imago. Memoria enim quæ est in nobis, potestas est potius quàm actus, cuius actus est intelligentia. in Deo autem semper est actus, ut quæ est memoria in nobis intelligentis Dei sit imago, unde intellectus nascitur, & ex duobus amor. primus dicitur pater, alter filius, tertius spiritus sanctus : personæ seu hypostases tres, una essentia, natura, quæ Græcis est οὐσία. Vnde uerò ea illis indita sint nomina, hæc est causa. In ijs quæ cognitionis munere sunt prædita, quod quicque eorum ad sui effigiem atque imaginem producit, id ei est filius. Intelligentia uerò intelligentis se Dei tanto opere est ei similis & compar, ut nihil inter res conditas tam sit parenti suo. Se enim Deus per semetipsum intelligit. filius est igitur intellectus, nec illi appositius inueniri potuit nomen, quàm quod dedit Ioannes Euangelista, λόγος, quod nostrum alij uerterunt sermonem, alij uerbum. est etiam eadem uox oratio, & computatio : sed nulla uoce exprimitur latine quidem tam apte, quàm si rationem dixeris, aut mentem. Appellatur quoque patris sapientia. ubi enim sapientia est cuiusque, nisi in mente? Amor uerò qui est in Dei simplicitate, & in deitatis unitate tertius, nomen ex operibus

P 3      accepit,

accepit, ut Spiritus sanctus nuncupetur. Amor enim Dei erga se per bonitatem eius & candorem rebus creatis communicatur: unde fit, ut fauorem suum & dona largiter impartiatur angelis & hominibus. & quia intus in mente hæc inspirantur nobis amoris diuini beneficio, idcirco Spiritus sanctus nominatur, non autem filius ut intelligentia. tametsi enim unius sunt omnes οὐσίαι, hoc est essentia, quia tamē intelligentia magis rem ipsam effingit, exprimit, representat, quā uolitio, nō amor dictus est filius, sed λόγος. Adde, quod ut cognitio seu intelligētia uolitionē antecedit, ita filius prius consideratur genitus, q̄ Spiritus procedēs: nō quod alter alterū antecesserit tēpore, q̄ sūt coeterni, sed cognitionis nostræ ratione quadā, & naturæ ordine, ut si initiū uterq; sūpsisset, antiquior esset filius futurus. Nascitur aut amor ex amāte per cognitionem, ita Spiritus à patre oritur per filiū. sed ab hoc quoq; eadē ratiōe oriri dicitur, seu procedere, quā ex cognitione uoluntatē profectā dicimus. Tenēda sunt in tanto mysterio recepta iā olim ab Ecclesia uocabula, quæ sola à diuina sapientia edocta semper & gubernata, quemadmodū loquendū sit sola nouit, appositē non ad rem ipsam (quæ enim hominum uel angelorum linguæ id ualerent?) sed ad disciplinam certē & pietatem nostram. Filius non  
gignit

gignit alium filium, nec spiritus alium spiritum pro-  
fert, quoniam nec filius aliam habet intelligentiam,  
quam eam ipsam qua Deus se cognoscit, qui est ip-  
se filius: nec spiritus alium amorem, quam quo Deus  
se amat, qui est ipse sanctus spiritus. una est enim es-  
sentia diuinitatis, ideoque et intellectus qui ex essen-  
tia illa de se nascitur unicus, et amor qui erga se  
unicus. Pater intelligens se λόγος: et illum siue intelli-  
gentiam parit, qui est filius. Hic uero non extra e-  
greditur, sed ad patrem sese conuertitur, et sistit  
in beatissimo. qua de causa nec generat, quonia ad  
patrem conuersus, nec aliorum potest respicere.  
generatio uero est ulterior processus ad sequentia.  
Ex hac conuersatione, et quasi intuitu mutuo na-  
scitur amor eorum mutuus, et tanquam connexus qui-  
dam, qui est spiritus sanctus. Hæc est Dei essentia,  
natura, substantia intima à se et in se, nec aliud  
quicquam potest interuenire. Prouidendum est di-  
ligenter, ne discindatur unitas ac simplicitas essen-  
tiæ, neu numerus personarum confundatur. Nam  
quæcunque in illis uocabulis separantur, ad rela-  
tionem quandam inter illas hypostaseis pertinet,  
ut gignens, genitum, procedens, pater, filius: cæte-  
ra quæ essentiæ sunt, nomina unica sunt, ut Deus,  
dominus, conditor, et huiusmodi. Et quemadmo-  
dum opus omne imaginem quandam et similitudi-

nem refert sui opificis, adeo ut ex opere qualis sit opifex, & ex opifice quale sit opus futurum in promptu sit intelligere: ita in rebus omnibus animaduvertere est diuinæ trinitatis effigie, in unitate substantiæ. Est enim in qualibet rerum essentia quasi pater, unde oritur potentia, hoc est filius, & ex utrisque actio, hoc est spiritus sanctus. In animantibus autem paulo dilucidius, in quibus quicquid gignit rem gignit suæ speciei ac formæ, alioqui monstrum est error naturæ. Tum charitas genitum & gignens copulat, ac conglutinat. Sed in mentibus eo est expressior imago, quanto illæ propinquiores ac similiores sunt Deo, nempe etiam menti, eaq; de causa Moses in historia creationis mundi, cum ad hominem uenit, uerbis Dei inquit: Faciamus hominem ad imaginem & similitudinem nostram. idem de angelis dicturus, si de illis esset apertius loquutus. In mente autem siue angeli siue hominis est mens ipsa tanquam pater, est intelligētia quæ ex mente proficiscitur, hoc est filius, tum ex ambabus uoluntio spiritus sanctus: nec plura sunt, neque pauciora, & in homine aut angelo. Disputatur à scrutatoribus naturæ rerum, an tria illa eiusdem sint substantiæ seu essentiæ, propterea quod in hominem aut angelum uidentur posse cadere qualitates, seu inhærentiæ alterius naturæ uel essentiæ, quam est mentium,



mentium, de quibus multæ & uariæ sunt, & ualde inter se discrepantes sententiæ. In Deo autem quæstio & disputatio huiusmodi non potest locum inuenire, in quem nulla competit compositio, nulla est in eo qualitas, nullum adiacens seu appositum, unica est in illo essentia simplicissima, & uniusmodi, ut Deus sit ipse, & idem Deus, quicquid est in ipso. Transeo alias in rebus similitudines complures, quas sancti olim patres annotarunt. Hi tres in orbis creatione sunt designati, pater opifex, filius sapientia ceu instrumentum quoddam, spiritus sanctus: hoc est, amor & causa quæ ad opus adduxit atque incitauit. Sancti & sapientes ex Iudaismo, intelligentiam quandam exiguam quidem & malignam, sed nonnullam tamen habuerunt huius sanctæ Triadis, quod quarto huius operis uolumine Christo adiuuante ostendemus. Illuxit quoque & gentilitati ueritatis huius radiolus. Zeno Stoicæ scholæ inuentor, λόγον dicit fatum & necessitatē, & Deum, & animum Iouis. Plato in sexto de Republica quendam esse ait boni ipsius filium, ei simillimum per omnia. bonum uerò esse tanquam solem, filium autem eius ceu uidendi uim, quam per solem, habemus. Et in epistola ad Herniam: Iurantes, inquit, studio Musis apto, & sorore studij eruditione, per Deum ducem omnium quæ sunt,

quæq; futura sunt, itidem per ducis & causæ omnium patrem dominum. & in Epinomide meminit λόγου τῶν πάντων θειωτάτου, hoc est rationis omnium diuinissimæ. Tertium quoq; dicit ineffabile. De filio etiam Dei multa apud Trismegistum mentio, Poëtæ uerò qui philosophis sunt antiquiores, resq; uetustissimæ memoriæ inuolucris fabularum operiunt, Mineruam suam habent deam ingeniorum & totius sapientiæ, atque adeò eam ipsam sapientiam, quæ sit Διὸς νοῦς, hoc est Iouis mens: eamq; ex Ioue solo progeneratam sine matre, & quidem ex suprema Iouis parte, nēpe ex cerebro. Sed hæc sint obiter perstricta paucis, quæ solum ob id unum attigi, ut ij quibus diuina sunt incredibilia, quia incompræhensibilia, magis se nobis tractabiles & æquos præbeant ad mentionem ac disputationē diuinæ trinitatis. Philosophi certè, qui post Christum fuerunt, diuinæ trinitatis mentionē non omnino exploserunt: quam quum animaduertent maximis rationibus fulciri, & rerum naturæ consentaneam, conati sunt à nobis ad Platonica commenta detorquere. Sed ueritas sub furto non diu latet, ea semper præ se fert domini sui signa, et cuius sit testificatur. Etenim Plato, & alij omnes, si quid de filio dicebāt, loquebantur magis, quàm quid loquerentur sciebant, uel intelligebant. Cognitiō

gnitio mysterij huius doctrinæ est non gentilitatis, sed Christianæ. Verum enimvero utinam res esset iam eò progressa, ut doctrina plenè admissa & approbata à nostris aduersarijs, non amplius de ueritate illius dissideremus, sed de authore.

QVOD DEVM CONVENIEBAT  
ad nos uenire.

**S**I quis hominem penitus consideret, tantam in eo dignitatem inueniet naturæ, tanta miseria peccati infectam & contaminatam, ut mirandum non sit dignatum esse Deum respicere opus suum adeò pulchrum & præstans, & quando restitui collapsum poterat, dedisse operam ut instauraretur. Quibus hoc alijs modis fieri à Deo potuerit, non est humanæ mentis perscrutari. certe quemadmodum factum est, congruentissimè ac sapientissimè factum animaduertimus, nec quicquam nos excogitare commodius possumus, ac melius: nisi forte uniuersam rerum naturam & mundi huius leges uellemus inuersas & sublatas, atque id optaremus quod fieri uel non potest, uel fas non est. Itaque ordinem, rationem, causas, quemadmodum actum gestumq; sit quicque inspicere, curæ profectò ac studij magnum precium fuerit. Per semetipsum uoluit nos Deus redimere captiuos,

captiuos, erigere iacentes, seruare perditos: nec aliter fieri uel par erat, uel expediebat nobis. Ipse nos per se creauerat ad suam felicitatem, nos ab ea per delictum nostrum discessimus. Maius & amplius bonum est ad illam beatitudinis eternitatē reduci, quā omnino esse procreatos: quoniam grauius & intolerabilius est in sempiterna illa miseria iacere, quā omnino nihil esse, quemadmodum de Iuda Dominus noster pronunciauit. Gignit infantem parens in utero, natura ex utero educit in lucem hanc & uitam. plus facit in eo natura quā parentes, & plus puer naturæ debet, quā parentibus: hi enim in gurgustio posuerant, & tenebris, natura in id profert quod est sine ulla comparatione præstabilius ac melius.

Quod si hominis perfectio est in beata illa immortalitate, quanto plus ei confert qui ad illam deducit, quā qui in hanc imperfectionem ac calamitatē exilij & ergastuli? Quod si nos per se Deus in hanc misisset uitam, alius uerò ad alteram deduceret, quod pulchrius & magnificentius est hic dedisset nobis, & huic quod maius atque optabilius est deberemus, Deo autem quod uilius & minus. Quum Deus hominem conderet, tam excellentem naturam, ipse per se uoluit creare. ideo dicitur, Faciamus hominem ad imaginem & similitudinem



tudinem nostram. & quotidie humanas animas, quemadmodum superius demonstrauimus, ipse infundit corporibus. Quod ergo per se non dedignatur facere, nefas est existimare, non dignari per se reficere. Nobis id quoque uehementer conducebat, & obfuisse aliter. Humanus nanque animus infectus & coinquinatus est superbia, quam per delictum contraxit, à qua stimulatus dedignatur subijci & parère homini: tum quòd habet hominem aliàs de ignorantia suspectum, aliàs de affectu prauo: idq; uel ex seipso colligit, uel ex aliorum experimentis. Quòd ignorantem esse suspicatur, ne non satis quæ dicit explorata habeat et cognita, subdubitat ac ueretur. Ex peruersa autè affectione illius, suspicatur eum uelle fallere, dicere hoc aut illud, ut aliquid sibi comparet pecunie, potètiæ, gratiæ, authoritatis, admirationis; uel rapi transuersum odio, inuidia, amore, spe, metu. Enimuero sensurum aut dicturum aliter, si esset nostro loco, si diues, si pauper, si seruus, si princeps, si miles, si opifex, maritus, celebs, parens, filius, æger, senex, puer, pressus necessitate, peregrinus, captiuus, exul, & huiusmodi quæ sunt infinita. Quis unus hominum, imò qui homines tot causificationibus obuiam ierint, ac satisfecerint? Itaque populus Israëlites Mosi detraxit,

Et obloquutus est tantæ uirtuti charitatiq; erga gentem ipsam, excussa memoria omni, eiectione tantorum prodigiorum respectu. Horum posterius à Deo uero ad cultum idolorum descuerunt, irriferunt, infectati sunt, occiderunt prophetas. Philosophos suos gentilitas subsannauit, partim quòd doctrinam sapientiæ non caperent, partim quòd inuoluti flagitijs et sceleribus disciplinam melioris mentis odissent. aliàs quòd philosophos ipsos aliter ac præciperent uiuere animaduernerent. quibus de causis non in philosophos modò multa sunt dicta, agitata, conscripta: sed nec desuere, qui totam ipsam philosophiam uituperarent ac condemnarent. Habet homo multos ad uerum doctores, cœlum, sidera, elementa, stirpes, animales: omnia nos de conditore suo docent, si uelimus præbere aurem. sicut in Psalmo dicitur: Cœli enarrant gloriam Dei, et opera manuum eius annunciat firmamentum. Sed homo ab ijs omnibus auertit aurem, mentem, cogitationem. datus est homini homo institutor, et hunc aliàs neglexit, aliàs contempsit, aliàs habuit suspectum. Iam ergo nulla nobis proderat doctrina. bonitatis ergo Dei fuit, rebus tam desperatis opem per semetipsum ferre, quam frustra per res alias tam multas tulerat. E re ergo nostra fuit ipsummet nobis loqui, nec aliter

ter conueniebat fieri. hunc certè nosse omnia nemo potest dubitare, nec libidine ulla animi aut prauis cupidinibus impelli, nihilq; ad sua commodare ferre, qui non eget, omnia ad nostra, qui sit bonus. Accedit huc, quòd motus nostrorum animorum ilico aduersus legem sibi contrariam insurgunt, cuiuscunque tandem sit hominis, eamq; ut prae grauem ac iniquam accusant, & quoad facere possunt reijciunt, tanquam pueri, quæ à magistris aut parentibus, aut uiris sapientibus aduersus eorum lusus & affectiones iniunguntur: de quibus si inter æquales pueros conquerantur, omnes continuo sapientem illum difficilem ac morosum pronunciant, non raro etiam stultum ac imprudentem. Ratio uerò inter tot clamores, & tantam repugnantiam animorum cedit plerunq; & transit in sententiam peruersæ cupiditatis. Quòd si quis affirmet se à Deo missum, non id credit sinistra nostra interpretatio, & suspicatur aliquid illum affingere de suo, nec mandata explicare bona fide. Quum uerò dicitur, Eum ipsum qui argumentis compluribus signisq; euidentissimis Deum se esse patefecerit ac demonstrarit, hoc præcipere atq; imperare, commouetur quidem animi affectus, & nonnihil detrectat, sed erubescit tamē, & retūditur cōtumacia superbia, quia pudet Deo rebellare, et uidet esse periculosum.

losum. Ratio interea quietior ac liberior iudicat de eo quod præcipitur, & inuenit nihil esse iustius, sanctius, congruentius. Adde his quòd olim philosophi, quoniam nullum ferè uirtutis præmium pollicebantur, paucos qui obtemperarent inueniebant: ut non immeritò exclamarit quidā, Quis enim uirtutem amplectitur ipsam, Præmia si tollas? Quis est fructus uirtutis, quis finis religionis uerus, & quo acquiescat sapiens homo & bonus? sempiterna beatitudo. Quis hominum præmium hoc posset polliceri, ut fidem impetraret, nisi idem ipse Deus, cuius coniunctio beatitudinē illam efficit? Nam de hominibus quis descendit de cœlis, ut ea referat? quis tantæ rei author esse & sponsor potest? Ideoq; nec Moses alia quàm terrena, etiam Dei uerbis ac nomine popularibus suis promisit. Et quæ philosophi de altera uita disputabant, nec ipsi explicabant quæ dicerent, ut qui non satis intelligerent: nec pro certo confirmabant, sed iactabant fortuitò, quæ ipsis eisdem & incognita erant, & uehementer ambigua: alijs uerò partim ridicula, partim uel falsa omnino, uel magnopere suspecta. Accedit huc, quòd humana uita ut non potest agere sine recto iudicio, ita nec sine recto amore, ut amemus & auersemur unumquicque pro merito ac dignitate.



te. alioqui non solum in miserandis tenebris cæci ac ignari omnium uolutabimur, sed in asperissimis conflictabimur calamitatibus, quod uoluntatem in loca indignissima abiecerimus, ubi non fratur eo quod cupit, sed torqueatur & det pœnas, quod prauè quæ non oportebat concupierit: relictis & pro nihilo habitis, quæ complecti maximè ere fuerat. Atqui amores rectos, ut iudicia recta solus potest tradere, qui falli non potest: solus uult tradere, qui est optimus. Quapropter hoc demum magistro potuimus quæ essent necessaria discere. Is lucem attulit hominum tenebris, & ueritati sub dubietate compulsæ ac inclusæ claritatē inuexit, detraxit uelum, & confirmauit prophetarū dicta: & si quid rectè gentiles philosophi monuerant, hoc magistro enucleata, hoc authore approbata & recepta sunt. Lex Iudeorum erat magna, & obscurissima caligine cooperata: is eam caliginem dispulit, & quæ erant in arcano illius mysteria reclusit & protulit, tanquā author totius ueritatis, et dominus uniuersorum. Ad hæc naturæ legem situ obductam deterfit, & omnium oculis spectandam proposuit, nitidam iam & decoram. Lex enim bona & recta insita erat à Deo humano cordi, quæ quòd primis humani generis initijs fuerit æqualis, naturalis est

Q nuncu-

nuncupata. per primum autem delictum, & per reliquorum delictorum continuationem inualuit sēuus dominatus iræ, ac concupiscentiæ, sub quo tanquam sub tyrannide bona lex uim & uigorem suum amisit, obscurata est, oppressa, afflicta ab iniquitate. Itaque necessum fuit, ut idem ipse naturæ legem repurgaret ac confirmaret, qui condiderat, nec sufficiebat alius. Omnes enim & homines & angeli sub natura sumus, nec tantarū uirū, ut quæ fracta, debilitata, laxata, inuersa sunt in natura, componere, consolidare, reparare possimus. Deus solus supra naturam est, conditor illius & dominus. hoc magistro legem naturæ integram accepimus, hoc eodem accipere conueniebat nos deterfam, emaculatam, instauratam: alioqui humana et ignorantia & suspicio semper an ea esset lex naturæ subdubitasset, quibuscunque humanis magistris edocta, nunquam secura. quemadmodum ante Dei aduentum accidit: neq; id est mirum. Nam humana quantumcunque magna & fortia, imbecillia sunt, quòd ab imbecillo & corrupto uase prodeunt, & debili brachio infiguntur. Deus autem potens est, & dat uoci suæ robur ualidissimū. Docuit ergo nos Deus quæ esset malorum uitæ huius origo & caussa, nempe natura per primam culpam uitata, & diabolus instigator sollicitus & uerser.

fer. quod philosophi quum ignorarent, unde in hominibus tanta existeret cupiditas ad flagitia, quum ingenium humanum naturaliter ad bonum deuegerat. magnopere demirati sunt. Poetae furias quasdam confinxerunt, quibus agitari dicerent homines consceleratos. Attulit Deus remedium contra demonem, fiduciam sui: contra naturae autem uitium, donum spiritus sui. Philosophi ignorabant prorsum quae esset ad Deum uia: de gratia & spiritu illius, de fiducia erga illum, altum apud illos silentium. Recentiores Platonici, ueluti Plotinus, Iamblichus, Porphyrius, uirtutes quasdam posuerunt purgatiuas, sed spurias atque adulterinas, scilicet alienum foetum surreptitium: illa enim scriptoribus nostrae pietatis erant suffurati. namque eiusmodi uirtutum nulli omnino ante Christum meminerant. Surripit nostra diabolus, inquit Basilius, & suis ea largiri conatur, ut scrupulos in hominum mentes iniiciat, tanquam philosophia sufficiat ad omnia, & superuacanea sit religio. Sed haec tanta quae nos manifestissimis rationibus communimus, nulli unquam mortaliu uenire potuissent in mentem, nisi Deus humanos oculos aperuisset, & latentem abstrusamque ueritatem in lucem conspectumque hominum protulisset. Lex iudaica data est uni po-

Q 2      pulo,

pulo, ideo per hominem illius populi. quæ autem  
 uniuerso humano generi dabatur, meritò per om-  
 nium authorem est promulgata, qui omnium nos-  
 set ingenia, qui unam haberet normam, quam om-  
 nibus appositissimè attemperaret, atq; accommo-  
 daret. Indignatur Lucanus, quòd Ammon oracu-  
 lum delegerit sibi in extrema Africa, Vt caneret  
 paucis, meritisq; hoc puluere uerum. Aliquem igi-  
 tur existere è re fuit omnium, qui ueritatem uni-  
 uersis demonstraret. Plato magna quadam mentis  
 incitatione, ac uelut *ὁδοποιῶν*, uidetur sectato-  
 ribus suis præcepisse, standum eatenus suis decre-  
 tis, & obtemperandum præceptis, quoad sacrati-  
 or aliquis homo appareat in terris, qui fontem ip-  
 sum aperiat ueritatis, quem omnes sequantur. Er-  
 go uenire ad nos Deum magistrum præceptorèq;  
 ueritatis, & erat bonitatis illius, & salutis ac bea-  
 titatis nostræ.

QVOD FILIVM CON-  
 ueniebat uenire.

EX tribus autè personis diuinitatis filio po-  
 tissimum congruebat instaurationis huius  
 munus, & functio: id est ei proprietati, per quam  
 Deus est filius. Filius quidem ipse ad nos uenit, &  
 nos asseruit, sed Deus ea ratione non est qua est pa-  
 ter, aut spiritus sanctus, sed qua filius, de quo prius  
 est



est tractatum. Nam per quod genus hominum est procreatum, per idem par fuit recreari. Filius Dei mens & sapientia est patris sui, uti declarauimus: per hanc sapientiam genus humanum est conditum, per hanc eandem erigi & fulciri debuit lapsus. omnia enim sapientia sua, uelut quodam (ut ita dicam) instrumento, Deus procreauit. Quid quod omnia producta sunt à Deo ad imaginem quandam filij sui, quippe qui est primogenitus patris, patri unicus: reliqua sunt opera, quæ ex hac primogenitura dependent. Primus enim actus & initium actuum omnium est Dei filius. Quæ autem foras prolata sunt ab opifice, similia ijs sunt quæ prius erant intus in animo. quod in nobis licet deprehendere, qui sic operamur quemadmodum animo concepimus. Intelligentia autem patris est filius. omnia igitur eius esse similia necessum est, quæcunque sunt creata. Quod si ita est, exemplar profecto erat adhibendum ad corruptam & deprauatam imaginem instaurandam. Adde his, quod peccatum omne in hominibus fit per auersionem humanæ mentis à diuina sapientia, sicut rectè factum omne fit per conuersionem ad eam. Nam Dei sapientia illuminat & docet unumquemque quid agendum sit. qui illam sequitur, ingreditur quæ oportet: qui ab ea discedit, errat, & uagatur temere per deuia,

et obtenebatur ei mens, ne uideat quæ conducunt, et leuissimas commoditates bonis ingentibus anteponat: ut dubitandum non sit, quin prauis omnibus actionibus error et obscuritas, et ignorantia sit admista. Itaque quisquis ex orbe uniuerso, siue inter Iudæos, siue inter Græcos, Romanos, Scythas, Indos, et quasunque alias nationes recte agit, sapientiæ Dei hoc debet: neque enim alio magistro utitur. Atqui ea est Dei filius, de quo Ioannes ait, illuminat omnem hominem uenientem in hunc mundum. Per filium ergo decens erat fieri reconciliationem, hoc est purgationem peccatorum, ut conuersio ad eum gratiam fauoremque pareret Dei, sicut auersio peccatum et culpam importauerat. Huic ergo Dei filio salutem suam debet, quisquis est assequutus, quocunque loco, quocunque tempore. Missus est autem filius à patre non aliter, quam cum in eadem anima uoluntas mittit ingenium ad contemplandum et cognoscendum.

QVOD CONGRUEBAT EVM  
humanitate uestiri.

**V**enit autem ad nos Dei filius humanitate, ut sic dicam, uestitus et tectus: quo nihil erat aptius et congruentius, nihil magis expediebat ei operi quod agebatur, nempe saluti nostræ. Parcere Dei non est ut hominum. homo enim homini

mihi gratiam potest facere iniuriæ, manente in utroque inimica inuicem uoluntate: Deus autem non ignoscit homini, nisi is cum ipse in gratiam redeat, quod fit per beneuolentiam & charitatē. hoc uerò, quoniam homini non est alterius animus perspicuus, Deo patent omnia. Sed neq; homo homini ignosceret, si iratum eius in se animū, & male cogitantem inspiceret. Charitas hæc & reconciliat nos Deo, & coniungit ad unionem, ut superiore libro declarauimus. Hanc uerò charitatē quod humanum genus onustum hoc corpore peccati, ad libidines & concupiscētiās suas prono & magno pondere incumbenti, tum curis uitæ huius distractum non potest tam habere idoneā, & congruentem, ut cum Deo iungatur: uenit homo qui unitus Deo, & illi gratissimus, suppleret in ijs qui se illi uerè ac toto animo applicarent atq; adiungerent, quod illorum amor ad beatitudinē deesset, ut illos incorporatos in Christo, et iā quasi eius mēbra Pater haberet charos ex charitate immēsa filij. Itaq; hoc desiderabat natura ipsa & ratio reconciliationis, salutis, fœlicitatis nostræ. Iam uerò homines cum Deo iunguntur charitate seu amore, & ea quæ amoris est comes fiducia. Amor autem & fiducia quum ex bonitate illius elicitur qui amandus est, & cui fidendū, tum ex amore illius in nos.

Hunc uerò affectum Dei erga nos homo non intel-  
ligeat, propter cōstantiam naturarum humanæ  
ac diuinæ. Deus factus homo ostendit nobis, & ob  
oculos posuit amorem Dei erga nos, ut eum iam  
non solum mente, sed oculis quoque corporis cer-  
namus. Præter hæc delictum hominis impulerat ip-  
sum in tria mala ingentia, infirmitatem, ignoran-  
tiam, malitiam, per quæ ineptus factus est ad uirtu-  
tem diuinā imitandam, ad ueritatē cognoscendā,  
ad bonitatem amandam. Venit Deus homine indu-  
tus, ut se homini præberet iam imitabilem, cogno-  
scibilem, amabilem. quod facere commodius non  
potuit, quàm ex propinquo, ex uicina, ex similitu-  
ne eiusdem naturæ. Pertinebat hoc quoque ad ro-  
bur & uires doctrinæ illius, id est ad nostras neces-  
sitates, ut qui agenda præciperet, idem ipse manus  
admoueret operi primus, & exequeretur quæ iu-  
bebat, minore alioqui futuro pondere in doctrinā.  
Nam si dissimilis uenisset nobis, hoc est in forma  
Dei, unusquisque nostrum imparem se esse Deo  
caussetur, nec posse illa obire quæ is iniungeret.  
Apparuit ergo homo, per omnia cuique nostrum  
similis & par, quantum utique ad naturalem  
constitutionem pertinet: & præbuit uitæ exem-  
plum indubitatum, quod nec cunctaremur emu-  
lari & deberemus: optimum, quia solus non po-  
test



test fallere: certissimum, quia nec falli. Homo enim per peccatum corporalis factus, & carneus, Deum iam (ut sic dicam) carneum, facilius & capere ac intelligere potest, & sequi. Accedit huc, quod quum beatitudo nostra sit unio cum Deo, grande attulit Christus exemplum, & incitamentum fiduciæ, ut uidentes hominem Deo unitum in Christo, de unione nostra incipiamus optime sperare, & sempiternam eam futuram sciamus, qualem in Christo ipso animaduertimus. Maior quoque est reconciliationis nostræ cum Deo fiducia, qui interpretem illius, & pacis nostræ sequestrum habemus Christum Dei filium. De cuiuscunque alterius hominis gratia cum Deo possemus subdubitare, & subuereri. omnis enim homo mutabilis: unde magna fiduciæ debilitatio. De Christo non possumus, quis inseparabiliter Deo est unitus, sedens ad dexteram patris sui. Adde quod cuius charitas uniuersorum erat suppletura charitatem, eum & amare & amari infinite par fuit: quod cadere in alios non potest, quam inter Deum patrem & Deum filium. Nec ullus merus homo in eum posset diuini fauoris gradum conscendere, ut omnia quæcunque optaret, posset à Deo impetrare: cuius rei magna habemus exempla in sanctis & prophetis, & ijs qui Deo gratissimi atque intimi fuerunt,

runt, Mose & Abraam. Crescit hæc nostra fiducia, & amor in Deum accenditur, quod uidemus nos Deo esse curæ, qui pro salute nostra filium suum nobis exhibuerit, filium pro seruis, charissimum pro inimicis. Quibus de causis Deum & hominem oportebat esse uindicæ, assertorem, instauratorem nostrum, ad doctrinam & exemplum, & solutionem à uinculis peccati & mortis. quicquid de Christo detraxeris, siue humanitatem, siue diuinitatem, de bonitate Dei, de consilio sapientiæ illius, de salute nostra detrahis. Iustissima hoc loco occurrit quæstio, quo ex genere, aut qualis omnino sit illa Dei & hominis in Christo coniunctio: difficilis sanè explicatu. nam nihil est hic in rebus conditis, quod coniunctionem illam per omnia referat. Similis est tamen, ut D. Athanasius dixit, copulæ animæ rationalis & corporis, ut diuinitas in Christo sit, ut est anima in corpore aliorum hominum, humanitas autem ut corpus. Et quemadmodum in hoc hominis nexu totus homo propter animam dicitur rationalis, ex corpore autem mortalis & infirmus: sic quæ sunt diuinitatis & humanitatis in Christo, toti Christo attribuantur, ut sit Deus omnipotens cæli & terræ conditor, homo edens, bibens, dormiens, lassus, passus, mortuus, & sepultus. Similis est etiam hæc

hæc coniunctio amoris nodo, & ipsa est ex genere quodam amoris. Nam quemadmodum patrem & filium in diuinitate immensus ille amor iungit, qui item est Deus, ita Deum & hominem amor iungit in Christo, altioris & excellentioris notæ, quàm quæ humana cogitatio ualeat consequi. Ergo sicut amor omnia reddit communia, & amicum facit alterum ipsum, ut Aristoteles diffiniuit: ita connexio hæc quæ amicitiam omnem cunctasq; charitates excedit, transfert diuina ad hominē, & humana ad Deum. ita homo dicitur Deus, immortalis, omnipotens: & Deus passus, ac mortuus. Ne commoueantur ad hoc dictū aures imperitæ, nihil patitur Deus in sua essentia, nec pati potest: sed nec Christi humanitas condidit cælum & terram. in coniunctione hac integer manet Deus, integer homo. non facta est hæc connexio, ut alterutri quicquid de dignitate, de maiestate, de essentia, de natura sua detraberetur ac periret: non ut minor esset Deus, sed ut homo excellentior, non tamen supra suā naturam. nec est Deus in homine conclusus, ut anima in corpore: citius est homo conclusus in Deo. sed sicut anima exit extra corpus per intelligentiam, & per orbē uniuersum se expādit: ita quod Deus essentia & præsentia sua complebat ante Mariā, complet adhuc post partum Mariæ, nempe totum quod

quod est, & quod non est. In nexu ergo & coniunctione est hæc communicatio diuinarum atque humanarum rerum, non in naturis humana & diuina. Dicat aliquis, si essentia reuera sunt distinctæ, nodo tantū deuinciuntur, cur quæ sunt unius, transfertis ad alteram? Quia non aliter coniunctio illa posset à nobis aptè exprimi, nisi per eiusmodi communicationem attributorum denotaremus unum prorsus esse illa duo. hoc & uult Deus, & nobis expedit ad efficacius immensam Dei erga Christū, & per Christum in nos omnes charitatem exprimendam, qua sibi hominem dignatus est adiungere, ut ei nos omnes per illum uniamur.

DE ADVENTU  
Iesu Christi.

**A**Duētus Christi, uita, mors, doctrina, et ea quæ postea sunt consecuta, facta sunt sanctis mysterijs, & diuinitatē illius manifestò ob oculos ponūt, si quis uelit attentionem adhibere. Non misit Deus filium suum statim post delictum, nec medicinam nascenti morbo adhibuit, quæ quòd fuisset incognita, parum admodum habuisset gratiæ, ac proinde efficacitatis. Homo enim quod tam cito, tam liberaliter esset oblatum, uel fastidisset, uel duxisset pro nihilo. Reliquit Deus hominem ad longam suimetipsius experientiam, ut uideret,



an qui malicia sua ceciderat, posset se uiribus suis erigere. Nam in Genesi Moſis, quum Dominus crimen obijceret homini, non uertit ſe homo ad Deū ad agnitionem ſcleris, ad precandam ueniam ac pacem, ſed reiecit culpam uir in uxorem, uxor in ſerpentem. Accedit huc, quòd tributa ſunt homini à natura corpus, animus, mens: & hæc duplex, prudentiæ altera, altera ſapientiæ. Initio exercitus eſt homo rebus corporis, uenationibus, agricultura, prima illa & antiquiſſima ætate, ſine artibus uitæ, planè carnaliter: eaq; de cauſſa obruit eos eluuio aquarum. Erexit ſe animus poſt diluuium in bellis, & honore fortitudinis, in potentia & imperijs. Succeſſit his prudentia, artes uitæ, adminiſtratio ciuitatū, faciūdia, ſcrutatio naturæ. Omnia hæc occuparunt quidem hominem, ſed nihil eorū illi profuit ad conſequendā eam felicitatē, cui erat deſtinatus. Venit filius Dei, ut hominē ſolueret ac liberaret, quē demon & peccati premebat ſeruitute, & obſidebat opibus, potentia, honoribus, bello, humanis artibus, inquiſitione naturæ, ut non poſſet caput erigere. Chriſtus ſuperiorem hominis partē liberauit, edocuit, inſtruxit, ut ad Deum ſeſe conuerteret ac ſuſtolleret. Dei enim cognitio, & colendi ſcientia, quæ religio dicitur, uera & eſt ſapientia, et habita ſemper ab omnibus  
fuit

fuit nationibus. Itaque homo iam sibi ac ingenio suo diffusus, in quo tam parū inesse præsidij cerne-  
ret, à quo uno petendū haberet, opem intellexit. Hoc quoq; est obseruatū, ut Rex pacis, pacis tem-  
pore nasceretur: quæ tum erat in uniuerso impe-  
rio populi Romani, quo maxima orbis pars tene-  
batur. Addunt nostri, tum uenisse Christum in ter-  
ras, cum ad summū peruenisset hominū malicia, et  
ita corruissent mores, ut differri iam non posset  
amplius correctio atq; instauratio. Hoc quidē in  
incerto est: sed illud profectò certius, uenisse illum  
mundo maximē edocto ex cultorib; sciētij, discipli-  
nis, usu, experimētis, notitia rerū omniū, ne quis  
imposturā simplicitati factā esse posset suspicari.  
Magnā rem consecutū esse Romulum scribit Cice-  
ro, qui non rudibus & incultis tēporibus, sed eru-  
ditis habitus sit pro deo. Quod miror equidem ab  
homine profectū antiquæ memoriæ callentissimo.  
Quid enim erat illis Romuli temporibus Romæ  
præsertim imperitius? factus est deus à conuenis il-  
lis scelerosis latronibus, aut nequā mancipijs. At  
Dominus noster in media Græciæ philosophia, in  
ipsa Italia referta literis, ingenijs, artibus, prædica-  
tus est. Nihil in eius aduētū debetur astris. opus est  
enī illud cœlis et siderib; maius, ac excelsius: ideoq;  
non ab astrologis prædictus est Christus, sed à Si-  
byllis

byllis gentiū, & uatibus Iudææ nationis. Tāta res est aduentus Christi, tam utilis uniuerso hominum generi, adeo necessaria, ut prænūciari expedierit, quo præcedentes expectarent cū fiducia, proximi pararēt sese, præsentēs agnoscerent, sequētes euenisse iā crederent: ne quē præteriret aut falleret ea medicina, quæ saluti omniū in commune promebatur. Nihil enim tristius, uel acerbius, quā graui morbo teneri, medicinam autem ignorare.

### DE VETERE TESTAMENTO.

**S**ed Sibyllarum carmina uetustas ipsa oboleuit, nec attinebat cōseruari obscura, multisq; absurdis superstitionibus: quales erant ab ijs receptæ, inter quos uiuebant implicitæ atq; inuolutæ. tametsi illa interpretes eorum aliorum sæpenumero tendentia, ad sensus quos uellent detorquebant: cui rei magnam illis facultatem & licentiam præbebat obscuritas sermonis, & sententiarum ambiguitas. Iudaica uaticinia sanctiora & excelsiora multo, ad omnium utilitatem reseruata sunt, quæ hunc se in modum habent. Deus quum hominem condidisset, edocuit illum sine uoce & literis. Sed per peccatum irrepsit ignorantia, oblitus est magnæ illius eruditionis. Duo tamē illi deus reliquit, alterum ad spem ac solatium, alterū ad utilitatem uitæ.

uitæ. Prius fuit, uenturum Christum ad redimendum humanum genus, alterum, legis naturalis ue-  
stigia: quæ si sequeretur, rectâ insisteret quâ oportet. Vtrunque quia homini necessarium, ideo datum homini à Deo creditur, quod Deus & bonus est qui uoluit, & potens qui potuit. neque enim ignorauit homo se non posse per seipsum assurgere: nam si hoc credidisset, non minore superbiæ se inuoluisset scelere, quàm prius. & inualiditatem suam multis experimentis depræhenderat, quàm nihil posset, nihil sciret, nihil esset. Sin autem redemptionem se iri desperasset, quantus mœror? Itaq; de Christo domino primus uates fuit Adam. Hoc uerò uenturum aliquando à Deo redemptionis beneficium, non solum patres tradebant per manus filijs, sed adumbrabatur subinde multis euentis rerum, ad solatium præsentium malorum, ut in morte Abelis figura Christi, in arca Noë figura baptismatis & ecclesiæ. Tum lex naturæ multis actibus confirmabatur, qui exitus manerent pios, qui impios: uelut in Cain, in diluio, & eiusmodi. Sed inualecente ignorantia, & per hæc malicia, cæci homines ad omnia, nihil considerabant. Tum misertus hominum Deus, excitauit spiritum sanctorum suorum, qui scriberent ad admonendum atq; edocendum hominem, quis esset omnium horum conditor,



ditor, quomodo peccatum sit in homines natum & propagatum, quomodo Deus punierit malos. Huius rei historiam habemus à Mose conscriptam, siue is est illius primus author, siue ab Abraam acceperit, quem opinio quorundam est, illis de rebus nonnulla Chaldaicis literis cōsignasse. Etiam filios Seth in columnis duabus generationem exposuisse coeli & terræ, tradit Iosephus: fides sit penes illum. Genesis autem mundi ita est à Mose descripta, ut maximi deinceps uiri & admirati sint in ea profunditatem sapientiæ, & ueritatem narrationis amplexati. Pythagorici, & hos secutus Plato in Timeo, procreationem illam mundi æmulati sunt, interdum quoq; eisdem penè uerbis. Postquam autem totum ferè genus humanum à Deo discessisset, illum qui bona fide Deum querebat, elegit Deus, in quo homine ostēdit magnitudinem bonitatis & retributionis suæ: & elegit progeniem eius, per Isaac & Iacob, unde ipse nasceretur, & qui alijs exemplo essent ad religionem: et consideraret homo, quàm esset pronus in malum, quàm subinde erigeretur manu Dei: quàm autem pleno fauore adesset, si quis se præberet ducenti obsequenti. Tum horum acta ad pietatem, & spem Messiae, & adumbrationem illius uitæ iussit scribi: persecutus est ea idem author, qui superiora, Moses. Et quando homines carne immersi nō curabant

R      bonita-

bonitatem, sed vires & potentiam, ostendit eis qua potentia uteretur ipse quum uellet. Eduxit posteros Iacob ex Aegypto, tot signis & portentis & brachio forti deiecit gentes Palestinae, ut ibi eos collocaret, in terra quam promiserat patribus eorum. & haec item omnia tradita monumentis literarum, ad pietatem posterorum. Dedit illis eam legem, quae & in praesens auerteret eos à flagitijs & sceleribus, & si uellent se in spiritum attollere, quales omnino essent futuri, intelligerent. Tum perscripta sunt facinora illius populi. Sub Iosue ingressus in terram promissam. Iam in illa terra sub ducib. et iudicib. Creatio demum regum, captiuitas Babylone. Omnia haec ad doctrinam, spem, fiduciam in Deum: et simul imagines erant maximarum rerum, quae mox essent euenturae, & quasi umbrae corporum. Misit prophetas tanquam magistros, & admonitores populi, per quos uelut uisitaret Dominus gentem illam. Hi & in praesens docebant legem, atque explicabant, & hortabantur ad eius custodiam: tum exemplo suae uitae sanctissimae multos admonebant atque inuitabant. Praedicabant quoque nationi illi euentura uel tristia, quum rebus prosperis lasciuires, aut oblita esset Dei: uel leta ad eius consolationem, ut doctrina legis & uitae probitate quam cernerent, fidem haberent ijs quae illi promittebant. Accessit moralis informatio, qua homines illi uterentur in  
uita

uita cōmuni: cuius authores sunt Iob, Solomō, & Ie-  
sus filius Syrach. addūt quidam Philonē Alexandri-  
num, quē authorē uolūt libri Sapientie: quæ non est  
instituti huius quæstio. Et quia uniuersa uita pij ho-  
minis meri sunt amores, habet anima nōstra delicias  
& amores suauissimos cū sponso suo Christo in Can-  
ticis, quæ colloquia referunt eorū qui pure amant.  
Constat ergo uetus instrumentum historia rerum ge-  
starum ad exemplum & doctrinā, lege ad obserua-  
tionem, prophetia ad præparationē uenturorū, præ-  
ceptis morum ad uitæ officia. Habent quidem hi li-  
bri intelligentiæ difficultatem propter ambiguitatē  
Hebræi sermonis, & tropos uetustate obscuros. tum  
de Deo ut loquitur hominibus crassīs, omnia sunt ad  
hominū mores ac similitudinē translata, aliter illi nō  
intellegerunt. Dionysius rectē ait in cœlesti Hierar-  
chia, Cōgruentius esse, ut res diuinæ exhibeātur sub  
metaphora rerum corporalium et uilium, quā no-  
bilibium. Primò, quòd per hos liberatur magis huma-  
nus sensus ab errore. manifestum enim est, quòd hæc  
non secundum proprietatem dicuntur de diuinis:  
quòd utiq; posset esse dubium, si sub figuris nobilissi-  
mis corporalium describerentur, apud illos potis-  
simum, qui nihil maius corporibus nobilibus exco-  
gitare nouerunt. Accedunt huc phrasēs, quæ mul-  
tos offendunt, nempe alienæ ab ijsce linguis quibus

assucuerunt. habent etiam translationes illis hominibus & temporibus gratas, nunc frigidas, nempe ab operis actionibusq; illorum hominum. erant enim fere agricolae & pastores: nos autem bellatores, amatores, litigantes. sicut antiquissimae translationes latinae rusticae erant, postea castrenses aut forenses. Sed considerare par est hoc usu euenire in linguis omnibus, etiam maxime cognatis & uicinis, ut in latina & graeca, in latina & hispana. Repetitiones tam crebrae illius sunt aui: quod est uidere in Homero, in quo sunt plures & molestiores. Tum in Canticis sunt collaudationes & translationes longissime petita, quibus nihil aequè refert animū amore percitum & inflammatum, qui per totam naturam peregrinus, quod amato conferat longissime adducit. Tametsi linguae illius periti, uenustatē, gratiā, proprietatē eius miris laudib. efferūt, maximāq; habere grauitatē & maiestatē aiunt, simul etiam profunda mysteria. Sunt tamen quidā, qui à sacrarū literarū lectione abhorrent, nō ob difficultatē intellectus, et recondita mysteria, quae nunquam ipsi attigerunt: sed quemadmodū delicati quidam aut deprauati stomachi, non possunt uel maxime salutaria recipere, nisi condituris sint & intritis cōcinnata. hi nisi adsit sermonis ornatus et deliciae, nihil possunt audire, uel in animū admittere: ita ut malint fabellas elegāter narratas,



*ratas, quàm simplicem ueritatem .nec delicias quidē  
 orationis ferūt, nisi quibus assueuere. Nam alioqui si  
 quis scrutetur, multas & magnas inueniet in sacris  
 literis . Omnia enim insunt genera schematum &  
 troporum illorum naturalium, quæ nouitatis gra-  
 tiam nullo seculo amittunt, sicut Homérica. Sed non  
 negamus esse simplicitatē sermonis. An par est, ut cō-  
 uiuium quod omnibus instruitur ac paratur, unius  
 solum aut alterius attemperetur palato? an istis æ-  
 quum uidetur, ut Deus homini loquatur subtiliter  
 & argumentose, quo paret sibi fidem: an, quemad-  
 modum loquitur Seneca, qui semper uidetur sibi uer-  
 sari in schola declamatoria, argutijs, acclamationi-  
 bus, argumentatiūculis contortis, alijsq; huiusmodi  
 flosculis uerborū & sententiarum, quo nomine pla-  
 cet plurimis. Non sic par est Deū loqui homini, sed  
 ut Dominū seruo, ut patrē filio, ut principē subdito,  
 ut magistrū discipulo. Apud Senecā sunt multæ sen-  
 tentiole magis concinnæ, & magno impetu dictæ,  
 quàm ueræ: uelut, Vir bonus maior est Dijs, Deus est  
 extra patientiā malorū, Sapiens supra patientiā: &  
 controuersiā facit dijs de felicitàte. Sed nec Seneca  
 istis satisfacit, quoniam nimis seuerus exactor uirtu-  
 tis. Quid quod ipse Aristoteles, tantus et bene dicen-  
 di, & rectē sentiēdi magister, tradit res grauissimas  
 nitore atq; ornamētis orationis immodicis deforma-*

ri, & tanquam corrumpi. Ita res nostræ pietatis nulla in phrasi possunt maiestatem illam referre quam habent in sacris literis. Sunt qui historias Abraæ, Isaac, Iacob aspernantur. Quid ita? nonne in illis magna est uarietas casuum, & series rerum, & alia quæ legentes uel audientes detinent? Ita planè. Sed dicunt esse pastorum, & priuatorum hominum. Vide hominum in pastorum delicias. An non pastor fuit Apollo, Paris, Pan? quorum non dico historias, & res gestas, sed fabulas cõfictas tam libenter cognoscitis. Quid illa pastoricia Vergilij et Theocriti, quàm suauiter legitis, et cantillatis? Vtra est uel iucundior narratio, uel fructuosior, de uenatione apri Calydonij, an de Iosepho filio Israël? At fuerunt pastores. At ij pastores meliores fuerunt quàm quouis reges, & præstatiores, nempe chari Deo. Age uerò de Iudicib. & regibus, quid deest huic historiæ? Quid tu malis legere de Nerone crudelissimo, an de Dauide mitissimo? de Caligula stolidissimo, an de Solomone sapientissimo? Sed mouent istos opes. quæ nam uerò ampliores aut admirabiliores quàm Davidis, & Solomonis? Caterum cur de Fabricijs, de Fabricijs, Curijs, Quintijs, Coruncanis legimus. de Aristide, de Miltiade, de Phocione, de suis philosophis? Quid, quod in illis narrationibus sunt affectus simplices, ueri, sinceri, atque ea de causa magis capiunt: nec desunt casus uarij, subiti, inexpectati.

expectati, grandes, admirabiles, omnia denique quæ  
in cursu rerum gestarum legentium animos solent te-  
nere. Fuit memoria patrū Romæ Petrus quidam Ca-  
laber, adeo deditus linguæ quiritium Romanorum,  
ut græcam non ausus sit attingere, ne qua peregrini-  
tate contaminaret latinam. hinc incipite æstimare  
hominis iudicium: quasi uerò non ut quisq; olim Ro-  
mæ fuit latinissimus, ita non etiā fuerit græcissimus.  
tantus admirator illius Romanæ uetustatis, ut Petri  
nomen mutarit in Pomponium, quasi uerò sit in no-  
minibus aliquod discrimen: nisi fortè, quòd Pompo-  
nius propter P & M grandius quiddam sonat. ita  
non significatu uocum, sed ipsis uocibus mouentur,  
ut belluæ. Sicut alius quispiam exclamauit, O te feli-  
cem P. Maro, cui non fuerit in carmine Petrus aut  
Paulus inferendus. O homines pueriliter deliran-  
tes. an non Paulus nomen est Romanum, et Marius,  
& Maria? Petra dicis: quin etiam Petrus. Num non  
hæc nomina literis et syllabis cõsignantur, et cõstant  
temporibus? Nisi fortè illud sentiebat, deorū gesta et  
heroum & hominum scelestissimorum atq; impuri-  
ssimorum aptiora esse carmini, quàm sacra: in quo il-  
li assentior. nam pia hæc grauitatē suam desiderant:  
illa crudelitatis, tumultus, auaritiæ, iactantiæ, libidi-  
num, motus illos recipiūt inconditos ac procellosos.  
Sed altius latet hoc ulcus, impietas affixa est præcor

dijs, quæ non solum insipidâ eis reddit pietatem, sed etiam inuisam. Verum de Pomponio Lato, uti cœperam. Celebrabat natalem urbis, & colebat Romulum, & se dictatorem nominabat: Phædrum autem, alium eiusdē metalli magistrū equitum, & alia, quæ nescias impiâ ne an ludicra nomines. Is autē quoties marmor aliquod uetus effodiebatur ex ruinis urbis, illachrymabat. rogatus cur id ageret, Admonitu (inquit) temporum meliorum. O hominem, ut ipsi uocant, excerebratum. Ecquæ tandē existimabat meliora tempora? An sub Maximino, sub Caracalla, Commodο, Domitiano, Nerone, Caligula, Claudio, Tiberio? qui uirtuti omni bellum indixerant. an ulterius, bellis ciuilibus Antonij, Pompeij, Marij, Syllæ, quibus nihil toto terrarum orbe miserabilius urbe Roma. Age uerò an non malis opus aliquod legere Ciceronis de philosophia, Senecæ, Plutarchi, Platonis, quàm carmē Valerij Flacci? Quî istud? quia de philosophia et morib. Atqui ea quæ hic traduntur, de morib. sunt, et non hominū magisterio, sed Dei. Angelus Politianus totam sacram lectionem aspernabatur. Domitius Calderinus ne missam quidem uolebat audire. & quum ab amicis eò duceretur, dixisse fertur, Earnus ad communem errorem. Sciamus quæ tandem erant occupationes istorum, præ quibus sordabant eis sacra & pietas: nam maximas & præcla-



præclarissimas fuisse oportet. Domitius erat occupatus in exponenda Priapeia Vergilij, seu Ouidij poetius: quid potest dici scœdus, ac detestabilius? Politianus querebat, dicendū ne esset Carthaginēsis an Carthaginensis, scribendum primus an preimus, Vergilius an Virgilius: et de hisce nugis instruebat centurias, quibus ordinandis defessus, transferebat se ad componendum festiuum aliquod epigrammatione mascula Venere græcum, ut haberet plus Veneris, et latini non intelligerent. O hominum curas, propter quas merito pietatem uel contemnerent, uel negligerent. Sunt tamen quidam, qui in uetere instrumento offenduntur illis legis præscriptis, tam indignis Dei maiestate. Ego uero non miror hoc aliquos mirari. Nam lex Iudeorum, ut quæ pueris dabatur, in specie quam Iudæi erant tunc uisuri, et quam solam etiamnum sustinent intueri, puerilis est, et plane indigna Deo. Imò nisi Christus eam à Deo affirmasset traditam, multi ex nationibus non potuissent adduci, ut id crederent. credunt tamen tanto testimonio: tum patefactis à Christo corporibus, quæ latebant sub imagine et uelo, ostensaq; ea facie legis, quæ digna est legislatore Deo, nempe ut omnia ad spem futuræ redemptionis et alutis pertineant. Christus enim est finis legis, et prophetarum. Itaque Moses incognitus antea, et multis ir-

risus, coepit beneficio Christi non solum nosci à gen-  
 tibus, sed illis placere, atque allubescere. Et hoc in-  
 gratissimi Iudæi Iesu Christo debent, nec agnoscunt.  
 Ergo quæ legem præcesserunt, uarijs modis Chri-  
 stum præfigurabant, eiusq; actiones, uitam, mor-  
 tem, regnum, Et ecclesiam: ut in morte Abelis in-  
 fontis, in diluuiio, Et reliquijs humani generis à Noë  
 seruatis: in fide Abraæ, in obedientia Isaac, in sim-  
 plicitate Iacob, in inuidia Et exaltatione Ioseph,  
 in agno phasæ, in egressu Aegypti, in transitu maris  
 rubri, in introductione ad terram promissam pa-  
 tribus. Quæ omnia quòd umbræ essent regni Chri-  
 sti, idcirco tam diligenter est ea Moses persecutus.  
 Lex autem tota umbra est, Et delineatio eius ue-  
 ræ legis, quam daturus erat Christus, dignam  
 Deo dante, Et homine accipiente, de quo aduer-  
 sus Iudæos disputabo. Historiæ autem quæ sacro  
 canone leguntur, figuræ sunt Christi certissimæ.  
 Ostendit hoc, quòd reliqua eorundem regum dicta  
 Et facta, quæ ad imaginem salutis non pertine-  
 rent, in alios sunt prophanos libros reiecta. de  
 quibus est illud subinde in libris Regnorum Et Pa-  
 ralipomenon: Reliqua autem sermonum huius aut  
 illius Regis, Et omnia quæ fecit, nōne hæc scri-  
 pta sunt in libro uerborum dierum regum Israël?  
 Propheta omnes quicquid de rebus præsentibus lo-  
 querentur,

querentur, admonerent, reprehenderent, laudarent,  
 statim se ad contemplationem sustollebant eternæ  
 salutis ac felicitatis. & de iustitia, de maiestate,  
 de beatitudine Messiae aliquid commemorabant, uel  
 ad consolationem afflictionum, incitationemq; ad  
 uirtutem & laudem: uel ad retundenda uicia, & im-  
 pietatem coercendam. nec aliter quam amatores  
 quicquid dicant, agant, cogitent, quicquid uideant,  
 quicquid occurrat, protinus ad amores suos conuer-  
 tunt: sic prophetae quacumq; ex re atque actione,  
 occasionem capiebant loquendi de Messia sibi cha-  
 rissimo, in quem mentes eorum semper ferebantur,  
 adeo ut interdum seipsos pro Messia substituunt. Cre-  
 das de semetipsis loqui, quum de Messia sit intelligen-  
 dum: eodem prorsus modo, quo amicus quum de re-  
 bus amici loquitur: & in plurali, multum hodie egi-  
 mus, multum profecimus: & in singulari, perfeci ne-  
 gocium, non perfeci: de his, in quibus qui dicit non  
 est uersatus, sed amici res pro suis habet. Sunt autem  
 prophetae difficiles & perobscuri multis de causis,  
 siue quod admiscant presentibus cognitis uentura  
 ignota, siue quod intuentes animo & cogitatione  
 res maximas & præclarissimas euenturas, nec satis  
 aptis uerbis enunciare poterant, quæ sub sensus non  
 ueniunt, quæq; ipsi nonnunquam parum intellige-  
 bant, quod & uatibus gentilitatis accidebat. Adde  
 quod

quòd ut ea cernebant mente tanquam speculo, interdum uelut præsèntia, aliàs ut uentura, aliàs quòque ut pràterita iam & transacta expromebant, quæ adhuc erant secutura. mutant enim crebro personis. Has omnes obscuritates illustrauit Christus, & figuris atq; umbris suum corpus ostendit uerum germanumq; ut quum corpus hoc habeamus, nihil sit opus amplius imaginibus & adumbratione. Iudeus literam adhuc tanquam corticem mandit durissimum, & exuccum: & ea complectitur, quæ nec Deo digna sunt, nec homine. Christus salutarem nucleum protulit. ille est sal & uita & lux ueteris testamenti, qui mortuis rebus uitam attulit, & saluauit insipida: de quo argumento alio uolumine disse-  
retur. nunc ad id quod instituimus.

DE EVANGELII SCRIP-  
toribus.

**V**Umbra ergo et caligini ueteris testamenti tanquam nocti tenebræ successit sol Christi, & dies Euangelij. in quo quæ de Christo perhibentur, grandia de immenso, et de Deo diuina, mirantur quidam à solis esse Christianis prodita, non item ab aliquibus ætatis illius uel gentilibus, uel Iudæis. Tertulianus, & Lucianus Antiochenus, & Eusebius Cæsariensis, authores sunt, multa esse tum à præsidiis Syriæ ac Palestine, tum à Cæsaris procuratoribus  
ad



ad Senatum et ad Principem scripta de actis Christi, quæ scriptores illi affirmant suis etiam temporibus in ærario seruari inter alia scripta publica Po. Ro. nec credi aliter potest, quoniam res tantas, quæ publice agerentur, multi mandarint memoriæ partim libris et commentarijs, partim epistolis ad suos. Documento est caput illud Iosephi in libro Antiquitatum XVIII, in quo Iudeus homo de Iesu filio Mariæ facit mentionem ad hunc modum: Fuit autem eisdem temporibus Iesus, sapiens uir, si tamen uirum eum nominare fas est. erat enim mirabilium operum effectus, et doctor hominum eorum qui libenter quæ uera sunt audiunt. Et multos quidem Iudeorum, multos etiam ex gentibus sibi adiunxit. Christus hic erat. Hunc accusatione primorum nostræ gentis uiro- rum, quum Pilatus in crucem agendum esse decreuisset, non deseruerunt hi, qui ab initio eum dilexerunt. Apparuit enim eis tertia die iterum uiuus, secundum quod diuinitus inspirati prophetae uel hæc, uel alia de eo innumera miracula futura esse prædixerat. Sed et in hodiernum diem, Christianorum, qui ab ipso nuncupati sunt, et nomen perseuerat, et genus. Hæc ille. Sed libri, et epistolæ, et acta Po. Ro. uetustate et inclinationibus temporum interciderunt, ut alia maiore etiam cura custodita: sicut Ciceronis multa, et Varronis undecumque doctissimi penè omnia.

omnia. Menandri, quem omnes ediscebant, nihil extat, nec Ennij, Actij, Pacuij: Taciti Cornelij, quem imperator Tacitus, quod se de illius stirpe satum iactaret, toties iubebat describi, & in publicis bibliothecis collocari, multi nihilominus desiderantur libri. Sibyllina carmina penitus interciderunt, Romanis sacrosancta: & leges XII tabularum, quas etiam pueri pro elementis ediscebant. ut transeam, quod philosophorum, qui tam multi Athenis claruerunt, præterquam Platonis, Aristotelis, Theophrasti, nihil prorsum ad nos peruenit, quum immensam librorum multitudinem dicantur reliquisse. Rerum Romanarum scriptores, qui soli extant, tantum persequabantur publica illius populi, & acta principum. Grauius de scriptoribus rerum gestarum Latinis & grecis conqueritur Cornelius Tacitus, quod Arminium tantum ducem Germanorum, quique Varum Quintilium tam insigni clade affecerit, uelut ignotum præterierint. Iam uero quæ in Iudæa contingebant, aspernabantur gentiles omnes, tanquam uanæ et anilis superstitionis, nec ea curabant cognoscere. Tacitus & Suetonius coguntur interdum uerba de Iudæis & Christianis facere, quia narrationis ductu necessario in eos incidebant. at ita de ijs loquuntur, tam falso, & negligenter, tanquam si nihil de illis audiuiſſent, nisi à pueris inter lusum. Erant uel  
delicet

delicet illis Iudaica omnia & Christiana tanquam in altero quodam orbe acta, & ab alio humano genere, referebantq; illa uel ad magiam, uel ad impietatem uanam & maleficam. Insecutis deinde temporibus, quum Christi nomen tanquam sol quidam latius radios suos inciperet diffundere, excitato plurimorum odio contra inuisam ueritatē, multa à uarijs de Christo conscripta, suppressa sunt & abolita ab ijs qui & Christi nomen cupiebant & conabantur abolere. Non defuerunt qui de Christo quum non male sentirent, tacuerint tamen omnia ea quæ nec improbare poterant, nec probare audebant. Age uerò, quid tandem, etiam si soli Christiani res Christi & discipulorum suorum literis mandassent? An quia Iudei soli Iudaica scripserunt, protinus sunt habenda pro suspectis? Soli Græci scripserunt Græca, soli Romani sua illa prisca, quis ea de caussa res illas uocat in controuersiam & ambiguitatem? quasi uero uel alienis tantum, uel inimicis liceat certa atq; indubitata tradere: & non promptius sit ueritati periculum uel à maleuolentia & iniquitate inimici, uel ab ignorantia & negligentia alieni? Quid, quòd plurimum interest inter scriptionem uitæ atq; actionum Christi, & aliarum cuiuscunq; nationis, sectæ, discipline. hæc enim omnia scribi & tradi possunt ab exteris, qui non sint eius ritus, moris, legis, instituti, uoluntatis.

luntatis. Res autem nostræ pietatis nemo potest uerè ac diligenter mandare memoriæ, quin ilico ad nostrāseat, et fiat Christianus. Intelliget enī eam esse doctrinā, et Dei cultū, in quo uno sit hominū salus, extra quem indubitata perniciēs. Quid de scriptione aut cōmentatione loquor? sola auditione, sola meditatione, sola pietatis hūius cognitione, & uno quasi intuitu, q̄ multa millia dederūt Christo sua nomina, neglectis semel ac pro nihilo habitis uniuersis uitæ huius utilitatibus, etiā uita ipsa? Cæterum quantumcūq; profāni homines de Christo scripsissent, non passus tamen esset Deus pietatem suam extraneorum testimonijs niti. sic enim illi fuit cordi, ut summa nostræ foelicitatis non nisi à sanctissimis optimisq; uiris traderentur, ne rei huius, quam esse firmissimam certissimamq; uniuersorum interest, aliquid authoritatis decederet ex indignitate authorum. Christus ipse nihil penitus scripto reliquit: quia non uenerat, ut legem suam in tabulis aut membranīs exararet, sed in humanis cordibus. quemadmodum idem ipse in mundi initio legem uirtutis in hominum pectoribus insculpserat: eamq; ob causam spiritum sanctum, hoc est patris & suum misit, qui uelut perpetuus esset commonefactor suæ doctrinæ, & magister præsens. nec cōueniebat ut alibi Deus scriberet, quàm in ijs ipsis quos docebat,



cebat, in ipsis eisdem cordibus quæ ipse sinxerat, ne diuinæ uoci tanquam parum efficaci scriptura optularetur, ac suppleret quod uiribus illius deesset. Nec personæ Christi congruebat, ipso in cœlū sublato, aliquod ostendi posse ipsius scriptum, ne in eo humana infirmitas peccaret, alij nimio cultu, alij offensione: quod (ut sunt hominum ingenia diuersissima) aliquibus uideri potuisset non omnibus suis partibus & numeris absolutissimum, hoc est Deo dignum & congruens. Satis Christo fuit, egisse quæ alij meminissent, aut si uideretur, aut opus esse existimarent, consignarent chartis ad recordationē. Doctrina quidem Christi in cordibus exarata est, qualem gerit ecclesia Christi sponsa, spiritus sancti discipula, insculptā in suo corde, atq; infixam. Sed quoniam diuinæ uocis homo obliuiscitur, & diuini spiritus fauorem ac monitus malicia sua uiolat, ac extrudit, placuit diuinæ benignitati ut ex Christi actionibus ea mandarentur literis, quorum cognitio ad hominum sufficeret salutem: et mandarentur ab ijs, quorū fides meritō approbaretur ab Ecclesia. Qui uitam atq; actiones Christi, qui prodigia, qui doctrinam erant humano generi tradituri, eos & uidisse conueniebat singula, & diligenter obseruasse, atque annotasse, tum etiam uersatos esse cum eo familiarius. non poterat hæc præstare turba populi, cuius sententia & testimonium incertū est,

§ plerunq;

plerumq; uanū, uagū, inconstans. Christus ergo quū plurima ageret, & potissima publicè, non tamē multitudinis testimonio acquieuit, septuaginta delegit sibi uiros. quibus uerò propius cōmunicaret sua, & tanquam intimorū amicorū cohortē, duodecim, qui cum eo domi & foris, in publico & priuato familiarissime conuersarent, & consilia eius sacratissima cognoscerent. Si quid hoc ad rem existimatur facere numerus hic duodecī deorū iam olim apud gentes sacer erat. sacrumq; hoc collegiū principū diuorum pietatis nostræ uidebatur adumbrare. Duodecim fuerunt dij Athenis, duodecim dij selecti Roma, & duodecim dij consentes. Apostoli sunt nominati, quod tanquā nuncij cœlestis regni à Christo mitterentur. fuerūt hi homines de plebe rudes, literarū et magnarū artium ignari, simplices, qui nec fingere aut dissimulare, nec astu ac uasfricie ulla scirent uti. leniti & tardi, nō solū ad percipiendū res maximas, sed etiam ad credendū, de quorum tarditate ac duricie cordiū sepenumero Dominus est conquestus. Tales uoluit conscios & testes esse suorū actorū, ut postquam intellexissent, et credidissent, fides esset & in illis stabilior, & apud reliquos certior, non aliter quā signū in dura materia impressum. Ad exhibendas humanas doctrinas, nempe naturales, opus est lumine naturali, hoc est ingenij acumine & cultu; ad cœlestē autē et diuinā, uidelicet supernaturalem, superna-

pernaturali lumine, quod diuinitus infunditur. Tales fuerūt Apostoli. rudes illos ac tardos accepit Dominus, sed quod ad pietatē altissimāq; attinet mysteria, doctissimos et sapiētissimos reddidit, et aliq; instruxit ingenio et prudentia, ut sapientiā illorum omnes admirarētur, nec quisquā falsos eos in illis rebus fuisse posset suspicari. Scire autē illos quæ assueverant, et cōpertissima habuisse, non affirmatione, aut iurando testificati sunt, sed iactura omniū quæ existimātur chara in uita, insuper etiā perferēdis doloribus, tormētis, morte acerbissima, et probrosissima. Quis credat eos indignissima, et malorū extrema subire nō recusasse pro eo quod haberēt incertū? nam pro certissimis et cōpertissimis quotusquisq; uel estimationis, uel fortunarū discrimen adire sustineat, nedum mortem oppetere, et tam acerbam? Iam uerō quisquis mentitur, aliquod sibi proponit animo emolumentū mendacij, alius pecuniā, alius uoluptatem, alius famam aut decus, alius ultionem, alius ut animi prauā aliquam cupidinē expleat. Apostolis autem Christi doctrina prædicanda et propaganda quid optabile uel uiuentibus quærebatur, uel uita sanctis uiuentib: quidē ea omnia, propter quæ deuitanda et propulsanda mentiri homines cōsueuerunt, inopia, labores, sitis, fames, cruciatus, ignominia, extremū supplicium: post mortem uerō infamia, et si doctrina uera ac cœlestis nō erat, poenæ apud inferos tā impij

S 2      mendacij

mēdacij. His credo illicefacti prēmij, facile eſſet ad  
 mentiendū adducti. Iā uerò cuius ſcēuitiæ fuiſſet atq;  
 immanitatis, diſcipulos Chriſti, tū ſemetipſos pericu-  
 lis, tormētis, ignominia, morti crudeliſſimæ obijcere:  
 tū id tāta cura et diligētia agere, ut tāta generis hu-  
 mani pars, per rei falſæ et cōfictæ perſuaſionē in ea-  
 dē mala protruderetur? Ex ijs ergo q̄ Dominū agen-  
 tē hic in terris comitati ſūt, et propius ac familiarius  
 nouerūt, quidā facta et dicta illius prodiderūt memo-  
 riæ, cōſignatis locis et tēporibus, quib. quæq; res eſ-  
 ſent actæ, etiā nominatis ijs qui affuiſſent, ut certior  
 eſſet atq; indubitator ueritas. nec auſi fuiſſet illa ſic  
 ſcribere, ſi quid fingerent, uiuentibus etiāmnū multis  
 qui uidiffent Dominū, à quib. potuiſſet refelli, ſi quid  
 mentirētur: præſertim quū eſſet plurimi, qui nihil ma-  
 gis cuperēt ac laborarēt, quā ueritatē noſtrā qua-  
 cunq; poſſet uia et ratione cōuellere ac labefactare.  
 Ex omnib. tamē ijs qui acta Chriſti et doctrinā literis  
 mandarūt, antiquiſſima illa et prima Eccleſia illorū  
 temporū penē æqualis, ſolos quatuor tanquā ſacro-  
 ſanctos et firmiſſimæ fidei ac ueritatis approbauit,  
 ac retinuit: Matthæi et Ioannis, qui rebus omnib. in-  
 terfuērūt: Marci, ex relatione Petri: Luca, tū ex Pau-  
 li reuelatione, tum relatu aliorū qui erāt cum Domi-  
 no uerſati. Sapienter Auguſtinus: Ac ne putaretur,  
 inquit, quod attinet ad percipiendum ac predican-  
 dum euangelium, intereſſe aliquid, utrum illi annun-  
 ciant



cient qui eundem Dominum hic in carne apparentē secuti sunt, an alij qui ex illis cōparata fideliter crediderunt, diuina prouidentia procuratū est per spiritum sanctum, ut quibusdā etiam ex illis qui primos Apostolos sequebantur, non solū annunciādi, uerū etiam scribendi euangelium tribueretur autoritas. Sic ille. Has historias et necessarias duxerunt esse, et sufficere. in quibus recipiendis duo potissimū secuti sunt, tum ueritatē rei, de qua facti erant uel ab ipsis eisdem Apostolis, uel à discipulis Apostolorū certiores. Itaq; tum recepta approbataq; est euangelicæ historia ueritas, quum adhuc superessēt, qui Dominum ipsum in sua mortalitate cognouissent, aut qui eos audiuissent, qui illi fuerāt familiares: tuncq; et cōueniēs fuit, et cōducibile, approbati quod sequentes ætates tenerēt pro indubitato, quū omnes acta illa et doctrinā nō tam ex scriptura cognoscerent, q̄ ex traditione eorū qui ipsi uidißēt ac interfuißēt. hi demū iudicare poterāt, quid in illis rebus probandū esset ac tenendū, quid contrā refellendū ac reijciendū. Secuti sunt etiā patres illi iudiciū spiritus sancti, qui eos docuit euāgelia hæc maiore sapiētia atq; spiritu esse cōposita, q̄ humano, diuinitus esse illorū pectori bus infusa: de quo statim disserā. At quatuor illi nōnunq̄ inter se dissentiuūt. Huic questioni sic respōdet Ioānes Chrysostomus: Paruæ interdū in euāgelijs disfidētiæ argumentū præbēt ueritatis, ne ex cōposito

uideantur scripsisse, si per omnia consentirent. Fuit Ioānes Apostolus Ephesi eodē tēpore quo etiā Paulus, alter tamē nullā in suis epistolis de altero mētionem facit, nec multū conueniebāt et colloquebātur, postquā satis erāt ab spiritu Dei edocti, instructi, & quasi armati, ne de cōmunicata sentētia et cōsilio uiderētur annūciare Christū, sed ex ipsius Christi doctrina et monitis cōlestibus. Ergo in fundamētis & summa nusquā discrepāt, nēpe Christū esse Dei filiū, natū de Maria uirgine, edidisse miracula ingētia, docuisse contemptū rerū mūdi huius, fiduciā et charitatem erga Deū & homines, uocasse cūctos mortales ad sempiternā felicitatē, passum, mortuū, surrexisse, ascēdisse ad cōelos, sedere ad dexterā patris sui, uenturū iudicē hominū uniuersorū. hęc una uoce, una sententia cōstanter referūt, & docent. Discrepāt quādoq; in circumstātijs, quas Græci *τελειότητες* nominant, quæ rei summā nō uariāt. hic astrictius rem narrat, ille fufius: hic perhibet sanatos duos, alter tres: unus in egressu portæ, alius in ingressu. quod illa de caussa sæpe euenit, quod est tanta miraculorū Christi multitudo, ut quæ sunt diuersa, nos tamē propter aliquā inter se similitudinē eadem esse existimemus. Eundē in modū usuuenit in dictis & sententijs doctrinæ. eadē dixit Dominus uarijs locis, uarijs uerbis: hic refert quæ hic dixit hoc modo, ille quæ illo in loco paulū diuersē. colligūt uidelicet cētones cōcionum

num et uerborū Christi, quæ ad institutionē et salutē nostrā facerēt. Et ut cōgerunt acta Christi, magis eorum habētes rationē, q̄ ordinis tēporis, ui dētur sæpe numero alia quæ sunt eadē, et eadē quæ sunt diuersa. Hoc uero etiā scriptores seculares soliti sunt facere, quale est illud (ut unū pro plurimis exēplis ponā) apud Verg. in XI. Vidimus ô ciues Diomēdē, argi uaq; castra, Atque iter emensi casus superauimus omnes. Tale etiā apertis uerbis apud Lucā in Actib. apostolorū: Et sic, inquit, uenimus Romam. Et inde quū audissent fratres de nobis, prodierūt nobis obuiam usq; ad forū Appij, et tres tabernas. Vsus quoq; uerborū nōnunquā præ se fert uarietate, dum alius idē uocabulū alia in significatione ponit. quarū rerū omniū manifesta sunt exempla legēti Euangeliū, huc autē adducēdi non est locus. huiusmodi enim melius demonstrantur in re præsentī, & oculis subiecta.

## DE VIRTUTIBVS ATQVE

excellētia Euangelij.

**C**Aeterū si quis Euangelij uirtutes gratiamq; admirabilem propius attentiusq; contempletur, intelliget indubiē nō hominis esse opus, sed Dei, nec potuisse ab humanis ingenijs sine proprio & peculiari numinis afflatu componi. Utinam mihi res nunc esset cum ijs qui attentius diligentiusq; librum illum uersassent atque inspexissent: intelligerentur melius quæ dicere, et facere non mediocre

cōpendium uerborum. Omnia habet, quaecunq; par  
 est habere diuinū librū, hoc est humane salutis. Pri-  
 mum omnium non de humanis artibus atq; opificijs,  
 nō de speculatione causarū, nō de circūsp̄ctione &  
 prudētia uel publica, uel priuata, pr̄cepta cōtinet,  
 sed de immortalitate, ac bonis eternis. Idcirco euāge-  
 lium nūcupatur, hoc est bona & leta annunciatio.  
 Discipline alię sapiētia, artes quaecunq; ac pruden-  
 tia mūdi huius nunciant uenire ad imperiū, ad re-  
 gnum, ad opes, ad potentiā cui huius fragilis, ac bre-  
 uissimī, ad epulas opiparas, ad ludos, ad uoluptates,  
 ad decus, ad laudē, ad rigidā atq; inanē uirtutis um-  
 bram, ad terram fluentem lacte & melle, ad puellas  
 formosissimas, & quotidianas cōpotationes. Euange-  
 lium autem Christi uenire celeres atque expeditos  
 ad amandum Deum, ut cum illo ad eternitatem iun-  
 gamur, unde existet beatitudo inestimabilis. Hinc ut  
 Deus homines omnes absq; ulla exceptione aptos ido-  
 neosq; condidit sue fœlicitati, ita & legem quam i-  
 pse traderet, hoc est fœlicitatis huius uiam certissi-  
 mam cōmunem esse omnibus uoluit. nulla ab ea etas  
 excluditur aut repellitur. nullus sexus, natio, condi-  
 tio: eaq; de causa catholica est fides nuncupata.  
 Quod si omnib. sine discrimine tradebatur tanquam  
 egris medicina, par fuit, ut ab omnib. etiā capi tene-  
 riq; posset, ad rectam obseruantiam et cultum. Non  
 est traditum euangelium obscurum & difficile ad  
 intelli-



intelligendum, tamquam paucissimis profuturū, sed facile, dilucidum, apertum, expositū omnibus, ut nemo esset quin petere illinc posset, et tanquam de fonte haurire, quæ salutis suæ expedirent. Pythagoras, Parmenides, Heraclitus, Plato, et alij ueterū, si quid sibi de diuinis, uel abstrusis in natura rebus uiderentur exculpfisse, occultabāt sedulo: uel si ederent, paucis admodū communicabāt, ijsq; amicissimis et adiutoratissimis, non cōmittebant monumentis literarū: aut si id facerent, obuelabant uerbis raris, exquisitis, obscuris. Plato scribēs Dionysio de quibusdā sacris mysteriis, iubet ut epistolā ē uestigio cōcerpat, ne deueniat in manus indignorū. Alij philosophi atq; oratores locuti sunt excultius, ornatiū, accuratiū, subtilius in omni genere artium: uidelicet nō scribebāt omnibus, aut ex ingenio uel faciendia decus ac gloriā captabāt. ergo illa ipsa tam elaborata pauci adeunt, pauciores intelligūt. Nihil est scilicet periculi, si illæ tenebris obruta sub ignorātia delitecāt. At quod scire omnib. expedit, et est necesse, quod extrema calamitatis est nescire, utiq; congruū est, ut ab omnib. quantū sat est intelligatur. Deus enim nō solum ingeniosorū, aut doctorū, aut diuitū est pater, et rector, sed omniū promiscue, omniū miseretur, omnes ad se uocat atq; allicit, omnib. uult optime cōsultū. ideoq; Dominus noster magistris ecclesiarum præcipit, Quod clā audiuiſtis, palām diuulgate. Homines ho-

minibus inuidēt, aut ad suam gloriā, aut suas utilitates referūt, quæ dicunt: Deus non sua spectat commoda quum nobis benefacit, sed nostra ipsorū simpliciter ac benignè. Quæ causa est, ut quum rationes de Deo multæ sint & efficacissimæ ingeniorū naturalium ac facultate deprehensæ, uoluerit tamen Deus omnia nobis cōducibilia doctrina sua cōprehendi, facili et aperta. Nam quū ad rationes illas non penetrent et perueniāt, nisi homines ingeniorū acumine præditi, idq; post longū studiū et usum, tam sano et ualido iudicio ne fallantur: quid ijs fieret, quibus nondū licuit studere per ætatē, nō licet per morbos. per imbecillitatē, per negocia et curas uitæ necessarias, non licebit per ingeniū torpēs et segne, uel auersum promptitate naturæ suæ et alienū ab eiusmodi contēplatione? Quapropter diuina institutio statim omnibus proponitur, & semel tota ea quā scire expedit, ex illius authoritate qui nec falli potest, nec fallere: ne si rationibus et speculationi ingeniorū relinqueretur, graue homines adirent periculū in ea re, sine quā salui esse nō possunt. Rationes enim et argumenta non semper ex ui sua efficiunt, sed prout est ingenium in quod inciderūt, ut semen in terrā. Alijs ratio fortissima suspecta est, sunt qui uerisimilē pro certissima atque indubitabili recipiūt. Proposita est autē Dei disciplina ea facilitate, quæ apta esset omnium ingenijs, quā omnes faciliē caperent, simplici uidelicet narratione,

tione, exēplisq; et similitudinib. sumptis de rebus no-  
 tissimis. At in hac ipsa facilitate et simplicitate tā uti-  
 li, tā cōgruēti quibuslibet, quāta occultatur altitudo  
 mysteriorū, quæ diutissimē exercere possint magna  
 atq; sublimia ingenia, ac pascere bona ac religioni de-  
 dita? Nullū est in Euāgelio uerbū, quo nō tegatur grā  
 de aliquod et admirabile arcanū. Qui librū illū nō e-  
 uoluitis diligenter, et cōsiderastis subtilius, credite  
 expertis, aut certe uos ipsi experimini. Atq; hoc ipsū  
 q̄ manifestū ex Dei operibus, quæ omnia hoc maxi-  
 mē artificio sunt magna et miranda, quōd sub specie  
 facili et aperta ingentes utilitates adferūt, ita res oc-  
 cultāt profundissimæ speculationis, et quæ ingenia  
 quantūuis excellētia ingēti defigāt stupore, nec unq̄  
 exatiēt cōtemplando. uelut in formica, in apicula, in  
 reb. minimis, in cœlo, in sole, in astris, in elemētis, et  
 reb. magnis, in brutis, in stirpibus, in humano corpo-  
 re, et rebus mediocribus. quibus omnibus nihil pul-  
 chrius, amœnuius, iucūdius. nihil utilius ac conducibi-  
 lius, ad scrutationē aut et uestigationē quid profun-  
 dius aut remotius? Sic in Euāgelio quæ nobis sunt ne-  
 cessaria, obuia sunt omnia et ad manū. cōtēplatione  
 illarū rerū nihil animo gratius, inquisitione uero et  
 perscrutatione nihil excelsius aut admirabilius, nihil  
 quod diutius sublimes mētes pascere ac detinere pos-  
 sit cū summa uoluptate et fructu. ut præclarus ac ge-  
 nerosus animus nihil necesse habeat alibi pastū præstā-  
 tiæ

tie sue congruentē querere. Grandia sunt hæc qua  
 dixi, sed profectò dignitate ac magnitudine illarum  
 rerū minora: hoc etiā sine experimēto, sine attēta sa-  
 cri Euangelij lectione facile quivis assequetur mani-  
 festa cōiectura. Nam si nihil est penitus à Deo profe-  
 ctum, quod nō sit refertū secretis et admirabilitate,  
 quāto esse magis par est Dei in humano corpore et  
 in terris vitā, functionē, administrationēq; humane  
 salutis ac beatitudinis, qua homines (ut sic loquar) dei-  
 fificantur, quemadmodū Deus ipse est humanatus. Iā  
 quāta admirationis est in toto Euangelio, et quidē  
 ab imperitis humane sapientiæ cōscripto, nō inveni-  
 ri que in monimētis maximorū ingeniorū, magnāq;  
 eruditione et cognitione rerū atq; usu excultissimorū,  
 ut aliqd sit uariū et pugnās, ut aliquid ineptū,  
 puerile, frigidū, absurdum, ridiculū, et ubi scriptori  
 danda sit uenia quod dormitarit? quēadmodū de Ho-  
 mero inquit Horatius. Nihil in eis tale: ut appareat  
 rectorē moderatorēq; illarū mentiū et manūū fuisse  
 Deū, illisq; id beneficiū esse collatū, quod nulli huma-  
 norū ingeniorū, naturæ quidē relicto. Quāta in illis  
 narrationis cōstantia, qui tenor perpetuus, facilitas  
 autē inaffectata, et ubiq; sui similis. Gravitas uerò et  
 seueritas diuinis reb. cōgruēs, nihil in illis prorsū io-  
 cosum, aut ridiculū, nō delapsi sunt ad ullā sui osten-  
 tationē, non ad citādos eruditos nationū, non ad ali-  
 quid inscendū ex sapientia mundi, que tū maxime



erat in precio, nō ad descriptiones regionū ac locorū,  
 nō ad inanes ullas atq; ociosas digressiones, aut quæ  
 amœnitate sua detinere possent lectorē, nihil in illis  
 uacās, aut aliorū pertinēs, nullū est uerbū quod ad  
 summā instituti non pertineat, hoc est ad rationē pie-  
 tatis. et quū in his quæ mediocria possent existima-  
 ri, sic eluceat diuini cōsiliij effectus, minus erit profe-  
 ctō mirandū nihil in eis esse obscenū, et turpe, ut in  
 Alcorano Mahumetis, et apud gentiū uates: nihil a-  
 nile, delirū, blasphemū. ut in Thalmud Iudeorū, et  
 apud plerosq; philosophos. In expositione autē eorū  
 quæ Christus uel dixerit uel egerit, eadē admirabili-  
 tas maiestatis quæ in cæteris, seu potius amplior et  
 sublimior. Nam Dei ratio et filius naturā sibi homi-  
 nis assumpsit, qua uelut instrumēto uteretur nostræ  
 doctrine, exempli, redemptionis, quo peractō mune-  
 re uoluit eam oculis humanis subducere, ne ibi amor  
 suorum sisteret, sed transiret ad diuinitatē. Quocir-  
 ca ut manifestū omnibus fieret opus hoc Christi cœ-  
 leste esse, non terrenū: ad Deum spectare, non in res  
 mundi huius: de Christi maioribus modice memora-  
 runt, contenti solum ostendisse, referre illum genus  
 suum in Abraham et Dauidē, quibus erat priuatim  
 promissus. De matre autē q̄ pauca? at de qua ma-  
 tre, q̄ digna, ut de illa longē plurima mandarentur  
 memoriæ? Ipse porro matrē et fratres suos affirma-  
 uit, qui patris sui cœlestis uoluntati iussisq; obedi-  
 rent:

rent: non repudians quos haberet ex sanguine, sed illos potiores sibi docens, qui per spiritum accederent: atque adeo consanguinei qui illum sunt secuti, non prelati sunt alijs nexu corporis, sed cognatione spiritus, hoc est excellentia uirtutum. De ipso autem Christo nihil retulerunt qua esset statura, qua facie, qua forma, qua uoce, quo modo indueretur, incederet, esset, biberet, quiesceret, quæ solent rerum scriptores etiam de uiris mediocribus memorie posterorum tradere: eoque accuratius ac subtilius, quam proprie de illis suscipiunt narrationem. quod altissimo Dei consilio effectum est, ne quæ de rebus filij Dei corporalibus haberemus, ea putarentur summa, et absolutissima, et in rebus neutris ac indifferentibus propè sola, sic uestiri, sic comedere, aut hæc uel illa sic loqui, sic ingredi. Inde quanta illis obseruandis, et quam accurata superstitio, quam placeret sibi qui sic ageret: et eo magis, si essent sibi naturalia, ut cognationem uideretur habere aliquam cum filio Dei. quæ cura negligentiam eorum importaret, quæ uerè sunt Deo grata; qua planè sisteretur in homine, non transiretur ad Deum. Niciam Atheniensem ducem ferunt manumisisse seruum, quem diceret Baccho esse simile: tactus est scilicet religione, quod nefas existimaret mortali seruire, qui similitudinem haberet cum immortali. Quid fieret inter nos de ijs qui Christum facie uel uitæ actionibus naturalibus referrent? Nec uicissim deessent, ut sunt hominum uaria et pugnans-

pugnantia iudicia, qui res illas Christi non putarent esse summas et perfectissimas: unde offensio de Christo, qua nihil est humanis et angelicis mētibus pesti lentius. Nihil scripserunt prorsum quod nostra non referret cognosci, nihil omiserūt quod referret. nam quicquid ē re nostra est nos scire, euangelij est explicatum: curiosa, hoc est quæ ad salutē nostram non faciunt, prætermiſsa sunt. Et hæc omnia non tractant tanquā encomiū, sed narrationis modo purē, simpliciter, nudē: ex qua prōptissimum sit iudicare, illum et uirum fuisse optimū, et Deum ipsum summū ac præpotentē. Quibus de causis et rationibus hoc possum affirmare, nō minus audacter quā uerē: Si cum etia humana sapientia cōspiraret, ut hominē aliquem Deum esse uellet ostendere, et eius opera et dicta diuina, fingeretq; de illo homine quicquid animo esset collibitū, et in id quod finxisset adhiberet orationis cultum, differendi uim, et acumē rationū, non posset tamen Euangelium unum quale est nostrum cōponere, hoc est conscribere, quo id possit euinci ac persuaderi, quemadmodū Euangelistæ nostri fecerunt solo historiæ contextu, detractis quibuscūq; humanæ sapientiæ uiribus atq; ornamentis. Hoc uerō ut profanis atq; imperitis fortasse uideatur incredibile, au- non satis probabile, quisquis tamen altius in Euangelij sensa penetrarit, facile mihi assentietur. Homer-  
us finxit arbitrio suo in Achille optimi seu principis  
seu

seu imperatoris effigiem, in Vlyſſe uiri prudentiſſi-  
 mi: quid exijt? Achillem fecit ſeuum, ſanguinarium,  
 immanem, inhumanum: Vlyſſem aſtutum, fraudulen-  
 tum, mendacē. Xenophon Cyrum maiorem ad ima-  
 ginem, ut inquit Cicero, iuſti ac moderati imperij:  
 et dixit quæ uoluit, quæ omnes ſciebāt in regē illum  
 non cōpetere. quid tandē protulit? principē bellacē,  
 bella ex bellis ſerentē, artium pacis uel oblitū, uel ne-  
 gligentē. Philoſtratus Atticus rhetor Apolloniū Tia-  
 neum deſcribit in odium Chriſti, uirū diuinitate ple-  
 num: qua narratione nihil eſt fabuloſius, inconstan-  
 tius, nihil à mente omni & ratione inanius. & pro-  
 fert tandem nobis magū uaniſſimū, arrogantiſſimū,  
 & iactantiſſimum. cuius mendacia & dementiam  
 quum Eusebius Cæſarienſis paucis uerbis patefecit,  
 tum nemini ſano non eſt facillimū perſpicere. Sed ad  
 ſaniores redeamus. nā Philoſtrato illa ſcribēti nemo  
 eſt tam abſurdo iudicio, qui nō intelligat mentē om-  
 nino et ſanitatē deſuiſſe. Plato rēpub. eſt cōmentus;  
 irriſam atq; exploſā ab omnib. Minos Cretēſis leges  
 ſuas à Ioue ſe accepiſſe finxit, Lycurgus Lacedæmo-  
 nius ab Apolline: quæ à Platone, Ariſtotele, et maxi-  
 mis quibuſq; philoſophis ſunt reprehēſæ ac cōſuta-  
 tæ. Cicero ipſe reip. iuſtæ ac legitime imaginē, qua-  
 ſiq; ideā ab illa reip. Ro. uetere mutuatus eſt, quæ  
 fuerit per bella Punica, & paulò antè: qua ciuitate  
 nulla unquā fuit poſt hominū memoriā iniquius, aut  
 certè



certe turbulentius instituta. At qui uiri hæc fingebant? quibus ingenijs, quæ: eruditione, prudētia, facundias sed apparebat protinus humanū esse opus, hoc est debile, & ruinosum. Hic undique relucet ars & consilium Dei. Idem M. Tullius qua cura, qua anxietate animi, quanta molitione consecraturum se ait memoriam filiae, omniumq; excellentiū ingeniorum & græcis & latinis monumentis effecturum, ut pro dea habeatur? qua solitudine scribit ad Atticum, ut ager sibi ematur loco celebri, in quo sanum extruatur Tulliolæ? Quid sequutū est? Scripsit libros duos de morte filiae, quibus, ut credibile est, profusis ingenij illius tanti tamq; in dicendo exercitati opibus, argumētis, schematis, cultu & ornatu orationis conatus est persuadere posteritati, Tulliolam esse deam. sed inepti patris aniles lachrymas, & commentum fragile præsentis posteri q; deriserunt. Redeamus iam ad libros omnes sacros, ueteres ac nouos. Princeps & caput et regula diuinorum oraculorum, & salutis & ac necessariæ ueritatis est Christi Euangeliū, quo ceteri sacri libri omnes censentur, & precium accipiūt, tam ueteris instrumenti, quàm noui. Epistolæ apostolicæ uelut explicatio quædam sunt aliquot sententiarum Euangelij, & earum fusior expositio per spiritum sanctum dictata, ut eius spiritus doctrinam Euangelio conformem & consonam, seu ut

T

aptius

aptius dicā, unam atque eandem in apostolis incipiamus deprehendere & agnoscere. Acta apostolorum primum est ædificium surgens super Christi fundamentum, quod sequens Ecclesia imitetur, quoad peragatur ædificium hoc in reditu Domini, quantum quidem fieri possit per tempora, regiones, & statum ecclesiarum. Hi omnes sunt libri fœderis pactiq; Dei cum hominibus, quod testamentum Hebraica loquendi proprietate nominatur. est enim fœdus diuinæ misericordiæ, & reconciliationis eius cum humano genere. Vetus instrumentum huius confederationis umbras continet eius corporis, quod est in nouo explicatum, atque ostensum. Nouum enim ad cognitionem apertam ueritatis est datum, uetus autem ad præparationem noui, ut haberent homines in nocte illa, quoad sol oriretur, doctrinā cultus diuini, speculationem rerum altissimarum sub caligine infimarum latentem, exempla Dei bonitatis ad fiduciam, & magnitudinis ac seueritatis eius ad timorem, ut uagi & fugitiui timore tanquam iniectis compedibus detinerentur: ne uerò desperarent, parata essent illis tot opera miserationum illius. In uetere sermo est & sententiæ puerorum, in nouo autem uirorum. Tametsi interdum Christus loquutus est discipulis suis, nempe adhuc Iudæis, Iudæorum uerbis, ac more, de mensis in æterna beatitudine,  
de

de epulis & conuiuio, alijsq; eiusmodi nonnullis, licet per paucis. Formabat scilicet Dominus pueros suos pueriliter primum, nec uoluit eos ad plenum perfectumq; doctrinae perducere, ut fulgor illis ueritatis proponeretur ante oculos, quoad absoluto humane uitæ decursu tantam iam auctoritatem apud illorum animos parasset, ut splendorem illum ingentium mysteriorum intueri & cuperent & inciperet posse. Ille quidem semina uniuersæ ueritatis & sanctæ doctrinae in illorum pectoribus iecerat: quæ illi parū à primo intelligentes, edocti mox ab eodem spiritu Christi, manifestò sunt postea intuiti. Non attulit spiritus sanctus nouam apostolis doctrinam, sed explicationem acceptæ, de quo sumus antea loquuti. Homo ratione ac mente præditus, ad disciplinas cultumq; animi factus, aptusq;, disciplina aliqua indiget, ne ocio ac situ uis illa animi ætiosissima obtorpescat. Ad peritias disciplinasq; non sunt omnes eodem modo apppositi: alij alijs uel tenentur, uel sunt dediti. una est quæ uniuerso hominum generi congruit, necessaria uidelicet. Necessarium uoco, sine quo uiuere ac tueri se non possit. Nam quemadmodum ad corporis uitam, etiam si artes actionesq; omnes homini adimas, tum illa omnia quæ uel delectationi sunt, uel utilitati comparata, alimentum certè ut relinquas est necessum, si modò uis eum

uiuere: sic una est disciplina, unus animi cultus, sine quo animi uita non possit fulciri, propagari, quum absque reliquis uniuersis possit. ea certe est ars, qua homo post uitam hanc corporis breuissimam, alteram illam eternitatis consequitur, & finem illum ad quem ex bonitate auctoris sui est conditus. Hæc est sciëntia colendi Dei, quæ pietas nuncupatur. ea uerò libris diuini fœderis explicata est. Quæ pietate quoniam homo plus indiget, quàm cibo, bonitas illa & benignitas eius qui cibum prouidit ac parauit, non neglexit, quod tanto erat magis conducibile ac necessarium. Ea enim est Dei bonitas & scientia, ut nemo dubitare possit, quin et ille prouideat nostris necessitatibus, & remedium illarum sit ab eo. Quæ ergo uel delectamentorum sunt disciplina, uel ornamenti, uel usus huius temporarij, ac fugaciissimi, ingenijs sunt hominum inquisita, & tradita, fluxa atque incertæ authoritatis. Hoc uerò quod certum esse oportet, sine quo salui esse non possumus, Dei esse par fuit, cuius sapientiæ infinita, nec falsæ, nec fallentis authoritas certa, indubitata, firmissima est. Fundari ergo conueniebat super immobilitatem æternæ ueritatis: quod nisi esset stabile, grauissima consequeretur perturbatio, & perniciēs acerbissima. Quæ propter quisquis sacris literis detrahit, quisquis eis derogat, detrahit ac derogat bonitati ac benigni-



gnitati Dei, fiduciæ atque amoris erga illum nostro, id est salutis et bono nostro supremo et unico, haud aliter cogitans aut faciens, quam si quis in graui et periculoso morbo unicam medicinam à sapiētissimo et amicissimo medico oblatam, uel tanquam noxiam calumniaretur, uel tanquam inutile sperneret ac refutaret. Tametsi hoc quod tantopere nobis expedit firmum esse, certum, stabile, liquidum, plurimi sunt qui uel malicia concutere atque exagitare tentant, uel errore obscurant, et obruunt tenebris, ut inter tot conantes deprauare periclitetur ingenij nostri imperitia atque infirmitas. Eiusdem bonitas qui illa dictauit sanctis suis, reliquit normam et lucernam duraturam usque ad extremum æui huius, quæ dux sit nobis in tenebris, et in dubijs atque incertis mensura. Eauerò est Ecclesia, cui in æternum præfecit magistrum et ductorem spiritum suum, ut per illius regimen uerè sit Ecclesia (quemadmodum Paulus ait) columna et fundamentum ueritatis. Illa scrutatur, examinat, expendit libros mysticos, probat aut reprobat singula uerborum sensuumque per spiritum sanctum, alioqui confusissima sequeretur rerum omnium perturbatio. Ecclesia uerò solos libros illos qui in sacro continentur canone, tanquam salutis nostræ necessarios recepit atque approbavit, quoniam eorum authores spiritu Dei

dictante scripsisse, ab eodem illo spiritu est edocta. multos alios comprobavit, ut utiles, non tamen necessarios, de quorum spiritu incerta est: qui etiam si magisterio sacri spiritus sint in scribendo usi, à quo sunt dona omnia sancta, non tamen ea spiritus in hoc dictavit, ut uellet aut perpetua esse, aut omnibus ad salutem immortalem necessaria.

DE ACTIS IESU  
Christi.

**A**ccedamus iam propius ad acta & uitam Iesu Christi, ut intelligant omnes, diuino eam fuisse consilio rectam, nec conuenisse aliter in illa quicquam fieri, nec humanas omnes cogitationes meliorem salutis ratione formamq; posse inuenire. Primum omnium poterat sibi Dominus corpus nouum omnino è terra confingere, quale Adæ. sed qui charitate nostri adductus in terram descenderat, sanguine & cognatione uoluit nobiscum iungi, quum ad maiorem inter nos & ipsum conciliandam gratiam, tum ut uerius peccatum in se ipso deleteret, quod infixum carni nostræ adhaerebat: ad exemplum quoque nostrum, quod ualidius est in eo, qui homo à natura cæterorum hominum non differret. Itaque electa est uirgo de tribu Iuda, & familia David, Maria, quæ Christum Dominum pareret, non dubium quin magnitudine uirtutum ad tantum munus euecta. Nam cui facul-

tas erat deligendi ex omnibus quam uellet, dubitan-  
dum non est, quo minus eam delegerit, quæ omni  
uirtutum & pietatis genere esset præstantissima,  
nempe sibi quantum fieri poterat simillima. Hæc  
desponsata erat Iosepho, eiusdem tribus et familiæ  
uiro, ut custos esset uirginis, & sexus infirmi. in  
quo non castitati modo uirginis est prospectû, sed  
etiam famæ, ne quis extra coniugium puerum na-  
tum statim ut adulterinum abominaretur. Sed illa  
ante humanas nuptias admirabilem illum homi-  
nem concepit, inscia prorsum uiri. Nam qui ad  
testificationem ueniebat totius integritatis, non  
decebat hunc integritatem in matre dissoluere ac  
uiolare. tum ad significationem spiritalis nostræ  
regenerationis. Sicut enim de uirgine matre nasci-  
tur nostrum caput, ita & nos de uirgine renasci-  
mur Ecclesia. Et desponsata fuit uirgo Maria, in  
hoc quoque similis Ecclesiæ, quæ & uirgo est &  
sponsa. Virgini mysteriû est ab angelo declaratû.  
Quam consentaneum erat rem tantam ab angelo  
nunciari, quando minores olim res patribus nun-  
ciabantur per angelos. Virginem quoque id non  
ignorare decens erat, ne intumescere, ignota de  
caussa, utero, pauore percelleretur confusissimo.  
Et ad uirginem par erat mitti angelum similis con-  
ditionis, ac proximæ: ad hæc, ut sciret non rem agi  
uulgare, quæ sic cœlitus denunciaretur. Iosephus

quum ad conspectum incrementis Mariæ uteri perturbaretur, admonitus est diuinitus, quid rei Dominus pararet humano generi. Itaque uir per omnia & iustus & pius, reliquo omni tempore abstinuit ab ea, nihilq; fuit aliud in domo, quam prætextus famæ uirginis, minister infirmi sexus, & teneræ ætatis pueri. Non est quod quisquam continentiam hanc Iosephi & Mariæ miretur: fecerunt hoc idem multa coniugum paria, quæ memoriæ sunt prodita, uelut Iulianus martyr & Basilia, Chrysanthus & Daria Alexandrini, Henricus Cæsar & Sinegunda, Amos, Malchus, & alij penè innumeri, qui literarum monumentis non sunt mandati. Exemplum Mariæ peperit imitationem, imitatio confirmat fidem exempli, ut quia fecerunt illi maximi, ad faciendum incitati sint minores: & quia hi fecerunt, non dubitetur de illis. Quod si in minoribus causis constat fides, cur in maioribus hærebitur? uerisimilius est potuisse id contingere in matre Christi, quàm in uxoribus seruorum. Siue id erat Iosepho iam tum, quum illam sibi desponderet, fixum & destinatum animo, non commisceri fœminæ, sed ab eius contactu conseruare se purum, ut Deus cuius consiliū ad grande illud arcanum deducebat uirginem, talem illi socium applicarit, qui illi ut in uita omni, sic in proposito animi esset concors. Siue ille uir religiosus



giosus horrore diuinæ maiestatis, non ausus est turpitudinem in locum sacrum inferre, in templū uidelicet longē quā illud Hierosolymorum sanctius & sacratius. Siue utrunque est, & propositum firmavit occasio. Philippum Macedonia regem memoriæ traditum est, quum haberet persuasum, Apollinem draconis imagine cum uxore sua Olympiade cubuisse, non est deinceps ad eam ausus accedere. Quidam de Platone Atheniensī haud absimile accepimus: nisi forte hoc de Philippo, & Platonis patre, sit credibile, non sit de Iosepho: & ualidior sit apud stultorum animos superstitio, quā religio uera apud sapientes: & umbræ pietatis apud impios, quā apud pios solida ipsa & uera. Sed certē leuissimum erat numini, matrem conseruare integram. Desponsam autem esse Dominus uoluit uirginem: noluit enim ex infamata nasci matre: maluit aliquos de origine sua, quā de matris pudicitia dubitare. Quippe originem ipse suam magnitudine atque admirabilitate operum facile erat asserturus atque approbaturus. Nitore autem uirginis non conueniebat, ullam prorsus quantumuis leuem maculam aspergi: quæ res puellarem animum suprā quā dici potest conturbasset, & confudisset. Quid, quod ij qui filium Iosephi faciunt Dominum, ut Iudaicus furor ac rabies, Mariæ castitatem non putant se

T s      accusare,

accusare, ut quæ nihil censeatur fecisse contra legem: qui uerò de uirgine malè sensissent, etiam Christi infamassent originem. ita uirginis dedecus commune fuisset ambobus. De Christi uerò patre dubitatio nullam alterutri parit ignominiam, quia nihil existimatur commissum contra legem coniugij. Pertinet hoc quoque ad exemplum Ecclesiæ, ne aliæ foeminae opinionem de se negligant, tanquam in hoc matris Domini sui non dissimiles, quæ de pudicitia malè audiissent. Ceterum ex matre sine patre nasci, grandi hoc mysterio non carebat. Alioqui cur fuisset turpius patrem habere quàm matrem, cū præstantior sit uir, quàm foemina? Sed nefas erat, ut homo quisquā diceretur eius pater, qui patrē haberet Deum. Theologia poëtarum ex antiquissimis auditionibus profecta, Mineruam refert Iouis filiam, ex cerebro illius natam, ἀνὰ τοῦ κεφαλῆ, hoc est Dei sapientiam: et Bacchum, id est mundum hunc, ex Iouis crure, quæ est illius pars infima: et Vulcanum ex sola Iunone genitum, ἀπὸ τοῦ πυρὸς, quæ est Christi humanitas. Partu appropinquante, edixit Caesar Augustus, qui tum orbi Romano imperabat, ut in sua quisque ciuitate censeretur, unde esset illi origo. quumque essent illi familiæ Dauidicæ, Bethleemum uenerūt, antiquam illius gentis patriam. et cū non inuenirent locū in diuersorio, redundante  
ibi

ibi multitudine illius familie, quæ eadem de causa eo conuenerat, peperit Maria filium suum Christum Iesum, octauo Calen. Ianuarias: & pannis inuolutum reclinauit in præsepi. Sensit statim infans frigus & inopiam, hoc est incommoda eius nature, quam sumpisset. Angeli cum grandi è cælo splendore, pastores ad gratulationem inuitant nati numinis. Stella uero magos eodem adduxit. Ad Iudæos pastores angeli mittuntur, qui alloquijs angelicis essent assueti. Magis autem gentilibus si angelus esset loquutus, suspicionem præbuisset demonij: hæc enim loqui & uersari consueverunt cum gentilibus, non angeli lucis. Itaque de cælo eis signum ostenditur manifestum, & propter ipsos, nempe homines in rerum cælestium perscrutatione uersantes: sunt enim apud Assyrios magi, quod philosophi apud Græcos. & propter rem ipsam, ne terrenum, aut ex hoc elementari mundo negocium esse crederet, sed cæleste et diuinum. tum etiam nouæ rationis, speciei, decoris stellam, nouum mundo natum numen scirent portendere, homines in cognitione cælorum & nature totius exercitati. Sed altius contemplantes, quid est hoc totum aliud, quam de populo Iudaico accessuros ad Christum adorationem & cultum pastores, hoc est homines simplices ac rudes, eos que Ecclesiæ pastores futuros? de nationibus uero magos,

magos, hoc est sapientiæ affectatores, homines magno ingenio ac doctrina? & prius Iudæos uenturos, hinc gentes: utrosque autem à cœlesti lumine adductos. Et ad magorum ingressum turbatum & trepidatum esse Hierosolymis, siue zelo, quòd in gratiam Dei reciperentur gentes: siue admiratione multiplicationis Ecclesiæ: quorum utrumque in Actis Apostolorum legimus. Attentè considerate singula. nam sicuti à principio præmonui, nullum uerbum uacat grandi mysterio. Circumciditur puer solutus lege, & ad purificationis solemne adducitur, mundus ipse, quiq; alios omnes erat purgaturus: ut doceat nos patrijs legibus obedire, nec cuiquam uel querimoniæ, uel suspicioni locum faceret. Imponitur ei nomen rei congruens Iesus, hoc est σωτήρ, quod nos seruatorem possumus dicere. Rex autem Herodes, quum se à magis frustratum uidit, timens successorem regni, occidi iussit pueros omnes Bethleemiticos intra bimatum, in quibus & filius est eius comprehensus. quod Augustus Cæsar quum cognouit, ioco notauit immanitatem: Satiùs esset, inquit, Herodis porcum esse quàm filium. alludens ad Iudaicum ritum, quo porcinam esse uetabantur. Rem magnam, admirabilem, metuendam sibi uidisse atque audiuisse de magis Herodem oportet, ob quam nihil sit cunctatus scèntiam non in ciues solum tantam exercere, sed



sed in suum quoque filium naturalem. Ad hanc deu-  
uitandam cladem angeli monitu Iosephus in Aegy-  
ptum cum puero & matre secessit. Docet nos Do-  
minus, persecutiones, quoad salua iustitia & pi-  
etate licuerit, defugere: & per Christi pueri per-  
sequutionem, nascentis Christi Ecclesiae perse-  
quutio denotatur. Querebat Herodes Christum,  
ut occideret: at is euasit, iugulati sunt infantes,  
flosculi martyrij. Vbi uero accepisset Iosephus, fa-  
cto esse Herodem defunctum, angeli iussu in Gali-  
leam reuertit. Duodecimo ætatis suæ anno reman-  
sit in templo, inscijs matre & Iosepho: & contu-  
lit cum magistris Hebræorum de lege & Messia.  
quod ille maximis de causis fecit. primum ut pate-  
fieret se iam tum ad quid uenisset scire, & quæ  
à patre mandata accepisset: & suppetere sibi, si  
docere uoluisset, sapientiam: nec temerè aut subi-  
tò ad ingentia opera delectum ac ascitum, ut Mo-  
sen, & alios permultos, nec fortuitò in id munus  
docendi incidisse: ideoq; & in eius ortu tot sunt  
edita prodigia, ut iam tum sciretur hunc esse illum  
à Deo ad mundi reparationem electum, destina-  
tum, missum. Vsque ad annum tricesimum, nihil le-  
gimus egisse Dominum publicè, non docuisse, non  
signis & portentis diuinitatis suæ maiestatem de-  
texisse: non minoribus hæc, nec paucioribus de  
causis, quàm reliqua omnia. ne si à puero tanta il-  
la

la tam'que stupenda essent acta, suspecta fuissent: quàm plurimis, alijs auersantibus & abominantibus uelut magica, alijs irridentibus & illudentibus tanquam puerilia: & ad posteros dimanasset suspicio, ne temerè fuissent illa à præsentibus accepta atque approbata. ad hæc sublatus fuisset immaturo tempore, nempe priusquam plene docuisset, priusquam maturum sui exemplum potuisset relinquere: ne quis res magnas ante iustum ætatis tempus aggrederetur agere. Denique decebat amplitudinem tanti officij, ut à uiro exerceretur. Et qui huc uenerat exemplum allaturus omnibus, omnem uiuendi rationem legitimam quidem expressit, austeram, & solitariam, & comem, & ciuilem: nec se tamen opificio ulli, uel arti addixit. Illa enim uitæ genera uirum bonum, qui que multis sit in commune profuturus, obire congruit, artes aut opificia non item. Preuidebat etiam futurum, ut si qua esset usus arte, existerent plurimi qui eam arriperent, constituentes in eo pietatem. Hoc ergo deuittauit, quod imitati essent multi cum damno. Prius illud alterum non deuittauit, cuius imitatio atque expressio nihil adferret incommodi. Seruauit perpetuam castitatem, neque uxorem duxit. non erat fas eum habere sponsam mulierem, cui desponsata esset Ecclesia, cui singula nostræ animæ: nec gignere corpora

poraliter liberos, qui tot gigneret quotidie spiritaliter. Decebat quoque hominem spiritalem castitas, & mundicies corporis. Adde quod uenerat ut homines non terrestres faceret, sed cœlestes: & à contagio liberaret carnis, ad cœlestem puritatem & mundiciem traductos. Postremò noluit discrimen aliquod inter sobolem naturalem & adoptatam relinquere, omnes uoluit spiritaliter creare: ut sciant omnes ad gratiam se atq; adoptionem hereditatis filij Dei pertinere, nō ad naturam. Quid ergo, dicat aliquis, exemplum ne præbet omnibus ut cœlibes uiuant & casti? Præbet certè, quantum quisq; potest consequi. sed quemadmodum ipse idē de castitate dixit, Non omnes capiunt uerbū hoc, nisi quibus est cœlitus à patre concessum. Incurrūt in uitam uniuscuiusque multa temerè & fortuitò, multa alieno acta consilio, multa priora à posterioribus consilijs & rationibus aliena atque contraria. Vitam Domini nostri si quis uel cunctam contempletur, uel per partes, intelliget totam esse consilio & ductu actam suo ipsius, hoc est diuino, & liberrima eius uoluntate, adeò omnia sanctè & sapienter sunt acta, & prima cum medijs, media cum postremis consentiunt: ut appareat ab eadem mente instituta fuisse superiora, à quā etiā sequentia. Principiò natiuitas ipsa, quæ non est in manus nascentium, in Domino nostro quàm consona

cum

cum austeritate totius uitæ: media bruma, de nocte, in exiguo & frigido oppidulo, atque in eo non in diuersorio, sed in casa uel tuguriolo, & reclinatus in præsepi. In eadem natiuitate, sicut in reliqua uita, animaduertere est humilitatem terrenam, cum maiestate ac gloria cœlesti coniunctam, hoc est hominem cum Deo. ad præsepe, & inter pastores cantant & ministrant mentes illæ cœlestes: summittunt se magi, hoc est mundi sapientia. Nato Domino continuo aduersus eum consurgit persecutio, & pro eo timor ac terror, & eius custodum fuga & trepidatio. hinc cædes infantium ab Herode rege facta, dum Christus quæritur ut opprimatur. Quid conformius, aut quæ expressior imago tum uitæ eius, tum Christi in sua Ecclesia nascentis? Conspiratur à potentia mundana aduersus Christum Domini, occiduntur martyres à principibus & regibus molientibus Christum opprimere. Christus autem subductus est à parentibus, hoc est à patre suo, positus in tuto, collocatus scilicet in cœlis ad dexteram ipsius. Propter puerum, inmaculantur pueri, propter uirum uiri, propter innocentem innocentes. Offeritur templo, præsto illi adsunt testimonia sanctorum, & non minus faminae quàm uiri. Quo autem consilio ignaris parentibus in templo remanserit, quàm profundo et admirabili, paulò antea explicauimus. Iam uerò per totam



tam uitam nihil eum possedisse legimus ex ijs quæ bona nominantur, non agrum, non uillam, non pecuniam, non domicilium uel suum uel conductitiū. Non decebat illum aliquid habere peculiare, cuius essent uniuersa. ac ne uestem quidem habuisset, si decorè potuisset inter homines uersari nudus. Cuius consilij fuit posse præstare, ne quid ab ortu ad interitum suum possideret. Non desunt, qui adulta ætate abijciunt à se procuracionem & possessionem rerum omnium uitæ: hi tamen aliquando habuerunt. Nihil autem unquam habuisse non emptum, non donatum, non relictum, non conductum, iam inde ab ipsa infantia ad extremum uitæ diem, ac ne in morte quidem sepulturā, certi fuit consilij, quod uitam totam moderaretur. Quid illa, quod nec ullam uitæ artem aut opificiū exercuit, nullum habuit nec magistrum peritiæ, neque actionum uel admonitorem uel consultorē, quod adulti quidem præstare fortassis possint, quia ita placet: in puero autem quantum est, non deductum esse à matre, à Iosepho, à propinquis ad aliquod opificiū, aut ad literas? neminem in Galilea extitisse, qui uel ex coniunctione sanguinis, uel ex publico munere, uel ex curiositate reciperet puerum edocendum? neminem qui adulto iam & confirmato consuleret, quæ facta essent opus, cuius admonitioni ille ausculta- ret. imò contra si quis

tentabat monere, in contrarium monebat eius rei, quam exequi negotio illius diuino cōueniret, eoq; seuerè ab ipso repellebatur: quod est annotare in sacra Euangelij lectione. Non utique fuisset nefas doceri hominem ab homine, & admoneri, & consilium capere. Nam Moses, cui Deus & loquutus est, & legē ac sapientiā dedit, tum à sacerdotibus Aegyptijs est institutus, tū admonitus à socero, & consiliū accepit à senioribus Israël. Sed grande nefas erat, Dei sapientiā ab humanis tenebris uel doceri, uel etiam quantumuis leuiter admoneri.

DE DOCTRINA  
Christi.

**O**Rsus autem docere, initium disciplinae suae sumpsit à refutatione receptorum errorū, de opibus, de uoluptatibus, honore, dignitatibus, gratia, potentia: quae omnia spernere suos, ac pro nihilo existimare iussit, tanquam fluxa, uana, commentitia, breui peritura. Caput doctrinae suae & fundamentum uniuersae suae pietatis, amorem esse dixit erga Deum & homines, in quo ostendit homini, quis esset finis & exitus bonorū omnium, & quemadmodum petendus. Amor enim Dei quia nos iungit Deo beatissimo, beatos efficit. Amori erga Deum amores rerum istarum officiunt, inter quae uersamur. minus enim amat singula, qui amat plura: & sensus usu aut uoluptate rerum mundi hu-

ius ceterioris delinitus, à rerum altiorum amoribus mentem quasi manu iniecta retrahit. Contemnenda sunt igitur hæc quæ uidemus & contrectamus, si uniuerfum amorem nostrum in eo quod oportet collocare cupimus: non est charitas nostra in res plures partienda, quæ tota ipsa adeò est exigua. Christi ergo disciplina fuit hæc, omnia ita esse à nobis posidenda & sumenda, ne in animum penetrent: non debere uoluntatem ad se pellicere, quæ præsentis tantum necessitati seruiunt, & subinde nos à cura æternitatis abstrahunt: cui curæ quicquid noceret, rescindi atque abijci imperauit, opes, honores, amicos, parentes, & liberos, si esset necesse, & proprium corpus. quicquid eam adiuuaret, ascisci & amplecti, sobrietatem, patientiam, tolerantiam, animi æquitatem. Ex Dei amore amor proximi nascitur, tanquam filium necessario amet, qui patrem. & eadem res utrique charitati simul sunt noxiæ, atque utiles. Ex opum, & potentiæ, & claritatis cupidinibus nascuntur lites, rixæ, iurgia, pugnæ, cædes, odia. ex illarum neglectione quies, & pax, & amicitia. Vicissim quoque magnum est argumentum charitatis Dei, charitas hominum. Et quoniam quidem ad coelestem illum amorem ficti ac instructi sumus, uetat nos hic Christus odijs & simultatibus assuescere. uult amore iungi, ut immortalem illam

uitam iam nunc incipiamus meditari . Nec solum redamandum esse amicum, sed non habendum inimicum odio : quod præceptum arduum nimis & factu asperum inueteratæ nostræ consuetudini, unumq; ex difficillimis Christianæ pietatis . Fractæ quidem & corruptæ naturæ sententijs atque opinionibus id uidetur . nam sensui naturæ integræ, quam Dominus restituit, nihil est probabilius, nec æquius, nec facilius factu . Quicquid enim est affectum contra naturæ suæ rationem atque habitum, prauum est, distortum, & in uitio . Mentis nostræ habitus est, ut ad ueritatem directæ sit semper, & spectans : uoluntatis, ut ad amorem, charitatem, beneuolentiã . Deprauata ergo est mēs, quæ in falsum tendit : uoluntas item praua, quæ ad maleuolentiam & odium . est enim odium uoluntatis distortio, & quasi morbus quidam, sicut mendaciũ, mentis . Qui ad errorẽ igitur, qui ad prauitatẽ, ad peccatum ex humanis pectoribus rescindendum uenerat, non debebat hunc tantum & tam graue omittere, hærens in potissima hominis parte, & prestantissima, quod etiam tale esset, ut hominem assue faceret contrariæ uiæ, atque illa est qua in cælum & ad Deum ipsum peruenitur . At dicis, Ille odit me, & malè uult mihi, male precatur, quacunque potest nocet . Vis ergo, quia ille est malus, tu etiam malus esse? Vis insanire tu, quia ille insanit? an sanabit



bit tuum morbum morbus illius? & quasi non sit satis unum esse malum, uis esse duos? Quid furiosius, quàm te arietare caput ad parietem, quia inimicus tuus arietat? an non hoc est contra mentē, contra rationem, contra iudiciū naturæ rectæ? Christi Domini nostri uita conformis fuit doctrinæ, admirabilis, & planè diuina. Nec possedit ullas opes, nec ambiit, contentus tegmentis corporis, & uictu. in diem quæsito, qualiscunq; contigisset. Oblatum est ei regnum, spreuit & reiecit, nullam uoluptatem unquam captauit, nullum in uita eius crimen, nulla criminis suspicio uel leuissima, inter tantam inuidiam & odium. nulli est unquam assentatus, nec loquutus ad gratiam, semper rectum ac uerū, etiam cum præsentissimo periculo & capitis discrimine. Vel Marthæ, quæ ipsi & discipulis eius ministrabat & parabat cibum atq; hospitium, officium Magdalenæ prætulit, nullam aliam in rem intentæ, quàm ut illum audiret. De modestia & mansuetudine illius infinitum esset dicere, quanta æquanimitate & excepit iactas in se contumelias, & pertulit quæcunq; euenissent. nemini maledicenti remaledixit, nec mordentē remomordit. Asperius interdum increpauit uitia, non sua cauſsa, sed publica: imò eorū ipsorum quos ita obiurgaret, ut nihil uel utilius uel lenius esset tali asperitate. Nulli in eius sermone admisti ioci, nulli uel in dictis uel

in factis lusus, omnia semper (quod Deū decebat) seria & seuera. Magnitudinem suam & paternū in nos affectum patefecit, quod in loquēdo captui se illorum accommodauit, cum quibus ageret. nec dixit quicquam ad ostentationem suæ sapientiæ: quod fecisset, quisquis in tam nouis & mirabilibus præceptis uitæ captasset authoritatem & fidem: quod fecerūt Mahumetes in Alcorano, Rabini Iudaorū in Thalmud, & philosophi gentiū. Quicquid uerò diceretur mundanum, Christus ad negocium salutis nostræ referebat, propter quod unū uenerat. ut quū narraretur ei de Galilæis, quorum sanguinem Pilatus miscuerat cum eorū sacrificijs: & de octodecim illis, quos ruina turris Siloë oppresserat: nō est illorū casus miseratus, aut execratus impij hominis sæuitiā, sed erexit suos ad meliorem mentē: Putatis, inquit, nullos fuisse in illis oppidis peiores homines, quā interfectos? ita & uos omnes graue exitiū manet, ni resipiscatis. Et cū rogatus esset, an liceret Iudæis, populo Dei, tributum Cæsari pendere, homini profano, ostenso tributi numismate: Si Cæsari (inquit) redditis quæ dicitis esse Cæsaris, reddite Deo quæ sunt Dei. Interrogantibus quoq; superuacanea uel curiosa, respondit profutura: ut Petro de cōditione mortis Ioannis euangelistæ, & discipulis alijs de regno eius.

DE VER. FIDEI LIB. II. 312  
DE CHRISTI DIVINITATE  
ac miraculis.

**S**ocrates, Plato, Seneca, & alij de nationibus  
Suii præcipui, modicè ipsi de se loquuntur, ac  
promittunt, interdum quoque plusquam oportet  
demiſſe: Christus autem contra, qui amplissima et  
maxima de se dixit, & est professus. inter cætera  
autem, quòd salus esset hominum, missa cœlitus in  
terras à patre: & se quoque esse Deum cum pa-  
tre suo, qui cœlum sit & terram fabricatus. Sed  
homines decet de se modicè sentire ac loqui, Deū  
uero decet quis & quantus sit nos docere. Homo  
de homine & humanis rebus potest iudicare: &  
quantuscunque sit aliquis, semper inuenietur a-  
lius, qui de eius magnitudine ac præstantia queat  
censere ac æstimare. Itaque qui de se est loquutus  
moderatè, posteaquā est uirtus eius intellecta, ma-  
ior ac præstantior existimatur, & modestia illa in  
gloriam ei cedit tanto maiore, quanto prodit uir-  
tus inexpectatior. De Deo autem nisi idem ipse a-  
pertè enunciet qui sit, & quātus, quis omnino uel  
hominum uel angelorum id assequi ualeat ac de-  
prehendere? Ergo in priscis eius oraculis sunt illa,  
Ego Deus omnipotens, &c. Et ex ijs qui Christū  
tantum uidebant, quotusquisque esset qui reputās  
Dei magnitudinem atq; excellentiā naturæ, hunc  
hominem cernens, adduci posset, ut crederet

Deum esse summum illum & omnipotentem? In quo graue impēderet periculum. Nam Socratem, & Senecam, & Platonem præteriri non intellectos, sine damno & iactura contingit generis humani: at Deum non cognosci & ignorari, à quo profisciscantur tam ingētia beneficia, omnibus periculosissimum est. Incidit enim homo in ingratitudinem, non habens benefactori gratiam: nec amat ut fas est illum, à quo nescit tot se momentis singulis accipere beneficia: & minus paret præcipienti, ignorans esse Deum. Deo autem nihil est opus honore & existimatione ex modestia, sicut homini: nobis est opus cultu illius, reuerentia, timore, charitate ex scientia & cognitione potentie ac bonitatis illius, quas nemo unquam sicuti conueniret intueretur, nisi illo ipso monstrante. Itaque Christus & in futurum maxima de se & sua Ecclesia est pollicitus, de quorum euentu certus erat. alioqui in tam nouo tamq; admirabili instituto, tamq; à communi hominum sensu abhorrenti, si aliquid falsum esse fuisset depræhensum, reliqua omnia tanquam uana & fictitia irrita essent, ac explosa. In præsens autem Deum se De iulii dixit: quod quia erat stupendū, in eius rei confirmationē res quoq; edidit stupendas, quæ illum Deo esse amicum declararent, per quæ authoritas est comparata, ut non esset credibile tantū & tam nefarium



nefarium de se mendacium talem hominem fuisse  
 dicturum. Addita sunt autem ea prodigia, quæ ab  
 animaduertentibus promptum esset intelligere,  
 ab eo solo posse effici qui Deus esset, auctor & do-  
 minus naturæ: & tanto intelligerentur melius, &  
 crederentur certius, quo quis esset sapientior, &  
 uirium facultatisq; naturæ rerum consultior. In  
 cæcitate & surditate natis, uidendi & audiendi u-  
 sum non quem amiserant reddidit, sed largitus est  
 omnino nouum. Deambulauit super tumentes un-  
 das, ut nos super solidam terram: imperauit uen-  
 tis, mari, tempestati, & paruerunt dicto. Expulit  
 demones ex humanis corporibus, abstulit leprâ,  
 roborauit membra, & compages humani corpo-  
 ris dissolutas, sanauit omne genus morborum. Red-  
 didit lucem & uitam mortuis. Multis modis mira-  
 culum superat potentiam naturæ: in ipsa actione,  
 ut solem sisti, uel retroagi ab occidente in oriens,  
 lapidem uel hominis corpus tolli in cælum, graue  
 in aqua non demergi: tum in subiecto actionis, ut  
 cæco reddi lumen, mortuo uitam. lumen enim &  
 uitam natura potest tribuere, sed non his. In ordi-  
 ne quoque ac ratione qua fit, ut repente sanari æ-  
 grum, sereno cælo dari pluuiam, subito sterni uen-  
 tum & mare turbatum: hinc in agente, ut homi-  
 nem inspicere hominum cogitatus: uel in instru-  
 mento, ut luto sanari cæcitatem. Omnis generis

acta sunt à Christo prodigia, ut si cui unum illorum, ut sunt hominum mentes diuersissimæ, uel spectum esset, uel non plenè satisfaceret, addita sunt tam multa & uaria, ut iam omnis dubitandi materia & occasio sit sublata. Et egit uarijs modis. aliàs solo iussu, ut se ostenderet regem naturæ: aliàs inuocatione patris, ut indicaret à quo haberet omnia, tum calumniæ occurreret eorum qui in Belzebuch principe demoniorum demonia illum aiebant expellere. Interdum re aliqua adhibita, ut luto uel sputo: ut ostenderet quemadmodum Deus operetur quandoque solo uerbo & nutu, aliàs tactu uestis eius: quandoque instrumentis quibus uult, etiam parum aptis, ut luto ad curandam cæcitatem. Sed illi naturæ domino nullum est ineptum instrumentum, qui nec instrumentis indiget. Nonnunquam manu imposita: interdum abluens solo iussu. Nec unquam occasionem ipse essendi miraculi captauit, semper usus est oblata: non ad usum artis suæ cepit tempus aut locum, quod præstigiatores faciunt, sed subito semper, & pro re nata. Nec utilitatē suam, aut commoda sua unquam spectauit, sed aliorum: ut appareret non illum gloriæ suæ seruire in miraculo, sed adduci ad hoc approbatione fiduciæ eorum qui peterent, ut homines fidem habere sibi et Deo assuefaceret. Nec ullum unquā egit miraculum corporale, quod  
non

non magnas significationes haberet spiritales : quod sigillatim referre hic esset longum & superuacaneum, præsertim quum hisce de rebus nostrorum hominum libri sint referti.

DE MIRACVLIS  
dæmonum.

**M**iracula quæ sunt à Deo, multis notis distinguuntur à fictis miraculis dæmonum. Nam dæmon, ut qui Deū odit, et nos à Deo uellet auertere, omnia quæcūq; potest diuina æmulatur: et tãto accuratius miracula, quòd uidet eā rem maxime ad potentiam diuinitatis accedere, quæ est supra naturam. Itaque ut est uiribus suis naturalibus potentior quàm homo, tum uirium & facultatis naturæ rerum consultior, facile sensus nostros eludit ad nos fallendos & abducendos à uero. Itaque & edit opera stupenda, & se (quod est etiam diuinitatis) conscius fingit rerum abstrusarum, præsentium, præteritarum, & uenturarum, uel ipsorum quoque cogitatum: quum Deus dicatur scrutator cordium, ut homo in contemplanda diuina potentia titubet & uacillet. Est enim ueritati res damnosissima (ad nos quidem) mendacium specie ueritatis tectum. Itaque fidem uerorum miraculorum & diuinorū magnopere eleuant ac diminuūt falsa miracula, per dæmones & dæmonum ministros edita. Quo execrabiliores sunt, nempe satha

ne similes, ij qui in templis nostrorum diuorum fingunt miracula propter quæstum. efficiunt enim, ut quum eorum uanitas est patefacta, de ueris miraculis incipiant homines dubitare. Ergo miracula has habent notas rei ipsius, ueritas essentia, qualitas, modus actionis, causa efficiens, causa mouens ante rem, finis. Ad hos tanquam ad lapides lydios examinanda sunt miracula, tum Christi et sanctorum, nempe diuina: tum ficta et diabolica, qualia sunt uel quæ per semetipsum facit sathan, ut quum non uisus loquitur: aut aliquid agit, ut quum affligit aliquem morbo, et sanat, quum pluit sanguine, carne, quum in aëre committit armatas acies, uel quum assumpto aërio corpore exhibet se conspiciendum hominibus, ut passim in hoc nouo orbe, et antea in Canaria, et insulis illis Fortunatis. uel quum loquitur in idolo, ut quondam gentilibus: aut in arbore, ut quercus Dodonææ: uel in homine, ut in sacerdotibus templorum uiris ac foeminis. Habet quoque suos ministros magos, incantatores, lamias, ueneficas, et omnia genera diuinaculorum, augures, aruspices, interpretes somniorum et ominum, chiro-manticos, geomanticos, hydromanticos, et alias dicendi de rebus occultis imposturas, quæ numerum non habent. Ex quibus omnibus collecta sunt ab scriptoribus gentium miracula, quibus demon



mon & à ueritate abducit animos, & in sua fallacia confirmat ac detinet. Sed in his primū est considerare, quòd eorum multa non habent ueritatem essentia, sed prastigias & illusionem oculorum, ut non uerè egrotare eum qui uideatur, non uerè uiuere: sicut ferunt magos quosdam certis incantamentis effecisse, ut cadauera sine anima ambularent, loquerentur, & alia uiderentur obire uitamunia. Alia non sunt miracula, propterea quòd ui naturæ fiunt, herba uidelicet adhibita, aut osse, aut lapide: quæ omnia occultè potest demon ad-mouere. Et multa quæ sunt peritis naturæ cognita, ab imperitis pro miraculis haberentur: qualia sunt quæ per eam magiam fiunt, quæ naturalis nominatur. Alia ineptissimis fiunt modis, & planè ridiculis, ut satis appareat à quo fiunt. Nam demon ne quis ea naturæ potentia fieri suspicetur, iubet adhiberi uerba à re alienissima: ut si est sanandus equus, dicatur, Mare est salsum, & in hyeme congelatum, aut aliquid absurdius. Interdum super ille induit pellem agninam, uult addi uerba ex sacris literis, uelut uersum aliquem Psalterij, aut etiam (si Deo placet) sententiam ex sancto Christi Euangelio quampiam, aut recitari missam uel missas, & sub sacro linteolo poni fabas aut cicera certo numero: aut funiculum tot nodis astringi, quoties recitatur nomen Iesu in passione. Gratia Deo,

Deo, qui non finit nobis tam occulta ab hoste nostro tendi retia, quin ratione aliqua possint ab attendentibus deprehendi: nec finit tentari nos supra id quod possumus. Alia fiunt per eos, qui etiā si uera exhiberent miracula, eorū tamen indignitās fidem illis detraheret, per flagitiosos, per consecratos, maleficos, impuros homines, per magos, per lamias, per homines perditos, quos nemo dubitet facere imposturam. Alia fiunt nemine postulante, alia sine ullo condigno, siue solū ob quæstū, ut à magis & ueneficis: uel ludicrū aliquod et risum, aut leuē admirationē ad delectandū, aut etiā ad terrorē, ut quæ fiunt in aëre: uel ostentationē, ut quæ à Philostrato scribuntur de Apollon o Tyaneo, de Brachmanibus, & nudis sapientibus, cuiusmodi quotidie patrantur à magis, à lamijs, ab incantatoribus, qui inter nos uersantur: ut lac ex unauacca transire in aliam, segetem ab agro in agrum. quod antiquissimis temporibus solitū fieri, & Vergilius significat, & aperte carmen duodecim tab. Neue alienas segetes auerteris excantando. Prætereo alia maleficia, quæ in infantes exercet dæmonis crudelitas per lamias.

In prædictionibus & patefactionibus rerum abstrusarum non minus manifesta est sathanæ uani-

tas & fraus. Res quidem præteritas facile potest nosse, quibus ipse interfuit, & præsentibus eadem ratione. Cogitatus mentis nostræ solus nouit Deus: sed dæmon ex coniecturis exterioribus illos colligit, ex uultu, ex gestu, ex phantasia quoque, quæ illi est peruia. certis tamē nihil habet: quemadmodum in rebus uenturis, quas ille magnis coniecturis uenatur, astrorum peritia, qualitatibus elementorū, quod faciunt agricolæ & nautæ cum admiratione eorum qui ea ignorant. tum multas prædictiones rerum futurarum tradunt philosophi naturales, multa in sua arte medici. Cursu rerum & experimentis, ut ex prioribus colligat sequentia, ut faciunt inter nos prudentes: de quibus est illud, Qui bene coniecerit, hunc tu uatem perhibeto optimū. Aspectu etiā sanctorū angelorū, quibus similes sunt in natura, & comprehendendi intelligēdiq; ratione. & ut sunt omnia coniecturis & notis collecta, sunt eis incerta, & reddunt responsa ambigua: ut,

Aio te Aeacida Romanos uincere posse. &

Cræsus Halim transiens.

Modus autem quo exequuntur has diuinationes, ineptus est, & meritò à maximis ingenijs etiam inter tenebras derisus: per garritus aut uolatus auium, per pastum pullorum, per exta animantium, per stridorem soricum, per uoces temerè iactatas.

R V R.

IOAN. LOD. VIVIS  
RVRVS DE DIVINI-  
tate Christi.

**T**Ria considerata sunt in Christo, sapientia doctrinae, probitas uitae, & diuinitas essentiae. Sapientiam satis declarat doctrina, quae brevis, dilucida, explicata omnibus philosophorum scholis & disputationibus silentium imposuit. Bonitatem declarat uita acta innocentissime. Miracula quae essent supra hominum captum, uiderentur tamen, ei sunt probandae rei data, quae captum quodque hominum transcenderent, nec tamen uiderentur. Ipsa quidem miraculi occasio semper hominum utilitates spectauit. sed per haec à maximo & sapientissimo artifice Deo maius quiddam & hominibus cunctis in commune salubrius parabatur, nempe & diuinitatis & doctrinae Christi confirmatio atque approbatio. quantulum enim est, hunc aut illum hominem uel sanitati reddi, uel uitae? cui uero non multa quotidie millia & affligeretur morbis, & defungantur fato. Illud maximum, uniceque expetendum, ut per fidem doctrinae Christi immortales animae seruentur. Christi miracula tanta & tam manifesta fuerunt orbi, ut nulla unquam gens fuerit uel tam impudens, uel tam Christo inimica & insensa, ut ea sit negare ausa. Itaque gentiles, Iudaei, Agareni, omnes grandia & mirabilia esse à Christo edita opera confitentur. sed alij alias in causis



causas referunt. Agareni Deum authorem illorum fatentur, Iudæi & gentiles demonem. Sed res ipsa clamat apertissime, Deo authore atque approbatore illa omnia esse acta. Qui enim primi relictis patrijs ritibus ac lege, qui abiectis & repudiatis rebus omnibus, quæ solent esse hominibus in uita gratissimæ & charissimæ, Christum sunt secuti, qui illi noua atque admirabilia dicenti fidem tribuerunt, grauiâ, dura præcipienti obedierunt, denique ceruices suas obtulerunt pro illius doctrinâ & gloria, aliquid certè in eo maius & excelsius animaduertunt humana sapientia & potentia. Nam ob communem uitæ rationem, & quæ nihil super cæteros haberet egregium, quis sanæ mentis renunciaret suis omnibus, nulla proposita spe, nisi paupertatis, calamitatis, ærumnarum, infamiæ, ac mortis? Istud uerò quod in loquendo & agendo maius erat humana sorte, à ui & potentia necessum erat proficisci, quæ fortior ac ualidior esset quàm humana. Tales esse duas tantum comperimus, diabolicam malam, & diuinam bonam. Positum sit nobis quod de diabolo est receptum, et à nobis declaratum superiore libro, esse illum naturam angelum, uoluntate Deo inimicum. Sub diuina potètia angelos bonos comprehendendo, qui sunt Dei administri. Diaboli mēs, animus, desiderium, ardor mentis est, Deo resistere, quatenus potest

X      efficere

efficere à Deo homines auertere blandimentis, astu, fraude, præstigijs, illusionibus, minis, terrore: nihil omittere, dum ne homo Deo se adiungat. Quæ Christus ostendebat miracula, pertinebant ad authoritatem personæ, & proinde corroboracionem doctrinæ. Doctrina erat, ut omnes rebus omnibus uitæ huius sine exceptione repudiatis, contemptis, pro nihilo habitis, Deum sequerentur, illi animos, mentes, corda deuouerent et consecrarent, quicquid hoc impediret aut remoueretur abscinderent atque amputarent, quicquid esset adiumento arcesserent ac fouerent. diabolus tanquam Dei inimicum odissent, abominarentur, execrarentur, nihil cum illo haberent consuetudinis ac commercij, quicquid ab illo esset putarent uenenum & pestem, caput esse omnis mendacij & fraudis. Dicat iam aliquis, an possit quicquam diabolo cogitari magis insensum atque inimicum Deo? Ad huius ne doctrinæ robur & stabilimentum uires & artes suas adiungeret diabolus, & accommodaret, quæ doctrina & uitæ institutio tantopere cum desiderijs suis pugnaret? Malus quidem est diabolus, sed non stultus aut imprudens. ipse ne, ut præstigias suas & fucos concederet atque accommodaret, ad fulciendam disciplinam suis cupiditatibus tam aduersam? Dicit forsan aliquis maliciosissime suspicax, Adiuuabat Iesum

Iesum dæmon hac sola de caussa & spe, ut insideret in hominum animis ea blasphemia & impietas, hominem illum esse Deum. Dictum hoc plus habet mala uoluntatis, quàm mali nocimenti. longissimè non à uero tantum abest ea coniectura, sed à ueri similitudine. Nam si Christus non est Deus, haberi à nobis pro Deo pia est blasphemia, nec diaboli desiderijs utilis, nec Deo inimica. Primum Christus nihil nos iubebat indignum Dei maiestate credere, aut sentire. Doctrina Deo erat conformis, mundabat nos uitijs, ornabat uirtutibus, erigebat à carne ad spiritum, à mundo ad Deum, Deo uni & summo nos cunctos consecrabat. Quæcunque ageret magna & mirabilia, & ipse in Deum referebat authorem, & illi ut grattas agerent adhortator erat atque incitator: unde populus non rarò ad gratulationem Dei extollebatur, quod prophetam magnum suis diebus excitasset, per quem uisitaret suum populum. Quid in his omnibus Deo non dignissimum? Humanitatem quam uidebant, nunquam dixit Deum esse, aut Dei filium, sed filium hominis. Iunctum uerò Deum esse homini ad liberationem nostram, ad salutem omnium, quis possit blasphemiam nominare? an non rebus omnibus Deus est iunctus & intimus? huic uerò homini ita esse annexum & applicatum, ut idem sit Deus & homo, quæ

tandem est blasphemia? nōne salua manet utriusque natura, substantia, dignitas? Nihil indignum patitur Deus, tantum ad communicationem diuinæ excellentiæ humanitas erigitur. hoc cōne est impium, quod arguit bonitatem Dei, & amorem erga nos ineffabilem, quod fiduciam nostram de uita & salute sempiterna adauget & corroborat? Imò quid est pietas, si hæc non est, id de Deo sentire ac existimare, per quod crescat mihi de illo fiducia, et amem illum ardētius? Hiscine deseruiebat dæmon? quo fine, qua sua utilitate, quid cupiebat, quid petebat? Nam dicere Christum sese esse Deum, si nō erat, ea uerò iniuria est Deo facta à Christo, ad nos nihil pertinet prorsum, qui per eius doctrinā & exemplum meliores & sanctiores fimus, recedimus à diabolo, accedimus ad Deum cultu, charitate & imitatione uirtutum. Quis hoc credat de diabolo, uoluisse illum, conatum esse, perfecisse, ut tantam in regno & ditione sua plagam acciperet, quo inter Deum & hominem unum inimicitias sereret? In Iudaico populo nihil querebatur dæmoni. Christus enim nunquam uetuit cuiquam ne pareret legi, sed ut uerius magisq; ex animo Deo obsequeretur, nec fiduciam collocaret in corporali actione, sed in bonitate mentis. In nationibus autē utro tempore florentius fuit regnum diaboli, ante Christum cognitum, an postea? Nec ignorabat dæmon,



mon, Christi doctrinam idololatriæ subuersionem esse. His omnibus accedit, quòd miraculorum ratio ac modus aduersus prorsum & contrarius est demonibus, ut modò explicauì. Et quemadmodum Christus longissimè abduxit suos à commercio demonis, ab imitatione mentis prauissimæ ac sceleratissimæ: ita inuicem demones quacunque potuerunt arte ac uafrie conati sunt homines à fide in Christum abstrahere, ac diuellere. ubi demonum authoritas suspecta erat & inuisa, ut apud Iudeos, ibi eum illi commendabant & laudabant, ut fidem illius eleuarent: ubi multum ualebant auctoritate, ut apud gentes, ibi uituperabant atque in se stabantur. Quòd si non fauebant ei demones, imò erāt infensi et inimici & hostes capitales, restat ut fautor & adiutor illius in rebus tātis Deus fuerit. Quòd si Deus, cū Christus ipse Deū se esse profite retur, Deus ergo erat. alioqui enim nullus unquam maior, nullus infestior fuisset hostis Deo. Quātulū enim fuisset diaboli crimen præ isto? diabolus Dei tantum æqualitatē expetiuit, hic essentiā & naturam usurparet. Quòd si angelus tam grauiter est punitus de affectata Dei æqualitate, quid factum esset usurpatori illi & raptori substantiæ ac essentiæ ipsius diuinitatis? Dei ergo est filius, eiusdem quæ ille naturæ ac essentiæ, missus in mundum ob salutem nostram. Hoc uerò nihil dubitabo addere

atque affirmare, si falsi & decepti sumus in Christo, Deus nos sefellit. is enim tribuit Christo tantā sapientiam doctrinæ, tantam probitatem uitæ, opera tam mirabilia, negotium tam salutare omnibus, tam dignum Dei bonitate, ut si falsi sumus, meritò cōqueri possimus nos à Deo falsos. sed nec fallere Deus quenquā uel uult, uel potest: nec nos falsi sumus, quoniā Christus, quo uno confidimus, Dei filius est, & Deus, doctor & author salutis ac beatitudinis nostræ nunquam terminandæ.

DE TORMENTIS ET  
morte Christi.

**S**I homo in prima illa integritate mansisset, qua erat à parente suo Deo in sua origine donatus, nihil ei fuisset gratius, nihil iucundius lege Christi, nec quod libentius accepisset. Sed obtenebrata & concussa mente, excitata lege concupiscentiæ, & temerario ac uiolento regno carnis, nihil uisum est ei inimicitius quàm id quod ipsi maxime expediret, ut lux assueto in tenebris degere, & ægro medicina. Itaq; & dæmon antiquissimas suas inimicitias est persequutus, & homines insulsis animorū motibus dediti ac mancipati, quod eis esset contrarium, non solum repudiarunt, sed persequuti sunt: nec aliter in Christum insurrexerunt, quàm si quis lusciosis hominibus in obscuro sedentibus, fenestras de repente ad solem admittendum

dum aperiret. Fugerunt ab eo uoluptarij homines, irriserunt diuites, persecuti sunt ambitiosi ac superbi, hoc est planè diabolici: ij potissimū qui cum dignitates & honores amplissimos specie sanctitatis captarent, nihil sibi magis rebantur obstare, quàm doctrinam & castigationem Christi, quæ illis personam illam theatricam detrahebat, & proponebat eos populo spectandos nudos, & in ea cuius opinionē uenabantur sanctitate infimos ac postremos, ne quis eos uellet imitari, tanto apud Deum peiores, quo se hic nomine maximæ ac præstantissimæ uirtutis uenditabant. Itaque simulatores hi probitatis odio & rabie occæcati, tametsi magna eius cernerent & admiranda opera, uarijs sunt eum insidijs aggressi, uarijs modis conati sunt eum è medio tollere. Sed nec ante tempus, nec alio in loco, aut alio modo passus est se occidi, quàm ut essent omnia illi à patre præscripta & definita: hoc est, ut saluti nostræ expediret. In tempore expectatum est dum absoluisset instituendi ac docendi prouinciam, dum ea edidisset miracula, quæ stabiliendæ pietatis suæ fidei sufficerent, dum oraculorum quæ de se præcesserant præstaret fidem, & eximpleret umbras figuræq; , quæ de se auorum memoria præcessissent. Mortuus est in iuuentæ uigore, hoc est annos treis et triginta natus, ut magis charitatē erga nos ostēderet, & paternis

iussibus obsequentiā. tum enim posuit uitam, quum  
erat uiuere iucundissimum. Sed nec congruebat, ut  
ulla in sacro illo corpore existeret diminutio eta-  
tis, uirium, ualentudinis: idcirco est his omnibus in-  
tegris & ualentibus sublatus. Demonstrata est  
quoque in specie sanctissimi corporis qualitas no-  
stræ resurrectionis. tales enim resurgemus, qualis  
ipse: nos per reformationem corporum nostro-  
rum, ille per naturæ suæ cursum. In loco autē pla-  
cuit, ut Hierosolymæ deligerentur: ibi enim pera-  
ctum est uerum hoc & summum sacrificium, ubi  
reliqua legis sacrificia, umbræ istius. Sed extra ci-  
uitatem. nam quorum animalium, ut inquit Pau-  
lus, infertur sanguis pro peccato in sancta per pon-  
tificem, horum corpora cremantur extra castra:  
propter quod & Iesus, qui sanctificaret per suum  
sanguinem populum, extra portam passus est, ne il-  
lius tanti beneficii fructus ad unam ciuitatem exi-  
stimaretur pertinere, sed in commune ad orbem  
totum. Et cruci affigitur extra conuersionem ci-  
uitatum, & uanitatis ab hominibus inuentæ, ad  
nostrum exemplum: sic enim debemus nos con-  
crucifigi Christo, cura & amore harum rerum ab-  
dicato. In ligno moritur Dominus, hoc est myste-  
rium peregit salutis, quoniam & lignum perniciē  
ac mortem attulerat. & de ligno multe sunt in ue-  
tere lege figuræ, ut in disputatione contra Iudeos  
expli-



explicabitur: Genus etiam est mortis non solum ignominiosum, sed durissimum, & propè intolerabile. Crucifixus est inter duos latrones, ad maiorem ignominiam: & hoc auget atrocitatē calumnie, & immanitatem inuidentium. Eorum latronum alter est ad beatitudinem seruatus à Christo, alter perijt magno & exemplo & mysterio. Quid magis uniuerfis hominibus conducit, quàm certos esse nos in extremis nostris rebus ac penè deploratis, salutem esse paratam per solam fiduciam in Christum, si nos illi uel puncto uno temporis uerè ac ex animo commendemus? Datum est eius rei certissimum ac manifestissimum exemplum in altero latronum. in altero uerò ostensum est, nihil proficere societatem laborum & crucis Christi, nisi adsit etiam fiducia in illum. Nihil iuuat crucifigi cū Christo, si Christum non diligis. Hi latrones duo significatio sunt totius generis humani, quod uniuersum propter sua scelera pœnas pendit. in eo alij sunt boni, qui adhærent Christo, ijs que Christi mors est salutifera. alij sunt mali, qui corpore quidem afflicti cum Christo, ab eo se auertunt animo: his Christum esse crucifixum nihil prodest. Cessit Dominus noster uita sua haud aliter, quàm si ueste aut calceo cessisset. In nobis quæ sunt naturalia, uoluntatis arbitrio non subduntur: quoniam nos ipsi intra limites naturæ uiuimus. Voluntati au-

tem Christi ut natura erat subiecta, ita naturalia illius omnia sub eius arbitrium erant posita: itaque & relinquere animam, & resumere relictam, in eius manu fuit ac potestate. Idcirco clamans expiravit, quod admiratus est Centurio. Nam alij acti in crucem, profuso sanguine tormentis & cruciatibus fracti, afflicti, pessundati, per silentium cedunt e uita, ut mortui iam credantur multo antea quam expirarent. Dedit Dominus in se locum et potestatem causis mortis, passusque est in se fieri quae in alijs mortalibus, ut ea ipsum occiderent quae alios occidissent: alioqui quid magnū fuisset, conseruare ipsum sibi uitam, qui alijs amissam reddidisset? Quid, quod facillimum illi fuisset uel e uinculis discedere? uel quod aliās fecerat, occultare semetipsum non in remoto loco, sed palam medio foro & die, caligine ac tenebris conspicientium oculis ne ipsum cerneret offusis? nam ipsi ad edendum miraculum nec instrumentis erat opus, nec tempore. uerum id hominum saluti non conducebat. Admirabile est planē, & aliorum eius operum simile, quemadmodum se in accusatione & damnatione sui habuerit semper in sua potestate, quam manserit mens eius diuinitati concors & obsequens: ut appareat planē ipsum non tractum, sed ultrò ad necem suam uenisse. In uinculis indignissimis, in calumniis mendacissimis atque impudentissimis raptus,

ptius, ad inimicos et iniquissimos iudices, inter tot  
 accusantium clamores, & deposcentium eum ad  
 supplicium tractus, raptatus, cæsus, irrisus, quan-  
 tam et quàm planè diuinam moderationem animi  
 præstitit: non se proiecit in lachrymas & eiula-  
 tus, non in afflictationem sui ipsius, in supplicatio-  
 nem iudicum, in deprecationem pœnarum. Nec  
 uicissim indignitate contumeliæ ac iniquitatis ir-  
 ritatus atque incensus est, ut maledictis calum-  
 niatores, aut iudices, aut satellites incesset: ni-  
 hil prodijt ex sacro illo ore asperum, contumelio-  
 sum. Neq; in ostentationem uel loquutus est gran-  
 dia & admirabilia, uel edidit prodigium aliquod,  
 præsertim apud regem Herodem, qui id tã opere  
 tam diu desiderauerat. non longam de se, ac rebus  
 suis, & accuratam habuit orationem: non abiect  
 suã ipse dignitatẽ, nec ademitt iudicibus suam, in-  
 credibili temperamẽto usus in rebus tam angustis  
 & difficilibus. Quum nihil se profecturũ uideret,  
 tacuit: quũ autem opus fuit, respondit rogatus pau-  
 cis & modeste, ne silentiũ in contumaciam rape-  
 retur. ne ue allegare ignorantiam ullam possent,  
 declarauit quis esset, sine cuiusquam iniuria.  
 Quum autem raperetur ad supplicium, non inuit  
 concionabundus, nec de cruce loquutus est ad cir-  
 cumfusam turbã purgans se, & testes accusatores  
 iudices culpã. Hæc illi in tanto tumultu, in tanta

rerum omnium perturbatione confusissima suppetijt sapientia, modestia, moderatio, constantia, ut facile regi omnia diuinitus appareret, & mandatum se habere à patre, cui nefas esset non obtemperare, ut ita se gereret. Et quemadmodum animam suam ultrò relinquebat, ita se offerebat tormentis & neci, certus rerum suarum & præscius, quem essent omnia exitum habitura. Nam quis unquam inermis, paruo comitatus grege inermium, imbellium, ignobilium, indoctorum, ignauissimorum, quos ipse diffugituros prædixisset, incumben-  
tibus in eius & doctrinæ ipsius perniciem cum odio sæuissimo & capitali pontificibus & principibus Iudæis cum populo, qui procerum uoluntate ac nutu mutabatur: quis inquam talis sperare esset ausus futurum, ut se sublato existeret quispiam deinceps, qui auderet non dico prædicare, sed illum uel nominare omnino, uel fateri fuisse se illi notum? Nam uel eo uiuente, quòd sacris interdiceretur, quisquis illum Christum esse diceret, non defuerunt, qui & doctrinam, & familiaritatem, & notitiam illius abnegarent. At Dominus nunc uicinus morti & Euangelium suum diuulgatum iri, prædicatumq; toto orbe prædixit, & testamentum suum fore æternum.



DE MYSTERIIS PAS-  
sionis & mortis Christi.

**H**AEC est illa crux Christi, Iudæis quidem, ut Paulus inquit, scandalum ac detestatio, gentibus autem dementia: uera tamen sapientia cœlestis, & ijs qui seruantur salus. Neque est aliud æquum mysterijs & contemplatione rerum celsissimarum uel plenum, uel altum. In ipso Christo ostensa est & approbata obedientia erga patrem, qua non solum carnem induit, & se quodammodo exinanuit Dominus, indutus forma serui, sed paruit usque ad cruciatum & necem indignissimam. propter quod pater exaltauit illum, & præfecit angelis, hominibus, dæmonibus, ut omnes illius nomini ac potentie se summittant in cœlis, supra & subter terrâ. Declarata est charitas Dei aduersum nos, qui filio suo non pepercit, sed pro nobis mancipijs nequissimis & scelestissimis tradidit unicum suum unice charum. Declarata est item Christi charitas, qui in illa omnia tam aspera & acerba, quoniam nobis conducebat, uolens & libens consensit. neque enim iniuncta illi & imposita essent, si nolisset. Cognoscitur liberationis & redemptionis liberalitas, & benignissima magnitudo. Noster enim reditus in gratiam cum patre ex amore patris & Christi est ortus, cuius amoris immensa copia quod nostro deerat suppleuit. Addita est tanta

ta filij obtemperatio, tam immane & ignominio-  
sum supplicium nostri gratia. ne si paruo & leui  
essent omnia labore transacta, parū fortasse nos de-  
bere existimaremus Christo, cui non magno stetit  
semus. Nunc uerò debemus illi gratiā immensam,  
qui tot in suo innocentissimo corpore cruciatus  
pertulit nostra causa, tanto grauiore, quo illud  
corpus tenerius erat, & delicatius. Debemus nos-  
met ipsos illi, qui semetipsum pro nobis impedit.  
Augetur inuicem charitas nostra erga Deum &  
Christū, à quibus nos tantopere intelligimus ama-  
ri, & tantæ esse illis cura. Crescit fiducia, non pos-  
se nos non esse Christo charos, qui nos tanto pre-  
cio redemit, & asseruit, qui tantum pro nobis e-  
git. Naturale est enim, ut beneficus eum diligat, in  
quo beneficium collocauit: & eo ardentius dili-  
gat, quo plura & ampliora dederit beneficia. Ori-  
tur erga proximum charitas, pro quo uidemus  
Christum tantum dependisse, nempe seipsum, ne  
pro nihilo ducamus animā, pro qua Christus mor-  
tuus est. Norimus quanta sit peccati uis, quæ tur-  
pitudine & macula, quæ sic fuerit eluenda, & qui-  
dem ab homine iustissimo, & flagrantissima apud  
Deum gratia. Seruemus nos à uitijs puros, ne rur-  
sum crucifigamus in nobis filiū Dei. Sciamus nos  
à seruitute diaboli extrema & abiectissima per  
sanguinē Christi esse liberatos, ne rursus in tam mi-  
seram

seram conditionē relabamur. Fracta est diaboli tyrannis & potestas, in humanum genus huius iam habet iurium, non tantum illi permissum in nos seruire atq; insultare. Vbicunq; diuulgatū est euangelium Christi, cessarunt continuo illius impostura: ut in Græcia, Asia, & uniuersa continente, simul audita est sancta illa uox Apostolorum, scriptores illorum temporum omnes conqueruntur cessasse oracula, desisse deos dare responsa admirantur, quia causam ignorant. Auorum memoria in Canaria & alijs insulis Fortunatis demones uarijs formis exhibebant se illis populis conspiciendos, & eos alloquebantur, inducebantq; ad multa genera sacrificiorum seu a & horrenda, ut ad paruos filios iugulandos, exurendos, & alia huiusmodi: posteaquam deuicti sunt armis Hispanorum, & Christiana pietas illis est audita, fraudes illæ omnes tamquam caligo luce immissa discussæ sunt, atq; euenerūt. Sed ne queramus exempla superiorū ætatum: nostra hac memoria in insulis occidentali- bus, & Nouo hoc orbe Hispanis nauigationibus reperto, demones per uias omnes & compita frequentissime homines illos alloquebantur, & quæ fieri uellent admonebant: ubi uerò Christianæ doctrinæ magistri eò uenerunt, magnum ilicò silentiū omniū, magna fuga. uidelicet tenebras dispellit lux, mendacium ueritas. Et quia doctrina inualida

est,

est, quum aliter uiuit præceptor ac loquitur, & mores sunt doctrinæ contrarij: ualidissima autem est, cum ipse qui præcipit actionibus suis eam constabilit & sancit: par fuit, ut Christus, sicut in disciplina salutis doctorem se exhibuit, ita in uiuendi ratione exemplar, ut qui antea de alijs imitandis dubitabamus, de hoc isto amplius non possumus dubitare, sed sequamur intrepidè optimum et sapientissimum, ut eadem uia insistentes, eodem quo ille perueniamus. Itaque proposuit se Christus exemplar nostrum, ut nihil cunctemur aspera omnia & grauissima adire ac perferre, ut obediamus Deo, ut illius in nobis amor augeat, ut proximo commodemus. Offenduntur quidam, quòd Deus in tanta humilitate ac deiectione uenerit, qua de causa multis præteritus sit ignotus, ut ipse idem causam uideatur præbuisse erroris ac impietatis erga se. Quàm uerè id ignorantia & cæcitas affectio- num loquitur, non rectum iudicium rationis, ipsi idem quid dicant non intelligunt. Primum quid uocant humilitatem, quid sublimitatem Dei? Si enim in sua ipsius forma atque specie uoluissent eum uenire, uniuerfa id natura non cepisset, incomprehensibile illud est etiã angelis. Demisisset se ad ingenium & conditionem angelorum, at hi nec apti sunt humanis conuersationibus, nisi corpore con- tacti: nec exemplum nobis possunt adferre, quum sint



sint formæ superioris. At ex hominum qualitate ac  
 conditione uoluissent isti, ut detulisset secum opes, ui-  
 res, potentiam, exercitum, nulla esset passus incomi-  
 mode, mortem deuitasset. tum quidem agnitus fuisset  
 prauis cupidinibus, incognitus rationi & iudicio  
 mentis. Quid fuisset uel Christo uanius, uel humano  
 genere miserius, si ille exhibuisset se talem? Qui e-  
 nim ueniebat, ut homines à cupiditate peruersa, à  
 malis libidinibus, à tumultu et tempestate rationum  
 ad modestiam, sobrietatem, continentiam, ad equita-  
 tem, tranquillitatem, pacem mentis reuocaret: idem  
 ipse uita, actionibus, exemplo sui ad demeritiam à sa-  
 na mente reuocaret ac retraheret? Nihil pulchrius  
 uel optabilius omnibus, quàm fieri quantum conce-  
 datur Deo similem. si ille mundanas secum opes in-  
 uexisset, quid aliud quàm exacuisset nostras cupidi-  
 tates: unde & obliuio religionis, & superbia, arro-  
 gantia, inuidia, rixæ, simultates, odia, pugne, & cæ-  
 des uel inter fratres, dum illas uel paramus, uel reti-  
 mus, uel ne amittamus sumus solliciti. Ita Deus nos  
 in mala hæc omnia procliues alioqui per nos ipsos,  
 & propendentes præcipitasset. Qui spiritus, quæ  
 arrogantia diluitum, pro dijs uoluissent coli: quæ de-  
 speratio pauperum. Iam uerò quid nos Christo debe-  
 remus, si comitatus uenisset tanta potentia: si placi-  
 dè, si molliter, si inter uoluptates ac delicias, quod  
 erat eui huius à patre iniunctum, transgisset, quid  
 Y de

de nobis esset benemeritus? Minus profecto, seu potius tollis prorsum gratitudinem erga Christum nostram, & proinde beneuolentiam & charitatem. Quanto ille melius ac sapientius? qui quum esset mundi dominus, & rex uniuersorum, ut & bonitatem suam & amorem in nos ostenderet, demisit se ad nostram humilitatem. Tum demum uere amor sese profert & declarat, quum equalitatem facit inter summa & ima, ut quemadmodum in legibus amicitiae ait Cicero, Minor ascendat, maior se summittat. Non bene conueniunt, inquit Poëta quidam, nec in una sede morantur, Maiestas & amor. Si rex posita personae maiestate casulam uel tuguriolum subeat amore ductus puellae, tum demum & se amare declarat, & multum ei puella debet. Deum, qui tantus est, adiunxisse sibi hominem hominis amore, summi, singularis, immensi est amoris signum, & homo illi seipsum debet, nec erit unquam soluendo. hoc uere coniungit nos cum deo, non opulencia & diuitiarum arrogans ostentatio. Iam uero ad exemplum. non considerant isti aptum esse exemplum non posse, quod accommodatum non sit ei qui sit imitaturus. omnes quotquot docent, ad captum se discipulorum summittunt. In Domino nostro omnium animi morborum medicina est prompta, atq; ad manum exposita, omnibus incommotis consolatio. Is in se expertus est frigus, aestum, lassitudinem, famem.

mem, sitim, uigilias, paupertatem, inopiam, persecutionem à suis, ab alienis, ignominiam, contemptum, conuicia, sinistras benefactorum interpretationes, insidias, proditionem etiam à familiari, desertionem à suis, uincula, calumniam, flagra, uerbera, irrisiōnem, sputa, alapas, nuditatem, cruciatus, crucem, mortem, depositionem de cruce precariam, alienam sepulturam: & hæc innocentissimus, qua patientia, equitate animi, modestia, moderatione, silentio? quanta existit hinc consolatio miseris? quantum frenum felicibus? quæ utrisque disciplina sapientiæ? Hæc est uia & disciplina, & salus, & uita generi humano, non quod stultitia afflictionum sibi confingit, quæ et diluit amorem Christi, & bonitatem eleuat, & pietatem nostram diminuit, & salutem sempiternam impedit ac auertit. Sed uolo iam undique hanc stolidæ cupiditatis amentiam apertius patefacere, & liquidum facere penitus quàm desipiat. Aio enim, quòd si Christus uenisset in opulentia, minus fuisset agnitus à recte statuentibus. metalla enim & uestes & mancipia, & honor, & dignitas, & potentia, illa omnia humane sunt ambitionis, unusquisque expetit, & quantum potest ad se rapit, & trahit, per fas, per nefas. non est hæc Dei possidere, sed contemnere. Cedò, quod regnum dedisses Christo, qui dominus est omnium regum? credo Israëliticum, in quo est na-

tus. maius ergo regnum habuisset Augustus Cæsar, maius Alexander Macedo. non decuisset Christi dignitatem, ut regnum sibi aliquod eligeret in terra, cuius esset terra ipsa & cœlum. Et in potentia nec iustitia, nec charitas, nec obedientia illius potuissent perspicui & cognosci: omnia sub illa potentie uoragine, ut in nostris principibus, fuissent coniecta & obruta: nec qua de causa quicq; uel loqueretur, uel ageret intellexissemus. sunt enim & uerba & consilia principum obliqua. Omnia in Christo oportuit esse simplicia, plana, explicata. ne quid esset tectum, & simulatum, omnia essent ei qui uoluisset animaduertere obuia & facilia. Iam uero de potentia & magnitudine Christi audet quisquam conqueri, quod occultata sit, & quasi celata? ecquid tandem apertius, aut manifestius? Quæ tandem fuit Alexandri potentia? adolescens egressus patrium regnum, comitatus quadraginta milibus delectissimorum militum, uicit Darium, cepit Asiam. Quæ Iulij Cæsaris? milite Romano ueterano, uincere semper assue to, decem annorum bello Galliam subegit: max imperator exercitatus in cursu uictoriarum superauit Cn. Pompeium, desuefactum bellis longa pace, & tyronem eius exercitum: uicit Ptolemæum, Scipionem, filios Pompeij. At quæ Christi potentia? Venit iuuenis, filius Mariæ, sponsæ Iosephi fabri, solus & inermis, solo nutu suo quotiescunq; uoluit sanauit



nauit morbos omnes, expulit demones, minimo cibo saturauit multa hominum millia, reuocauit mortuos in uitam, imperauit uentis & mari, & obtemperarunt, etiam mortem eius cœlum atque elementa luxerunt. Quæ est hodie, aut fuit unquam potentia huic similis, nedum par? huic quisquam potentia compararit uniuersas quæ sunt, erunt, fuerunt? Si hoc non est infinitam & diuinam potentiam ostendere, atque ante oculos ponere, dicant mihi quid erit? doceant isti quemadmodum uerius declarari queat potentia. an omnia sita esse ducent in numis & in armis, quorum possessores miserrimi sunt homines, propter motus animorum & tumultus concitatissimos. Alexandrum Macedonem (ut de hominibus loquamur, qui istis mirificè placent) quum Parmenio illi diceret, si essem Alexander, hoc aurum acciperem, quod pro uxoris & filia redemptione offert Darius: respondiisse ferunt, Et ego, si essem Parmenio. sed ego memini me esse Alexandrum. Ita Deus si esset istorum similis, uenisset qualem ipsi cuperent. sed ille se Deum esse recordatur, hoc est ut potentissimum, ita mitissimum & benignissimum: ideoq; potentiam illam tantam prodigiorum nemo est suo malo expertus, omnes utilem sibi & salutarem senserunt. Ecce iam uobis Christum non in humilitate, non in occulto, non ut ansam præbuerit ignorantie, sed sublimem, potentissimum, manifestum, ut præ-

tendi ignoratio à quoquam nulla amplius possit. quod ipse idem est testatus: Si non uenissem, & locutus fuisset eis, peccatum non haberent, nunc autem excusationem nullam habent de peccato suo. Vita eius testificata est bonitatem & innocentiam, doctrinam sapientiam, miracula, potentiam. Agite quem tandem iudicem nobis fertis? nullum recusabimus, ad cuius censuram & iudicium, magnitudinem, potentiam, sublimitatem Iesu Christi uultis aestimari? Vultis sensus iudices? uidete miracula. uultis mentem? expendite doctrinam. uultis affectus? si ullus est in uobis erga pulchritudinem iustitiae, probitatem innocentiae, considerate dicta eius & facta. Manifestus ergo Dominus uenit, ut est apud

sed uiciosus oculis, sed imperitiæ aut inconsiderantiæ nimium opertus: ut alia omnia quantumlibet magna & excellentia, si absque attentione prætermittas, uelut cœlum, solem, stellas, naturam ipsam rerum & eius opera.

#### DE SACRAMENTO IN COENA Domini instituto.

**Q**Uum uerò præsentiam suam discipulorum oculis esset subtrahiturus, quid magis illum decebat, qui tam nos tenere atque indulgenter diligeret. quàm eam sui memoriam nobis relinquere, quæ nos & amoris illius erga nos obliuisci nunquam sineret, et solatio esset, uelut parente destitutis, quæque illum

illum nobis quoad fieri posset, exhiberet, ac repre-  
 sentaret? ea uerò animis nostris est spiritus Christi,  
 qui idem est & patris Dei: qui ut inuisibilis, cum  
 inuisibili Ecclesie mente semper maneret, monens et  
 docens eam quaecunque sint opus. Quoniam uerò  
 non solam habemus mentium cognitionem, sed e-  
 tiam sensuum corporalium, istis admonitio relicta  
 est Christi sub signis, quæ in sensuum notionem ea-  
 derent, panis scilicet ac uini: ut tam intus quàm foris  
 uerum sit quod ipse pollicetur, Ego uobiscum sum  
 omnibus diebus usq; ad consummationem seculi. Ir-  
 ridemur hic à profanis, et incesimur acriter, quòd  
 panis crustulam corpus esse Domini nostri assera-  
 mus, & uinum eius sanguinem. Quid non miraculo  
 fuit, quum primum proferretur? ut inquit Plinius.  
 Nihil est quod non uideatur absurdum ignorantia mo-  
 dum, rationem, causas, eiusce rei. Nihil tam graue,  
 serium, excellens, quod non ad calumniam et irrisio-  
 nem pertrahi possit, si tu ex eo solum colligas, quod  
 est stultitiæ aut absurditati quadantenus simile. Sic  
 Dei providentiam ordinem uniuersi, religionem om-  
 nem, ortus, occasus, decursus mundi huius, quæ ui-  
 dendo nunquam exatiamur, semper admiramur:  
 Epicurei, homines ipsi maxime ridiculi, quia non  
 intellexerunt, derisere, & Lucianus Epicurissimus  
 subsannauit: quasi uerò non etiam nos rideremus,  
 si talis esset Deus, si talis mundus & uniuersorum

ordo, qualem ipse cōfingit. Sed reuertamur ad propositum. Ad uenerationem tanti sacramenti, ad habendam pro tali munere gratiam, causæ sunt explicandæ, et tota ratio negocij. Sapienterq; atque etiam piè olim factitatū est à patribus, ut mysteria hæc non patērent nisi ijs qui edocti iam essent, quæ nam sit cuiusq; illorum uis et natura. Primum considerandum est, hoc esse ab illo institutum, cui nihil non solum impossibile, sed nec difficile uel arduum. Corpus Christi in eo est sacramento, modo quodam nobis incomprehensibili. Nec mirum, quanta enim quæq; est res ex istis naturalibus quas cognitione sensuum usurpamus, et cōtrectamus manibus, quarum essentiam, rationem, qualitatem, uires intimas assequamur? Tributum est sacramentum hoc ab amantē ad memoriam sui, à patre ad consolationem desolatorum ac quasi orphanorum, à miti ac misericorde ad fiduciam trepidantium, à medico ad salutem ægrorum. Idcirco et corpus ipse suum reliquit, ut hæc omnia essent certiora ac firmitiora. nec enim res posset inueniri alia, quæ ita et memoriam ipsius conseruaret integram, et affectionem uigentem. Quis enim erga rem ullam quantumcunq; excellentem et admirabilem ad eum posset modum affici propter Christum, ut erga corpus ipsius met Christi? Nec par erat, ut qui tamum Ecclesiam amaret, alia in re fundaret recordationem amoris,



amoris ac beneficiorum suorum, quàm intus in suo spiritu, foris in suo corpore. Quiq; sic nos diligebat, & illo tenebatur zelo, ut nos ad se unum traheret, & per se ad patrem, ne quòquam aliò animi nostri deflesterent, nunquam profectò sustinisset, ut in alias res ad cultum, ad uenerationem, ad renouationem charitatis intemi essent animi nostri, quàm ad eum ipsum. Indubiè ita est, quia sic esse & Deum decet, & nobis expedit. Formæ autem electæ sunt panis & uini, quoniam sunt res maxime pure, tum quòd eas intra nos sumimus, ut sumpsisse nos sciamus Christum: ut quod amanti maxime est optabile, non solum nobiscum, sed intra nos habeamus rem unice charam. Habent etiam hæ duæ substantiæ rerum altissimarum significationes, & tanquam simulacra duo: alterum materiale, quòd sunt alimentorum præcipua: alterum spiritale, quòd fiunt, panis quidem ex granis contusis tritici, uinum autem ex uuae acinis pressis. Priore declaratur, præcipuum quoque & saluberrimum omnium alimentorum esse sacramentum hoc, quod uitam immortalẽ adferat, & suffulciat rite sumentibus. Posteriore autem intelligimus charitatem corporis Ecclesiæ & membrorum inter se: ideoq; à Græcis synaxis nominatur, à nobis communio. corpus enim hoc ex nobis omnibus componitur, ut panis ex granis, uinum ex acinis, sed contusis prius & pressis charitate

ritate, ut iam nullum existat granum, nullus acinus, sic in communitate hac Ecclesie nemo est suus, sed aliorum: nemo suum per se habet sensum & affectum, sed alienum, id est conuersum in substantiam corporis cōmunis. Itaque ad alias sacramenti huius utilitates accedit hæc, quòd docemur qualis sit Ecclesie compago, & cuiusmodi esse unumquemque nostrum decet, & quomodo affici erga ceteros homines.

## DE RESVRRECTIONE,

Ascensione, missione Spiritus sancti.

**N**on erat congruens, ut corpus illud Christi sacratissimum, tam obsequens animo & rationi instrumentū diuinitatis ad tantum bonum, iaceret in puluere & putrefactione: nec ullo prorsum modo expediebat nobis ad uenerationem atque amorem in Christum. Quis enim æque reueretur, aut diligit mortuum, ac uiuentem? ad spem uerò nostram quum in Christum, tum resurrectionis corporum nostrorum, ut nos haud aliter speremus redituros ad uitam, quàm uidemus salutis nostræ authorem atque inuentorem. Christi enim resurrectio initium est nostræ. Nam Deus Christi humanitatem excitauit à mortuis, quæ ipsi est proxima: per hanc ad remotiora, hoc est ad alios homines ueniet. Ostendit Christus potentiam suam morti inimicam, authorem salutis & uitæ, quæ non solum alijs uitæ largiretur,

largiretur, sed sibi ipse. etenim ipse idem nullius ope  
aut procuratione adiutus, reddidit sese uitæ, & re-  
fellit conuicium Iudeorum: Alios saluos fecit, se-  
ipsum non potuit saluum facere. resurrectio enim  
spontanea, & rem quoque spontaneam fuisse o-  
stendit manifestò. Sepulchrum Christi nouum pror-  
sus, & grande saxum ad ostium obiectum, tum cu-  
stodia militaris, argumenta sunt certa resurrectio-  
nis, & corporis ad immortalem beatitudinem com-  
mutati. Nouum sepulchrum declarat, non esse alium  
qui ad uitam surrexerit. Vastum saxum declarat,  
nihil iam illius corpori quo minus penetret quacun-  
que libuerit ob stare. Militaris custodia, illum si col-  
libitum sit, non posse perspicui. Sed illud certissimè  
uitæ eius argumentum, quòd ostendit se uiuentem  
discipulis, collocutus cum illis sepe, uersatus, con-  
tractatus. Ideoq; qui illum post resurrectionem ui-  
derunt, ceruices suas indubiè morti obtulerunt pro  
fide resurrectionis eius. Quòd si non apertissimè  
conspexissent eum discipuli uiuentem, renuncias-  
sent uitæ institute, inuisæ mundo, solum suspicati  
& fraudem inesse. Quis illorum adeò uercors fuis-  
set & insanus, ut mortem non dubitaret oppetere  
pro fide resurrectionis illius, qui spem esset eorum  
frustratus? quid enim expectaret amplius, à quo se  
delusum in tanto promisso recordaretur? quis po-  
tius non execraretur eum, qui hominibus in nego-  
cio

cio pietatis sic imponeret? At non exhibuit se post resurrectionem oculis multitudinis spectandum, ut antea. Vulgus enim rude, et tantorum mysteriorum ignarum, credidisset uel phantasma aliquod esse, uel magicis artibus ac præstigiatorijs deludi oculos suos. Nec discipulis id prædicantibus eam habuisset fidem, quæ si ipsi soli quum uidissent, et contrectassent eum, tormentis et nece sua confirmarent. alioqui enim suspicax in deteriora populus, se quoque aspexisse diceret, sed non sibi illum esse uisum, aut fucum aspectui esse factum. Et quum expediret Christum ad patrem ascendere, nihil conueniebat minus, quàm relinquere suspicionem de resurrectione sua ullam. ideoq; ut alijs in rebus, ita in hac quoq; testimonium in sequentes etates propagandū noluit esse promiscuæ multitudinis, quod inconstans et temerarium est, ne leuitatem in eo posteri possent suspicari. nec ulli uoluit apparere, qui postea esset dubitaturus, eam que dubitationem extensurus tanquam cõtatione in uenturas etates: nec ulli qui non esset postea paratus, sanguinem et uitam pro eiusce ueritatis testimonio profundere. Quid, quod resurrectionis persuasio non conspectū requirebat modò, sed colloctionē, cõuersionem, contactū, ut Thomas dixit. at ea non poterant uulgò fieri: multoq; erat aliud se natum hominem, uiuentemq; omnibus ostendere, quàm à morte suscitatum.



tum. Ad prius enim paucissimis est opus argumētis,  
 ad hoc uerò alterum permultis. Quapropter illud  
 datum est turbæ, hoc uero paucis, atque ijs selectis.  
 Non cōducebat nobis, Christum hic in terris post re-  
 surrectionē suam agere, & inter suos uersari. magis  
 enim de illius præsens magnitudine dubitassemus.  
 Non facile capit humana mens, ut quem hominē sibi  
 similem cōspicit, Deum esse credat, qui omnia cōdi-  
 derit & sustineat. Nec erat iam corpus illud beatissi-  
 mum diurnæ inter homines cōsuetudini idoneum.  
 Expedit uobis, ut ego uadam, dicebat Dominus suis:  
 quippe si non abiero, paracletus non ueniet ad uos.  
 Nam nisi enim desissent apostoli uidere Dominū, nō  
 facti fuissent apti & capaces spiritus sancti. nunquā  
 enim se ad illius sustulissent diuinitatis contempla-  
 tionē, capti præsens humanitatis cōspectu iucun-  
 diſſimo. permansissent in amore rerum corporaliū,  
 nec se ad spiritales erexissent. Apud oculum corpo-  
 ris absorbetur Christi diuinitas in humanitate, &  
 apud oculum uero mentis humanitas in diuinitate.  
 sicut si hominem oculus corporis intueatur, totus ui-  
 debitur corporeus, & animus delitescet sub aspectu  
 corporis: sin uero oculo mentis, nihil tam existet,  
 quam animus, & mens, ut corpus non iam ex homi-  
 ne uideatur esse, sed uelut tegmen quoddam & ap-  
 pendix. Eodem serres habet modo in cōtemplatione  
 Christi Dei & hominis. Itaq; ascendit is in cœlum,  
 ut

ut eò assuescamus mentem, desiderium, nota nostra omnia, ubi ipse est, mittere: & monstretur uia, qua nobis est eundum, & perueniendi fiducia. Melius quoque nobis est, ut Christus in cœlo ad dexteram sedeat patris, unde plura & maiora ad nos bona euentura facilius confidimus, quàm si hic semper moraretur in terris. Ascensu Christi reseratum est sanctis animabus cœlum, quod ante illum erat clausum. Neque ullus patrum illuc ascenderat. hic est aduentus Christi, & redemptionis ac liberationis nostræ fructus ampliſsimus. Aequum erat etiam, ut qui ad homines in cœlum mittendos huc uenerat, primus ipse in tanto bono esset dux reliquorū, nec cuiquam alteri fas est eam gloriam et decus tribui, quòd primus hominū in cœlum intrarit, ut qui princeps uiam aperuerat, instruxerat, munierat, primus ipse ingrederetur, primus aperiret ostium: ne si quis alius prior ascendisset, illi uel uia factæ, uel reserati ostij beneficium posset imputari. Primus ergo Christus in resurrectione, primus & caput Ecclesiæ, primus in beatitudine. Reliquis autem dux ipse, & author, & caussa. Ceteri ut ab illo, & per illum, ita post illum. In rebus alijs humanis facile quiuis Christū præcesserit: in suis autem ipsius bonis, in sua hereditate, nefas est. Ascendens in cœlum Christus, discipulos suos manere Hierosolymis iussit, donec celesti ab se missa uirtute confirmaren-  
tur

tur & corroborarentur. Ante id tempus erat illis Christi presentia maximo solatio, qua una acquiescentes nihil requirebant aliud. hanc quum expediret ab eorum oculis subduci, missus est illis spiritus sanctus, qui presentiam illam suppleret docendo, admonendo, consolando, inflammando eorum corda. Noluit eodem momento temporis aut die mittere, ut assuescerent patienter expectare opem Domini, & illi fidere, etiam si differenti & procrastinanti.

Spiritus sancti effectum in Apostolis manifestum sentimus, in doctrina mentium eorum, & animorum confirmatione: adeo ut etiam si de eo nulla esset scriptura, indubitabilis esset & certissima coniectura. Discipuli enim ante Domini mortem tam indociles, post eius resurrectionem tam docti et sapientes magistri orbis terrarum: quumq; admiranda eius cernerent opera, trepidi tamen semper et diffidentes in periculo desertuerunt eum: atq; etiam qui uidebatur animosissimus & constantissimus, iureiurando abnegavit: post resurrectionem ultro se pro illo offerebat, & gloriosissimam existimabat sanguinem pro eo profundere, uitam ponere. Indubie multum effecit resurrectio. nam ubi uiderunt eum uita se, reddidisse, reuocarunt in memoriam ingenia & diuina illius opera. unde magna erga eum reuerentia, fiducia, & charitas. Sed nec tam facile essent

sent omnia recordati quæ ab eo audierāt, nec intellexissent ea, quorū multa quū ab eo dicerētur, præterierūt nō intellecta: nec tam cōformiter fuissent firmi & cōstantes in tuenda fide, quam ab eo acceperant, etiam per infamiā, damna, cruciatus, mortē, nisi uirtute aliqua diuina et docti et corroborati. Res facta oste. Iiquidō suam causam.

Tum illis decem diebus quib. dilatus est spiritus sanctus, agētes in eisdē adibus trepidi, & extrema metuētes malorū, cœperunt suimetipsorū experimentum, quā nihil essent omnino sine præsidio diuino, & condiscerent illum expetere uotis omnibus atq; implorare. Pōst uerō præsidio illo muniti, quā fortes atq; animosi euaserūt? Magna est hæc ad ingressum diuini spiritus animorū nostrorum purgatio, si agnoscamus nos nihil esse, Deū in nobis esse omnia, ut nos ipsi cōtemnentes atq; aspernati, ad Deū solū nos cunctos conferamus ac recipiamus, illum unum inuocantes atq; implorantes magna cum fiducia et charitate. Quæ Christus suos edocuit, ea ipse ut magister & dominus tradidit. At spiritu sancto mittendo uoluit nos cognoscere, & ad intelligentiam doctrinæ omnis opus esse cœlesti lumine, & ad executionem præceptorum cœlesti ui ac uirtute. Pertinebat spiritus sancti missio ad doctrinam uenturæ Ecclesiæ, ut consuesceret sursum spectare, inde



inde mentem sanam, inde uoluntatem rectam optare: & se quemadmodum apostoli accepissent, accepturam certum haberet: nec quia Christo ipso immortali non erat magistro usa, protinus abijceret animum, memor se posse habere spiritum sanctum eundem, quem apostolorum doctorem & tutorem post magisterium & tutelam suam Christus esse uoluit. Et quemadmodum in primitiis Ecclesie expositor, doctor, admonitor, conseruator fuisset eorum quæ tradidisset Christus, ita in sequenti Ecclesia esset futurus, ut nullo unquam tempore uel magistrum mutaret Ecclesia, uel doctrinam, sed eandem ab exordio peregrinationis suæ retineret usque ad terminum, eundem institutorem, qui à Christo exhibita suggereret semper atque explanaret. Quid magis ad consolationem nostram, ad institutionem pietatemque conseruandam, ad salutem denique congruebat? Quid aliud à tanto amico erat expectandum, à tam pio & indulgenti patre? Datus est spiritus sanctus sensibilibus apostolis, ut & ipsi accipere se sciret, & reliqui deinceps accepturos se saltem spiritualiter non diffiderent, quod alios sensibilibus accepisse uidissent, uel audiuissent. Magnarum enim rerum fides manifestiorem esse inter initia conuenit, ut inde in reliquum ad occultiora proficiat. Apparuerunt super singulos igne & lingue, inquit Lucas. ignis

ad inflammandum & illustrandum facit, lingua uerò ad explicationem eorum quæ mente conceperis. Ad opus euangelistæ Christi necessaria est mens, quæ capiat mysteria: & animus, qui intrepide admoneat: & lingua, quæ disertè. Linguarum uerò donum ad uarietatem nationum edocendam est tributum. Fides enim, ut Paulus inquit, per auditum, tum ex linguarum pronuntiatione, & accipienti manifestus fiebat spiritus Dei, & audienti.

## DE APOSTOLIS

& martyribus.

**Q**Uæ post Christi in cælum ascensum, postque spiritus diuini missionem sunt consequuta, non minus Christi diuinitatem nobis ponunt ob oculos, quàm quæ præcesserunt. Nam si quis quæ facta cernimus, futura prædixisset, nemo habuisset fidem, nisi ope ac opera peculiari Dei ac propria factum iri haberet persuasissimum. Tanta enim sine humanis ullis uiribus nec ingenij, nec corporis, nec uitæ, quanta Christus, nemo potuisset profectò perficere, nisi esset Deus. Principiò, quæcunque facit Dominus, iusta sunt: nec quisquam ei potest dicere, Cur ita facis? Sed quoniam homini mentem atque intelligentiam tribuit ad libertatem uoluntatis, placuit ei hætenus se approbare, ne quam in eo occasionem relinqueret querelæ uerisimilis. Ergo ne qua conqueri posset na-

tio

tio non ex se natum Dominum, non se ab eo edo-  
ctam, & nasci ex ea uoluit, quæ cognitionem ac le-  
gem accepisset Dei: nec ad gentes est egressus,  
quibus regnum Dei annuntiaret. si qui enim Chri-  
stum audiuerunt è gentibus, intra ipsos Iudææ ter-  
ræ limites audiuerunt. Quin nec se uiuo passus est  
discipulos, quos ad salutem nunciandam homini-  
bus quoquò uersum dimittebat, ad ciuitates gen-  
tium proficisci. Rediturus tamē ad patrem iussit,  
ut apud omnes mortales sine exceptione ulla uel  
discrimine diuulgarent Euangelium regni cælo-  
rum: Deum esse omnium patrem, nullam apud il-  
lum distinctionem fore, illum esse eundem omni-  
bus: Christi pietatem & gratiā iam non ad unum  
aliquem pertinere populum, ut legem Moysis, sed  
ad uniuersum humanum genus. neque enim eadem  
est hominis unius, & filij Dei causa. Moses bonus  
fuit minister Domini, sed populo Israëlitiæ. Filius  
Dei, qui & idem est Deus, omnium est dominus,  
omnium pater, æqualis ad omnes, idem semper &  
sui similis. Qui ergo Deus intra fines unius popu-  
li non concludebatur, huius misericordiam non o-  
portebat illi soli populo patēre, sed tam latē se ex-  
tendere ac propagare, quā potentiam & sapien-  
tiam. Ideoq; fides Christi catholica nuncupatur,  
hoc est uniuersalis, quòd omnium sit gentium, om-  
nis sexus, omnis conditionis, continens quæcunq;

sunt saluti adipiscendæ necessaria, nunquam cessatura, Et quo facilius prædicatio hæc apostolorum per orbem sese diffunderet, maximam orbis partem ditioni uni atque imperio subiecit, Romano scilicet: quæ res facilem præbebat inter nationes transitum, commeatum, communicationem omnium inter se. Adiuuabat eam rem linguæ communio. plurimi enim sub Romana ditione loquebantur latine, plerique græcè, ita brevi tempore fama rerum omnium atque auditio latissime se diffundebat. Elegit Deus apostolos suos ad tantum & tam admirandum opus, quibus nulli omnino uideri poterant minus idonei: sed elegit infirma mundi, sicut Paulus inquit, ut confunderet fortia. Scientissimi atque expertissimi est artificis, malo & inepto instrumento idem efficere, quod alius a tissimo atque appositissimo uix possit. sicut Apellem carbone de foco sumpto, ita eum à quo esset ad Ptolemæi prandium inuitatus expressisse tradunt, ut omnes inuitatorem illum ad primam delineationem agnoscerent. Sed mirandum non est, Deum quæ uelit incongruentibus præstare instrumentis, qui instrumentis omnino nullis indiget, quicquid fingere statuerit. Itaque misit paucissimos ad quàm plurimos, rudes ad peritissimos. erat enim mundus ingenijs atq; artibus excultus, si unquam aliàs: ne quis fucum factum, aut dolo captos esse homines



homines possit suspicari. misit infantes ad disertissimos atque eloquentissimos, misit simplices ad astutos, inermes ad armatos, imbelles ad bellicosos, inopes ad imperium populi Romani. Expediebat tantam esse in primis illis ædificij huius ex-structoribus humilitatem, ne ipsi humanis uiribus artibusq; aliquid tribuerent, aut in eis spei quicquam aut fiduciæ collocarent: sed sibi penitus diffisi, ab ope ac præsidio penderent Dei. Tum ne quis stultè ac dementer aliquid ex ijs quæ facta essent, humanæ potentiæ attribueret. Ne ipsi quoq; apostoli humilitatem ullam possent aspernari, memores suæ. Discerent mansuetudinem & misericordiam alijs impartiri, quam à Deo essent consequuti. Ciuitas hæc est Christi, regis mitissimi ac mansuetissimi: nihil conueniebat primis illius fundamentis ac ædificio, ex cemento contrariæ ciuitatis, nempe diaboli, admisceri superbiæ atque arrogantiæ, cuius ipse author est, inuentor, caput. Et ut magis & ipsi ad Dei opem subinde implorandam consuescerent accurrere, & ueritas doctrinæ purior existeret, ac purgator, aduersarios dedit discipulis principes, procures, milites, philosophos, orbem penè cunctum. Pugnant multi aduersum paucos omni præterquam diuino præsidio destitutos & desertos: pugnant inquam odijs, inuidentiâ, rabie, maledictis, insectatione, tormentis,

mentis, occidione. proposita erat ijs qui institutum amplecterentur Christianum infamia, dedecus, paupertas, cruciatus, mors, ignominia toti generi ac posteritati. Et quemadmodum electum est ad prædicationem apostolorum imperium Romanum, ita & ad cruciatus ac martyrium, ne regulos haberent Christiani ad quos confugerent, sed ab irato principe Romano nullum relinqueretur suffugium. quis enim ausus esset tutari, quos omnium dominus rerum capitalium damnasset? Prædixerat hæc eis Christus omnia, ne quum acciderent terrerentur, sed memores eius à quo essent præmoniti, forti animo subirent pericula. Quanto & quàm diuino consilio hæc sunt acta omnia: ne quid suorum incrementorum deberet pietas mundo, ex Deo penderet tota, quæ sciret originem suam, auctus, progressus, exitus, omnia habere se ex solo Deo, uel uniuerso mundo inuito ac repugnante. Initio quum sanctæ pietati fundamenta iacerentur, satis est diligenter procuratum astu & calliditate sathanæ, ut Christus secum coniungeretur: ut in aliquam uel societatem, uel portionem admitteretur sancti regni, effecit, ut Tiberius Cæsar Senatui Romano scriberet de Christo inter alios deos recipiendo. idem edicto Adriani, idem uoluntate Alexandri Seueri tentauit: nihil profecit. non potest sathan coire societatem cum Christo,

Christo, non congruit, non expedit nobis. Quod si tum Christus pro uno ex dijs esset habitus, beneficiaria uisa esset illius diuinitas, data ab imperatoribus Romanis: nec ea quæ summa est religio & sola, non talis fuisset credita, sed una ex bonis. Conueniebat ergo ad eius uirtutem atq; excellentiam cognoscendam, per omnem contradictionem examinari. Quo ore commendat philosophi tolerantiam, & eius rei ad nos cohortandos paucula quedam colligunt præcepta, atq; ea fortium uirorum, nempe philosophorum, aut militum, quos ætate in laboribus durisq; rebus exercitata, mirandum non erat aliquid in patientia corporum super ceteros præstare. At nos permulta possumus exempla nostra inducere, quibus sanguine suum profunditibus sancta & constabilita est nostra pietas. nec hi sunt solū fortes ac robusti uiri militares, uel philosophi, per cogitatus & exercitamenta animo ac corpore indurati: nā his quoq; abundamus: sed scemina, pueri, puellæ, senes. At qui cruciatusq; ad sui miserationē impellebant eos, qui Christianos aiunt extrema omnia cōmeritos: ut Tacitus Cornelius. ut inter cetera miracula non sit illud habendū in postremis, potuisse à teneris corpusculis tam immania tormenta perferri. Sed quod natura nullo prorsum modo ualuisse, perfecit Deus. Tulerit C. Marius, uel Alexāder Macedo, aut uir aliquis bel-

lis & laborum patientia obduratus, ictum unum  
 atque alterum lethalem: quid puella tenerrima,  
 quid tam multos toties cum acerbissimis doloris  
 morsibus repetitos? Nec frustra cruor ille sacro-  
 sanctus fundebatur. Nulla in terram cadebat gut-  
 ta, ex qua non multi Christiani consurgerent: ut  
 expressa in ueritate uideatur fabella de serpentis  
 dentibus à Cadmo in Boeotia sparsis, unde armatae  
 acies nascerentur. O magna uis ueritatis, exclam-  
 mat eorum Cicero, quae contra hominum ingenia,  
 calliditatem, solertiam, contraque fictas omnium  
 insidias facile se per seipsam defendit. Ita Christia-  
 na religio, quo acrius & rabiosius est oppugnata,  
 hoc è praelio fortior, praestantior, gratior exce-  
 dit. Planè est quod ille pronunciauit, Veritas est  
 rerum omnium fortissima. Itaque discesserunt no-  
 stri martyres, etsi mortui, uictores tamen. Nec ui-  
 deatur hoc uobis absurdum, qui M. Attilium Re-  
 gulum necatum à Carthaginensibus in tormentis  
 uictorem dicitis eorum ipsorum, à quibus iniquè  
 & immeritò tortus fuerit, & neci deditus. Idem  
 affirmatis de Zenone Eleate, & de alijs uiris pre-  
 stanti uirtute, qui iniqua sunt morte sublati. Quan-  
 quam uos, sicuti modò dicebam, paucissima pote-  
 stis commemorare exempla eorum, qui mortem  
 ultrò pro ueritate & iustitia obierunt: & in ijs  
 alij effugissent si licuisset, ut Zeno. nam Anaxago



ras fuga sibi consuluit. alij seruierunt suæ gloriæ,  
 ut Attilius. Socrates quid de dijs sentiret, crimi-  
 nationi apud iudices respondens, dissimulasse cre-  
 ditur. Maccabæi fratres propter patriam legem  
 mortem obierunt, ut Philenij fratres pro patriæ  
 terminis defodi se uiuos passi sunt, sicut Salustius  
 & Valerius Maximus tradunt. Curtius quoque in  
 lacum medio foro Romano se coniecit, & Decij  
 in medias acies. hæc pietate patriæ. At pro pia ue-  
 ritate mortem constanter perferre, non subterfu-  
 gere, non dissimulare, institutum est quod Chri-  
 stus e cælo ad nos detulit, accensis suorum pecto-  
 ribus incredibili charitatis flamma erga Deum, ut  
 omnia, etiam uitam suam & sanguinem Deo post  
 habeant. nec id unus excepit, aut alter, sed tot mil-  
 lia, ut totidem homines in id consensisse pro gran-  
 di esset habendum miraculo. Post nostrum uerò  
 martyriū profani aliquot in re falsa imitati sunt,  
 quod nos in uera. scilicet nauat diligentem operā  
 dæmon, ut id in suis malis exprimat, quod in suis  
 bonis operatur Deus: sed ille inefficaciter, sicut  
 omne genus uirtutis & speciem ingentis pietatis  
 conatur effingere. Verum quales tandem sint dia-  
 bolici martyres, quales Christi, à fructibus utro-  
 rumque non obscure dignoscitur. Quid dicemus,  
 quantum miraculum est, quàm planè Dei opus,  
 quod martyres nostri præstiterunt, siue dum ipsi

inuiti tam immania supplicia perferunt, siue dum homines priuati, humiles, imbelles, imperiti, infantes, ab ijs omnibus quibus uis aliqua fit homini destituti ac inermes, præterquam diuino præsidio, doctis indoctisq; persuaserunt res adeò sublimes? quum philosophi difficile persuadeant moralia, difficilius multo naturalia, arte, eloquentia, exercitamentis, atque usu instructi & armati. Nunquam eam habent uim ficta, quæ uera. si res simulata esset nostra fides, atque adumbrata, non eum in humanis pectoribus effectum siue ad credendum, siue ad agendum, siue ad patiendum ostenderet tot seculis, tot hominum millibus non coactis, sed ultrò uenientibus, quum tam multa in contrarium à nobis retraherent. Videamus iam quàm contra ius & fas omne tam grauiā pertulerint supplicia. Merito & sapienter, quisquis dixit: Si accusari suffecerit, quis erit innocens? At Cornelio Tacito satis grande & legitimū est præiudiciū, damnatum fuisse Christum à Pontio Pilato præside Iudeæ. Quæso te Publi Corneli, si ita est, quid fiet Socrati? quid tuo Ciceroni? quid Rutilio? quid historiæ tuæ numinibus Heluidio Thræseæ, Senecæ? quid alijs multis? Audiamus crimina, prodeant actores, sedeant iudices. Actores multi sunt, & crimen non unum, sed pro ingenio cuiusque. Philosophis displicet, quòd suis principijs

contra-

contradicitur, & natura neglecta altius sese humanus animus attollit: ut Athenis irrisus est Paulus ab Stoicis & Epicureis, ad mentionem resurrectionis mortuorum. mordebat illud acrius, quod inuenta meliore doctrina, uidebant se minore in precio futuros, & contemptum iri suam caliginem luce fulgente. Superbo insensum est, honores & decus & fastum conculcari: diuiti, pro nihilo haberi opulentiam. principi odiosum est maiorem potentiam allegari, & ostendi alium esse, cui sit potius parendum: quem affectum superbissimum adhuc in quibusdam est deprehendere Christianis principibus, qui non parum aequis auribus de diuina omnipotentia accipiunt, praesertim quum de illorum humana est mentio. Voluptarius adimi sibi suas delicias fert moleste: Pontifices & sacerdotes, decus, authoritatem, opes. Parentes indignantur liberos suos honore, loco, nobilitate, hereditate, connubijs, pro nihilo habitis ac spretis, ad nudum, & pauperem, & humilem Christum, tanquam ad certissimum asylum confugere. Sed quis sigillatim persequatur singula? quum non defuerit Ephesi statuarius, qui in Christianos populum concitaret, quod idola tollerent, unde ipse magnum faciebat quaestum. Quem que sua rapiunt scelerata in praelia caussae, inquit Poeta. Praetextus tamen communis omnium erat, uiolari

uiolari religiones patrias, & contemptum esse numen deorum immortalium. hoc uidelicet erat ad omnes speciosissimum. Tacitus & Tranquillus nihil profectò eorum legerent, quæ tam temerè darentur, sequuti uulgi opinionem ac uoces. Et satis apparet, eos curam omnem suorum studiorum in excolenda lingua, non mente consumpsisse. Quomodo enim religionē nostram uocant maleficam, cuius caput est omnibus bene uelle, bene consulere, bene facere? Quod unquam in commune Christianorum aliud est unquam crimen intentatum, nisi quòd Iouem non colerent? Nam quædam rabiosissimè & acerbissimè conficta sunt, & tradita pueris legenda, ediscenda, cantillanda publice: sed quia falsa & conficta, non hæserunt in nobis, ipsa per sese dissoluta sunt. Audite sodalem uestrum Plinium Cæcilium, qui huius criminis inquisitioni præfuit, dum Asiam prouinciam regeret: nā uos ex populari uociferatione iudicatis. Plinius ergo in epistola quadam ad Traianum sic inquit: Propositus est libellus sine autore, multorum nomina continens, qui negant se esse Christianos, aut fuisse, quum præeunte me appellarent, & imagini tuæ, quam propter hoc iusseram cum simulachris numinum adferri, thure ac uino supplicarent, præterea maledicerent Christo, quorum nihil cogi posse dicuntur, qui sunt reuera Christiani,



ni, dimittēdos putauī. Alij ab indice nominati, esse  
 se Christianos dixerūt, & mox negauerunt: fuisse  
 quidē, sed desisse, quidā ante triennū, quidā ante  
 plures annos, non nemo etiam ante uiginti quoq.  
 Omnes ex imaginē tuā, deorumq; simulachra ue-  
 nerati sunt, ij & Christo maledixerunt. Adfirma-  
 bant autem hanc fuisse summam, uel culpae suae,  
 uel erroris, quod essent soliti stato die ante lucem  
 conuenire, carmenq; Christo quasi Deo dicere se-  
 cum inuicem, se que sacramento non in scelus ali-  
 quod obstringere, sed ne furta, ne latrocinia, ne  
 adulteria committerent, ne fidem fallerent, ne de-  
 positum appellati abnegarent: quibus peractis,  
 morem sibi discedendi fuisse, rursusq; coeundi ad  
 capiendum cibum, promiscuum tamen, & inno-  
 xium. Quo magis necessarium credidi, ex duabus  
 ancillis, quae ministrae dicebantur, quid esset uerū  
 & per tormenta quærere. Sed nihil aliud inueni,  
 quam superstitionem prauam & immodicam.  
 Hæc ille. Sed erat tamen præter iam dictas alia  
 causa, cur scriptores illi de Christianis non sine  
 ignominia facerent mentionem. Exarserat enim  
 tantopere & principum & uulgi odium aduer-  
 sus nouam pietatem, ut quisquis de illa paulo mo-  
 deratius meminisset, in suspensionem raperetur, tan-  
 quam uideretur fauere ei, cui non malediceret,  
 quamq; nō proscinderet graui conuicio. Quaca-  
 lumnia

lumnia ut se omnino scriptores liberarent, cum  
probro & contumelia nominabant Christianos,  
quoties in eorum mentionem inciderent. quod e-  
tiam hodie fieri à quibusdam animaduertimus in  
damnatis opinionibus, quas multi non audent  
absque præfatione contumeliæ nominare, ut se  
probenet longè ab illarum factione abesse. Quod  
si priscis receptisq; maiorum cultu religionibus  
contrauenire tantum erat nefas, cur impuniti re-  
linquebantur philosophi, qui non solum ueteres  
illos ritus cultusq; irridebant & damnabant, sed  
eorum multi ne deos quidem esse arbitrabantur:  
alii animas nostras affirmabant mortales esse, &  
deorum curam ad terras ac res humanas nūquam  
se dimittere, quibus dictis religiones omnes, non il-  
la solum fictæ, & ab errore humanæ ignorantie  
introducæ, sed quæcunque aliæ ueræ ac sanctæ  
funditus extirpabātur. At qui ea disputabant atq;  
asserebant, non solum magni erant in ciuitatibus,  
& honorati, sed eorum libri in precio & mani-  
bus omnium. Quod si nostri contra religiones an-  
tiquas loquebantur, at audissent saltem quas alias  
adserebant, & utrasque inter se conferrent ac re-  
putarent. Nihil tale, sed clamore imperitiæ multi-  
tudinis damnati sunt, exosi uoluptatibus, diuitijs,  
potentiæ, honoribus, demoni, quæ omnibus bellis  
indixerant, ut homines per horum inimicitias ad  
amici-

amicitiam Dei sustollerent. Cedo autem qui iudices condemnarunt, & addixerunt supplicijs, sancti & incorrupti: Primus omnium Nero, hinc Domitianus, Seuerus, Maximinus, Maxentius, Diocletianus, Decius, & eorum ministri. Istis uidelicet curæ erat deorum religio, quos gentiles ipsi fatetur deorum fuisse contemptores: aduersus homines autem teterrimas belluas & crudelissimas, flagitijs & facinoribus seuisimis coopertos & obrutos, hostes uirtutis omnis, probitatis, honestatis, laudis: ut euidentissimum argumentum sit, fuisse bonum, quicquid illis displiceret. Vel ex ipso iudice condemnati rei colligatur innocentia. Habebant hi principes, ut fieri solet, similes sui praefectos prouinciarum, & ministros. Torquebantur & dilaniebantur martyres immaniter, partim à seua iudicis natura, partim ambitione quadam, ut se principi suo uel ad multitudinem uenditarent, tanquam ultores publici odij, & edictorum principis sui diligentes exequutores. alias quoque pietatis odio, quæ cum eorum moribus grauiter dissideret ac pugnaret: alias contentione quadam, uter uinceret, uiolentia iudicis, an patientia martyris. Voluit Christus, ut quemadmodum suo sanguine, ita et suorum, quam ille de cælis attulisset pietatem, sanciri. Primum, quod par erat, ut labores atque ærumne capitis redundaret in membra, ita implentur quæ desunt

desunt afflictionum Christi, ut inquit Paulus. tum ut certius confirmaretur pietas, quam non uerbis modò, & inani contentione assererent, qui adferebant, sed morte probrosissima & crudelissima. haberent quoq; exemplum sequentes, quid facere illos pati q; oporteret pro diuina ueritate.

DE CVRSV ECCLESIAE  
sanctæ catholicæ.

**H**ic decursus Christianæ Ecclesiæ perpetuus herit, quoad tota hæc terrestris in cælum sit translata, & ex mortali facta sit immortalis, ex afflictâ beatissima. D. Augustinus, & Io. Picus, referunt fuisse qui terminos quosdam statuerent ætati Ecclesiæ, qui omnes iam olim præterierunt, magna illorum uanitate atque ignominia, qui limites uolebant ponere in eo quod Deus iussit esse sempiternum. idq; illi ex positu siderum uolebant colligere, quum nec religio, nec hominis uoluntas cælo sit & sideribus subiecta. Neque ulla est siderum coitio, quæ efficaciam suam in tot regiones tam diuturno tempore possit extendere. Argumenta pia super eare hæc sunt. Cælum quandoquidem à Deo bono regitur, non potest esse malorum legum atque impietatis causa, eorum deniq; quæ bonitati ac sapientiæ Dei contraria sint atq; inimica. Contemplari est in uniuersa natura, qui ordo,



ordo, qui consensus, quàm sapiēs institutio. quàm  
 absonum ergo fuerit, ut quæ ratio naturæ nollet  
 fieri, ab ijs tamen procurentur sedulò quæ partes  
 naturæ sunt magnæ, potentes, optimæ, principa-  
 les. Quòd si uirtute magnæ alicuius coniunctionis  
 religio aliqua nascitur: abolita illa uirtute, abole-  
 ri quoque religionem est necesse. Nulla autem fide-  
 rum est coniunctio, cuius uirtus durare per tot an-  
 nos fingatur etiam ab astrologis, quot annis et  
 cultus idolorum, et Mosæica religio, et Chri-  
 stiana perdurant. Triplicitates uerò siderum quæ  
 olim erant, hodie sunt: etiam quas authores esse  
 religionum Ptolemæus ponit. Quir igitur nemo  
 nunc colit idola, ut olim? Sed hac de re non uidetur  
 mihi necessarium esse anxie disputare, posteaquam  
 ostensum est authorem religionis nostræ esse De-  
 um, hunc uerò bonum et clementem, qui benigni-  
 tatem suam in uniuersas generationes effundit us-  
 que ad consummationem generis humani. Si quid  
 ille naturaliter est acturus, ut in causis, sic in natu-  
 ralibus informatum concedi potest. sin uerò supra  
 naturam est acturus, nihil necesse est, ut sit in caus-  
 sis naturalibus, nempe cœlo et sideribus uel inser-  
 tum uel indicatum. Sunt qui miracula etiam nū ad  
 confirmationem suæ fidei requirāt, seu si apertius  
 auderent loqui, ut credant omnino, dubij plus ni-  
 mio et incerti in persuasionē sanctæ ueritatis. Pri-

num miracula dubium non est quin sint facta in-  
numera, quorum plenæ sunt historiae, & fatentur  
uel inimici nostri, quarumcunque sint sectarum,  
Iudæi, gentiles, Agareni. Alioqui hoc esset maius  
omnibus miraculis miraculum, ut ait quidam, Si-  
ne miraculis adductum esse mundum inuitum &  
repugnantem ad opiniones adeò à receptissimis  
& inueteratis alienas & contrarias, per tantā re-  
pugnantiam & persecutionem potentium. Nec  
dubium, quin edantur quotidie ex fiducia peten-  
tium: sed non scribuntur omnia, non omnia perse-  
runtur ad nos. multa etiam scribuntur, sed suspicio  
falsorum miraculorum aspergit ueris ambiguita-  
tem. Auaritia enim quorundam falsas miraculorū  
imposturas comminiscitur, ex quibus deprehensis  
ac manifestis, quæ uerissima sunt redduntur incer-  
ta: quod est in religione pestiferum, & execran-  
di qui ea confingunt, maiores que poenas meriti,  
quàm qui adulterant pecuniam, aut antidoto ad-  
miserunt aconitum. Cæterum qui tandem exigunt  
prodigia? qui indigni sunt qui uel uideant natura-  
lia, prono semper in terram capite, ritu beluarū:  
aiunt se uelle intueri etiam supracælestia, qui nun-  
quam cælum aspexerunt. Rapi uolunt in altum  
portentis, ut inquit Ficinus, non uirtutum gradi-  
bus ascendere. nunquā utuntur ratione, & uolunt  
quæ rationem superant intueri. nam si ratione, si  
consilio,

consilio, si iudicio uteretur, aliquando hæc essent eis ad confirmationem pietatis pro magnis & admirandis prodigijs. Illud est in hac miraculorum postulatione ridiculum ne an indignandum maxime, quod insani homines ita à Deo poscunt ad religionis firmamentum miracula, quasi negocium agatur Dei in eo, ut ipsi ueræ pietati accedant: & non potius eorum ipsorum, qui ex miserrimis & perditissimis ad salutem & felicitatem transeunt. Simile est hoc dicto illi principis cuiusdam, Sufficiat Christo, quod nos principes illi exhibemus fide. Quantæ erant in eo qui id dixit tenebræ inconsiderationis? isti Deum sibi fingunt, ut unum aliquem de nostris regibus, cui expedit fidem sibi haberi, se diligi & coli à subditis. Miraculorum satis est factum, credat qui uolet: suam rem aget, non Dei. Adde quod miraculorum fides seu fiducia est effectrix. Vbi est nunc ea in nobis erga Deum fiducia, quæ impetrare possit à Deo, ut miraculum uel faciat, uel accipiat? quanquam si quis recte expendat, non desunt nobis miracula in rationibus pietatis, si quis ad exactum iudiciū referat. Nec dubiū quin sancti illi patres, Ecclesiæ nascentis crescentisq; procures Apostoli ac martyres, rationibus sint potissimum usi, intermistis nonnuquam miraculis uelut gemmis, quæ fides & feruor tum prædicantis, tum concionis ipsius imple-

trabat. sed illa oculis dabantur, rationes autem menti. Nam quum homo cognitionem habeat sensuum, quæ est ei cum mutis animantibus communis, & cognitionem mentis, quæ est ipsi propria, magis decet illum rationibus mentis formari ad uirtutem ac cultum diuinum, quàm prodigijs, quæ oculis alijsq; sensibus ostenduntur, in admirationem stuporemq; impelli. Hoc est quod Abraham diuiti illi nepoti petenti, ut aliquis ex mortuis resurgeret, qui uiuentes admoneret meliorum, respondit: Habent Mosen & prophetas, si illis fidem non adhibuerint, nec si quis illuc à nobis reuertatur, credent. Validior certè est ratio rectè reputanti, quàm miraculi subita admiratio. Miraculum enim & suspicionem & calumniam patitur, tanquam impositum sit sensibus: uera ratio non patitur, quæ quo magis tractatur, expenditur, excutitur, eo inuenitur firmior, solidior, certior. De dit ergo olim Dei benignitas prodigia, dat quotidie, dat cuique quod ualidius sit prodigijs ad colendam sanctam pietatē. nulli probetur excusatio maliciæ: uicio quisq; suo est malus, beneficio Dei bonus.

DE RESURRECTIONE  
nostrorum corporum.

**D**emonstratum est antea multis uerbis, hominem à Deo esse ad sempiternam beatitudinem



dinem conditum. eos igitur homines, qui ipsi fidu-  
 cia & charitate adhæserint, beatos efficiet. Quòd  
 si homines beati atq; immortales erunt, animi red-  
 dentur corporibus. non enim solus animus est ho-  
 mo, aut solum corpus, sed quod ex ambobus confi-  
 citur. Alioqui nihil attinebat corporatos condi-  
 disse homines: spiritus suffecissent nudi, ut in ange-  
 lis, si corpora semel in morte occumbentia nun-  
 quam essent surrectura. Adde quòd nos in homine  
 animaduertimus uitam uegetantem in utero ma-  
 tris, uitam sensuum in infantia, uitam affectionum  
 & rationis inferioris reliquo uitæ huius decursu.  
 restat uita mentis & rationis superioris, quam  
 quia hic non uidemus, alicubi certè futura est non  
 solum in anima, sed in ipso etiam toto homine, in  
 quo & reliquæ sunt ostensæ ac exercitæ. Rectè  
 Athenagoras: Appetitus eternitatis quoniam to-  
 ti est homini insitus, fit, ut totus homo immortalis  
 sit, reddetur ergo corpus luci ac uitæ. Et hominem  
 totum non in alienum usum Deus retulit, sed ad a-  
 ctum procreauit naturæ suæ intimum & congru-  
 entissimum, ut Deum amet, imitetur, fruatur. Cor-  
 pus autem & anima communiter sunt in his ope-  
 rata, aut in contrarijs: cōmuniter igitur uel præ-  
 mium accipient, uel pœnam. Quòd si homo inte-  
 ger non resurgeret, frustra esset anima à corpore  
 impedita, & corpus ab anima: hæc dū regit cor-

pus, illud dum paret. Vnde multa utrique & gra-  
 uia extiterunt, & permolesta. Itaque dura condi-  
 tione alterum esset alteri alligatū, & uenirent cor-  
 pora in societatem malorum, non bonorum. Adde  
 quod leges in commune sunt corpori & animo  
 impositæ. Iam uerò uniuscuiusque rei certus est fi-  
 nis: hominis nullus quidem certè est, nisi felicità-  
 tas: homo ergo totus eius est capax, & ea fruetur.  
 Sic colligit Athenagoras, sapiens in Ecclesia Chri-  
 sti adolescente. Ceterum non esse possibilem re-  
 surrectionem contendunt, qui Deum ipsum sum-  
 mum ac præpotentem limitibus naturæ huius con-  
 cluserunt, & tanquam carceribus coëreuerunt:  
 absurdissimumq; id uisum est philosophis Athe-  
 nis, Paulo de religione differente. Atqui redditos  
 uitæ permultos ex Christianis, annalibus constat.  
 hos non admittunt, admittamus nos suos ipsorū.  
 prætereo fabulas, ut Calisthonis filium in uitam  
 esse reductum à Ioue: tum etiam Pelopem: Alce-  
 stem, ab Hercule: ab Aesculapio multos, uelut  
 Hippolytum, qui dictus est Virbius, Glaucum Mi-  
 nois filium, & Pollucem Tyndaridem. Sed Plato  
 Herum quendam Pamphylium reuixisse ait, in ex-  
 tremo de Republica. Idem Plato ex disciplina Py-  
 thagorica *μετεμψόχων* ponit, genus quoddam  
 resurrectionis. Theopompus scribit Zoroastri  
 fuisse opinionem, omnes aliquando reuersuros in  
 uitam.

uitā. Plinius in lucē redisse tradit plurimos, quorū  
 duo exempla subiecisse suffecerit. E' duobus fratri-  
 bus equestris ordinis Corfidio maiori accidisse, ut  
 uideretur expirasse, apertoq; testamento recitatū  
 heredem minorem funeri instituisse: interim cum  
 qui uidebatur extinctus, plaudendo concinuisse  
 mysteria, & narrasse à fratre se uenisse, commen-  
 datam sibi filiam ab eo. Demonstratum præterea,  
 quo in loco defodisset aurum nullo conscio, & ro-  
 gasse ut ijs funebribus quæ comparasset efferre-  
 tur. Hoc eo narrante, fratris domestici properè  
 annunciauere exanimatum illum, & aurum ubi di-  
 xerat repertum est. & paulo post: Bello Siculo  
 Gabienus Caesaris classiarius fortissimus captus à  
 Sex. Pompeio, iussu eius incisa ceruice, & uix co-  
 hærente, iacuit in littore tota die. Deinde quum  
 aduersperauisset, cū gemitu precibusq; congregata  
 multitudine petijt, uti Pompeius ad se ueniret, aut  
 aliquem ex charis mitteret: se enim ab inferis re-  
 missum, habere que quod nunciaret. Misit plures  
 Pompeius ex amicis, quibus Gabienus dixit: Infe-  
 ris dijs placere Pompeij caussis, & partes pias.  
 Proinde euentū futurū quæ optaret, hoc se nūcia-  
 re iussum. Argumentum fore ueritatis, quod pera-  
 ctis mandatis, protinus expiraturus esset. idq; ita  
 euenit. Non disputo de horū ueritate, satis est his  
 exēplis nō oportere uideri impossibile. & gētiles  
 quidem

quidem quum illa dicebant, nemo commouebatur: nos quum dicimus, non possumus ferri. Audiamus iam causam, cur nemo potest mortuus in uitam remeare. A priuatione in habitum impossibilis est regressus. Axioma fragile, ad quod fulciendum sexcentis esset opus tignis. An non à tenebris ad lucem est regressus, à somno ad uigiliam, à quiete ad actionem, à cæcitate ad uisum? Sed cauillantur, non à priuatione ad eundem habitum. quid refert, modò ad simillimum, ut idem prorsum uideatur. Qui enim amissum recuperatus, re cepisse dicitur. alioqui nec uisum meum hodie eundem esse dixeris qui heri fuit. Argutiae sunt istae ineptae ac pueriles. Quòd si possibilis est reditus à priuatione ad eum habitum qui perijt, aut certè simillimum, quanto erit magis à disiunctione ad coniunctionem? neque aliud est mors, quàm disiunctio, & dissociatio: uita autem, coniunctio & nexus. itaque manente anima & corpore, perinde est ac si lapides in pila separentur, postea rursus componantur. Velim isti intra se reputent atque expendant, utrum est difficilius dare animam nouam ei corpori quod antea nunquam habuit, an reddere illam ei quod habuit. Sed isti quia alterum uident contingere, alterum non experiuntur, sine cogitatione rationis sequuntur sensus, & prius ducunt facillimum, alterum impossibile. Atqui philosophi est, ratione  
magis



magis moueri quam sensu : quam rationem si imbecillitas ingenij eorum nō potest exculpere, certe studium sapientiæ oblatam atque ostensam debet amplecti. Sed quorsum attinet ex principiis naturæ disputare de eo, quod naturæ omnem latitudinē excedit? & quidem ex principiis non manifestō naturæ, sed quæ sibi homo aliquis confinxit uerisimiliter ad id quod se asequi existimabat. Quæstio autē illa multos torquet, an idē resurget homo, eadem ne materia, eadē facie ac forma. Qui fieri potest? inquiunt. nam forma sæpe est in homine eodem mutata : materia uerō fluit in modum annis. quæ erat ab hinc annos quatuor, iam non est. successit alia atque alia, ut aqua in flumine, & transit ad diuersas formas : ut. quum ex cadauere fit uermis, ex uerme anguis, ex angue lutum, ex luto herba, rursum ex herba comesa ab homine caro humana, & homines alij alios deuorant, & quotidie in quibusdam regionibus deuorant. Hæc & alia permulta congerunt quidam, partim admirantes quō nam corpore redibimus ad uitā, partim de uniuersali resurrectione multum ambigui. Verū omnia, ut aliæ ferē quæ de ueritate suboriuntur ambiguitates, originem capiūt ab ignorantia. non enim considerant quid satis sit, ut idem dicatur homo uarijs temporibus, quod sermo communis nō nescit. Idem est homo exhausta per mor-

bum carne, colore diluto, cæcus, & surdus, qui  
 prius succi plenus, colore uiuido, compos uiden-  
 di atque audiendi sensu. Itaque formæ ac faciei ua-  
 riatio, tum mutatio materiæ ac corporis, non effi-  
 cit alium hominem, nisi alius ad adhærentia refe-  
 ratur: quemadmodum alius dicitur qui senten-  
 tiam mutauit, aut affectionem aliquam. Redibit i-  
 gitur eadem anima ad materiam quam Deus da-  
 bit, & erit idem homo qui prius quam moreretur.  
 materia autem erit eius rationis ac generis, cuius-  
 modi est humanorum corporum, nempe ex qua-  
 tuor primis qualitatibus confecta, hac facie & fi-  
 gura, his sensibus, his membris internis ac exter-  
 nis, hac compositione, contextura, proportionem,  
 harmonia, intus & foris, qua nunc sunt homines.  
 alioqui non essent idem homines, ac ne homines  
 quidem, sed aliud quoddam genus. Audiamus Pau-  
 lum, conscium maximorum arcanorum, de quo  
 philosophus Aeneas sic loquitur: Paulus simili-  
 tudinem adfert de semine, ut quisque ex eo quod  
 uidet intelligat quod nō uidet: & qualis sit à Deo  
 quottidiana generatio, talis erit illa extraordina-  
 ria. ex semine arbor nascitur & animans, sic ex  
 parua cuiusque corporis parte crescet corpus, ut  
 ex costa Adæ corpus Eux. de quo uir dicit: Ecce  
 nunc caro ex carne mea, & os ex ossibus meis. sic  
 ille. Iam & in illo hæretur, quid ijs fiet qui sen-  
 sum

sum adhuc habebant exiguum, ac propè nullum? an ita reuertentur in uitam, quales sunt infantes & fatui? Infantes uelut in herba habent suum sensum, accipient qualem erant in iusta etate habituri, quasiq; herba ad frugem perducetur, & uiriditas ad maturitatem. fatui uerò, stupidi, dementes, non habent nullam mentem, sed oppressam, atque impeditam: soluetur ac liberabitur, quemadmodum oculi reddentur cæcis, & manus ac pedes mancis. perfecti homines resurgēt omnes. hoc nemini debet uideri admirabile, qui consideret autorem illius resurrectionis. Quippe imperfectiones corporum, atque inde sensuum, & mentium humanarum in hac uita uel existunt ab imbecillitate artificij naturæ, uel à casu aliquo, uelut morbo aut læsione. Si ad uitam illam reducemur à natura ipsa, & obnoxij essemus iniuriæ ueriorum casuum, talesq; haud dubiè essemus, quales hic. Sed sine ministerio naturæ reddet nobis corpora & humanam uitam rex ille & dominus naturæ, in quem non cadit ignoratio, non infirmitas, supra casus omnes. quocirca nihil eorum nobis tum accidet, quæ hic uel ab infirmitate, uel à casibus eueniunt. Et mutatum iri humana corpora in conditionem longè hac nostra potiorē, reputanti status illius excellentiam manifestissimum est. non enim magnitudo beatitudinis  
 animo.

animorum infirmitate, horum corporum uilitate, miseria posset contineri & consistere. Quid, quod nec cœlestis ille locus quem sumus habitaturi, hanc ignobilitatem & turpitudinem corporū posset perferre.

DE CESSATIONE  
uicissitudinum.

**C**orpora nostra immortalī Deo in sempiterna beatitudine unita immortalia erunt, ut anima ipse. Homo enim ex corpore constans & anima, medius inter mentes illas qui angeli dicuntur, et corpora sublunaria, ut angeli, ita et ipse ab animo immortalis est conditus: à corpore autem, quemadmodum hæc subcœlestia, caducus & mortalis, quoad uaga hæc infirma et peritura subcœlestia statuentur firma, stabilia, sempiterna: tum & nostra corpora, sicut res illæ unde est desumptum fictumq; firmabitur in æternitate uitæ. Nec beati essemus, si rursus esset nobis in uitam reuertendum. Nam uel morituri reuerteremur, et iterum surrecturi, uel post mortem nunquam reuicturi amplius, si rursus exurgeremus eadem ratione & sæpe & infinities, quod est ridiculum. Sin absumptis corporibus soli remanerent animi, iam non homines essemus, sed animi corporibus exuti. Quod si ad eandē essemus uitā reuersuri, quid miserius, quā iterū eosdē labores, easdē calamitates subire?



subire: si ad aliam incertam, quid possit illis mentibus nunciari tristius, quàm uenire rursus in aleam infœlicitatis, in qua incertus sit exitus, utrùm ad eandem reuolabunt fœlicitatem, an in eam detrudentur miseriam, qua uident inimicos Dei plecti? Hinc quum non possent se Pythagorici extricare, & philosophi alij, qui reditus animorum in hanc uitam illis authoribus posuerunt, uelut Plato & Platonici, ijsq; non pauci poëtarum assensu, flumen lethæum excogitarunt apud inferos, ex quo bibentes animi, obliuionem haurirent omnium rerum actionumq; transactionum, rursus & inciperent in corpora uelle reuerti. Itaque quoniam beati illi animi si se à beatitudine illa casuros scirent, non possent plena fœlicitate perfrui, nescire illos hanc sortem uoluerunt. Quæso cuius est impudentiæ, affirmare mētes illas corporibus, hoc est tenebris atque ignorantia exutas, in illa rerum omnium luce ac scientia nescire quid sit sibi euenturum: nos in tanta caligine, seu uerius cecitate ad omnia, profiteri nos, quæ est hæc tam proiecta ad mentiendum impudentia, scire? quis edocuit? quis nunciauit? Sed fortasse non omnino nec sciunt neque nesciunt, sed dubitant. atqui uel ea ipsa dubitatio gaudia illa tam immensa diluit. Et si alios uidet ad uitam hanc redire, ex illis, posunt de se indubiam coniecturam capere. Quæro  
iam,

iam, quod ob crimen ex tantis illis bonis rursum  
 ad ergastulum hoc, extremaeque miseriae condi-  
 tionem uoluuntur? nam nullo eorum commeri-  
 to, non est credibile ab optimo Deo in mala hæc  
 à foelicitate illa deturbari. Delictum omne ex ig-  
 norantia aut imbecillitate nascitur in illis animis  
 purissimis ac purgatissimis, quæ in scientia re-  
 rum omnium uersentur, in quibus nullæ sunt  
 prauæ cupiditates, nulli affectus qui uoluntatem  
 sollicitent contra rectum, ubi nulla ignorantia,  
 nulla infirmitas in statu rerum, quo nullum ne-  
 que possent meliorem optare, neque uellent, quæ  
 potest subire uel occasio peccandi, uel causa?  
 Adde his, quod reditus animorum in hanc condi-  
 tionem corporum ac uitæ, contrarius uidetur  
 efferationi et causæ, cur Deus hunc mundum  
 condiderit, de qua sumus superiore uolumine lo-  
 quuti: quæ quidem est, ut mentes multas partici-  
 pes faceret suæ beatitudinis. quod ubi esset iam  
 perfectum, cuius foret libidinis puerilis ac lusus,  
 rursus infectum facere, et ita uicibus cadendi et  
 surgendi foelicitatis ac miseriae capi ac delectari?  
 uelut quum pueri domunculas ex bacillis et rude-  
 ribus componunt, quas subinde construunt et  
 diruunt, atque in uarias facies conformant, qua-  
 rum nulla diu placet. Quod si nostra corpo-  
 ra immortalia erunt in cœlis, et Deo immorta-  
 li summo

li summo ac præpotenti iuncta, quasiq; in eo absorpta, in quo uno sunt bona omnia, non indigebunt profectò fulcimentis uitæ, nec ad crescendū, nec ad morbum propulsandum, nec ad mortem uel deuitandam uel differendam. Cibus enim & medicina propter uitæ sunt reperta, quæ uita si propter coniunctionem cum ipsa immortalitate nunquam est defectura, nec externis alimentis aut adminiculis indigebit. Quocirca quæ ad uitæ huius nostræ transigendæ usum ac rationem pertinent, stirpium, animantium, florum, frugum, ortus, maturitates, interitus, opportunitates arandi, serendi, metendi, uigilandi, dormiendi: hæc cessabunt omnia, uidelicet quiescet opus sine sublato. finis enim natura & conditio est, agentem instigare ut insistat & perseueret in opere. Nihil ergo opus uere, æstate, autumno, quæ ad percipiendas res hisce usibus necessarias spectant: non die, nec nocte, quæ ad actionem & quietem horum corporū. Cursus ergo & conuersiones cælorum sistent. neque enim erit opus amplius ijs quæ per eiusmodi motus fiunt uel ad uitæ necessitatem, uel ad contemplationem ingeniorū, ut inde qualis esset author & rector uniuersorum intelligerent, eumq; reuererentur piè accolerent. Ea uerò non abolebuntur, quæ non sunt nostra, sed mundi, ut cælestia corpora & eorum species

species ac ornatus, tum elementa mundi inferioris. Quale autem nunc cœlum perdurare cernimus, talis erit post resurrectionem uniuersalem mundus sublunaris. In cœlis enim iam est munere conditoris sui essentia immortalis cum qualitatibus mortalibus, nempe motibus & uicissitudine conuersionum. sub cœlo autem semina sunt tantum immortalitatis, quæ tunc in stirpes & fructus consurgent, quum erit Deus (sicut Paulus inquit) omnia in omnibus, id est, Dei uita atque immortalitas per omnia communicata & diffusa. Quod si mortale ad immortalitatem adducetur, purum certe ac defecatum, et in sua naturali essentia constituetur, detractis sordibus. eluit quidem aqua, & emundat, sed extima: ignis uero etiam intima perpurgat, ut experimur quottidie in aqua, uino, oleo, metallis, carnibus. Emundatio igitur horum elementorum à permistione sordium, quas ex perpetuis generationibus & corruptionibus contrahunt, eo instrumento fiet, quo mundissime perpurgantur omnia, nempe igne. Tunc erit quies cœlorum, siderum, elementorum: & quemadmodum ille inquit, maximorum arcanorum conscius, liberabitur creatura omnis à seruitute corruptionis, id est ab eo labore, quem propter res corruptibiles perpetitur. Exustionis huius mundi sublunaris odor quidam etiam ad gentes manauit. Panætius Stoicus  
(ut



(ut Cicero tradit) metuebat, ne ad extremum mundus ignesceret. Et Plinius ait, Vergere mundū iam in uices ignis. & Ouidius, ex fatis indubiè Sibyllinis ait, sed poëtice,

Esse quoq; in fatis reminiscitur, affore tempus,  
Quo mare, quo tellus, correptaq; regia cœli  
Ardeat, & mundi moles operosa laboret.

## DE IUDICIO

Iesu Christi.

**I**N uita hac, & mundi huius decursu, omnia uidemus permixta & confusa, bona malis, parua magnis, bonis damna accidere, malis commoda, et uice uersa. quæ res magnopere multorum perturbauit iudicia: adeo ut de prouidentia, qua uniuersitas continetur, malè existimarent, & induceret pro æterna illa & immensa sapiëntia fortunā, & casum, & temeritatē. Par est ergo, & sapiëntiæ æquitatiq; rectoris omniū ualde congruens, ostendi hominibus, angelis, dæmonibus, distinctionem aliquā bonorum ac malorum: itaque iudicium illud extremum & uniuersale. Iudicauit quidem Deus initio mundi huius sathanam, & totam eius factionē, conscijs quidem angelis, sed non conscijs hominibus. iudicat unumquenque statim à morte, sed in occulto. aliquod ergo restat iudicium uniuersis mentibus manifestum, ut boni iustitiam Dei laudent, mali de illa non possint conqueri. & in eo in

dicio patefaciet Deus omnibus, quo consilio ea e-  
 gerit, quæ stulti homines reprobabāt, quum non  
 intelligerent. tunc simul ipse de uniuersis iudica-  
 bit, simul ostendet quàm prauè sit de se à multorū  
 dementia iudicatum. Conscientiæ omnium omni-  
 bus patebunt, ita momento temporis unusquisque  
 de se pronuntiabit. bonus accedet ad Dominum  
 cum fiducia, malus autem metuet Deum, & ex  
 metu oderit: odium autem inducet mœrorem, in-  
 uidiam, rabiem. & odium hoc nunquam restin-  
 guetur, quia in tanta acerbitate ac diritate tor-  
 mentorum nemo ad se unquam reuertetur, nec ad  
 reputationem suorum scelerum, & diuinæ iusti-  
 tiæ. sed quod uidemus hic inter nos contingere, ut  
 nemo sit tam nocens ac nefarius, qui in tormentis  
 & cruciatibus meminerit legum, iuris, æquitatis,  
 tum suorum commissorum sceleratè, impiè, nefar-  
 riè, se iniuste torqueri clamat, & conqueritur: ita  
 & demones, & impij demonum socij, in tormen-  
 tis illis iniuriam sibi à Deo fieri clamabunt, & il-  
 lum uelut iniquum incessent conuicijs, ac oderint.  
 Odium uerò æternum æternam quoque pœnam  
 efficiet. Res hæc est horrore plena, non solum il-  
 lis miserrimis, sed nobis etiam, quorum exitus est  
 incertus. Iesus Christus uelit nobis adesse propiti-  
 us & misericors, qui est futurus iudex uiuorum  
 & mortuorum, cui pater dedit omne iudicium,

multis

multis de causis. primum, quia ipsi pater subiecit omnia, & dedit eum caput uniuersitatis rerum. tanquam dominus igitur & princeps, & caput iudicabit reliqua. Ipse redemit humanū genus à seruitute diaboli. liberos ergo suos iudicabit patris. Ipse est legislator supremus, de custodia suarum legum iudicabit. Veniet iudex corporalis ad iudicandos corporales: ueniet homo ad homines, ut similis natura similem possit iure arguere, absolueret & condemnare, non ignara eorum quæ soleant in eiusmodi natura incidere.

Sed quid fiet ijs, quibus non est Euangelium prædicatum? aut quibus propter uetustatem excidit, iam pronepotibus, nec aliud audiuerunt quam mores patrios? Hanc quæstionem proponunt homines curiosi, qui relicto penso sibi iniuncto respiciunt ad aliorum labores. Audi Sapientem: Altiora te ne quæsieris. Tantum quæ præcepit tibi Deus, ea cogita semper, &c. Dominus in Euangelio huic curiositati prospexit. Nam quum dixisset Petro, Sequere me: is conuersus, uidit discipulum quem diligebat Iesus, & dixit ei, Domine hic quid? reprobauit curiositatem eius Dominus, nec respondere dignatus est, quid de illo esset futurum: Sed si sic eum uolo manere, donec ueniam, quid ad te? tu me sequere. Quomodo autem in iudicio quisque tractabitur, non est.

ingenij nostri dicere. Dominus ait, quod remisibi-  
lius erit Tyro & Sidoni in die iudicij, & Niniui-  
tis, &c. Non dubium est, quin auditores & negle-  
ctores uerbi grauius punientur. Paulus quoque  
ait: Gentes quæ legem non habent, & naturali-  
ter ea quæ legis sunt faciunt, ipsi sibi sunt lex. Om-  
nes seruat filius Dei, uel sine humanitate, uel cum  
humanitate, per amorem & fiduciam in se.

D E P R A E D E-  
stinatione.

**M**agnus scrupulus & magna querela mul-  
torum, soli electi consequentur beatitudi-  
nem. Sunt quidam prædestinati, alij reprobati. Si-  
cut scriptum est à propheta: Iacob dilexi, Esau au-  
tem odio habui. Magna disputatio apud Paulum  
ad Romanos. Quid ergo prodest mihi labor, si nō  
sum prædestinatus: nihil proficiam. & cessanti of-  
feretur beatitas, si sim prædestinatus. Hæc omnia  
ignorantia inuoluuntur. de hac quæstione loquu-  
tus sum libro superiore. Verba nostra pauca con-  
gruunt Deo, fore & fuisse non est in eo, omnia sunt  
præsentia, cui hoc esse nostrum uix competit, ut  
Plato, & Gregorius Nazian. dicunt. Opera quæ  
nobis sunt ignota, nempe futura post decem an-  
nos, Deo sunt iam præsentia. Itaque elegit Iacob,  
quia uidet eum bonum: reprobat Esau, quia ui-  
det malum (dicit propheta) quum nihil adhuc bo-  
ni



ni aut mali egissent ante Deum : id est quum nasce-  
rentur , & nondum quicquam uel egissent , uel co-  
gitassent . loquutio est Hebraica . Mundo erant par-  
uuli , Deo iam senes : sed ante Deum dicitur fieri ,  
quod foràs prodit . Omnes ergo uocat Dominus ,  
quoniam omnibus ostendit , & proponit magna  
bona . Electus autem , prædestinatus , præsci-  
us , nostrorum sunt operum . Deus omnibus se offert ,  
hæc est uocatio : si quis utitur , est electio : si usq[ue]  
in finem , prædestinatio : si quis reijcit , induratio .  
Ex euentu ergo ista indicantur . ut quum dicimus  
iram Dei , furorem Dei , poenitentiam Dei , &c .  
ex effectis . Tu ergo te facis prædestinatum , ele-  
ctum , aut præscitum , induratum , &c . At gratia  
Dei est quæ agit . Ita est , sed ea parata est omni-  
bus . Ego sto ad ostium , & pulso . Et illuminat om-  
nem hominem uenientem in mundum . Non quin  
aliquibus offeratur maior gratia propter publi-  
cas utilitates , ut Paulo , & apostolis : sicut non-  
nullis perspicacius & felicius ingenium , corpusq[ue]  
ad uirtutem flexibilius , ut qui sortiti sunt animam  
bonam . Omnibus tamen tantum offertur , quan-  
tum si excolerent , & gratia Dei in eis uacua non  
esset , ad perfectiora eueherentur , ut Abraam , &  
Centurio . Naturalia uaria sunt , & ea quæ uo-  
cantur indifferentia , alij sunt claudi , alij cæci , alij  
muti , alij longæui , alij breuis uitæ . quantum au-

tem ad necessarium illud attinet, omnibus est prospectum. Deus enim omnes homines vult saluos fieri, & ad agnitionem ueritatis uenire. Sed in his omnibus satius est Domini consilium adorare, quàm scrutari. Ideo Paulus considerans nostrorum ingeniorum tenebras atque imbecillitatem, quanta autem firmitate & contentione mentis, tum etiam luce opus esset ad hæc reputanda, seuere reiecit eos qui se temerariè ingerebant in eam questionem. cuius conclusio est, O altitudo diuitiarum.

LIBRI SECUNDI  
FINIS.

IOAN.

IOANNIS LO/  
DOVICI VIVIS DE  
Veritate fidei Christianæ Liber Ter-  
tius, qui est contra Iudæos,  
quòd IESVS est  
Messias.



**N**OLESTA pars huius ope-  
ris & perplexa sequitur, dispu-  
tandi aduersum Iudæos, genus  
hominum impudentissimæ per-  
uicaciæ, quam odium exacuit  
contra nos & Iesum Christum Dei filium. ea ue-  
rò difficiliter retunditur propter obscuritatem san-  
ctarum literarum ueteris testamenti, in qua tamē  
obscuritate postulant illi atque exigunt, ut à no-  
bis ex prophetarum uaticinijs & patrum figuris  
fiat liquidum, Iesum Mariæ filium esse Christum à  
lege & uatibus promissum: nec patiuntur nos  
quicquam iudicio ac ratione adhibita interpreta-  
ri in illis oraculis, sed ut doceamus aperte & di-  
sertis ac simplicibus uerbis citra figuram id esse  
expositum & declaratum. in quo facile quiuis re-  
cte statuens intellexerit, stomacho illos atque odio  
ferri, non mentis iudicio aliquo & sententia. ita

enim obstinarunt animis aduersari Christo Dei, ut ad fulgorem lucis occludant oculos, & quæ apertissime ac manifestissime sunt dicta nolint audire, ne cogantur id confiteri quod abominantur. Capti uerò & deprehensi in mille sese formas conuertunt ut euadant, comminiscuntur nouas lectiones scripturarum, admittunt atque asseuerant absurdissima, & Deo ac lege sua indignissima, modo uel contra nos faciant, uel ne pro nobis. Operosum est hos sanare, qui & medicinam oderunt, & medicum non aliter detestantur, quàm carnificem aliquem ad occidendum inductum. Nos tamen de caussa ita disputabimus, ut si quis non sit aliorum similis, malicia & maleuolentia sua perditus & deploratus, reduci ad mentem meliorem possit. Et quo manifestior fiat nostra ueritas, Christianum introducemus & Iudæum, sectam suam quàm fieri poterit acerrimè ac fortissimè propugnantem: sic tamen, ne obstinaret animo pernegare omnia etiam ueritatis manifestæ, sed qui cedat apertæ rationi, & homo cum homine humanæ ratione ac iudicio disceptante contendat.

CHRISTIANVS. Quis nam est liber iste, quem habes in manibus? IVDÆVS. Est liber ueritatis, liber sanctus, lex nostra Hebraicè scripta. CHR. Intelligis ne quæ isthic legis? an est liber tibi clausus, quemadmodum ille apud Esaiam:



Esaiam: Et erit uobis uisio omnium prophetarum, sicut uerba libri signati, quem dabunt scienti literas, dicendo, Lege nunc istum. & dicet, Non possum, quia signatus est. IVD. Nauo certe operam, & id quanto possum studio laboro, ut aliqua intelligam. CHR. Si eò usque perueneris, ut uerè & quemadmodum decet intelligas, ilicò eris Christianus, & baptismum petes, ut sis de grege Ecclesiæ catholicæ. IVD. Quì isthuc?

CH. Quoniam abs te & Iudæis omnibus nihil equidem aliud requirerem, quàm ut de Deo non sentiretis aliter, quàm & illum decet, & uosmet ipsos qui estis homines. IVD. Rem tantam promittis, ut uix mihi uel audisse, uel intellexisse credã. Dic quæso te denuò, & explicatius. CH. Aio & confirmo unicam rem obstare, quo minus ad professionem Christianæ fidei accedatis, quòd de Deo non sentitis ut dignum est illo, & ut dignum est homine mente ac ratione prædito.

IVD. Atqui Deus id nobis iniungit, & nos id studemus, & præstare nos arbitramur. CHR. Equidem præcipuam esse errorum atque impietatis uestræ causam reor, quòd de Deo indignè ad maiestatem illam sentitis. Nam si uti par est sentiretis, quis uestrùm ferret literas ueteris testamenti ad humillimos atque abiectissimos sensus inuitas ac repugnantes esse detrusas? quis librū Thal-

muſ, quo nihil excogitari poteſt in Deum contumelioſius? Cedò uerò, quid tu cenſes eſſe hominē? IVD. Id quod uides. CH. Facilius ac melius tu reſpondebis mihi docenti, quàm ſimpliciter roganti. An non homo ex corpore conſtat & animo? corpus eſt hoc concretum & aſpectabile: animus eſt qui non uidetur, niſi per actiones quas edit in corpore magnas atque admirabiles. IVD. Ita eſt. CH. Penes animum eſt ratio & imperium uoluntatis, in corpore autem ſeruitium. IVD. Facile eſt hoc animaduertere. CH. Nemo eſt qui hæc nō poſſit & euidentibus rationibus declarare, & multis uerbis extendere: idcirco à me dicentur breuius, quia nulli dubitata. In ipſo uerò homine non annotaſti aliquando motus illos & tempeſtates iræ, inuidiæ, mœroris, odi, metus, cupiditatis, quæ perturbationes uel affectiones nominantur? IVD. Quis non hæc ſingulis momentis & in alijs cernit, & in ſemet ipſe experitur? CHR. Poteſt ne inueniri aliquid miſerius aut calamitoſius, quàm ſic iactari & agitari illis intemperijs, & quaſi furijs? IVD. Nihil planè, quoniā quidē nihil poteſt beatius fingi, quàm illis carere, ſedata et trāquilla eſſe prorſum omnia in humano pectore. CH. Eſt ita ut dicis. eaq; de cauſa ſapiētes quidam de gentibus, humanā beatitudinē in pace & quiete animi collocarūt, quā illi græco uerbo εὐθυμία nomi-

nominabant. IVD. Nos quoq; ex uetustissimo patrum nostrorum more nihil possumus cuiquam optare felicius, quàm pacem: existimo de cordis pace esse intelligendum. CH. Quid corpus, quale uidetur tibi esse? IVD. Fex & sordes. CH. Planè olidum sterquilinum pellicula contextum. quāta in eo miseria, quā uaria, quā singulis uirgēs momētis, quā inexplicabilis necessitas edendi & bibendi, egerendi, dormiendi, morbi, debilitates, mutilationes, infirmitates? Talis est homo. qualem porrò censeres esse angelum, an ijs miserijs subditum? IVD. Non sat scio. CH. Atqui ratio ipsa facile te deducet ut scias. angelos nōne illos esse existimas, qui in cœlis astant Deo beati iam, & de sorte sua certi ac securi? IVD. Eos uocāt angelos sacræ literæ non uno in loco. CHR. Si Deo sunt proximi in cœlis, & ea causa beati, iam ad eos nō potest malum pertingere, nec ulla ex nostris his miserijs: futuros alioqui nō beatos, sed miseros, uti nos sumus. Non ergo sentiūt corporum nostrorum incommoda, non animorum seuos motus atque agitationes. Ascendamus iam ad cognitionem Dei aliquam. Quanto uos illud ore detonatis, Notus in Iudæa Deus, & in Israhel magnum nomen eius. Atqui pudet dicere, sapientius & religiosius philosophi quidam gentiū sentiunt & loquuntur de Deo, quàm Rabini uestri.

Non

Nam pleriq; uestrum Deū sibi fingunt, regē quendam paulo potentio- rem Alexandro aut Iulio Cæsare, paulo sapientio- rem Solomone, paulo melio- rem Abramo uel Dauide. Sunt etiam qui homi- nem esse arbitrentur, & humanis membris compo- situm, & sedem eius esse in cœlis supra Hierosoly- mas, quæ sint terræ umbilicus, ut olim apud gen- tiles Delphos. Quod si corporatus est, imaginem habet. contra est apud Esaiam: Cui assimilastis, inquit, Deum, & quam illi imaginem ponetis? Cur autem uetamini simulachrum ullum in tem- plo uestro ponere, nisi quia solum Deum iussi e- stis colere? huius autem nulla est facies, nulla for- ma, qui spiritus sit corporis omnino exors. Quæ- ram autem de forma. non dubium quin dicetis esse humanam, iuxta illud, Creauit Deus hominem ad imaginem & similitudinem suam. quod si ea sit fi- gura & compositione corporis, quid reliqui est, quo minus sit homo, & hominis imago grata sit il- li, & sub ea coli & adorari se non uetet, nempe simili essentiæ ac naturæ suæ, quæ que ipsum uerò ac propriè referat, & ad memoriæ uestre moni- tionem tale simulachrum ne reiiciat, neque dedi- gnetur? Quomodo autem sedet super Hierosoly- mas, qui dicit per Hieremiam: Cælum & terram ego impleo? IV D. Istiuc quidem certè ad uim & potentiā illius pertinet, quæ se per mundi uni- uersi-



uersitatem late pandit, ut regis per regnum. CH.  
 Si uis & maiestas præpotentis Dei per cunctum  
 orbem se tendit, cur peculiariter sedere dicitur su-  
 per Hierosolymas? quid refert ubi sedeat? nisi for-  
 te in potentiæ immensitate melius auditurum eum  
 aut uisurum opinamur de propinquo, quam de lō-  
 ginq̃uo: quod est æmentissimum dicere. Quomo-  
 do enim gubernator esse mundi posset idoneus, aut  
 iudex omium rectus, si non se æqualiter in omnia  
 impenderet? multa profectō uelut derelicta præ-  
 termitteret, & negligentius curata: nec iudicare  
 de omnibus posset æqualiter, qui non omnia æqua-  
 liter cognosceret. audiret ille scilicet & uideret  
 exacte & subtiliter quæ agerentur, dicerentur ue  
 Hierosolymis, crassius & neglectius quæ Romæ,  
 aut in Persia: quod cadere in uim illam sapien-  
 tiamq̃ infinitam, non dico philosophi & homi-  
 nes ingenio aliquo præditi, ne aniculæ quidem im-  
 peritæ, aut rudes pueri existimarent. Quorsum  
 uerò attinet sellam illi ponere? nunquam ne stat,  
 non deambulat, non à sede discedit sua, nunquam  
 se commouet? Quæ autem magnitudo corporis  
 infinitæ illi naturæ conueniet? finitum est enim,  
 quicquid limitari ac determinari potest. Equidem  
 uehementer miror in eo falli multos uestrū uni-  
 us ueri Dei cultores, qui legem ab eo & præce-  
 pta accepistis, qui tot habuistis prophetas, & san-  
 ctos

Etos viros, in quo gentiles non falluntur, homines  
 sine Deo & pietate. IVD. Quid uos, an non  
 idem sentitis? CHR. Deus meliora. IVD.  
 Nonne Christum hominē Deum esse dicitis? CH.  
 Ita planē. Verū membra illa humana non Dei  
 sunt, sed humanitatis Christi: nec Deus habet cor  
 pus, sed adiunxit sibi corpus, non ut eo uestiretur,  
 quemadmodum hominis anima, sed ut haberet si-  
 bi applicita atque admirabili quodam nexu con-  
 iuncta, liber tamen illis & solutus per se. IVD.  
 Verisimilius est quod dicis de spiritu Deo, & im-  
 mensa illa maiestate condignius. CHR. Perga-  
 mus porro, an non est uirium ac potentiæ intermi-  
 nabilis? IVD. Sic uidetur, quia fecit cælum &  
 terrā, & quæcunq; uoluit. CH. An non regit  
 & gubernat omnia? IVD. Quid ni? CH. In-  
 spicit ne cogitatus hominū? IVD. Scrutans cor-  
 da & renes Deus. CH. Ergo est sapientiæ im-  
 mense. IVD. Magnus Deus noster, & magna  
 uirtus eius, & sapientiæ eius nō est numerus. CH.  
 Audi Esaiam, ut una concludamus sententia. Deus  
 æternus dominus, qui creat terminos terræ, nō de-  
 ficiet, nec laborabit, & non est inuestigatio intel-  
 ligentiæ eius. Quod si omnia potest, nihil ad eum  
 accedet mali, nihil incommodi. ille enim potest a-  
 uertere, ne ad se perueniāt. Nam quibus mala con-  
 tingunt, ex imbecillitate ac potentia contingunt.  
 quippe

quippe nollent ea perferre: sed non tantum habēt  
 uirium, ut ualeāt deuitare aut resistere. Si uerò est  
 sapiētiae infinita, praeuideret omnia. I V D. Mil  
 le anni in conspectu Domini sicut dies hesternā  
 quae praeiit. C H. Praeuidet ergo, & prouidet,  
 ne damna ulla ad se perueniāt. Malum ergo & in  
 cōmoda & damna, & res tristes, quae omnia sunt  
 ex infirmitate, longissimē absunt ab illa infinita ui  
 & facultate. Nemo sibi accersit malū ultro: at in  
 ferre illi malū inuito, qui sit immensus potentia &  
 uiribus, nulla res potest, sicut scriptū est, Volunta  
 ti eius quis resistit? I V D. Non uidetur aliter pos  
 se uel fieri, uel cogitari. C H. Ergo quae sunt infir  
 mitatis ac miseriae humanae, non cadunt in Deum:  
 contrahi mœrore aut odio, dilatari lœtitia, exulta  
 re, effruescere in iram, contabescere liuore, extol  
 li superbia & arrogantia, quae nos miserrimos ac  
 infelicitissimos efficiūt. I V D. Non uideretur bea  
 tus, si hisce tempestatibus quateretur, quibus nos.  
 C H. Hæc quae posuimus omnia si uera sunt, si ma  
 ximē rationi consona, & ingenijs recte de diuina  
 illa natura statuentibus, quomodo animi uestri ad  
 Thalmudi blasphemias atq; impietates non cohor  
 rescunt, in quo libro describitur Deus propemo  
 dum miserior homine, dolens, flens, lachrymās,  
 pœnitens, afflicans se, iratus, seuus. pœnitet  
 propter mala Israël, & lachrymatur semel  
 quotidie.

quottidie. An non ipse sciebat ea euentura? & si sciebat se tantum doliturū, cur permittebat? quæ erat ignorantia, si nesciebat? uel imprudentia, si non norat modum euitandi: uel impotentia, si ultro in eam se miseriam conijciebat, modò præfenti animi impotentia obsequeretur? Et iracundus est Deus, semel quottidie irascitur, quum galli crista expallescit: quia legitur apud Iob, Quis dedit gallo intelligentiam? Qualis est autem sapientia, quottidie aliquid legere in Thalmud tanquā discipulum, nempe primis quatuor horis diei: & quum Hierosolymis templum fuit euersum, non remanserunt Deo nisi tres cubiti soli, aut quatuor, ubi sederet lecturus in Thalmudo. Ergo uel rabini qui Thalmud conflarunt, sapientiores sunt Deo: uel Deus obliuiosus est, qui non recordatur, quæ ipse illis inspirarit. Additis Deo inuidentiam & metum, ut quum reliquit foramen ad septentrionem ad experimentum diuinitatis, si quis alius se Deum esse iactaret, ut iuberet lacunam illam implere. Quid referam uos Deum dicere mentitum, & peccasse, quòd lunam minorem fecisset sole? Descendit eadem cæcitas procacitas ad angelos, ad cælos, & lunam facitis calumniam de sole ad Deū detulisse, unde sit lumine diminuta. Tum de Adam, quòd fuerit gemina nature, & quòd rē habuerit cum omnibus animantibus: quòd uerò nullum



nullum esset ingenio suo satis aptum, creatam esse  
 foeminam. de Zelotypia corui aduersus Noam in  
 archa, quæ portenta uos non pudet in literas sa-  
 cratas mittere, me in hac dissertatione pudet refer-  
 re. Et transeo nugas plusquam pueriles, ut de con-  
 uiuiis omnium circuncisorum, quæ omnia breuiter  
 præcurro: nā tibi multo sunt quam mihi notiora.  
 tum historias rerū, et rerū narrationes non solū  
 apertissime mendaces, sed ineptissime ac stultissi-  
 me narratas: uelut de Og rege Bassan, de Tito Ve-  
 spasiano, deq; excidio Hierosolymorum. Et ad  
 hæc adeo ridicula non ueremini detorquere maie-  
 statem sanctarum literarum. Congeritis loca ex  
 Iob, Esaia, Psalmis, et quæ sancti homines per me-  
 taphoram, ut mos erat tum loquendi, ad spirita-  
 lem referebant intelligentiam, uos in cœnum car-  
 nalitatis impie atque impudenter detruditis. quæ  
 ne pueris quidem aut uetulis possent persuaderi,  
 nisi consuetudo et affectus recto iudicio officeret.  
 Et hæc non docent cerdones, aut culinarij, aut sex  
 uulgi, quod uix esset tolerabile: sed proceres et  
 rabini, ingenti supercilio atque arrogātia, de qua  
 nemo possit satis loqui pro dignitate rei. Fuerunt  
 enim inter uos rabini, quos in ueneratione atque  
 admiratione habetis, fatui, temerarij, impudentiæ  
 proiectissimæ, qui auxerunt impietatem et tene-  
 bras uestras, blasphemij in patriarchas, in prophe-

tas, in sanctos omnes, in legem, in Deum ipsum.  
 alij tradiderunt prophetas mentitos, alij se audi-  
 uisse Deum plorantem. alius uidit eum afflictan-  
 tem se, quod iuravit se nociturum Israeli, & que-  
 rentem a suo iuramento absolutionem. alius se ait  
 adeo iustum & sanctum esse, ut posset in die iudi-  
 cij diuini liberare mortales omnes, qui post se es-  
 sent nati. quod si una iungeretur Ionathan Vziel,  
 possent genus humanum uniuersum seruare ab A-  
 dam usque ad postremum hominem. Esset ne inue-  
 nire furiosos, mente captos in uinculis, quibus in-  
 uiolentia furoris talia uentirent in mentem? qualia  
 hæc uidentur tibi? IVD. Per Deum pudenda.  
 CHR. Vide quid facit affectus, & quantopere  
 iudicium inflectat. nullus est Iudæus, qui cum hæc  
 audit in synagoga in calore illo animi, in flamma  
 odij aduersus Iesum & Christianos, a quo sacrifi-  
 cia uestra omnia auspiciamini, non suspiciat & a-  
 doret. eadem si ardore illo refrigerato foris audi-  
 at, suffundetur rubore, quod huiusmodi recipiat  
 & approbet. Profecto si quid haberetis mentis ac  
 iudicij, si quid in priscis scriptoribus legissetis, si  
 ingenuum haberetis in re aliqua sublimi ac præ-  
 stanti uersatum & excultum, is unus liber Thal-  
 mundi satis esset ad animos uestros a Iudaismo auer-  
 tendos, & a doctrina & fide uestrorum rabino-  
 rum. Sed uos ad omnia estis cæci & surdi, præter-  
 quam

quàm ad questum pecuniæ. Leuior mihi & expeditior esset cum gentili concertatio, adferunt hi ad disceptationem ingenium, iudicium, cognitionem rerum uariarum, omnisq; memoriæ antiquitatis notitiam, attentionem animi ac moderationem: uos nihil nisi obstinatam pertinaciam, ignorantiam uniuersorum, & rabiem cuncta damnandi.

I V D. Omitte ista quæso otiosa, & ad institutum reuertere. C H R. Colligamus ergo nos ipsos. Est æternus Deus, immensa potestatis, sapientiæ, bonitatis, sibi per se sufficiens, bonisq; uniuersis ex se cumulatisimus, atque hac de causa summe beatus: maior denique & melior per omnia, quàm uel cogitari ab humano possit animo. Si optimus est, nemini inuidet: nec est causa cur inuideat, si potentissimus, & cuius uoluntati nihil potest obistere, obtemperant cæli ac terra, mitissimus est igitur, & mansuetissimus. Quod si est optimus, uult benefacere omnibus: & quia potest & uult, profecto benefacit ijs omnibus qui se illius beneficijs non subtrahunt. liberalis est, igitur & mitissimus. Quæ omnia non ut de homine dicuntur aliquo, sed de natura infinita infinite, non a混istione contrarij cuiusquam, ut in nobis, sed pura sunt illic omnia, nec aliusmodi esse possunt: non enim optimus est Deus, ut homo, in quem aliquid incidit maliciæ, uel potest incidere.

pura sunt in illo omnia, & perfectissima, talia fue-  
 runt ab eternitate, talia perseverabunt seculis in-  
 terminabilib. an non talis uidetur tibi infinita illa  
 & suprema natura? IVD. Ita profecto. CH.  
 Nec aliud est dignum de illa uel sentiri, uel cogita-  
 ri, uel existimari? IVD. Mea quidem sententia  
 nefas esset inexpiabile, aliter de illo cogitare. CH.  
 Plane grande nefas. Sed nec te rem credas maxi-  
 mam præstare, quòd ita de Deo sentias, ut par est  
 fecerunt hoc idem non pauci de gentibus, quorum  
 patribus nec erat Deus loquutus, ut uobis, nec te-  
 gem tulerat. IVD. Atqui res est mihi utiq; non  
 parua, ut sunt plerique nostrum in hac de diuinæ  
 substantiæ sententia crassi, & nonnihil uti iam in-  
 telligo, si modo eloqui liceat, impij, ac in Deum  
 blasphemi. CHR. Atqui pietatis totius funda-  
 mentum primum & basis est, de Deo, uti dignum  
 illo est, sentire: tum de homine. de quo quid exi-  
 stimes, peruelim audire. IVD. Quid existima-  
 rem aliud, quàm de animali infirmo & misero?  
 quemadmodum Iob cum describit: Homo natus  
 de muliere, breui uiuens tempore, repletur multis  
 miserijs. CHR. Etiam, sed aliquid maius esse ac  
 præstabilius oportet, de quo idem uir Dei dicit:  
 Etiam super hunc aperuisti oculos tuos, & me ad-  
 duces in iudicium tecum. & David: Quum uideo  
 cælos tuos, opera digitorum tuorum, lunam & stel-  
 las,



las, quæ tu es fabricatus: quid est homo quod memor es eius, aut filius hominis quod uisitas eum? Res est profecto excellentissima, cum qua Deus dignatur loqui, uersari, legem ei ferre, pactum et fœdus cum eo ferire. Cedo, ex quibus tandem partibus homo est compositus? an non homo ex animo et corpore? IVD. Nemini hoc est dubitatum. CHR. Corpus nonne caducum est, et mortale? IVD. Ita plane est. CHR. Animus an non sempiternus? IVD. Nondum id quidem inter nostros satis constat, propter dictum illud Solomonis in Ecclesiaste: Quia exitus est filiorum hominum sicut exitus brutorum. CHR. Totam ipsam sententiam mihi excute, et expende diligentius, quæ altius repetita sic habet. Et uidi amplius sub sole, in loco iudicii impietas, et in loco iustitiæ iniquitas, quod quum ad rationis æquitatisque normam reuocarem, intellexi non esse diuinæ iustitiæ hæc ita præterire, sic confusa. itaque iustum et impium, quos humana censura non distinguit, sed permiscet, Dominus ipse iustissimus iudicabit: et ueniet tempus, quum de singulis rebus pronunciabitur iustum iudicium à iusto Deo. Interea uero dedit Deus homines in uita hac similes brutis, ut qui rem oculis tantum corporis animaduertat, nihil existimet inter hominem et belluam interesse ortu, occasu, progressu, nec post mortem uidet spiritum fi-

liorum hominū ad conditorem suum redire. cogitatio hæc tentatio est Domini, ut uideat an homo sic reputans supra belluam se eriget, an abijciet se in uoluptates corporis, & in curam solummodo rerum præsentium. Hic quidem uidetur mihi esse sensus loci illius. nam idem Solomon in eodem opere apertius, & quidem ubi se colligit, & loquitur iam sine personis & dialogismis: Et reuertetur, inquit, puluis in terram unde fuit, & spiritus reuertetur ad Deum, qui dedit illum. Itaque de anime immortalitate non quero quid aliqui ex plebe uestra delirent, sed quid ipse cum sanioribus uestrorum rabinorū sentias. IVD. Animos profectò non interire cum corporibus, ex pietate nostra est. Nam in aduentu Messie resurgent pij omnes, & in terra promissionis affluent copijs bonorum omnium, uiuentq; tranquillissime ac beatissime. CHR. Quid mali, non etiam resurgent? IVD. Non omnes, sed quidam ex illis, ut sit iudicium Domini, & uideant mali beatitudinem bonorum, qua crucietur. quemadmodum est in Psalmis: Peccator uidebit, & irascetur. CH. Multa uideo esse in ista opinione absurdissima & impia. Primum quòd Solomon in Ecclesiaste, sicut dicebam modò, posteaquā uniuerfa dixisset esse confusa in hoc æuo & permista, ad postremū ait reseruari omnia ad iudicium Dei futurū, quod non posset

posset esse uniuersale & equum, si aliqui malorū  
 resurgerent, non omnes. & in psalmo sexagesimo  
 secundo, Tu domine reddis cuiq; iuxta opera sua.  
 Quid uerò necesse est malorum aliquos reduci in  
 uitam, uidelicet ut spectatores sint felicitatis bono  
 rum? an non plurimi semper erunt adhuc mali &  
 profani, ritus impios sectantes, qui id uideant, si  
 quid hoc ad rem facit? Iam & malos istos, qui ui  
 uent Messiae temporibus, qui persequentur pios,  
 & illorum felicitate torquebuntur, quando iudi  
 cabit Dominus? Adde his, quod si omnes qui ad  
 uentum Messiae uestri expectarunt, reuersuri sunt  
 ad hanc lucem, ut fruantur uitae bonis cum Mes  
 sia, quae Palestina illos capiet, etiam si constipen  
 tur, ut fici aridae, uel uuae passae in fisco sparteo?  
 quae alimenta illis suffecerint? nec minus caperet  
 mundus malos, si multi eorum redderentur uitae.  
 Age uerò, quid faciet boni in terra promissionis?  
 IVD. Fruentur bonis. CHR. Quibus tan  
 dem bonis? IVD. Voluptatibus per uniuersum  
 corpus, copijs rerum omnium, auro, argento, do  
 mibus, suppellectile, & instrumento domestico, ci  
 bis, iucundissime sine ulla interpellatione per sum  
 mam quietem & securitatem. CHR. Atqui san  
 cti & prophetae & optimo quisque ingenio ac  
 praestantissimo, eiusmodi corporis uoluptates ma  
 xime sunt semper aspernati: unde amplissimam  
 Cc 4 assequeuti

assequuti sunt & laudem apud homines, & apud  
 Deum commendationem: ut Hieremias, Esaias,  
 Heliseus, Daniel, & alij quamplurimi. Quod si il-  
 la est hominis beatitudo, profecto Deus in hac vi-  
 ta gustum eius aliquem charis illis suis præbisset,  
 ut scirent iam nunc quid essent ab eo post fata ex-  
 pectaturi. Quæro autem, an in illis hominibus,  
 qui bonis eiusmodi fruuntur cum Messia, mansurâ  
 ne sit hæc naturæ conditio, an penitus sint immu-  
 tandi? IV D. Hæc eadem. CH. Ita uidetur,  
 nam alioqui non ducerentur ijs rebus, quibus nunc  
 natura hæc nostra capitur, ac delectatur. Si ergo  
 ingenium hoc idem in illis erit, necesse est ut exur-  
 gant animorum motus, in alijs arrogantia, in alijs  
 inuidia, in alijs prave cupiditatis aut iracundia,  
 quæ interturbent requiem illam & beatitudinē.  
 IV D. Non erit ita. nam omnes erunt boni. CH.  
 Quantumvis sint boni, non erunt meliores quam  
 Adam, cuius tamen probitas & reclaratio ab ani-  
 mi perturbatione uicta & prostrata est. Age ue-  
 rò num non existimas Messia temporibus futuros  
 aliquos in alijs sectis & religionibus, qui cum ani-  
 mi quiete maximis uitæ huius bonis perfruantur?  
 num non & inter uos esse aliquos censes? isti ergo  
 felices sunt sine Messia. & aliæ res possunt dari  
 homini, maximū illud quod uos per Messiam uni-  
 cum assequuturos uos speratis. IV D. Quid uos  
 de



de Christo uestro? nonne conceditis posse seruari aliquos, qui nihil de illo audierint? frustra ergo uenit. CHR. Nihil hoc habet cum eo, quod dicebam, commune. Nam qui seruatur, Dei munere ac ope seruatur, qui Deus est Christus noster. ita quod nos colimus apertius, ille colit obscurius et tectius. quid simile habet in illis uitæ copijs Messias uester? De felicitate autem bonorum Esaiæ dicit, quod nec oculus uidit, nec auris audiuit, nec in cor et cogitationes hominum ascendunt, quæ suis præparauit Dominus. Sunt ne hæc corporalia, quæ nec cogitatione possumus consequi? Sed Messias tamē iste uiuet perpetuò, an morietur aliquando? IVD. Nostrorum est sententia, moriturum eum, sed progeniem illius ei fore per similem, quæ in illis nos bonis tuebitur ac conseruabit, ad quæ Messias nos adduxerit. CH. Atqui in psalmo septuagesimo primo dicitur, annos illius per omnes generationes duraturos, ut in perpetuum sedeat coram Domino. Quid uerò obstat, quo minus et posteri illius sint etiam Messie? quandoquidem non parum est, parta semel bona conseruare. Quod si Messias morietur, nō dubium est, quin sitis uos etiam tum morituri. non enim meliore eritis conditione, quàm ille. IVD. Nihil dubiū. CHR. Quæ ergo est felicitas hæc, diluta meta amittendi? Iam ergo et erunt illic connubia, et

ortus ac interitus : quid attinebit mortuos in uitā  
 reuocare, quum progenies per generationem pos  
 sit reparari: ut in hoc mundi cursu: & de mortuis  
 redibit eadem quæstio, & tota res eodem recidet,  
 ut inter uitam hanc & alteram illam sempiternam  
 superflua sit illa resurrectio ad edendum ac biben  
 dum, cen quis ex suavi & continuo somno surgat  
 de media nocte ad potandum, ut rursus obdormi  
 scat. Animus enim post hoc Messie regnum non  
 ne permanebit in omnem deinceps æternitatem?  
 IVD. Sic credunt multi nostrorum rabinorum.  
 CHR. Neceffe est omnes id credere, quod est sa  
 cris literis aperte traditum & explanatum. in  
 Psalmis enim dicitur, iustos in perpetuum uictu  
 ros, & preciosam esse in conspectu Domini mor  
 tem sanctorum eius, & mortem peccatorum pesti  
 mam. Cur hæc pessima, si nihil postea sequitur?  
 aut cur illa preciosæ? Imò uilissima est, si non aliter  
 iustus extinguitur, quàm animal mutum, cuius ni  
 hil restat. Daniel quoq; duodecimo, Et multi dor  
 mientes in terræ puluere expergiscuntur, hi ad ui  
 tam æternam, illi ad opprobrium & contemptū  
 sempiternum. Baal item gentilium propheta, non  
 delicias uitæ huius optat, sed, Moriatur (inquit) a  
 nima mea morte iustorum, & fiant nouissima mea  
 horum similia. Postremo ex consideratione huma  
 næ conditionis ac præstantiæ, tum diuinæ magni  
 tudinis

tudinis ac potentiae satis declaratur, non in corpore huius commodis sitam esse beatitudinem, sed in eo quod in homine est potissimum ac excellentissimum, nempe in animo: & non in uita huius curriculo laborioso atq; ærumnoso, sed in bonis sempiternis: idq; magnitudinem illam & munificentiam Dei amicis suis dare pro pietate erga se, æquius est ac decentius. IVD. Nullum ne premium dabitur corpori, socio atque administro laborum animi? CHR. Dabitur sane. sed te ipsum uelim consultum, quale premium dares corpori obsequundanti animo suo in omni probitate ac religione: nonne quod esset ei optimum & optabilissimum? IVD. Quid ni? CHR. Perpende quaeso, utrum sit corpori melius esse, bibere, dormire in hac conditione uitæ uilissima ac miserabili, an solui iugo isto seruitutis, transire ad conditionem uitæ liberam, sine afflictione morborum, absque necessitate edendi & bibendi, ut se tueatur? Quis est hominis sensu præditus, & animo ad humanitatem informato atque imbuto, qui non uideat hoc esse potius atque optabilius? Viuet igitur uitam beatiorē quā ut cogitari possit, non in cura & solitudine uersabitur, quo prementibus hisce necessitatibus satisfaciat, & expleat inanes semper uoluptates, sed tranquillissimè, & suauissimo quodam sensu in eternitate sua perseue-

perseuerabit, non amplius mancipium animi sui, sed socium & compos felicitatis. Huic animi & corporis beatitudini est ne aliquid quod possit cōparari: sicut Esaias scripsit, quod nec oculus uidit, nec auris audiuit, nec asse qui mens potest, quæ Deus amicis suis præparauit. IVD. Non uideo quid possit dici sublimius aut præstabilius. mihi uerò præclare uidetur hæc dici omnia, atq; etiam optabiliter. CH. Istiuc ergo maximū est & excellentissimum, quod homini dari à Deo potest munus. IVD. Ita uidetur. CHR. Iam ne intelligis, nihil tam conuenire uel hominem à Deo beneficentissimo poscere, ac sperare, uel Deum amicis suis tanquam beneuolentiæ suæ summum ac absolutissimum donum promittere, atque elargiri, quam uitam illam in cœlis immortalē: & hoc est utroque, tum dante, tum accipiente, dignum. cætera inferiora sunt multo & hominis dignitate, & maiestate Dei: haud secus quam si quis à maximo & potentissimo principe pro ingentibus suis erga illum meritis ac officijs, uel fiducia regalis munificentiae fretus, calceos aliquot poscat ueteres ac detritos: rex uerò in eo concedendo munere intentus esset atque occupatus. Quid enim humana omnia uitæ huius præ illa immortalitate sunt aliud, quam nobis ueteres calcei, aut panni uilissimi, quæ Deum promittere pro religionis



DE VER. FIDEI LIB. III. 473

gionis premio, vel hominem postulare, quid aliud est, quam & diuinam & suam dignitatem conculcare, atque habere pro nihilo? IVD. Repugnant quidem nostri, & furenter reclamant, sed mihi certe isthuc sit probabilius. CHR. Hec ergo crebro apud animum tuum recole, reuolue, reputa. Nam si tenueris, maxima erit tibi ad Christianismum uia confecta. IVD. Teneo equidem, sed eam istam de Christianismo uiam nondum perspicio. CHR. Faciam ut uideas. Nondum ponebatur nobis dudum, spiritum esse Deum simplicissimum, incorporeum, nullius omnino rei indignum: rerum autem uniuersarum, quarum conditor est & gubernator, potentem? IVD. Positum est. CH. Quod ergo ut ne uescaris porco, ne ue linum & lanam consuas precipiat, quod an referat ad utilitatem aliquam & usum suum? IVD. Absit, ut ille his uel utatur, uel indigeat. CHR. Quid porro ad tuum usum, illum dico prestantie tue, hoc est animi ac mentis tue immortalis ac propè diuinæ congruentem ac condignum? Tu æternæ beatitudini es cōditus, illuc tendis: illuc ut peruenias, Deo te adiungis cultu & amore. quæso te, quid ad iter illius felicitatis uel eius porcinæ facit, uel lana lino assuta, & alia quæ sunt in lege uestra eiusmodi innumerabilia? Nam si è dignitate & decentia est tuam magnitudinis & boni-

bonitatis Dei immense ad beatitudinem illam uocare, tum hominis ratione præditi, & ad immortalitatem facti, eam quærere ac sectari, reliqua sunt infra dignitatem. Ista profectò quæ ad felicitatem illam nihil omnino pertinent, uilia atque abiecta sunt, & cura Dei præcipientis indigna. nimis enim hominem deiicitis, nedum Deum ipsum, si occupatum utrumque in re tanta quanta est immortalis & sempiterna beatitudo, Deum ut tradat, hominem ut accipiat, ad res reuocatis ac retrahitis à tanti boni cura alienas atque abhorrentes, & quidem sub specie religionis, quæ uia est ad immortalitatem unica. Quòd si Deus tantus est, quantum eum existimari fas iusq; est, non de rebus uilissimis aut superuacaneis tradiderit uobis præcepta pietatis, sed de maximis, & se & uestris animis quò immortales sunt dignis. Hoc si ita est, apparet profectò illa omnia de sue, de lepore, de cibis, de uestimentis, non corporaliter esse accipienda, sed spiritaliter, non ad carnem, sed ad mentem referenda: ita demum fiunt & Deo apta, & homini. IVD. Atqui utile est non uesci porco, ex cuius esu fiunt homines leprosi. CHR. Ridiculum prorsus quasi de eo quod corpori est utile, uel noxiū, constituta sint præcepta religionis summi Dei. Mitto disputare de esu porcinae, quam Hippocrates, Galenus, & medici super ceteras omnes commendant:

dant: & alius est sapor porcina in alijs regionibus, alia utilitas. quid de lepore, quid de alijs animalibus & piscibus? sed prætereo hæc, quæ medicorum sunt præscribere. neque enim tradebat uobis Deus rationem uictus, sed legem mentis, qua ipsum coleretis. Quid dicam de oblationibus, de ceremonijs? quæ consideret quis quantum uoluerit, et uertat omnem in partem, nullam rationem inueniet, cur ita potius præceptum sit quam aliter: nec Deo sunt accommodanda, nec animis nostris ad probitatem conducunt, nec ad ualitudinem corporibus, nec in ullum uitæ usum ualent, nisi interpretatio altior & sublimior spiritalis accesserit, quæ faciat bonis nostris congruere, Deo & mentibus nostris esse consentanea, quæ antea ex crasso literæ sensu ne pueris quidem erant uel digna uel congruentia.

DE INTELLIGENTIA SACRARUM LITERARUM.

**I**VD. Atqui nolo ego in uerbis Domini mei inquirere, sed obseruare ea quæ scio mihi esse à Deo tradita: nec uolo rationem meam efficere mensuram & normam uerborum Dei, sed subdo eam Deo. Nam Deus est sapientissimus: ego uero, sicuti est in Psalmis, Vt iumentum factus sum apud te. CH. Ista tanta simulatione modestiæ uel socordiæ, uel uasæ ac subdola (nam non ad modestiam spectat, sed ad odium nostri, uel ut torpori ingenio-

rum uestrorum in rebus præclaris indulgeatis) efficiatis, ut dum timetis ne afficiatis illicita, nec afficiatis necessaria. Nullo modo potestis legere sacras literas, quin adhibeatis mentem, & iudicium, & rationem tanquam ducem intelligentiæ. alioquin non esset legere, sed ludere puerorum more, qui grandia trutinant uerba sine sensu ullo. IV. Nos seruamus ea ut iussa sunt nobis, et tradita: non habemus interpretatione humana, diuina uerba quò nobis libitum est detorquere. CH. Dictum ridiculum, & eo magis, si ex animo diceretis, & non temporis gratia. Cur ergo apud maiores uestros fuerunt scribæ & pharisæi, qui legem enarrarent? cur deinceps tot rabini? ex quibus collectum Thalmud: quorum si interpretationes persequi coepero, fiet infinitum. quisque uia sua insistit: & qui inter eos paulò sunt saniores, Christianissant. Ergo inter uos sacræ literæ admittunt ex iudicio sapientium enarrationem, ad nos non admittunt. num non sentitis loqui uos ex animi libidine, non ex ratione? At uerò cuiusmodi in lingua non uultis explanationem adhiberi? Primum an non in uestra, sicuti in quauis alia, uocabula sunt rara & inusitata, quæ non omnes capiunt? ea uerò an non egent explanatione? Iam loquendi formulæ obscuræ, iam distinctio, & interpunctio. quid, quòd olim carebatis uocalibus, in quarum loca successerunt punctula.



la. tanta ambiguitas, et tam brevis transitus ad significationes uerborum diuersissimas, notula una uel elemento addito, detracto, inuerso. Quid orationis concisio, & infantia? adde his translationes tam crebras, adde enigmata: quæ si sunt in lingua ulla, maxime in uestra: quo fit, ut nulli ferè duo Hebræi in sensu sacrarum literarum paululum obscuro consentiant. Hæc omnia simpliciter sunt recipienda, & nuda, explanatione quacumq; ac declaratione detracta & reiecta? Quid autem illa figurata? quæ si simpliciter, & naturaliter, & sine tropo intelligantur, nihil sit non modo absurdius, sed nec magis impium, nec causa plurium errorum, & maiorum. Faciamus, inquit, hominem ad imaginem & similitudinem nostram. Habet ne Deus imaginem hominis similem? Brachium, oculus, auris, digitus, cor, ira, poenitentia, labor Domini, quoties in sacris literis occurrunt, intelligemus isthæc omnia simpliciter, naturaliter, sine figura? IVD. Omnia illa sunt per translationem intelligenda. CH. Ita est planè, & hoc solū uolebam ex te audire. ergo est opus sanctis literis explanatione aliqua. IVD. Ita planè uerborū, nō sensorū. CH. Ex quibus uero constant sensa, nisi ex uerbis? Quid autem, an non in sensu est obscuritas plerisque in locis? ut in illo ipso, Faciamus hominem ad imaginem & similitudinem nostram: &, Poenitet me fecisse hominem: Laborare me fecistis in uestris ex-

Dd      cogitatis,

cogitatis, fessus sum, & alia, quæ in Deum nullo modo possunt competere: gladius Domini, arcus Domini, sagittæ Domini. an etiam gladium habet Deus omnipotens, & arcum, & pharetram cum sagittis, ut Cupido genilium? Quod si brachium Domini per translationem dicitur de eius potentia, & oculus de scientia rerum uniuersarum, & gladius de iustitia & ultione, qui scis an etiam quum uetaris uesci porco, porcus pro immundicie sumatur, sicut leo pro atroci, lupus pro uoratore? IVD. Non sumitur. CH. Qui scis? quæ norma distinguet hæc? IVD. Magistri sunt qui docent. CH. Magistri isti nonne docent adiuti ratione, iudicio, doctrina, quæ ratione elicitur? IVD. Etiam. CH. Sensim ad me deflectis. hæc ipsa erit dux in sacris literis intelligendis. IVD. Atqui debet ratio nostra subdita esse rationi diuinæ. CH. Etiam profecto, dum de ratione diuina constat, deq; eius sensu. Sed interea dum non constat, non habemus aliam seu intelligendi uiam, seu normam, quam mentem nostram. IVD. Vnde tu ergo rationem tuam mensuram rationis diuinæ facere? CH. Absit. Nolo ut ratio mea plus ualeat apud me, quam ratio Dei. Sed in omni præcepto considerantur duo, intelligentia & causa. ut, Diliges inimicum tuum: quid sit diligere, & quis inimicus, si Deus diserte non explanauerit, ratio me mea docebit. cur uero diligam,

DE VER. FIDEI LIB. III. 419

ligam, & cur mihi præcipitur, non inquirā. IVD. Atqui ego tanto melior atque obsequentior, qui pareo ijs quæ non intelligo, nec inquirō in rationem Dei. CH. Quomodo ergo scis te Deo obtemperare, si non intelligis, & ratio repugnat esse à Deo? Age enim si dicat tibi Deus, nunc esse medium nobis, oculi uero tui uident esse medium dici, quid facies? IVD. Non credam esse Deum, qui id dicat. CH. Fac constare tibi non minus, quàm constat, Deum dedisse legem uobis per Moſen. IVD. Queram ex eo dicti ſui intelligentiam, ſenſum, mentem. CH. Fac receſſiſſe ſtatim, ſicut data lege, ne ſit amplius facultas conueniendi. IVD. In anguſtias me redigis. CH. Age uero, quum dicitur tibi uerbis Dei, Populus hic in tenebris ambulat, quid intelligis? an ambulare illos in nocte obſcura ſine lucernis & facibus? IVD. Nihil tale, ſed cecitatem & ignorantiam mentis. CH. Sic illud intelligas par eſt, eſſe mediam noctem, tenebras uerſari in animis denſiſſimas. IVD. Quid ni? CH. Quis te id docet? IVD. Video quò me adegeris, ratio. CH. Hæc eſt ergo doctrix, hæc uia, index, canon. Id autem minus eris admiratus, ſi ſcias quid ſit ratio noſtra. IVD. Quid tandem eſt? CH. Radius quidam immenſæ illius diuinæ lucis deriuatus in nos. eaq; de cauſſa quo hic radius purior eſt & copioſior, hoc conformior ſonti ſuo: & quo con-

formior, hoc ad ueritatem propinquior. ita mens exercitata & exulta recta institutione altius se attollit, quàm deiecta & torpens. atque eo magis, si affulgeat aliquid diuinæ lucis, quæ se per uniuersum genus humanum spargit. sicut in Psalmo dicitur, Qui docet hominem scientiam. qua scientia bene usi multi extra Israëllem ad fauorem Dei peruenerunt, sicut Iob, & princeps omnium Abraam. IVD. Atqui uetant sacræ literæ, ne quid uel addatur, uel detrahatur uerbis Dei. ut in Deuteron. & Prouerb. & Esaia. CH. Cur ergo Thalmud auxit præcepta ad numerum 117. quæ seruatis accuratius, quàm diuina illa expressa in lege? IVD. Et uos quid fecistis? an non ad Euangelium adiecistis quàm plurima? CH. Multo diuersa est nostra caussa, neque nunc id agimus. de illa enim, quum uoles. nunc de uestris pergamus dicere, sicut instituimus. Nos quidem fatemur, mente & iudicio, & ratione opus esse ad nostra intelligenda atque inuestiganda, quemadmodum ad res alias omnium artium & disciplinarum quasq; . Expende porrò uerba ipsa legis uestre: Non addetis, neue detrahetis ad uerba hæc. interpretatio uero & declaratio dicti alicuius nihil addit, nihil detrahit, nec sensum mutat, sed explanat, & intelligentiam obscuritate oppressam profert in lucem, quo melius quod iussus es facere exequaris. Si quis enim dicat, tege caput galero, igno-



ignoret alter quid sit galerus, si ego id explico, uideor ne tibi apponere aliquid præcepto, uel auferre, & non potius præceptum clarius reddere, & ad obeundum expeditius? Si quis dicat procliui in uoluptates ac libidines filio, ne fias porcus: explano ego, ne fias sordidus, obscœnus, immundus: non muto consilium, sed efficio, ut possit prodesse exposita intelligentia. Deus enim, qui populo uestro dedit legem per Moysen, & nobis gratiam suam per filium suum, idem dedit homini mentem, & opus mentis præcipuum rationem. Itaque præcepta sua, quæ dicat ea menti (loquitur enim ad cor) uult ut mens non examinet atque expendat mensura sue intelligentiæ, sed ut intelligentia tanquam manu porrecta accipiat, ratione recolat, meditetur, tractet, uerset, et in opus quum usus poscit transferat. Quoties ipsæ uestre sacræ literæ uos coarguunt, quod capite in terram deicecto more pecudum, non uultis mentes ad intellectum diuinorum præceptorum attollere? quod uelut conquerens Dei nomine ac persona dicit David: intellectum tibi dabo, & instruam te in uia hac qua gradieris, & firmabo super te oculos meos. Quoties Deus & sancti eius prophete intelligentiam suorum dictorum in uobis desiderant, & conqueruntur de uobis, quod oculis quidem uidetis, & auribus auditis, intelligentia tamen caretis eorum quæ oculis & auribus non per-

cupiuntur, sed sola mentis agitatione atque exercitatione? Id si quando aliis, hoc certe tempore maxime in uos competit. Dominus per Esaiam dicit: Propterea captiuus ductus est populus meus, quod non haberet scientiam: & populus gloriosus eius, populus famelicus: & multitudo eius, populus aridus siti. & per Oseam 4. Succisus est populus meus, quia est absque scientia: quia tu sacerdos scientiam repulisti, repellam te, ne sacerdotio fungaris mihi. Quam uero facienda sit scientia atque intelligentia sacrorum oraculorum, per Hieremiam Dominus demonstrat, qui magni muneris loco promittit: Dabo uobis pastores iuxta cor meum, & pascunt uos scientia & intellectu. & quidem de tempore Messie hoc dicitur. Prius enim dixerat: Conuertimini filij rebelles, dixit Dominus, quia ego dominatus sum uobis, & assumam uos unum de ciuitate, & duos de familia, & introducam uos in Sion. An non affirmatis uos futurum iuxta Esaiam & Hieremiam uaticinia, ut in aduentu Messie omnes sint docti à Deo, nec proximus necesse habeat proximo suo dicere, doce me. Omnes enim cognoscent Dominum, à maximo ad minimum. Ergo interea dum ille uenit, hac doctrina mutua & intelligentia caretis. quomodo illius particulam potestis aliquam aliter consequi, quam ducturationis? quæ quum sit hominis maximum in hac uita bonum, profectò si cui est

est usui tributa à Deo, non tam ad cibum aut potum, ad tegumenta & ædificia paranda pertinet, quàm ad scrutationem inuentionemq; rerum maximarum & excellentissimarum. Quorsum enim datur optimum instrumentũ, nisi ad optima? Quid uero est inter res præstantes religione præstabilius? Huc ergo ratio, uis, claritas est humanæ mentis applicanda & accommodanda, ut illud probe intelligamus, quod intelligi exerceriq; tantopere nostra refert. Quid dicam, quòd prophetæ ipsi uisiones suas uix intelligunt? Daniel enim ait: Et audiui, & non intellexi, et dixi, Domine quid in nouissimo horum? & dixit, Vade Daniel, quia clausa sunt & signata uerba usque ad tempus finis. Nónne inter uos alij alijs plus ualent ingenio, plus iudicio, studio, industria, diligentia? quos uos tanquam magistros & doctores aliorum recipitis: & quæ omnes in synagogis uestris de lege Domini auditis, illi interpretamur, explanant, & iudicio uestro lucem obscuritati adferunt. IVD. Vera sunt hæc omnia. Sed quorsum pertinent? CH. Ad rem maximam, ut ratione & explanatione uerisimili adhibita legantur, tractenturq; sacræ literæ, non rudi illa intelligentia uerborum, qua nihil potest fieri absurdius. Et hæc fuit caussa cur nec uos nec patres uestri agnoscitis Messiam, quia non uultis erigere uos ad cõsiderationẽ rationis spiritalis, sed hæere crassi

tiæ literæ puerilis ac ineptæ, contra id quod deceat  
 hominem ac Deum. Quod si tantum malum patri-  
 bus olim uestris accidit cecitate uoluntaria, quum  
 adhuc obtinerent Hierosolymas, & haberent peri-  
 tiam legis, & doctores, qui dies ac noctes in scruta-  
 tione sanctarum literarum uersabantur, in patrijs se-  
 dibus, presentibus ac integris tribubus, quid fiet uo-  
 bis in isto exilio dispersis tribubus, ac penè extin-  
 ctis, in ignorantia quæ uos premit, imò opprimit?  
 præsertim quòd post Iesum Christum, & Hierosoly-  
 morum excidium, non dederunt operam Rabini ue-  
 stri, ut explanarent sacros libros, et dilucidiores tra-  
 derent legentibus, sed ut omnia detorqueret, ne qua-  
 drarent in Iesum. is fuit scopus interpretationum ac  
 declarationū omniū. Quòd si in hoc unum operam  
 suam impenderunt, ut dictis per se obscuris caliginē  
 atq; obscuritatem offunderent, cogita tu quantas ef-  
 fecerunt illas tenebras, quàm deflexerunt quæ erant  
 recta, et quæ explicata intricarunt? præsertim quod  
 exoleuit paulatim inter uos lectio sanctarum litera-  
 rum, illas tanquam rem uetustate exanguem & lan-  
 guidam reliquistis, amplexi enarrationes, commen-  
 ta & somnia uestrorum rabinorum, ex quibus con-  
 flatum est Thalmud, quod maioris esse apud uos au-  
 thoritatis coepit, quàm ipsa Dei oracula. Et inter cæ-  
 tera ignorantie ac malicie uestre inuenta illud est  
 unum, nullum esse locum in mysticis literis, qui  
 non



non possit septuaginta modis exponi. Acceßit tantis dementijs authoritas rabini Solomonis Galli, hominis non solum stulti, sed etiam furiosi, qui interpretatiunculis partim impijs, partim ridiculis libros omnes sacros scedauit. & aiunt uestri, non posse illos intelligi sine huius explanatione. Hæc quum scias esse uera omnia, quo ore audes à me poscere ac exigere, ut ex dictis sanctarum literarum sine ulla interpretatione, sine coniectura uerisimili, seposita ratione omni, euincam ea quæ proposui? Si ergo memisti te esse hominem, ad mentem debes reuocare tua omnia, quæ est optima & præcipua tui pars, & ex qua sola omnia in homine nascuntur bona & mala. Si recte sentitis de Deo, ad spiritalem intelligentiam debes attollere eius uerba, non ad carnalem ruditatem, ac crassiciem. quanto esset pulchrior & magnificentior perscrutatio mysteriorum sanctarum literarum ad sensum excelsum & cœlestem, in quo ipsa inquisitio cum admirabili delectatione ac fructu pasceret animos? Quod si uir sapiens, aut matrona casta aliquid dicat uel humile uel ineptum, uel subobscœnum, denique sua dignitate inferius, iniuriam nos illi remur facere, nisi id ad sanio rem altiorẽq; sensum transferamus: quod & uos facitis in Canticis Solomonis, sicuti par est. quàm id cõgruentius est in ijs agere quæ à Deo ipso dicuntur? Græci Homerum suum, quod tanti facerent, à fabellis

Et rebus leuiculis ad grauissimas sententias traduxerunt, ut redderent admirabiliorem, et ostenderent iure ab se amari ac suspici. uos parem uenerationem diuinis uerbis negatis, in quibus quæ per metaphoram sunt dicta, accipitis ad literam, et simplicem intellectum: imò detruditis in coenum. sicuti quod est apud Micheam, Deponet iniquitates nostras, et proijciat in profundum maris: id uos reuera putatis futurum, deq; eo celebratis festum mense Septembri. Et quia dicit Psalmus, Omnia mea ossa dicent, Domine quis similis tibi? concutitis totum corpus in quadam solennitate festi. Philo Iudæus in libro de Contemplatione, acumen Christianorum in intelligencia scripturarum uehementer commendat, atque admiratur: quas beneficio apostolorum melius intellexerunt Iudæi, qui illis temporibus uixerunt, nondū confictis absurditatibus Thalmudicis.

#### QVOMODO DISPVTANDVM.

**I**VD. Vehementer probatur mihi istud uelut prolium sermonis nostri, quem una ex caussa mancum fore atque impeditum timeo. CH. Quatandem? IVD. Quia uideo te à cognitione lingue Hebraicæ inermē. CH. Quid tum? IVD. Quomodo poteris citare loca ex sacris literis, quæ lingua sunt Hebræa conscriptæ, et consignatæ? CH. Faciam quod solent homines, qui per nationes alienas peregrinantur, ut secum aliquos ducant interpretes,

terpretes, qui & ipsorum & aliorum linguas norint. illi eis hoc præstant, ut ex ignorantia sermonum illarum gentium nihil incommodi accipiant.

IVD. Ita est planè. sed nescio quo pacto si tu me non intelligas, egre inter nos poterit uel contractio uel communicatio procedere. CH. Non est id quidem dubium. sed interpretationis beneficio fit, ut nihî sit in intelligentia uerborum impedi-  
menti. ut si tu de barbaro quopiam uel sericum, uel aromata empturus, roges quami? ille uerò lingua sua dicat, piper octo denarijs in libras singulas: interpres tibi id tua lingua referat, preciumq; uideatur tibi immodicum, & liceare denarijs quinque aut sex, erit ne de intelligentia conuouersia, an de re ipsa? IVD. De re, non de sensu uerborum. CH. Ad eundem modum, quum citandi erunt sacri libri, ascisam mihi interpretes doctissimos quosque, & diligentissimos in scrutatione sermonis uestri, quantum quidem ego assequi potero. nam neque hoc iudicare rite potest, nisi in eo ipso eruditus. IVD. Istuc quidem probe. sed quos tandem scies tu esse peritos lingue nostræ, cuius ipse es ignarus, in tantis præsertim illius obscuritatibus, ac difficultatibus, quæ senes e. iam & ueteranos illius magistros plerumque irretiunt ac cōfundunt? CH. Tu quidem obscuritates uocas sanctorū librorū, ego uerò tenebras, et obscurā noctem. non animaduertisti  
quā

quàm occurrant in eis passim loca dura, difficilia, intricata dicta, obliqua, ambigua, ad uarios & diuersos sensus flexibilia? unde inter rabinos uestros tantam uides discordiam, tot controuersias, tot discrepantes sententias, imò repugnantes, maximeq; contrarias? IY D. Equidem aduerti animum quandoque, & miratus sum nostros hæc non cogitare. CH. In uia igitur tam ardua, difficili, obliqua, uaria, cælo obscurissimo, quomodo censes esse ingrediendum? IVD. Nimirum face aliqua prælucente, & duce præeunte. CH. Planè uideris mihi respondisse, ut homo bene uersatus in usu uitæ communis. Quale uero uideretur tibi, si tenebris adderemus tenebras? IVD. Conducibile hoc quidem, si uelis longius aberrare. CH. Ergo quum ea uia incedimus tam tenebricosa, auferendæ sunt procul animorum tenebræ, ira, odium, inuidia, arrogantia, pertinacia, quæ etiam rebus dilucidissimis, atque in ipso meridie tetricam caliginem densasq; tenebras offunderent. Hæc in primis necesse est iubeamus conquiescere, imò abesse quàm longissime, dum de sanctis oraculis disserimus. Nec incendaris animo, quòd Christianus aliquid dicat contra receptas uobis opiniones, contra uestrorum rabinorum dogmata. si non lubet statim assentiri, neque id ego abs te exigo: at sustine te paulisper, & audi æquo animo, ut possis expendere,



pendere quid sit quod dicatur, et quale. IVD. Vi-  
deo summotā impedimenta, quæ nam nunc adiuven-  
ta adfers? CH. Nempe de luce ac duce loqueris.  
IVD. Etiam, de his ipsis. CH. Lux & dux,  
quando uerba ipsa non sufficiunt, erit nobis illa,  
quam dudum dicebam accensam in nostris pectori-  
bus ex diuino illo & sempiterno igne rationem, si-  
ue examen iudicij. Hanc dedit nobis Deus pro ingen-  
ti munere ducem ac lucem actionū omnium uitæ. et  
in rebus perplexis, intricatis, obscuris, arduis, diffi-  
cillimis aliam rem ullā esse inter nos nō reperio, quæ  
possimus pro luce & duce uti, quā rationē uel nostrā,  
uel alienā: & in aliena quoque nostra est opus. neque e-  
nim aliena nobis persuadebit, nisi congruat cum no-  
stra. IVD. Nostros quidē homines, ut sunt in re-  
bus eiusmodi duri atque inexorabiles, haud sanē expe-  
rireris in istis quæ postulas ualde cōmodos. sed mihi  
tamen uidentur ista quæ posuisti æqua in primis, et  
ad ueri inuestigationē apta & conducibilia. CH.  
Planē est ita. nam quis, malum, furor est, in dicto ob-  
scuro et difficili dicere, ego sic intelligo, nullā adfer-  
re aliam intelligentiā? Exquisitio, expansio, ratio,  
nugæ, blasphemie, impietas. Si tam uos Deus forma-  
uit homines quā nos, si uestra (ut uultis) meliora  
sunt quā nostra, si ratio ipsa recta est, & æqua,  
nempe à Deo nobis indita tanquam re præstantissi-  
ma, & diuina, quid queso causæ est, cur suspi-  
cimini

cemini rationem potius à nobis stare, quàm à uobis? imò tanto plus caussam uestram adiuuabit, quanto & ea est melior, uerior, sanctior: & ratio eisdem qualitatibus prædita applicabit se, uidelicet ratio ad similem sibi naturam, eamq; amplexabitur, tuebitur, fouebit.

DE FINE AC PRAE-  
mijis legis.

**R**edeamus igitur, si placet, ad propositum. **IVD.** Redeamus. **CH.** Via ergo ad Christianismum certissima atq; expeditissima, ut dicebā, hæc est, hominem à Deo optare, quod sit excellenti sue naturæ & sublimibus desiderijs conueniens, & sperare ab illo, deq; illo se accepturum confidere id munus, quod magnitudine & potentia illius condignum sit: nempe à sceleratissimo sceleratissimam, ab immortali immortalitatem. quibus rebus duabus fictus, appositus, natus est homo. in quo & animus ratione est ornatus, & uoluntas capacissima. quæ que nullis possit rebus conditis impleri, solo Deo acquiescit, & cuius natura atque essentia sempiterna est durationi apta. **IVD.** Cur non hæc aperitis eloquebatur uerbis? cur semper terrena promittuntur in lege? **CH.** Quia loquebatur pueris rudibus, nondum capacibus rerum cœlestium. & ita uestra lex in cortice puerilis est, intus latet nucleus spiritus, quem Christus protulit ac ostendit mundo.

mundo. Pueros enim ad literas primâ que illa for-  
 mandorum morum exercitamenta, non allicimus  
 ostendendo opes, decus, & ampla illa que uirtu-  
 tem sequuntur præmia: sed pyro aliquo, aut panis  
 crusta mellita, aut pollicendo calceos elegantes. ita  
 uos allicebamini ad culturam legis, rebus sensui  
 expositis: nos uero Christus assuefecit eternita-  
 tem beatitudinis intelligere, cupere, sperare. IVD.  
 Promittitur corporalis res, & temporaria, quo-  
 modo igitur res spiritalis rependitur, & sempiter-  
 na? CH. Quia & puero laganum pro studioso la-  
 bore proponitur, per quem laborem grande postea  
 decus & magnæ opes comparantur. Adducit Deus  
 pater indulgentissimus & sapientissimus homines  
 corporeis rebus assuefactos, promissione illarum,  
 ut postea id largiatur, quod uix esset ipsi ausi opta-  
 re. IVD. Id si ita est, quid caussæ est quo minus  
 aperte dixerit? CH. Non est ea dubitatio ingenia  
 tuo digna. nam si ei quâ supra sensus & res corpo-  
 rales se non erigit, de spiritalitate dicatur, quid aliud  
 fuerit quàm semoto colore quo alliciebantur sensus, fru-  
 ctum omnem sermonis perdere? mens illa nondum capit:  
 detractus autem ijs quibus tenebatur sensus, nihil super-  
 est iam quo res nitatur, ita cõcidat per se ipsa neces-  
 se est. Si tu quum pusioni tuo pyra & laganum ostendis,  
 ut itet ad ludum literarium, pariter de opibus, de uirtu-  
 te, deque ingenti uirtutis præmio facias mentionem, quid  
 profice-

profeceris aliud, quàm ut parua contemnat, & magna non assequatur? ita confundas omnia, nec illè quod tu cupis efficiat: quia nec grandia intelligit, & parua iam pro nihilo habet. Ita si uobis spiritaliter esset locutus Dominus, excæcasset uestros oculos, uelut prolata luce fulgentissima. ideo dixistis Moysi, Ne loquatur nobis Dominus, loquere tu. & in eius signum uelum faciei suæ prætendit Moses, inquam faciem radijs fulgentem intendere oculi uestri non ualebant. Auscultate Esaiam manifestis uerbis de uobis testantem: Quem docebit, inquit, scientiam, & quem intelligere faciet? quod audiuit, ut pueri sunt ablactati à lacte, auulsi ab uberibus. Nam ut mos est pueris, datur eis præceptum post præceptum, præceptum post præceptum, linea post lineam, linea post lineam, parum ibi, parum ibi, quia balbutientibus labijs & lingua altera loquetur propheta ad populum istum. Hactenus Esaias. Si proponebantur uobis rudia & crassa, quia spiritalium non eratis capaces, quæ ratio fuisset enunciandi spiritalia? IVD. Nullus ne tandem erat tum capax, omnes erant pueri? etiam Moses, etiam Dauid, Helias, Heliseus, & alij prophetae? CH. Erant quidè in illo populo nonnulli, qui aliquid spiritalius de Deo, uti par est, saperet: sed populus tamè nihil supra sensus assurgebat. quod ostenderunt in deserto, quando in tanta multitudine nemo inuentus est idoneus, qui



qui loqueretur cum Deo, præter Moſen. ille autem, ac prophetæ, qui erant ſapiētiores, quibusq; ſe apertius communicabat numen, altius intuebatur quàm populus: de qua ſcientia dicit Dauid, Incerta & occulta ſapiētiae tuæ docuiſti me. & in alio Pſalmo: Retege oculos meos, & conſiderabo mirabilia de lege tua. & in eodem Pſalmo: Super ſenes intellexi, quia mandata tua dilexi, & ad ueram legis cuſtodiam da mihi intellectū, & cuſtodiam legem tuam, & cuſtodiam toto corde. Et quum Eſaias dicat, daturū Dominum ſperantibus ea quæ ſolus ſcit ipſe Deus, humanum uerò oculum nunquam uidiffe: non dubium eſt, quin nonnulli de tantis illis bonis & cogitarint, & bene ſperarint. Sed quum uobis loquebantur ſapientes illi, planè uerbis & ſermone ſuo toto demonſtrabant uos eſſe pueros. Puerilia promittunt pro exequutione diuinarum præceptionum, & ea dicunt de Deo tam crassa, tam absurda, ut uos intelligatis, quæ ſeniores philoſophi gentium erubuiſſent dicere: omnia humana membra, omnes affectiones ac miſerias noſtras Deo tribuūt. nonne hoc eſt ad pueros uerba facere?

## DE ABROGATIONE LEGIS.

**I**VD. Vt fatear peccare noſtros in legis intelligentia, certè uos multo peccatis grauius, qui legem hanc non ſeruatis, quum eſſe à Deo datam

Ee      confi-

confiteamini. CH. Quia lex ea erat tempora-  
 ria usque ad Messiae aduentum, qui illam presentia  
 & doctrina sua illustratam sustulit, reposita alia  
 multo excellentiore, magisque & ad hominis excel-  
 lentiam accommodata, & ad Dei maiestatem. IV.  
 Atqui lex haec nostra sepe numero à Deo ipso æ-  
 terno nominatur & foedus perpetuum, & pactum  
 sempiternum, quasi nunquam finiendum. CH.  
 Magis tu mihi argumentum istud obijcis, uel per-  
 turbandi mei gratia, qui ignarus sum uestrae lin-  
 guae, uel ut tu mihi elabaris, quam ut ualidum esse  
 arbitrere. neque enim potes tu ignorare id, de quo  
 uideo inter omnes constare, qui quidem hebraice  
 norint, uocem illam ad olam, quod nostri aliàs in  
 æternum, aliàs in sempiternum, aliàs in seculum uer-  
 tunt, non simpliciter dici de tempore, cuius finis sit  
 nullus, sed uel de longa duratione, uel indefinita;  
 uel de eo quod continenter duraturum est sine inter-  
 polatione: cuiusmodi sunt item apud Latinos &  
 Græcos, perpetuum, perenne, iuge, infinitum, de quo  
 multa sunt in sacris literis exempla, ut Exodi 21.  
 Seruiet ei in æternum. nempe qui diu uiuet, uel usque  
 ad annum Iubilæi. & Hierem. 25. de migratione Ba-  
 bylonica: Ponam, inquit, in his regionibus solitu-  
 dinem sempiternam. hoc est, uel diuturnam, uel per-  
 ennem usque ad reditum ex Babylone. nam statim ad-  
 dicit, Seruiet gentes istae regi Babylonis septuaginta  
 annis,

annis, & continuo posteaquā fuerint impleti septuaginta anni, uisitabo regem Babylonis, & gentem ipsam, dicit Dominus, iniquitatem eorum, & terram Chaldaë, & ponā illam in solitudines semperiternas. Isthæc autem uestra sacrificia æterna nominantur, quasi quā diu durabit lex, nunquā cessatura, nec intermittēda suis tēporibus, quā diu essetis ubi liceret exequi. alioqui Babylone cessarunt, etiā tot annorum centenis inter uos: & Daniel cap. 12. prædixit. IV. Quid? ergo est uarietas in Deo atq; inconstantia? CH. Vnde id colligis? IV. Quia præcipit quod aboliturus est, fert legem quam ipse idem sit abrogaturus. CH. Est inconstantia in medico, si hodie iubeat ægrum sumere cassiam, cras aloē: est in te inconstantia, si discedens domo præscribas ministro, ut computet rationem hebdomadis, postea lectum sternat, tum uerrat cubiculum, inde paret prandium? Est uarietas aut mutabilitas in Deo, quod nunc arbores & stirpes omnes frondent ac florent, post quatuor menses erunt nudæ? IV D. Non sunt hæ inconstantia, quæ sub eadem constitutione comprehenduntur. CH. Eundem in modum sub eadem Dei constitutionem uenit, ut uobis tradere-tur lex aspera & dura, umbra spiritualitatis uobis congruens, postea daretur spiritualitas uniuerso hominum generi. nec aliter in hoc ado-

lescit mens & sapientia humani generis, quàm in  
 unoquoque hominum, qui Dei constitutione pri-  
 mum infans est, hinc puer rudis atque imperitus,  
 tum uir ingeniosus, eruditus, prudens. IV. Ex-  
 plicatius aliquid & dilucidius uellem audire de ra-  
 tione ferendæ legis. nam mirari satis non possum  
 tradi legem à Deo, quam ipse sit mox abrogatu-  
 rus. CH. Non possunt hæc paucis uerbis doce-  
 ri, quæ ingentia in se atque admirabilia claudunt  
 mysteria: ingenio est opus, & sedula attentione.  
 IV. Ecce me attentissimum, & cunctum in hoc  
 ipsum. CH. Missurus Deus Messiam suum, hoc  
 est, seruatore[m] redemptoremq[ue] humani generis,  
 uoluit esse populum aliquem peculiarem sibi, in  
 quo nasceretur & educaretur, & uitam transige-  
 ret mortalem. Hunc autem populum instrueret  
 ornaretq[ue] cognitione sui, & cultu, ut quum is so-  
 lus esset uera sanctaq[ue] religione præditus, nulla re-  
 linqueretur alijs populis querela, quòd ex se orta  
 non esset salus Domini, non apud se educata, non  
 se docuisset. ille enim populus ad hæc omnia emi-  
 nebat, & erat aptus præ cæteris, in quo uno esset  
 ueri Dei cultus ac pietas. ideoq[ue] Dominus noster  
 natus inter Iudeos, reliquas nationes fecit in hoc  
 æquales, ut ipse nullam omnino adiret, professus  
 se ad solas uenisse oues, quæ aberrassent ex domo  
 Israël: apostolos deinde suos misit in orbem uni-  
 uersum.



uersum. Vos autem ut sibi essetis populus & hereditas, non elegit ex omnibus tanquam optimos. Scis enim quoties illi maiores uestri peccarint, quæ sint & quàm acerbæ in sacris literis de duritia cordis uestri, de impietate uestra querimonia: quas nihil attinet referre, passim sunt cuique obuiæ. Placuit autem illi fides Abraæ, probauit integritatem Isaac, grata fuit simplicitas & mansuetudo Iacob, propter eos stirpem Iacob sumpsit sibi tanquam gentem sibi dicatam & sacram: quemadmodum propter memoriam Dauidis noluit omnino tollere regnum à familia Solomonis, ut maneret lucerna Dauid. Deuter. quarto: Quia dilexit patres tuos, & elegit semen eorum post eos. & quarto Regum: Misertus est Dominus Israël, & reuersus est ad eum propter pactum suum, quod habebat cum Abraham, Isaac, & Iacob. IV. Cur ergo tulit hanc legem, & talem legem tam duram & temporariam? C H. Imò id maxime decebat Deum optimum, ut temporaria esset lex, quæ & dura. primum omnium uoluit uos tanquam oues signo suo aliquo notare, & à cæteris gregibus separare, ideo legem tulit. tum quia ex ignorantia & prauitate morum maiores uestri in Aegypto non unum habebant Dei colendi ritum ac morem, & ad prauas cæremonias delabebantur plerique, præscripsit septa quæ non egrederemini. Maxima ta-

men legis ferēda causa fuit, incredibilis Dei fauor  
 erga uos, qui uos tanquā filios charissimos aber-  
 rantes uoluit in uiam reducere, & imperitos eru-  
 dire. Olim maiores uestri, quod Deus esset locutus  
 progenitoribus gentis, & circumcisionem fecisset  
 uelut foedus quoddam inter se ac illos, illa freti fi-  
 ducia, omnia se abundē consecutos in religione exi-  
 stimabant, nulla erat mentio de imploranda Dei  
 misericordia, reliquas nationes aspernabantur tan-  
 quam profanas & impias, se esse existimantes san-  
 ctos Dei & sacrosanctos. hanc tam stolidam arro-  
 gantiā uolens illis Deus adimere, & instituere ad  
 sapientiā, dedit eis legem: quā cū uiderent se non  
 custodire, intelligerent quantū deesset sibi ad per-  
 fectionē iustitiæ, & uerū cultum diuinitatis: diffusi-  
 humanis facultatibus, confugerent ad Dei opem  
 & misericordiam, implorarent Messiam, et auidē  
 expectarent, per quem fieret reconciliatio, & as-  
 sequerentur salutem sempiternā. Et loquutus sum  
 de lege illa, facili, miti, expedita, decem præcepto-  
 rum: quæ cū sit expedita & facilis, maximeq; con-  
 formis naturæ, eamq; ipsam non possitis præstare,  
 docet uos quantopere Dei gratia egeatis, tum illo  
 per quē reductus nobis patet semper ad gratiā Dei.  
 Nam illa alia de ritibus et ceremonijs, tā multa, tā  
 uaria, grauiā, molesta, intolerabilia, non sunt uo-  
 bis data ut per ea fieretis meliores, sed ne peiores,  
 scilicet

scilicet proclives in idolatriā, & cultū pessimo-  
rū dæmonū: ut ab ea nefaria consuetudine abstra-  
heret, iussit quē cultū idolis eratis pręstaturi, sibi  
uni pręstaretis. alioqui enim quorsum opus est im-  
molationibus naturę illi summę & omnipotentis  
quis sanę mētis existimet placari illū sanguine, et  
nidore animalium? quod ne ignoretis, satis superq;  
traditū est vobis, & incultatū, eiusq; rei prophe-  
tarum omnium sunt referti libri. In Psalmo enim 50.  
dicitur, Quoniam non vis sacrificiū, nec dabo, ho-  
locaustū tibi nō placet: sacrificia Dei spiritus con-  
tritus, cor contritū & confractū Deus non despi-  
cies. & in alio psalmo, Holocaustū & sacrificiū  
pro peccato non postulasti. & psalmo 49. Audi  
popule mi, & loquar Israël, & testificabor aduer-  
sum te: Deus Deus tuus ego sum. Non super sacri-  
ficia tua arguā te, nec super holocausta tua, quōd  
non fuerunt coram me semper, non accipiā de do-  
mo tua iuuenecum, & de septis tuis hircos: & quę  
sequuntur. Tum ad impiū conuersus, ostendit non  
placere sibi malos quantumcunq; in lege ac prę-  
ceptis eius sedulos: Ad impium uerō dixit Domi-  
nus, Quare tu prędicas legem meam, & fœdus  
meum labijs tuis uersas? Esaias quoque dilucidissi-  
mē, & quidem initio statim sui uaticinij, tanquam  
lapidem fundamenti huius ponit: Audite uerbum  
Domini principes Sodomę, auribus percipite

legem Dei nostri populus Hamorrhæorū. Quorū  
sum mihi offertis multitudinem uestrarum uictima-  
rum? dicit Dominus. Satur sum. holocausta arie-  
tum, & adipem bubalorum, & sanguinem uitulo-  
rum, & agnorū, & hircorū nolui. Quum in con-  
spectum meum ueniretis, quis hæc de manu uestra  
requisiuit, ut sic atria mea conculcaretis? ne perga-  
tis simulatum sacrificium offerre. Suffitus abomi-  
natio mihi est. Neomenias & sabbatum, quibus  
cætus iniquos conuocatis, ferre non possum. Neo-  
menias uestras & solennitates uestras odio habuit  
anima mea, oneri mihi sunt. Laboraui, ut sustine-  
rem. Quid ergo postulet Deus ab homine, audite.  
Lauamini, mundate, auferte maliciam operum ue-  
strorum, desinite male facere, discite bene facere,  
querite iudicium, dirigite oppressum, iudicate pu-  
pillo, iudicate uiduæ. Idem Esaias in capite duode-  
sexagesimo: Interrogant me iudicia iustitiæ, &  
appropinquare Deo uolunt. Quare ieiunau-  
mus, & nō es intuitus? affliximus animas nostras,  
& ignorasti. Ecce in die ieiunij uestri, quicquid  
est uobis animo collibitum facitis, & debita ue-  
stra repetitis, litigatis ieiunantes, & contenditis,  
& inuicem inique cæditis. Ne ieiunetis uti nunc,  
quum in excelsis auditur clamor uester. Non est  
id genus ieiunij, quod est mihi cordi, affligere ho-  
minem in die animam suam, incuruare ueluti run-  
cum



cum cervicē suam, in sacco & cinere sterni. Nun-  
quid istud appellatis ieiunium, & diem Domino  
acceptabilem? An non hoc potius est ieiunium  
quod elegi, ut solvas colligationes impietatis?  
Tum addit alia, quæ ad Dei & hominum charita-  
tem faciunt: quæ quoniam tibi nota esse scio, non  
adiungam. Idem agit capite sexagesimosexto. Mi-  
chæas quoque capite sexto; quum adhortatus es-  
set populum, ut gratum se erga Dominum pro  
ingentibus beneficijs exhiberet, & iustitiæ intel-  
ligeret ac sectaretur, ut ueram doceat gratitudi-  
nem ac iustitiam, dicit: Quo placabo Deum? cur-  
uabó ne me Deo excelso? nunquid placabo eum  
holocaustis & vitulis anniculis? Nunquid uolet  
Dominus millia arietum, & decem millia torren-  
tium olei? Nunquid dabo primogenitum meū pro  
præuaricatione mea, fructum uentris mei pro pec-  
cato animæ meæ? Nunciabo tibi, ô homo, quid sit  
bonum, & quid Dominus requirit à te: utique fa-  
cere iudicium, & diligere misericordiam, & hu-  
miliare te, & sequi Deum tuum. Psalmista crebrò  
nos admonet, ut sacrificemus sacrificia iustitiæ.  
IV D. Illud tamen adhuc me torquet, cur hæc  
qualiscūq; lex est, quum sit Dei, antiquetur? CH.  
Facilem mea quidem sententia, & explanatā quæ-  
stionis huius rationem tibi edam.

## DE VOCATIONE GENTIVM.

**Q**uid tu de gentibus & nationibus censes, an non & illi sunt homines haud secus quam uos? IVD. Quis de hoc ambigat? CH. Præditi sunt ratione, iudicio, consilio, uoluntate, amore, perpetuitate animorum. Illorum Deus conditor est & pater, ut uestri. IVD. Id quoque constat. CH. Credibile est igitur, Deum, qui sit optimus, beneficentissimus, nemini inuidens, & istos quoque ad gratiâ suam & æterna munera uelle asciscere: quod oraculis est sanctorum prophetarum testatum. Iacob moriens prædicit, Messiam futurum expectationem gentium. & in psalmo idem Messias precatur, Libera me à populo contradicente & repugnante, statue me caput gentium. Cui pater respondet per Esaiam capite 49. Et dixit Dominus, inquit, exiguum est ut sis mihi ad suscitandas tribus Iacob, & ad conuertendos desolatos in Israël. dedi etiâ te in lucem gentium, ut sis salus mea usque in extremum terræ. Nō potest locus hic de alio quam de Messia intelligi, in quo Deus uelit ostendere opulentiam suæ misericordiæ, & magnitudinem suæ potentie. ideo dicit leue & exiguum opus esse, si id modò illi tribuatur, ut ueniat ad utilitatē solius Iudæe gentis: ad uniuersitatē humani generis mitti eum conuenit. & id decet Deum illum, qui auctor est paterque hominum cunctorum. Hac ipsa de  
re

re sunt & alia in eodē capite, ut illic: Ecce ego le-  
 uabo super gentes manū meam, & super populos  
 exaltabo uexillū meū. Tibi uerò homini in sacris  
 literis adeò exercitato, satis est locū uel digito de-  
 signasse. Nec solū prædicūt propheta uocādas es-  
 se nationes ad Dei ueri & summi pietatē, sed præ-  
 latū iri uobis. Esaias capite sexto & quinquagesi-  
 mo, uerbis Domini promittit eunuchis & alieni-  
 genis, qui Dominū ritē coluerint, potiorē locum  
 in domo Dei, quā ipsi filijs & filiabus. I V.  
 Minatur se Dominus ad gentes transiturū, ut nos  
 adducat in zelum. ut apud Esaiā, Propter pecca-  
 tum Iudæ, dicit Dominus, quærere me feci ab ijs  
 qui non interrogauerunt, inuenire me feci ab alijs  
 qui non quæsierant me. dixi, Ecce ego ecce ego, ad  
 gentē non uocatā meo nomine. C H. Atqui hæc  
 non comminatio est, sed prophetia rei euenturæ,  
 ut aliæ de quibus sumus locuti. Sed uos uelletis De-  
 um misereri uestri, quum sitis pessimi: non uultis  
 aliarum nationum misereri, non peiorū quā uos  
 estis. I V D. Si ut nos adducat in zelum, tran-  
 sit Dominus ad gentes, non transisset, si nos illi nō  
 peccassemus: uel certē cū illi reconciliabimur, re-  
 pudiaabit gentes tanq̃ pellicē, & cunctus ad sponsā  
 suā synagogā reuertetur. C H. Faceret hoc quidē  
 Deus, si uestri esset similis: uos nō faceretis, si illius  
 essetis similes. Quæso te, credis tu cadere in Deū  
 tam

tam uilem & abiectum affectum, qui in bonum & sapientem uirum non cadit, ut ex æmulatione, aut inuidia, aut ira bene faciat, ut alteri doleant oculi, cui male uelit? Natura est ille beneficus & munificentissimus, & omnibus largiter commodat, non ut alterum lædat, sed ut omnibus profit. Itaque si uos non peccassetis, non utique non transisset Deus ad gentes, & extendisset misericordiam suam in omnia, quorum est Deus. Sed uos fuissetis principes, reliqui autem uestra uelut accessio. Nunc contrà contigit. nam si qui ex uobis seruantur, is ad gentes accedit, sicut in Deuteronom. scribitur: Si auscultaris domino Deo tuo, ut custodias omnia præcepta eius, ponet te Dominus sibi populum sanctum, & ponet te Dominus in caput, & non in caudam, & eris supernus, non infernus. Quòd si non obedieris uoci Domini Dei tui, peregrinus qui est in medio tui, erit te superior, tu uerò illo inferior. Ipse mutuabit tibi, non tu illi. ipse erit caput, tu cauda. Hæc & alia ibi Moses uerbis Domini. Quum autem reconciliabitur uobis Deus, non desinet esse misericors in eos qui querunt eum, sed erit tum & in uos.

R V R S V M D E A B R O G A -  
tione legis.

**Q**uòd si Deus gentes quoque ad suum complexum, ad amicitiam gratiam que suam asciscit,



asciscit, par est ut ea lex eis feratur quæ sit omnibus apta & congruens, qualis certè non est lex uestra. Lex uestra erat ne uniuersalis omnibus nationibus ac gentibus, an peculiaris uni populo? IV. Vniuersalis, quia Dei, qui est dominus uniuersorum. CH. An si medicus sit aliquis publicus, ea de causa quia publicus, quicquid uni egro prescripserit, ad egros omnes credetur pertinere?

IV. Non arbitror. CH. An quia Dominus aliquid precipit uni seruorum, idem protinus alij omnes præceptum sibi esse debent interpretari? IV. Minimè uerò. CH. Ita Deus medicus & dominus uniuersorum, medicinam applicat unicuique congruentem, quæ ad alios non pertineat. De uestra autem lege expresse scriptum est, Qui annunciat uerbum suum Iacob, præcepta & iudicia Israël. Non fecit taliter omni nationi, et iudicia sua non manifestauit eis. & in alio Psalmo: Notus in Iudæa Deus, & in Israël magnum nomen eius. Si lex erat uniuersalis, cur non iussi estis eam explicare omnibus? Volo ex te audire, an uos diuulgatis uestram legem? IV. Minimè. CH. Predicatis ne Babylone, aut Romæ? IV. Non. CH. Imò nec uersabimini inter gentes, ut eos possitis docere. an ijs qui uiderunt uos, & agnouerunt Deum uerum colere, suastis ut ad uos transirèt? Moyses socero suo Ietro nunquam suasisit, ut secum per-

permaneret, sed in patriam illum remisit, sacerdos  
 tem idolorū. ut antea Solomon non suasisit reginæ  
 Sabba, ut fieret Iudæa: nec Daniel Nabucodonoso-  
 fori, aut Dario: nec septuaginta senes Ptolemæo,  
 à quo tanti fiebant. Hoc isto tempore mysteria ue-  
 stra occultatis: & diris deuouetis, si quis enunciet  
 tantūmodo. pertinaciter asseueratis non esse salu-  
 tem, nisi inter uos. Quid, quòd omnia per quæ lex  
 & ceremoniæ uestræ exercentur, declarāt apertè  
 ad unū tantum populū illa omnia pertinere? ea ue-  
 rò sunt, sacerdotiū ex una certa tribu, unum tem-  
 plum in una ciuitatē, omnia definita & descripta  
 ad terrā illā promissionis & 12 tribuū. Ex pecu-  
 liaribus itē præceptis satis colligitur, ingenio ue-  
 stro esse accommodatam legē. Nam quòd estis natu-  
 ra zelotypi, permissus est uobis libellus repudij: ut  
 citius eijceretis uxores, q̃ occideretis. Quia proni  
 ad usurā, permissum ut fœneraremini extero, mo-  
 dō abstineretis à fratre. Quia creduli in malū, uo-  
 luit uos abstinere Deus à cōmercio idololatrarū,  
 ne illi pertraherēt uos in suos ritus. Tu medicinā  
 hanc ei adhibeas, qui postquā edoctus fuerit unum  
 esse Deū, uana esse idola, periculū nunquā sit, ne  
 in cultū falsorum deorū reuoluatur? & si cū alijs  
 impijs uersetur, ipse facilius eos ad suā pietatem  
 transferat, quàm ad eorū impietate transeat? quod  
 inquā plurimis Christianis compertum est experi-  
 mento,

mento, ut unus solus uniuersum sepe populum ad suam pietatē traduceret. Iam quid opus est lege de zelotypia, uel scēneratione, ei genti quæ nec zelo typæ est natura, neq; scēneratrix? Lex quæ datur uni populo, conformis debet esse ingenio illius, ad mores illius reddendos meliores. Lex quæ uniuersis datur, cōformis debet esse toti generi humano. Nihil porro istorū exteriorum accommodari uniuersis potest, propter diuersitatē ingeniorum in diuersis regionibus ac temporibus. Ergo Dei est, qui author est naturæ, unusq; regiones, tempora, hominū ingenia pernouit, eā ferre legem, quæ apta sit omnibus ætatibus, sexibus, regionibus, temporibus: qualis est lex Christi, quæ omnibus congruit: idq; argumentum est, eam esse generalem. In qua illud uelim te animaduertere, nullū esse præceptum, quod non uniuersis congruat, nullum ei posse excipi ætate, sexu, loco, tempore, uale tudine. IVD. Qui isthuc fieri potest? an non habetis uos ieiunia, & dies festos, & præcepta de con nubijs, & alia permulta, à quibus excipitis multa hominū genera? et uestri pontifices multos uel pecunia, uel gratia soluunt legib. & canonibus. CH. Fando tu quidē nonnulla de legibus atq; institutis nostris fortassis audiuisti, sed nihil ut uideo exactius uel accuratius. Christi præcepta sunt, ut de se omnia speremus, & fidamus, qui patri Deo pro

pro omnibus satisfecit : hinc ut amemus Deum  
 plusquam nosmetipsos, & proximum non aliter  
 quam nos ipsos. Hæc est summa legis Christi, à  
 qua nullum genus hominum, nulla conditio po-  
 test excipi. Patres deinde & rectores ecclesiarum  
 quasdam attulerunt regulas, quæ uelut manu duce-  
 rent ad fastigium hoc pietatis, ut de ieiunijs, de o-  
 cio feriarum, de audienda missa, de precibus, de  
 coniugijs. Lex diuina, ut sapientissimi authoris  
 omnium, omnes comprehendit, omne tempus, om-  
 nem locum. Lex humana, ut hominis non omnium  
 capacis ac prouidi, multas exceptiones uel ipsa ex  
 se recipit, uel ab eo ipso patitur qui legem sanxit.  
 Sed attende quæso, & intelliges quantum inter le-  
 ges nostras & uestras intersit. Quis est uerus Dei  
 cultus? IV. Quem Deus ipse præscripsit & sta-  
 tuit. CH. Ecquem Deus statuit? IV. Quem  
 legis in libris Mosis. CH. An non paulo antè ex  
 psalmis & prophetis docuimus, ueram religionē  
 esse animi puritatem, & iustificationem, non ui-  
 ctimis atque immolationes animalium? Cedò, est  
 ne aliquid quod ego tibi possim gratius facere, &  
 per quod magis tibi concilier, quam si dem operā,  
 ut tibi siā quā simillimus? IV. Nihil, ut uide-  
 tur. CH. Poteris tu me magis diligere aliqua ra-  
 tione & uia, quā si uelut teipsum in me contem-  
 pleris? IV. Quorsum id tandem? CH. Quia  
 nulla



nulla est religio, nullus cultus Deo acceptior, q̄ si  
 te illi efficias similem, quantum quidem præstare  
 possis. similitudo autem hæc in sanctificatione nō  
 corporis, non rerum exteriorum, sed animi exi-  
 stit. Sancti, inquit, estote, quia ego sanctus sum.  
 Quale hoc tibi uidetur? Nam si quid in eo uel hæ-  
 res, uel requiris, satisfaciemus tibi, priusquā pro-  
 grediamur ulterius. IV. Non uidentur mihi ab-  
 surda, nec à recto iudicio aliena: & multas in sa-  
 ceris libris sententias memini legisse me, quæ hoc  
 ipsum testificentur. CH. Similitudo igitur pa-  
 rit beneuolentiam inter te & Deum, & is Dei  
 cultus multo optimus, imò uerissimus ac solus. Sci-  
 to igitur amorem ipsum maiorem similitudinem  
 gignere, & magis copulare animos, & ex duobus  
 unum prorsus efficere. IV. Hæc sunt nimium  
 profunda. CHR. Etiam uos quibus data est lex  
 terroris, de amore nihil unquam auditis. quæ con-  
 iungant & deuinciant corpora, multa sunt: quæ  
 uerò animos ac spiritus, quid tandem est? IVD.  
 Nescio. CH. Credo. nihil enim scitis uel acutū,  
 uel reconditum, uel excultum expolitumq̄, uel ab  
 ingenijs, uel ab eruditione, à qua uelut dedita ope-  
 ra longissimè abestis. nunquam ne audiuiistis, ami-  
 citia coniungi homines, ut amicus amico sit alter  
 ipse? amor igitur non solum efficit animos ac spiri-  
 tus similes, sed unum prorsus. Quod si uerus Dei

cultus est, ut eius fias similis, et ex similitudine gratior, nihil est quod maiorem gratiam conciliet quam amor. amore enim amor gignitur. quod si ames, redamaberis. amor hic nexus est animorum. fies unum cum Deo, ac proinde uelut Deus quidam. Hæc est æterna hominis beatitudo. uel aperte, uel tacite huc uota omnia humani cordis tendunt. Confer iam leges. uestra nunquam ferè de amore loquitur: & si quando, breuiter id & obscure, semper de metu ac terrore. Deus uobis est magnus dominus, pugnator, ultor, zelotes, quæ omnia in seruilè affectum deiiciunt animos. nobis omnia sunt de amore Dei & proximi. nostræ Deus mitis, misericors, blandus, indultor, pater: quæ omnia in filialem habitum componunt animos nostros. Quæcunque in Euangelio præcipit Christus, ad amores istos pertinent, quæ rectores Ecclesiarum ad uerum Dei cultum referunt. Ieiunamus enim, ut spiritus se ad Dei contemplationem extollat: precamur, ut incendamus charitate: feriamur, ut animus curis uitæ huius solutus, liberius de Deo cogitet: intersumus missæ, ad memoriam redemptionis nostræ.

IV. Quid uerò leges pontificiæ de sacerdotijs, de initiationibus? CHR. Non differimus hic de politicis legibus, quarum usus est in foro, & ciuitate, sed sacris ritibus ac ceremonijs, quæ ad cultum diuinum sunt constitutæ. Propter huc uestra.

non

non uesci porco, nō lepore, non anguilla, non ad-  
 suere lanam lino, quam similitudinem Dei adfert,  
 quam iustificationem, aut purificationem mentis,  
 quam beneuolentiam conciliat cum Deo. Iam ue-  
 rò quantum interest, ostendere simpliciter uiam,  
 qua ad Deum peruenias, per amorē scilicet, quod  
 fecit Christus: & onerare miserum animum im-  
 mensa præceptorum multitudine, quæ satis sit ne-  
 gocij uel memoria posse continere. quod contigit  
 uobis per manum Moysi, in quo planè estis tracta-  
 ti ut nequā mancipia, quæ plagis emendantur, ita  
 præceptis minæ sunt atroces additæ: & nobis,  
 quia nō bene cōmittebatur ociū, datū est negociū,  
 quo distineremini, longum, uarium, molestum, o-  
 diosum, non eo fine ut id ageretur, sed ne contra-  
 ria. non ut Deū toleretis, aggerata sunt tot præ-  
 cepta tam minacia: sed ne uacaret uobis relabi ad  
 idololatriam. ita circumsepsit uos Deus suis præ-  
 ceptis, ne locus patēret alienis. IV. Hæc indigēt  
 magna speculatione. CH. Nec omnino nulla, nec  
 fortasse tanta, quāta nunc tibi uidetur. comprehend-  
 disti ne memoria? IV. Etiā. CH. Videris tibi  
 facile retēturus. IV. Ita planè. CH. Domi ergo  
 solus per ociū recolita. IV. Faciā. CH. Itaq; cū  
 apertæ fuerunt ianuæ diuinæ benignitatis, ut per  
 eas ingrederentur gentes, lex uestra antiquata est,  
 & data noua à Deo ipso toti humano generi,

*congruens uniuersis, ut olim uobis, quæ apta ingenio esset uestro. id quum ratio ut factum sit euincit, neque aliter de suprema est illa sapientia cogitandum, tum oracula sunt prophetarum. Malachias enim dicit primo capite: Non est mihi uoluntas in uobis, dicit Dominus exercituum, & munus non uolam de manu uestra. Ab ortu enim solis usque ad occasum eius magnum est nomen meum inter gentes, & in omni loco incensum offertur nomini meo. & oblationem mundam offeretis, quia magnum est nomen meum in gentibus, dicit Dominus exercituum. Perpende prophetia huius singulas sententias. accessum gentium ad Dei cultum prædicit, in quo iam uos cum uestris sacrificijs, ritibus, ceremonijs ostendit minime placituros, nec munus iuxta legem Moysis gratum futurum: sed si in illo Dei cultu uniuersali uultis placere domino, offerre (inquit) non immundum sacrificium adipis, sanguinis, medullarum, sed oblationem mundam. quid enim potest dici immundius, quid tetrius aut foedius, quam illa tanta & tam iugis tot animarum carnificina? quid erant aliud pontifices et sacerdotes olim uestri, quam lanij perpetui & coqui? Itaque mundum sacrificium, ad mundiciem et animorum pertinet & manuum. Nec uideo quod in tempus referri possit, quod Esaias inquit capite sexagesimo sexto, quam in hoc, quum tantis uotis expecta-*



expectatis Messiam, & fingitis uobis reditum in  
 Palæstinam, & tanto molimine apud animos ue-  
 stros & sermonibus inter uos ædificatis templum.  
 Sic dixit Dominus, inquit, cœlum est solium meū,  
 & terra scabellum pedum meorum. Quæ est ista  
 domus quam ædificabitis mihi, & quis est locus  
 quietis meæ? omnia hæc manus mea fecit, & exti-  
 terunt hæc, dicit Dominus. Hinc subdit, quod nos  
 dicimus, purum & sanctum animum uerum esse  
 Dei templum: & cum toto hoc, inquit, respiciam  
 ad pauperem, & contritum spiritu, & trementē  
 super uerba mea. De sacrificijs autē, per quæ uos  
 in æde illa ingentem apud illum gratiam quæsi-  
 ros confiditis, pergit dicere: Qui immolat bouē,  
 ac si interfecisset uirum: qui immolat pecus, per-  
 inde est ac si deceruicasset canē: qui offert oblatio-  
 nem, est ac si offerret sanguinē suillum: qui suffire  
 facit thus, est ac si bene diceret idolo, & abomi-  
 nationibus suis anima illorum delectata est. sic il-  
 le. Et Hieremias uerbis multo apertioribus cessa-  
 tionem legis denunciat: Ecce dies ueniunt, dicit  
 Dominus, & feriam cum domo Israël & cum do-  
 mo Iuda fœdus nouum, non secundum fœdus quod  
 pepigi cum patribus eorum in die quum apprehen-  
 di manum eorum, ut educerem eos de terra Aegy-  
 pti, quia ipsi irritū fecerunt pactum meum, & do-  
 minatus sum eis, dicit Dominus. Sed hoc erit fœ-

dus quod feriam cum filiis Israël: post dies illos (dicit Dominus) dabo legem meam in medio eorum, & in corde eorum scribam eam, et ero eis in Deus, & ipsi erunt mihi in populum. Et quidem hæc prædicit futura post dispersionem Iudææ gentis, & post exilia per orbem totum, & post illud magnum & nouum, quod Dominus factururus est super terram, ut scæmina circundet uirum. IVD. Istud ad Mesiam nostrum pertinet. CH. Nondum de Messia disputo, sed de legis cessatione, quam uides aperte prædici, tanquam medicamentum ad tempus aptatum morbo uestro. Et ne te defatiges, deq; Dei constantia & stabilitate in proposito sis anxius, neu legem tuam deplores tanquam reiectam prorsus & extinctam, scito abrogationem illius esse factam ad sensaliteræ, non ad sensa spiritus. IV. Quid ego audio? CH. Dicã apertius. Lex quã populo Iudæo dedit Deus per manus Moïsis, diuina est adhuc & perdurat, & ueri Christiani eã obseruant. IV. Estis ergo Iudæi ut nos. de quo est igitur controuersia? CH. Vos legem illã corporaliter obseruatis, qualẽ exhibuit Moïses: nos spiritaliter, quemadmodum Christus, & eius discipuli enuclearunt. & abstinemus nos etiã porco & lepore, & offerimus hostias in lege præscriptas, sed ad sensum diuinatum magnitudine, tum etiam præstantia humana dignum. Abstinemus enim

nim porco, id est immundicia carnis : & mactamus Deo pecudes, id est belluinas nostras affectiones. sed longum esset persequi singula. Et ueri Christiani sunt Iudæi spirituales, & filij Israël, & semen Abraæ, progeniti ab illis non secundum opus belluini corporis, iuxta quod genitus est etiam Ismaël & Esau, sed ab excellentiore parte, nempe ab animo, per imitationem uirtutum illorum. Ergo ostensa est eadem lex uobis quidem à Mose tecta uelo, nobis autem relecta & reuelata à Domino nostro Iesu. IV. Quomodo potestis uos obseruare, quæ non modò negligitis, sed etiam contemnitis? persuasum enim est uobis, legem nostram non modo mortuam esse cum uostro Iesu, sed etiam post eius resurrectionem mortiferam. CHR. Nos id sentimus de lege uestra carnali, seu simpliciter sumpta, & sine figuris : spiritalis autem adhuc uiuit. IVD. Atqui uulgus Christianorum & doctorum ex uobis uel plerique, uel non pauci, ritus & ceremonias nostras ignorant : quomodo possunt quod nesciunt, uel scire quorsum pertineat, uel rectè obseruare? CH. Qui ex nostris hominibus significationes illas sublimes & mysteria legis uestræ non intelligunt, obseruant nihilominus quæ sunt præcepta : quia quæ uobis in mysterijs sunt & arcanis tradita, planioribus sunt nobis uerbis iussa,

& reſectiore ſententia. ut ſi neſcio quid ſit por-  
 cus, nec quorſum pertinet non ueſcendum porco  
 in ſenſu ſpiritali, obſeruabo nihilominus præce-  
 ptum, ſi dicatur mihi non eſſe paſcendam men-  
 tem, hoc eſt inquinandam obſcœnitate atque im-  
 mundicijs, quales bruta & abiecta caro expetit.  
 Non meministi te aliquando didiciſſe literas in ſyl-  
 labas coniungere, ſyllabas autem in uerba? IV.  
 Non ſatis commemini, ſed in multis pueris id ob-  
 ſeruau. CH. Non animaduertiſti quot formu-  
 læ, quot uiaſtenduntur eis à ludimagiſtris, ut re-  
 ctè elementa inter ſe applicent? ea omnia ubi iam  
 perdidicerunt, legere obliuiſcuntur, & nihilo ſe-  
 cius expeditius legunt, quam cum illis formulis:  
 quas omnes & ſi aliud agentes, nec animum ad eas  
 aduertentes, obſeruant tamen in legendo. Puerum  
 quoque imprudentem aliquid acturum multis in-  
 ſtruimus conſilijs, & præceptis, & cautionibus:  
 quæ omnia unica illi prudentia, quum eam tempo-  
 re atque uſu rerum parauit, ſuppeditat. ſic præce-  
 pta & formulæ uiuendi, & ratio colendi numinis  
 multis uerbis explicantur, & proponuntur ijs qui  
 carent ſpiritu Dei, hoc eſt fiducia & amore erga  
 Deum, quæ uniuerſa Dei amor latenter docet, &  
 quum uſus poſcit ſubminiſtrat. Quòd ſi multa illa  
 præcepta atq; inſtituta eò pertinet ut rite colatis  
 numen, numen autem ſimilitudine illius optime  
 colitur,



colitur, quia sic conciliatur amor: supremum autem est amor: qui efficere potest ut amemus, is optimam uerissimamque colendi Dei rationem tradit, & quicquid alijs uerbis, ritibus, institutis, ceremonijs explicari potest, concludit & comprehendit. Nostra uero lex eò tendit tota, sic nobis proponit Deum, sic nos afficit, ut uere & toto pectore amemus. Nec ullus uestrorum rituum datus uobis fuisse à Deo, si & illum, & proximum uestrum uere atque ex animo dilexissetis. Quaeso te, ut liber aliquando & solutus curis expendas atque examines uim omnem praeceptorum uestrorum, & legis uniuersae, tum dicta, monita, cohortationes prophetarum: inuenies ad hos duos uelut scopulos dirigi amorem Dei & proximi. qui tamen ita sunt duo, ut in unum coeant & coniungantur. I V D. Isthaec omnia noua sunt mihi prorsus atque inaudita, difficile est mihi de eis quicquam statuere. C H. Id uero magis mihi placet, ut per ocium exactiore iudicio adhibito ista perpendas. Nam quae fortasse prima auditione propter nouitatem absurda, et à ueritate abhorrentia tibi uiderentur, ea si accuratius altiusque scruteris, inuenies uerissima esse & sanctissima. neque hunc tantum locum uelim sic abs te recoli & retractari, sed cunctam hanc nostram dissertationem.

**E**Xilium quoque istud uestrum ab auitis sedi-  
bus, manifestò ostendit legem quam obserua-  
re solebatis, quamq; adhuc tuemini, & retinetis  
mordicus, esse antiquatam. sacra enim, ritus, cere-  
monias, conclaſerat Deus una regione, & ex ea  
una in ciuitate, uno in templo, sub uno summo sa-  
cerdote, ex tribu Leui, ex familia Aaron. Templū  
est dirutum, ciuitas subuersa, uos arcemini pro-  
cul à Palæstina, clausit Deus omnia isthæc uestra  
definitis limitibus loci, ut loco uobis penitus a-  
dempto, illa etiam omnia sciretis adempta, quæ  
illic continebantur. Accedit his, quòd simul cum  
lege constitutus est summus sacerdos, qui sit uelut  
præses, custos & tutor legis. cum autem uidetis  
sublatum, ex quo licet intelligere & legem esse  
abolitam. quod Dauid prædixerat, constitu-  
tum esse Mesiam sacerdotem à Domino, & qui-  
dem iureiurando, & quod nunquam sit mutatu-  
rus, & sacerdotem sempiternum non secundum  
ritus Aaron, sed Melchisedech. IVD. Bona  
uerba. quid tu de exilio nostro eterno loqueris?  
Nos uerò uatum nostrorum oraculis confisi, re-  
stitutum iri nos speramus. fiet aliquando, etiam si  
ex Dei consilio inscrutabili differatur. CHR.  
Ipsa expulsionis causa & ratio liquidò ostendit,  
uos

nos nunquam restitutum iri. quæro enim, quamobrem exulatis tam diu? IVD. Propter idololatriam in deserto. Nam ea de re Exodi tricesimo secundo sic scribitur: Ego autem in die ultionis visitabo super eos peccatum eorum. CHR. At uide quid sequatur: Percussit ergo Dominus populum, eo quod fecerant uitulum, quem conflarat Aaron. Num non propter scelus illud occisa sunt tot millia? num ingressus est aliquis eorum in requiem Domini? non Moses, non Aaron, nullus præter Iosue & Caleph. Quale uerò est, post centum generationes meminisse sceleris, quum aliæ omnes mediæ euaserint pœnam? Ego sum, inquit, Deus fortis, zelotes, uindicans iniquitatem patrum in filios in tertiam & quartam generationem, ijs qui oderunt me: & faciens misericordiam in millia, ijs qui diligunt me. non dicit, in centesimam generationem. Quid, quod uos non uidemini ex ijs qui illum oderunt, sed qui amant & colunt: fertis patienter exilium tam longū, & sustinetis illum, expectatis dum dignetur uos respicere, non estis idololatæ, quin ergo facit misericordiā uobiscū? Iam uerò quum totus Israël descuiisset à Domino, idq; tanto tempore, omnes reges Iuda idolorū cultui dediti fuerint, præter Dauidem, Ezechiam, & Oziam, ducti estis Babylonem, habuistis nihilominus illic iudices uestre gentis & prophetas,

qui

qui uos consolarentur : mansistis ibi annos septuaginta, & reducti estis in patriam antiquam. nunc agitis per orbem dispersi, subditi, serui, extremæ ac miserrimæ conditionis, nullum habetis propheta tam qui uos consoletur, quæ non committatis tam graue scelus idololatriæ quàm olim, non sacerdotes, non annotationem & distinctionem tribuû, ut sciatis unde Messias sit nasciturus. Sed nec est opus amplius. at quàm diligenter erat annotatum ante Christum? Quid, quòd Cæsares Vespasiani iusserunt interfici omnes eos qui superessent ex familia Dauidis? Vos ad hæc omnia estis cæci & surdi, non uno aut altero anno, sed mille quingentis. Ecquod tandem nefas non fuisset tanto tempore expiatum? Illud quoque uelim mihi dicas, si nō est molestum, cur non sollicitat uos nunc dæmon ad idololatriam, sicut olim patres uestros? inter quos tantum fuerunt tres reges obseruatores legis Domini, quos modò commemorauī. IVD. Quia non sumus tam acuti, nec tam solertes, quàm olim patres nostri, CHR. O egregium acumen, o solertiam prædicandam, scire à Deo ad pessimos dæmones desciscere. Igitur Achaz acutior, qui idolis seruiuit, quàm Dauid, qui Deo soli. Stupiditas est uidelicet, & dementia, uera pietas. nollem tale unquam dictum uenisset tibi in mentem, nedū ut protulisses. IVD. Quid ergo dixerimus esse



se in caussa? CHR. Securus est de uobis diabolus, satis putat uos esse in partes ipsius pertractos: nec ulla esse potuit maior idololatria, quam spreuisse ipsum Dominum & authorem uniuersorū, qui uobis salutem adferebat. Inspicite iam quales eratis, quum deleuit regionem uestram Titus Vespasianus. A reditu ē Babylone non fuerat inter uos cultus deorum alienorū, conformiter & constanter Israël colebat Dominū. Occidistis Iesum, qui se dicebat Christum. Is uerò si non erat Messias, quemadmodum ipsi affirmatis, nullum poteratis opus facere Deo gratius, quoq; amplius demereremini fauorē illius, quòd hominem sustulissetis in crucem contumeliosum in Deum, & in Mesia eius. Nam si Phineæ filio Aaron confirmatum est sacerdotium à Deo propter zelum Domini, quem in uno filio Israël ostenderat puniendo, quibus præmijs eratis uos digni, crucifigendo eum qui Messiam se diceret, quum non esset? quin & dicit per prophetam Dominus, Saluos faciam uos, non propter uos, sed propter me, ne dicāt gētes quòd dominus eorum non potest eos saluos facere: quanto magis nunc, ne dicant quòd occidistis Christum Domini, qui non erat? At uerò post mortem illius uexati estis fame sub Claudio, latrocinijs, discordia præsidum, Fœlicis & tum bello sub Nerone & Galba, excidio acerbissimo sub Vespasia,

Ispasiano . rursum cæsi estis ab Adriano , iterum à  
 Gallo expulsi patrijs sedibus, excisa urbe & tem-  
 plo . Crudelius egerunt uobiscum Romani, quàm  
 cum alijs urbibus captis, ut appareat ultione Dei  
 esse factum. At dicitis uos habere regnũ ultra mon-  
 tes Caspios. ô quàm multa extruxistis uana, ut ex-  
 cluderetis lucem ueritatis. Quis uidit? quis tradit?  
 Sub Macedone Alexãdro factum est. Hoc falsum.  
 Nam quum estis deuicti à Tito, omnes 12 tribus e-  
 rant in Palæstina. Sed uos estis adeo impudentes ,  
 ut sine uerecundia aliarum nationum asseueretis  
 id quod reliqui omnes manifestum esse mendacium  
 sciunt. nec reueremini memoriam gentium, nec a-  
 pertum illarum contra uos testimonium : om-  
 nes habetis pro canibus, non illorum merito, sed  
 procacitate uestra, & impudentia deplorata. Pul-  
 si ergo estis in tam extremum exilium, quòd quem  
 admodum dixit Christus, non cognouistis tem-  
 pus in quo Dominus ipse ad consolationem ue-  
 stram uos inuisebat. de quo Hieremias queritur ca-  
 pite octauo, Etiam ciconia in cælo cognouit tem-  
 pus suum, & turtur, & grus, & hirundo custor-  
 dierunt tempus aduentus sui: populus autem meus  
 non cognouit iudicium Domini. Iosephus Iude-  
 us ait, suspicari quosdam mortem Iacobi fuisse in  
 causa. An est credibile, propter mortem unius  
 hominis quamlibet iusti, gentem uniuersam esse  
 cæde

eade primum & clade, hinc exilio tanto multatam? Mors enim Iacobi, mors Christi, si non erat Messias, quid aliud erant, quàm mors hominis propheta? Propter mortem autem Zachariae, aut Esaiæ, aut Hieremiæ non estis à patria excisi. Audite Amos caput secundū, Super tribus prauaricationibus Israël, & super quarta non parcami ei, eo quòd uendiderint argento iustum, & pauperem propter duo calciamenta. Precium uile significat, sicut olim numo sestertio, nunc frusto panis. Quis est iustus hic, cuius uenditionem tanti æstimat Deus, et ita eam ulciscitur, nisi Iesus Christus: qui uenit ad uos sub pauperis imagine, mitis, demissus, & sine ullis opibus? Propheta uestri, si uoluissetis oculos aperire, satis aperte exposuerunt uobis, & exprobrarūt grande illud & nefariū facinus. Esaias dicit ca. 8. Dominum exercituum sanctificabitis, et ipse timor uester, & ipse pavor uester, & erit in sanctificatione, & in lapide offensionis duabus domibus Israël, in laqueū & rete habitantibus Hierosolymis, & impingent in id plurimi, & cadent, & conterentur, & irretientur, & capiētur. Idem propheta cap. 3. populum dicit eiectum, excisum, & relictum sine duce, & principe, & bellatore, & propheta, quia linguis & operibus suis irritauerunt Dominum, nec peccatum suum celauerunt, sed aperte professi sunt.

Ecquod

Ecquod tandē peccatum apertē profitemini, nec uos pudet, nisi de morte Domini nostri Iesu? et addit uates: Væ animæ eorū, quum reddiderunt sibi ipsi malum. nempe quum dixerunt, Sanguis eius super nos, & super filios nostros: quo nihil est euidentius, quā ita esse. tum adijcit: Quum tamē in ea sis calamitate, ut nec scientiam habeas, nec regnum, nec libertatem, nec iustitiam, qui te beatum dicunt, an non te seducunt? ij te fallunt, & uiam semitarum tuarum perdunt. Quid, an non id hodie non cernimus impletum, quum rabini uestri persuadent uobis uos solos beatos esse, nempe qui soli uerum colatis Deum, & ueram sanctamq; sectemini spem de Messia? ita perdunt uias uestras: nam cogunt uos insistere uia praua, nec uelle ab ea egredi, quam existimetis rectā ad beatitudinem ducere. an potuit apertius describere, etiam si fuisset historicus, non propheta? In Deuteronomio exilium hoc uestrum, & extremæ conditionis seruitus describitur. inter cætera enim dicitur: Percutiet te Dominus amentia, & cæcitate, & stupore cordis, & palpabis in meridie, quemadmodum palpat cæcus in caligine. Expendite totum illud caput octauum & uicesimum, uidebitis nunquam potius execrationes illas quā ad hæc pertinere tempora. nunc ergo cæci estis. Atqui deos alienos nō colitis: & si unquā aliās, zelatores estis legis.

cæcitas



Ecce ergo uestra est, Christum Dominum non  
 cognoscere. Hieremias aperte dicit, maius esse ue-  
 strum peccatum, quam peccata patrum uestrorum.  
 A die (inquit) qua egressi sunt patres uestri e ter-  
 ra Aegypti usque ad diem hanc, misi ad uos om-  
 nes seruos meos prophetas, per diem surgendo de  
 mane, et mittendo, et non audierunt mihi, nec in-  
 clinauerunt aurem suam, sed indurauerunt cer-  
 uicem suam, et peius faciunt quam patres eo-  
 rum. Si hoc peccatum est grauius, quomodo pro-  
 pter uitulum dicitis uos puniri? At explicatiue ca. 5.  
 Scrutamini in plateis Hierusalem, et uidete nunc,  
 et scitote, et quaerite in plateis eius, an inuenia-  
 tis uirum, an sit qui faciat iudicium, qui quaerat ue-  
 ritatem, et parcam ei. et si, Viuit Dominus, dixe-  
 rint, uere mendacium iurabunt: Domine, oculi  
 tui nonne sunt ad res stabiles? percussisti eos, et  
 non doluerunt: consumpsisti eos, renuerunt acci-  
 pere disciplinam, duriores fuerunt facies eorum  
 petra, renuerunt reuerti. Ego autem dixi, forsitan  
 pauperes sunt, stulti facti sunt, quia non nouerunt  
 uiam Domini, iudicium Dei sui. Ibo ad maiores, et  
 alloquar eos: ipsi enim cognouerunt uiam Domi-  
 ni, iudicium Dei sui. sed ipsi simul confregerunt  
 iugum, ruperunt uincula. Sic ille. Quibus uerbis  
 apertissime status horum temporum uester descri-  
 bitur. Depicti estis, quod aiunt, uestris coloribus,

uos ac rabini uestri. Idē propheta paulo pōst exilium uestrum prædicit, & excisionem à sedibus, sed ita ut non penitus soboles uestra intereat. & simul causam adijcit, cur à fauore Domini excideritis. Ascendite (inquit) muros eius, & dissipate, consumptionem autem ne faciatis, auferite minas murorum eius, quia non sunt Domini, quia præuaricādo præuaricati sunt in me domus Israël, & domus Iuda, ait Dominus. negauerūt Dominū, dicentes, quod non sit. quem uerò dixerunt esse illum qui esset, nisi solum Iesum Dei filium? Idem Hieremias capite duodecimo, de causā desolationis terræ loquens ad Dominum: Nam & fratres tui, & domus patris tui, ipsi præuaricati sunt contra te, ipsi congregati uociferati sunt in te. Ne credas, quum loquuti fuerint tibi bona. Tum uerbis Domini: Reliqui domum meam, dimisi hereditatem meam, dedi dilectam animam meam in manum inimicorum eius, fuit mihi hereditas mea tanquam leo in sylua, dedit contra me uocem suam, idcirco odi eam. Idem capite decimosexto: Et erit, postquam annunciaueris populo huic omnia uerba hæc, & dixerint tibi, quamobrem minatus est nobis Dominus tam graue mal: in hoc, & quæ tanta nostra iniquitas, aut quod peccatū nostrum quod peccauius Domino Deo nostro? dices ad eos: Propterea quod dereliquerunt patres uestri me,

me, ait Dominus, & abierunt post deos alienos, & seruiuerunt eis, & incuruauerunt se illis, & me dereliquerūt, nec legem meam custodierūt, & uos peiora perpetrastis quam patres uestri. Sic ille. Tum addidit historiā horū temporū: Et ecce uos ambulatis unusquisq; post duriem cordis sui mali, ut non audiatis uerbi. Et expellam uos de terra hac, quam nec uos nec patres uestri cognouerūt, ubi dijs alienis seruietis die ac nocte, quia misericordiam meam non impartiar uobis. Quomodo poterat explanatius declarare, uos esse à misericordia Domini repulsos, nec Deum uerum ac uiuentem colere, sed falsos deos, quos uobis confinxistis? Dicite quæso, quod in tempus ista competunt, nisi in hoc? Immensum esset, si in singulis uelim pro dignitate immorari. Tu ipse omnia examinato, quem uideo uersatum esse in studio sanctarum literarum. Quintum caput Threnorum eiusdem Hieremiæ, est Iudæi populi misericordiā petentis. in cuius extremo hæc sunt uerba: Vt quid in perpetuum obliuisceris nostri, derelinques nos in longitudine dierum? Conuerte nos Domine ad te, & conuertemur: innoua dies nostros sicut ab initio. Sed reprobando reprobasti nos, iratus es contra nos uehementissime. Ea est libri clausula, qua status hic rerum uestrarum significatur. Adde his, quod si Deus communicaturus

est seipsum uniuerſis gentibus, ut ſacra oracula teſtatur, hoc eſt, legem daturus uniuerſalem, quid opus eſt iſta ueſtra ſub illa ſcilicet altera uiuetis et uos. Hanc uerò uniuerſalem ſi legem eſſe Meſſiæ dicitis, quid opus eſt uobis reductione? quid templo, & Hieroſolymis? Vbique poteſtis uiuere ſecundum eam legem. quæ ſi uniuerſalis eſt, non alligabit utique ad unum templum, & unam ciuitatē. Quæro autem, an Meſſias legem iſtam ueſtram ſit confirmaturus, an inducturus aliā? Hanc ueſtram oracula teſtantur abrogatum iri. quòd ſi aliam adferet, quid de Ieſu Chriſto conquerimini, qui non aliam intulit, ſed hanc iſtam ad ſenſus homine & Deo dignos tranſtulit, ſeu potius erexit. Quòd ſi paulo attentius uelitis animaduertere, non erit uobis difficile inuenire, & cur olim ſitis electi ad peculiarem Domini hæreditatem, cur cōſeruati, cur poſtea reiecti, & repulſi. omnium cauſſa eſt Ieſus Meſſias. Voluit Deus, ut paulo antea dicebam, aliquem unum eſſe in mundo populum, qui Deum cognosceret, apud quem eſſent illius ritus, ceremoniæ, leges & præcepta, ex quo filius ſuus nſcetur, & in quo uerſaretur, ad excludendum querelam aliarum omnium nationum. Ex hoc populo quæ tribus de duodecim eſſet electa ad Meſſiæ generationem, & ſi aliquid attigerat Iacob moriens, incertum tamen erat uſque ad Dauidem. huic enim



enim propter mansuetudinem renouata est promissio, quemadmodum facta olim fuerat Abrae propter fiduciam. Itaq; populus electus est Abrae per Isaac & Iacob, tribus Iudae, & familia Dauidis regis. Quomodo erudit uos Deus, admonuit, castigauit, tulit usque ad Mesiam? Expleto autem usu instrumenti, abiectum est instrumentum, tanquam deinceps inutile. Additi sunt uobis quadraginta anni, ut resipiscentes transiretis ad uniuersalem uocationem cunctarum gentium. postea consequuta est confusio atque abolitio fortunarum omnium & diuini cultus, ciuitatis, templi, sacrificiorum, sacerdotij, tribuum. An non ex his aperte intelligitis, nullum esse amplius uestri usum? Hic remias rabinos & sapientes uestros sic obiurgat, capite octauo: Quomodo dicitis, sapientes sumus, & lex Domini est nobiscum? uere mendax est stylus, frustra sunt scribae, pudore affecti sunt, sapientes perterriti sunt, & capti sunt, uerbum Domini reprobauerunt, & sapientia in eis nulla. I V. Magnas adfers rationes. & sic à nostris rabinis accepi, uestra omnia perualidis esse fulta rationibus per homines ingeniosos, quales habuistis inter uos quam plurimos. CHR. Quam malitiosam calumniam, ut quando res ipsae claro meridie se oculis uestris ingerunt, lucem ipsam accusetis, quoniam aliud non ualetis. Primum habuisse nos in

religione nostra, acutissima ingenia quàm plurima, an exiguum est argumētum uera esse quæ nos recipimus, quandoquidem à talibus sunt ingenijs approbata? Deinde ratio: num non res est æqua, uobis & nobis par, pro ueritate semper fortior ac manifestior? si pietas nostra non esset uera, nullæ suffecissent rationes, nulla ingenia ad eam fulciendam, scilicet falsa & conficta ipsa per se paulatim laberentur. Opinionum commenta delet dies, ut inquit sapiens quidam de gentibus: recta iudicia confirmat. Quid, quod rationi conforme est, non discrepat à Deo, ueritate, & unde manat ueritatis omnis ratio. Audisti etiam cuiusmodi genus hominum Christus sibi asciuerit, quàm non aptum excogitandis proserationibus. IV. Atqui nos sumus populus Dei, & sic semper uocamur, uel in ipso exilio, & hæreditas illius, & uinea electa. CHR. Sic uocamini propter primam electionem. sicut apud Esaïam: Israël me non cognouit, & populus meus non intellexit. An estis populus eius, quum eum non nostis? De uinea autem legite quæ sunt apud Esaïam capite 3. quomodo exciderit eam Dominus. & Hier. secundo: Ego autem plantaui te optimam uitam, totam ipsam semen uerum, & quomodo conuersa es mihi in samentum uitis alienæ? IV. Atqui reditio domum multis cœlestibus oraculis nobis promittitur, ut in Deute-

Deuteronom. & apud Esaiam, Hieremiam, Ezechielem, Amos, & alios tam multis locis, ut ignorari non possint, nec sit eòs huc adferre necessarium. CH. Nihil necesse habes ea recensere, satis commemini. de quibus antequam dissero, uelim mihi dicat, quæ nam sit futura reducendi uestri causa. IV. Vt sacrificemus Domino, per quæ sacrificia siemus grati Deo, uiuemus in libertate, in ocio & quiete, in copia rerum omnium, in delicijs. uel ipsa Esaiæ uerba mirificè animos delectant: Se debet, inquit, populus meus in pulchritudine pacis, & in tabernaculis fiduciæ, & in requie opulenta. CH. Duo esse uideo, quæ uos in reductione hac speratis, gratiam & fauorem Dei per sacrificia, tum uitæ opulentia, & fortunarum omnium copiam, quanta uel optari possit. IV. Hæc ipsa. CH. Dicamus prius de sacrificijs. Non credo excidisse tibi, quòd dudum inter nos constabat, maximum & præstabilissimū quod homini Deus possit præstare, esse beatitudinē aternā: eam uerò cōiunctionem esse cum Deo: coniunctionem autem fieri amore, amorē conciliari similitudine animorū. Vos ergo p̄ uniuersam custodiā legis quid amplius aut excellentius potestis à Deo consequi, q̄ ut sitis illi amici? IV. Nihil sanè neq; maius, neq; optabilius. CH. Quòd si sacrificia hoc uobis dabunt, quur quum maxime uigebant illa Hierosolymis,

plurimi erant sceleratissimi, paucissimi sapientes, pauciores prophetae? Quid, quod multo plures fuerunt iusti uiri ante sacrificia, quam illis constitutis? Tu uero nunc quum non sacrificas, nonne bonam spem habes te posse diem unum uitam propagare? tu nescis, an possis tibi Deum amicum facere, et sustines uiuere. Sed consolabor ego te exemplo Hieremie, Ezechielis, Danielis, Anania, Azariae, qui et sancti, et sapientes, et prophetae fuerunt sine Hierosolymis, sine templo, sine sacrificijs et ceremonijs. Quid, quod a sacrificijs estis soluti permissu Dei, dum exulatis, aut peregrinamini. Esto igitur, non bono tantum animo, sed magno quoque. potes Deo amicus fieri absque sacrificijs, sola uoluntate bona. Quod si ita est, ut ratio et exempla et prophetae docent ac ostendunt, nihil aut perparum facient externa sacrificia, ubi uoluntas intus fuerit uel a Deo aliena, uel cum eo coniuncta. Quod si aliud nihil est uobis Messias largiturus, quam ut quiete sacrificetis, atque ociose, frustra nimirum talem, et tantam, et tam tumultuosam operam sumet. nihilo enim plus dabit, quam nunc existimatis uos habere, ut fauorem Dei possitis promereri iustificatione mentis. Iam de libertate, de diuitijs, de opulentia, et uoluptatibus. Indignissima sunt haec de quibus fiat mentio, dum de rebus caelestibus. et diuinis loquimur, quae non raro  
separant



separant à Deo, & ad diuinum amorem impedi-  
mento sunt. IVD. Nunquari id nobis accidet,  
quia erimus iusti omnes, sapientes, prophetae:  
quemadmodum non nocuerunt diuitiae Abraam,  
Isaac, Iacob, Dauidi, Ezechiae. CHR. Eritis  
uos perfectiores quam Adam? at illum legitis uni-  
co desiderio abstractum à Dei tanta illa amicitia.  
quid fiet uobis inter tam multa et uaria desideria?  
& istis quos nominasti, an non putas impedi-  
mento aliquando fuisse opes, quo minus agerent quod  
decebat tam sanctos uiros? relege illorum uitas, ui-  
debis dissensisse Abraam à Loth. Dauidem ea com-  
misisse, quorum illum postea grauissime poenituit.  
Ezechiam opes suas ostentasse legatis Assyriorum,  
de quo est ab Esaia reprehensus. An non etiam si-  
ne diuitijs maximos illos & sanctissimos uiros fu-  
turos fuisse censes, ut Heliam, Heliseum, Hiere-  
miam, & alios prophetas? IV. Esto sanè ita,  
sed num non præstat bonitati adiungere liberta-  
tem & diuitias? CHR. Atqui Solomon dicit,  
mundana omnia esse uanitatem. quid ergo utilita-  
tis adferent uana? aut quomodo diuini cultus præ-  
mium erit res uana? An non tu, si esset optio, libes  
deligeres uitam Heliae sancti & pauperis? IV.  
Rogo te, ne mihi uia ulla paupertatem imprece-  
ris, qua nullum est malum grauius. hæc Minoritis  
aut Carthusiensibus tuis cane. CH. Videlicet

cura rerum uitæ huius tam acris, tam intēta & uehemens, non finit uos oculos sursum attollere: & dum prolixè sit prospectum arcæ, reliqua facilia esse ducitis, & quæ uirtutis sunt aut uitij negligitis, subinde prouerbum illud usurpantes, Omnia aspera pane leniuntur. Hinc fit, ut quales uos esse uelitis, tales fingatis & Messiam & Deū. Prophetas quoq; eosdem faceretis, nisi quod in his aperta ueritas refragatur. Deus autem non cernitur oculis corporis: Messias uerò uenturus est. ubi certè potestis, infigitis mendacium tanquam cuneum, affectionibus uestris seruiens. Itaq; audi attētissime, quod tua & aliorum omnium gentis tuæ tam interest scire. Quod tu existimas esse maius aut acerbius exiliū, procul abesse à Deo, an à patria ubi nati sunt maiores tui? IV. Quis de hoc possit ambigere? malo multo exulare à patria, quàm à Domino. sed si sim in patria illa, propinquior ero Deo. CH. Id uerò est quod Dominus per Hieremiam conqueritur: Nunquid Deus de propinquo ego sum, dixit Dominus: & non Deus de longinquo? Dominus & propinqua & longinqua, & aperta & tecta contuetur, tam his adest quàm illis. ubi est illud, Cælum & terram ego impleo, dicit Dominus. Propinquior erat Deo Daniel Babylone, quàm multi in Iudæa & Hierosolymis. Itaque uerum & lugendum exilium est, reiectos esse à Domino,

mino, procul ab illo agere: uera patria, & sacrificia, & pietas, & felicitas, coniungi cum illo puritate animi, fiducia, charitate. quem ostendimus esse cultum uerissimum, & Deo dignū, quā alem sancti uiri præstiterunt in suis peregrinationibus: ut ij quos modò commemorauī, Hieremias, Daniel, Ezechiel, Ananias, Azarias, & alij complures. Illa ergo optāda est uobis in patriā reditio, ut Deo coniugamini animis, qui unus & pater est uester, & patria. Quod si abesse à Deo exilium est germanum & uerum, accedere ad eum in patria uiuere, utique prophetae & sancti uiri Deo pleni, qui præcipua quæq; et uerissima hominibus tradebāt, ab spiritu diuino illis insita & dictata, quod non inopiam uestram, aut seruitutem humanam, aut peregrinationem deplorarunt, & spem fecerunt uobis facilioris status & cōditionis: sed quod erat & ipsorum sanctitate ac sapientia, & humana excellentia & diuina maiestate dignum, acerbissimū exilium à Deo, grauem seruitutē sub peccato, quā seruitute iam olim grauamini, deplorarunt: & letissimam promiserunt reductionem, non in Palestinam, & ad mēsas & lectos, cæterasq; corporis uoluptates, belluinis magis corporibus quā humanis mentibus, hoc est planē cœlestibus aptas & congruentes, uerū in gratiam & fauorē Dei per iustificationem cordium uestrorū. Hæc religio, et  
eternum

æternum religionis præmium est, terra illa pro-  
 missa coelitus Abraæ & patribus uestris, terra ma-  
 nans lacte & melle, id est bonis omnibus, quæ hu-  
 mana mens rectè instituta posset exoptare. Dum  
 uiuebatis sub lege nondum abolita, eratis quidem  
 domestici, sed serui: nunc alieni penitus, seu ho-  
 stes uerius. conuersi autem ad Deum per uirtutes  
 mentis, eritis liberi & filij. Hoc etiam Esaias præ-  
 dixit capite decimo: Et erit in die illa, non adij-  
 ciet ultra residuum Israël, & qui euaserit ex do-  
 mo Iacob inniti super percutientem eum, sed in-  
 nitetur super Dominum sanctum Israël in uerita-  
 te. Residuum Iacob conuertetur ad Deum for-  
 tem: quia si fuerit populus tuus Israël uelut are-  
 na maris, reliquiae conuertentur. Ex eo bona spes  
 est de reditu uestro ad meliorem mentem, licet se-  
 ra. In quo uelim annotes, non dixisse prophetam,  
 cunctum Israël saluum fore, ut uos speratis per  
 resurrectionem & reductionem in Iudæam: sed  
 reliquias, nempe illas quæ agnoscent Iesum Chri-  
 stum. Considera tu nunc, quanto est reuersio hæc  
 ad Deum melior & optabilior, quàm reuersio ad  
 diuitias Palestine? quanta est in sanctis uolumini-  
 bus mentio de misericordijs Dauidi fidelibus, de  
 ueritate Dauidi promissa stabili ac æterna? quan-  
 to hæ sunt ueriores misericordiae, & utilior ue-  
 ritas, reconciliari & coniungi Deo per Christum,  
 quàm



quàm manere regnum soboli Dauidis, & conseruari illius lucernam?

## DE MESSIA IV.

daorum.

**A** Veo iam ex uobis intelligere, qualem tandem Messiam tot annorum millibus expectetis. IV. Nos expectamus ea quæ sunt nobis à uatibus prædicta, & Dei nomine promissa, quæ fallere non potest. quæ quòd nondum uidemus còpleta, pro indubitato habemus euentura, quantumcunque differantur. Non sunt diuino consilio præfiniendi ab homine termini. CHR. Rectè dicis. sed quæ tandem sunt ista? IV. Dicam ex Efsaia, Hieremia, Ioële, & alijs prophetis, tum traditionibus nostrorum rabinorum certissimis: uenturum è genere ac stirpe Dauidis regis ducem, qui magna potentia, & ui armorum omnes quæ supererunt ex progenie Israël, reducet in terram patribus promissam. Ibi in libertate, imò in regno, in ocio, in opibus, in rerum omnium abundantia & copia reædificabimus templum Hierosolymis, & celebrabimus sacra, ceremonias, dies festos. omnes erimus sapientes, omnes prophetabimur, non solum patres familiæ, & prouectæ ætatis, sed filij nostri, & filiæ nostræ, etiam serui & ancillæ nostræ. omnes enim erimus edocti à Deo, nec opus erit ut quisquam dicat alteri, doce me,

aut

aut ueni docebo te legem Domini, omnes erimus  
in ea probè instituti. Huic siue regi, siue duci sub-  
duntur ceteri omnes reges ac nationes, uenientq;  
illorum plurimi iuxta legem Domini sacrificatū  
Hierosolymas, & à Iudæis docebuntur. Hic est fi-  
dei nostræ decimus tertius articulus, sine quo salui  
esse non possumus. C H. Discutiamus, si placet,  
singula, & pedetentim, ne quò impingamur. Neq;  
enim ignoras quàm obscuri & difficiles sint pro-  
phetæ uestri, ut uates omnes: quàm etiam plerun-  
que, nisi ex acri iudicio adhibeatur recta intelli-  
gentia, ut sic dicam, inepti. Potentem quidem fa-  
ciunt illum prophetæ, sed diuina ui & potestate,  
& humanis opibus planè alienū. ut Esaias: Ecce  
seruus meus inuitat eò, electus meus, complacuit in  
eo anima mea, dedi spiritum meū super eum, iudi-  
cium gentibus in lucē proferet, non clamabit, neq;  
uociferabitur, neq; foras proferet uocem suam: ca-  
lamum quassatum non conteret, & linū fumigans  
non extinguet. & Zacharias: Exulta ualde filia  
Sion, iubila filia Hierusalem, ecce rex tuus ueniet  
tibi mansuetus, seruator, humilis, equitans super  
asinum & pullum asinæ. Oseas quoq; expressius:  
Domus Israël, inquit Dominus, miserebor, & sal-  
uos faciam eos in domino Deo suo, & non serua-  
bo eos arcu, & gladio, & bello, equis & equiti-  
bus. Iam de terra illa quam expectatis, audi Esaiā

octauo

octauo capite: Et transibit per terram induratus  
 & esuriens: & erit, quum esuriet irascetur, &  
 maledicet regi suo & Deo suo, & respiciet sur-  
 sum, & terram intuebitur, & ecce calamitas &  
 tenebræ, & obscuratio, & angustia, & dense ca-  
 ligines. Locum hunc uelim examines diligenter.  
 Nam quæ dicuntur à prophetis, ad uos pertinent  
 potissimum, uidelicet dicta uestri uel commune fa-  
 ciendi gratia, uel castigandi ac corripiendi, uel edo-  
 cendi. In isto rerum uestrarum statu unusquisq; ue-  
 strum transit per terram peregrinationis huius, de  
 qua nihil potuit dici aptius quam transire. peregri-  
 ni enim sumus omnes, ut & patres nostri. Transit  
 itaq; Iudeus induratus et pressus incommodis uitæ.  
 esuriens autem, id est in arcum rei familiaris adductus,  
 nec Deum agnoscet, nec Messiam suum, omnes negliget  
 & execrabitur, qui sibi non aliam in rem sperat fru-  
 ctuosos, quam ut plena manu largiantur diuitias.  
 Suspiciens autem terram: quæ est terra quæ transitur,  
 nisi hæc saxosa & lapidosa? quæ autem illa quæ su-  
 spicitur, nisi cælestis patria communis omnium? de  
 qua est in psal. Spero uidere bona Domini in terra  
 uiuentium. ad intuitum autem illius, id est ad considera-  
 tionem uerorum bonorum, statim oboriuntur uestris ani-  
 mis caligo densa, & tenebrosa nox. Sed audiamus  
 alia. Vbi tandem futura est isthæc tam desiderata  
 sacrificatio? IV. Hierosolymis. CH. Vos ne

cum uniuersis nationibus gentium? IV. Omnes pariter. CH. Quæso te, quale uidetur tibi, cogi orbem terrarum uniuersum intra ciuitatis unius moenia, intra templi unius parietes? qui clamores, qui strepitus, boatus, balatus, mugitus, quæ cædes, quæ carnificina, qui cruor, quod fastidium, quæ nausea cruoris & sordium tot animantium mactatarum, quæ confusio tot nationum, etatū, sexuum? Sed si alibi uos exaudiri nefas esse ducitis; certè definitus ac determinatus est Deus uester loco aliquo, qui dicit, Cælum & terram ego impleo: nec uidetur uoluntate sua liberrima concessurus in ea quæ ab illo supplices postulabitis, sed quasi coactus & incātatus, ut aliter facere non possit, quando iam sitis in loco illo. IV. Atqui sic est præscriptum in lege. CH. Etiam, sed duodecim tribubus Israël, ne si fortè copia esset facta seorsim sacrificandi, ædículas, & cellulas, & idola uobis constitueretis, ut ille egit in libro Iudicum. Adde, quòd ut arca fœderis erat uobis admonitio beneficiorum Domini, uoluit ad conseruationem recordationis uestræ, ac proinde gratitudinis, ibi sacrificaretis Domino, ubi illa esset. ea uerò non nisi uno in loco esse poterat, eoq; ad unum locum conferebantur sacrificia. Qua ex ratione & caussa satis potestis edoceri, in cultu omni ac ueneratione Dei non tam sacrificia postulari, quàm gratam memoriam



memoriam beneficiorum illius, unde beneuolentia gignitur. Sacrificare enim quouis loco erat facile: sed quia id quod memoriam & conseruabat, & renouabat, unum erat, nempe arca, & quæ ex uetustis miraculis in arca continebantur, uirga & manna, ad illius præsentiam cultus est omnis redactus. Messias autem adhuc expectatur. is si uenturus est, ubi sunt sancti & prophetae, nuncij illius ac præcursores, quales omni habuistis tempore ante Iesum Christum? per illos enim reuisit Dominus, & consolatur, et corroborat suum populum. Itaque in psalmo, uel ex metu ac terrore, uel ex uaticinio horum temporum uestrorum dicitur: Iam non est propheta, & nos non cognoscet amplius. Quotquot autem inter uos de uenturo Messia post Iesum attentarunt aliquid prædicere, deprehensi sunt, ut par erat, uanissimi & impostores, adeo ut iussi sint omnes conticescere: & quidam exclamarunt de uobis, Vae animabus defnientiam tempus Messiae. Colligere ex his quæ diximus facile potes, quam exigua rei quam immanis sit uestra expectatio de Messia: ut non immerito competere in hoc negotium possit illud de fabula,

Parturiunt montes, nascetur ridiculus mus.

Noster uero Messias, quam ampla, quam expetenda sunt quæ nobis attulit? solutionem à sceleribus. mentem meliorem, reconciliationem cum Deo,

Hb      spem

spem certissimam æternæ felicitatis. Et idem uos diceretis de uestro illo, nisi nos de nostro dixissemus, ne ulla prorsum de re nobiscum consentiatis. Sed hoc beneficium conueniebat adferre secum illum, qui sic promitteretur, sic expectaretur. alioqui quid erat opus tot oraculis, tanto apparatu. tam longa & diuturna prædictione? non est profectò tanti redire Hierosolymas, sed amicum Deo fieri, & in sempiternam beatitudinem adscribi: hoc nimirum tanti est, & pluris etiã. Quid, quòd Esaias apertè de Messia dicit, Posuit Dominus in eo iniquitatem omnium nostrum.

DE NOSTRO ET IV-  
deorum Messia.

**S**ed ut manifestius utriusque Messie cognoscatur discriminem, uestri quem somniatis, & nostri qui abhinc annos plus mille & quingentis uersatus est inter homines, conferamus eos inter se, ut appareat Messie rationem & causam in uestrum nullo prorsus modo conuenire, conuenire per omnia in nostrum. Principiò quid est Messias? IV. Messias est apud nos, qui lingua uestra unctus, & græcè ( uti accepi ) Christus. unctio uerò hæc est regie dignitatis ac imperij nota quædam, & stabilimentum. CHR. Omnis ergo rex unctus dicitur Messias? IV. Omnis. Sed peculiari quadam appellatione, & uelut propria dicitur Messias

fias ille, qui promissus est olim patribus à Deo, qui tam diu expectatus Israël: CH. Oportet igitur maximum hunc esse atq; admirabilissimum regem, & utilitates quas adferet Israël dignas esse, cum tanta expectatione totius gentis, tum uerò quod amplius est, multoq; pluris faciendū, promissione Dei. quātum enim futurū sperari conuenit, quod Deus ipse promittat toties, tam multis, tam uariè? Vos uerò quod potissimum opus Mesſiæ fore creditis? IVD. Reductionem triumphantem & felicissimam in patriam. CHR. Quam in patriam? IVD. Iudæam. CHR. Atqui opus nostri Mesſiæ est peregrinatio atque exilium huius terræ, & reductio in patriam cœlestem. IV. Itidem ille noster faciet, quia ibi statuet ubi ritè sacrificabimus, & erimus boni. CHR. Quanto reductio nostri Mesſiæ melior atque optabilior, qui Adam, Abraam, Dauidem, Danielelem, & alios non reduxit ad uanitatem huius uitæ, sed ad bonā sempiternā? Quæro autem, ubi agunt patres Anterea dum Mesſias iste uester latet? si in cœlis cum Deo, quā grauis est iniuria, illinc eos detrahere ad uitæ huius commoda, hoc est rem adeò inanem, ut dixit Solomon. Quòd si in cœlis non sunt, certè ubicunque agunt meliore sunt conditione, quā illa est Palæstinica edendi & bibendi, & mactandi pecora ad sacrificia. IV. Redibunt

fortasse ad gloriam Mesſiæ. CH. Videlicet & qui hinc diſceſſerant homines tenues, frugi, fortunarum rerumq; uitæ huius omnium contemptores ſtrenui, reuertentur accenſis in altera uita cupiditatibus, & incipient iam expetere cibos delicatos & exquisitos, ornamenta elegantia, ædificia ſumptuoſa, & alia ſeruitutis huius corporis uilia miniſteria. nimirum ſument pharmacum aliquod, quo illis iam ſapiant quæ prius ſolebant illis eſſe fatua & inſipidiſſima. Iam uerò quæ eſt gloria hæc Mesſiæ, ad quam honeſtandam, ornandamq; remittentur huc ſancti patres? Gloria & decus, comitatus noſtrorum eſt morum, nō cœli. Neque enim illa in cœlis ſpectantur, cum multis quis ueniat, an cum paucis, cum quo hominum genere, quàm culto & uestito, quæ inter nos homuli conſiderant, & magni faciūt: non illi quidē cordatiores paulo, ſed de medio uulgo: nec decus aut gloria eadē illic æſtimatur formula, qua apud nos. Deo eſſe gratiſſimum, cæteris rebus omnibus detractis, unica eſt illic gloria. comitatu nihil eſt opus. Sed quæ tandem eſſet æquitas, ſanctos patres propter alterius decus aut honorem, ſuo ipſos iure defraudari? Non ergo non introibant in cœlū, ut cum Mesſia redirent ad hanc lucem, ſeu uerius ad noctem hanc & tenebras, quemadmodū uos firgitis: ſed arcebat eos aditu cœli peccatum, nec aliud



liud poterat ob stare, quo minus in cœlum fato  
 functi reuolarent. IV. Atqui non pauci eorum  
 immunes prorsum fuerunt omnis noxæ, ut Hiere-  
 mias, Helias, Daniel, & Ioannes, sicut uos asseri-  
 tis. CHR. Neq; id nos negamus: sed uel hinc  
 colligas licet, non solum abluendis maculis, quæ  
 quisque uoluntate sua in se contraxisset, promi-  
 sum esse instauratorem, & seruatorem: sed illi po-  
 tissimum, quam primus parens Adam in uniuer-  
 sam suam posteritatem diffudit. ob quam dictum  
 est, Detestabilis terra in opere tuo. Quibus in uer-  
 bis, si acutius uelis ea examinare, deprehendes na-  
 turæ esse corruptelam significatam. Ex psalmo e-  
 tiam licet idem colligere, in quo de hominis natu-  
 ra integra dicitur, Quid est homo, quod memor  
 es eius? &c. Cui tandem hominum subiecta sunt o-  
 mnia? imò nulli propè minus. Sed locus hic diffuse  
 est à me tractatus in disputatione cum gentilibus:  
 illinc petes, quum uoles. Hinc & reliquis patri-  
 bus ostensa est spes de reditu in gratiam cum Deo.  
 bonum sunt animum habere iussi, per eum qui es-  
 set patri gratiosissimus. Vides generalem fuisse me-  
 dicinam, ut intelligas morbum item fuisse genera-  
 lem, & expectationem salutis omnibus fuisse iu-  
 cundissimam, quia nemo erat damni expers. om-  
 nes indigebant instauracione ac reparatione, quia  
 omnes ceciderant, & omnes memoria promissio-

nis fulciebantur ac recreabantur. Esaias non ob-  
scuris uerbis expiationem hanc peccatorū expo-  
suit: Quis credidit auditui nostro, & brachium  
Domini cui reuelatum est? Et ascēdit sicut uirgul-  
tum coram eo, & sicut radix de terra deserti. Lon-  
gus est sermo huius prophetiæ, sed non grauabor  
referre: quoniam adeo in Christum nostrum com-  
petit, ut non tam uideatur prænuñciasse uentura,  
uelut uates, quàm præterita descripsisse, ut histo-  
ricus. Itaque pergo dicere: Non est forma ei, ne-  
que decor. & uidimus eum, & non erat aspectus:  
& desiderauimus eum. Despectus est, & abiectus  
inter uiros, & uir dolorum, & expertus infirmi-  
tatem, & abscondebamus faciem ab eo: despectus,  
& non reputauimus eum. Verè languores nostros  
ipse tulit, & dolores nostros portauit, & nos re-  
putauimus plagatum, percussum à Deo, & hu-  
miliatum. Ipse autem uulneratus est propter præ-  
uicationes nostras, attritus est propter iniqui-  
tates nostras. Castigatio pro pace nostra super  
eum, & liuor eius sanitas fuit nobis. Omnes nos  
tanquam oues errauimus, unusquisque ad uiam  
suam conuersi sumus, & Dominus peruenire fe-  
cit ad eum pœnam omnium nostrum. Oppressus  
est, & afflictus est, & non aperiet os suum. Sicut  
agnus ad occisionem ducetur, & sicut ouis coram  
tondente se obmutuit, & non aperiet os suum. De  
clausura

clausura & iudicio sublati est, & generationem illius quis enarrabit? quia abscisus est è terra uiuentium: propter prauaricationem populi mei, plaga fuit ei. Et dedit cum impijs sepulturam eius, nec dolus fuit in ore eius: & Dominus uoluit contere eum, egrotare fecit. IV. Atqui rabini nostri, quod uos tam appositè congruere in Iesum uestrum creditis, de populo Israëlítico afflicto & percusso à Domino exponunt. CHR. Facile est quiduis confingere, si non sis rationem cur id facias redditurus. An competunt in gentem uestram illa, Verè languores nostros ipse tulit? Quis enim illic sic loquitur, nisi Esaias, qui est ex eodem populo? & gens Iudaica percussa est à Domino propter sua scelera, non propter aliena. propter quod dicitur: Ipse autem uulneratus est propter prauaricationes nostras, attritus est propter iniquitates nostras. Cedò uerò, & id quod sequitur, Castigatio pro pace nostra super eum, & liuor eius sanitas fuit nobis: an hoc quoque de populo Israëlitis? etenim nationes aliæ nihil emolumenti accipiunt ex uestris calamitatibus ac afflictionibus, utiq; haud magis quàm cum malus qui uis punitur, quod uident iustitiæ diuinæ experimentum quoddam. Iam qui sunt illi, Omnes nos tanquam oues errauimus: nonne propheta, & prophetae populus? ut appareat manifestò,

qui datus sit in pœnam pro omnibus, alium esse à populo Israëlítico. Illud autem, Sicut agnus ad occisionem ducetur, & sicut ovis coram tondente se obmutuit, & non aperiet os suum: tantum abest ut uobis conueniat, ut à uobis nihil dici possit alienius, qui estis impatientes, maledici, diris atq; execrationibus deuouentes uniuersos à secta uestra alienos. Postremò apertissime Propheta subdit, Propter præuaricationem populi mei uerberatus est: quæ sententiola commenta uestra omnia manifestò confutat. Declarat enim esse alium quàm populum, qui sit propter populi delicta percussus. Nec credo uos tracturos ad uosipsos dictum illud, Eo quòd iniquitatem non fecerit, nec dolus fuerit in ore eius: quum paulo antè de uobis dictū sit, Propter flagitia populi mei cæsus est. Sed multo fuerit facillimum discrimen inter nostrum Messiam, & uestrum tam diu expectatum inspicere, si ambos inter se contulerimus. Primum ex te quaero, Messias an erit Deus? IV. Absit, quorsum enim futurus esset Deus? CH. Quia sicut quum dabat uobis legem peculiarem, dignabatur signis quibusdam ostendere se præsentem, ac uelut conspicuum: ita quum daret legem uniuersalem, propius adesset nostris sensibus, & illum non iam per ignem & tonitrus conspiceremus, sed corpore indutum, & unicuique nostrum similem. Esaias di-



eit uerbis Dei : Propterea cognoscat populus  
 meus nomen meum in die illa, quia ego ipse qui lo-  
 quebar ecce adsum. Nō possunt hæc de alio quā  
 de Deo intelligi, qui olim loquutus est patribus,  
 cuius uoces & tonitrua audiistis in signa : po-  
 stea uersatus est inter homines, homo factus. quod  
 & Baruch dicit, propheta non parue apud uos  
 authoritatis : Hic est Deus noster, & non extima-  
 bitur alius aduersus eum. hic adinuenit omnem uia  
 disciplinæ, & tradidit illam Iacob puero suo, &  
 Israël dilecto suo. Post hæc in terris uisus, & cum  
 hominibus conuersatus est. IV. Atqui scriptum  
 est, Non uidebit me homo, & uiuet. Esurire autē  
 & sitire, algere & æstare, hæc in Deū non com-  
 petunt : impium est, Deo hæc attribuere. CH.  
 In loquendi ratione sita sunt illa, non in ratione  
 intelligendi. Vos soletis dicere, septuaginta ani-  
 mæ descenderunt in Aegyptum, & multæ animæ  
 perierunt. atqui nec anima perit, nec ascendit aut  
 descendit quoquam : sed loquendi consuetudine  
 aliàs pro homine toto anima sumitur, aliàs pro  
 corpore, interdum pro uita. Sic in Christo nostro  
 natura una est Deus, altera est homo : quemadmo-  
 dum in homine pars una est corpus, altera est ani-  
 ma. Quod in Christo oculis intuentium erat expo-  
 situm, non erat Deus : sicut quod cernimus in ho-  
 mine, non est anima. Deus ergo nec esuriebat, nec  
 Hh 5                      algebat,

algebat, sed homo ille Deo iunctus. De parte autem redundat appellatio tum in partem alteram, tum in totum: quemadmodum homo dicitur esurire ex corpore, & rationalis ex anima. IV. At quæ aures possunt ferre, Deum esse actum in crucem, & mortuum? CH. Si non assueuisses huic loquendi modo de homine, quæ aures ferrent dicere animas esse uenditas, & animas percussas pro homine ipso, & hominem esse claudum, cuius sit solus pes claudus? Re explicata adeò nihil est in intelligentia absurdi, ut mirer esse, qui illa loquendi ratione offendantur: probent tamen eam, quæ est de homine. quòd si & illum loquendi morem inusitatum uestris auribus tantopere abominamini, nos certè in uerborum controuersia molesti uobis non erimus: utinam tam facile de rebus inter nos conueniat, quàm conueniret de uocibus. IVD. Ostende mihi in hoc libro, prædictum esse Messiam fore Deum. CHR. Ostendi aliàs congruere ut ita esset, multis mea quidem sententia & magnis argumentis, quæ (si uis) uel ex eo petes libro, uel hic aliqua attingamus. IV. Mihi argumentis nihil est opus: explica mihi librum hunc sacrum, & doce. CHR. Quomodo possem efficacius docere, quàm demonstrando ita congruere, ita oportere? quandoquidem Deus non agit, nisi quod maxime & congruit, & oportet. Si tantum  
uos

uos haberetis contra nos rationum, quantum nos contra uestras inanes persuasiones, quo ore, quibus uerbis rationis uim, præstantiam, diuinitatem exaggeraretis? de literis sacris ne mentionem quidem fieri pateremini. Sed ex ipsis tamē sacris oraculis depromam tibi testimonia meæ ueritatis.

Quid porro si id quod confirmem, mysticis non esset literis expressum? an nō plus est, scriptum esse à Deo in cordibus nostris, quàm in saxis aut membranis? IV. Non arbitror. Nam est hic liber, liber ueritatis & uitæ: ut quod in hoc libro non sit, nec pro ueritate haberi debeat, nec pro uita.

CH. Quisquiliis & minutias quàm acutè cernitis in fraudibus, in imposturis, in sordidissimis lucellis captandis, ad res magnas planè cæci. Si hic liber ueritatis est, fit, ut nihil in eo sit falsum: quod planè ita esse, est mihi persuasissimum. Non consequitur autem, quòd nulla sit extra illum ueritas. Volumina enim prophetarū liber sunt ueritatis, multa sunt tamen uera extra illos: ut in libris Mo- sis, in Psalmis, Parabolis, & eiusmodi. quin et uos extra canonem sanctarū literarum, multa creditis esse uerissima in libris Thalmud. IV. Omitte nūc ista, & ex libro hoc perfice quæ instituisti. CH. Vaticinia adferā sanè nō pauca, quib. si peruersas et peruicaces interpretationes adlere animo obstinaueris, nihil est quod nō possis ad sensus alieniss;

mos longissimè detorquere, etiam in Latinis &  
 Græcis scriptoribus, non solum in lingua uestra,  
 cuius obscuritas & intricatio in uerbis, in tropis,  
 in sententijs, & tota dictione magnam tibi ad coa-  
 ctas interpretationes ansam & facultatem præbe-  
 bit. quo iniquius facis, dum contendis à me, ut lu-  
 cem tibi puram & purgatam tantis è nebulis &  
 caligine proferam. Quapropter admonenda est  
 his tenebris nostra lux, maligna quidem illa, &  
 prætenuis, sed adiumento tamen futura in hac ob-  
 scuritate. I V. Et quæ tandem est lux ista nostra,  
 quam diuinis rebus prætendemus? C H. Oblit-  
 tus ne es conuenisse inter nos dudum, lumen huma-  
 næ mentis de luce illa summa & sempiterna deri-  
 uatum, rationem esse. hanc nos in nocte ista san-  
 ctarum scripturarum accendemus, ut uideamus  
 quis sensus maximè congruat prophetæ uerbis, di-  
 ctis & præcedentibus & sequentibus, quis sit ap-  
 titissimus mysterijs & rebus sacratissimis, de quibus  
 illic agitur: ne celsissimas & diuinas sententias,  
 quales sunt in sanctis oraculis, ad infimas ineptas  
 atque aniles interpretationes deflectamus, dum sto-  
 macho seruimus, non intelligentiæ. An non tibi  
 hoc uidetur esse ad sacras literas intelligendum  
 peraccommodum, et ex maiestate sermonum Dei?  
 Quid taces? I V. Quoniam elegantiam oratio-  
 nis audio, dicta autem uerborum Domini non au-  
 dio.



dio. CH. Non potes de eo ipso conqueri. nam  
 & audiisti hactenus satis sæpe, & audies, uti spe  
 ro, posthac. sed res ipsa coëgit me hæc præfari,  
 quæ non dubito, quin ipse approbes. IV. Non-  
 dum de eo constitui. CH. Approbasses, si dixis-  
 set rabinus, & laudasses, & esses admiratus. sed  
 non iniuria illud dicunt, Longè aliter fauorem sen-  
 tire, quàm offensionem. Tu uerò quantum uoles  
 induc in animum tuum eas affectiones, quibus ad  
 rectam omnem rationem cæcum & surdum & sa-  
 xeum omnino redactum cor: ego nihilominus exe-  
 quar reliquum propositi. Utinam uelles animi æ-  
 quitatem ad pauculas horas sumere. Sed nec præ-  
 fatio hæc sola suffecerit, ut sunt uel uestra inge-  
 nia, uel obstinatio cōtra ueritatem. Non arbitror  
 te dubitare, quin scopus uaticiniorum omnium sit  
 Mesiās, ad illum omnia quæ recta quæ obliqua per-  
 tinere, per quem Deus promittit se Israëlī missurū  
 salutem, & propheta ipsi personam sæpenume-  
 ro induit Mesiæ, sicut etiam Dei, quod est in lin-  
 guis omnibus commune, ut amici amicorum nomi-  
 ne sæpenumero de ipsis loquantur. Dicit qui ne-  
 gocio non interfuit, magnam rem pereginus, mul-  
 tum profecimus: uel contrā, nihil potuimus impe-  
 trare, repulsi sumus, contumeliam accepimus: de  
 amico sentiens, quem unum existimat secum, ami-  
 citia illos uniente. Hoc ut frequens est apud pro-  
 phetas.

phetas, & psalmistam, de rebus Messiae: ita mirandum non est, quia uulgare admodum in quacunque sermonis & linguae ratione. IV. Satis id mihi quidem uidetur probabile. CH. Incipiamus igitur pedē conferre. Negas Messiam futurū Deum. erit sacerdos? IV. Ne hoc quidem ipsum. nam ex tribu Iudae, non Levi. CHR. Atqui psalmus centesimus decimus illius diuinitatem & sacerdotium declarat. in quo Dauid, qui fuit rex Israelis, ex cuius stirpe erat Messias nasciturus, dominum eum uocat, dicens: Dixit dominus domino meo. Maior ergo est hic dominus, quam homo & rex, & pater suae humanitatis. quantuscunque enim fuisset, si modò homo solum, propheta & rex Israelis, & progenitor suus filium illum potius appellasset, quam dominum. quemadmodum in psalmo 44. quum post regis mentionem, quem regem & dominū & Deum uocat, conuertit se propheticus sermo ad reginam, quòd humanitas tantū in illa inesset, amplissima quidem & excellentissima, nempe quae astitit coniunx ad dexteram regis cum aureo diademate, in uestitu uariegato, non tamen diuinitas, filiam illam nominat: Audi filia, & uide. Audiamus iam quid Dominus dicat Domino: Sede à dextris meis. Leue dictū, si caput in terram deijcias, ut pecus: sed grāde atq; admirabile, si paulū erigas, si sursum tollas. Eccui tandē homini dixerit

xerit Deus, Sede à dextris meis! Nulla est tanta uel hominū uel angelorū magnitudo, quæ asidere possit Domino, & asidere ad dexterā. Cur enim cecidit lucifer, qui manē oriebatur, ut est in Esaia, nisi quia dixit: In cœlū conscendā, super astra Dei exaltabo solium meū, & sedebo in monte testamēti, in lateribus aquilonis. Ascendā super altitudinē nubium, similis ero altissimo. quod erat uelle Domino asidere. Nullus ergo sedet ad dexterā Dei, non homo, nō angelus, nisi is qui diuinæ est particeps naturæ. De sacerdotio autē subdit, constitutū esse illum à Deo sacerdotē, & quidem iureiurando, cuius nulla sit unquam futura poenitētia: & non secundū ordinē Aaron, ne de tribu sis sollicitus, sed secundum ordinem Melchisedech. Sacerdotiū Iudaicum ex tribu conferebatur, & ex familia. in sacerdotio autem Christi non familia nec tribus spectata est, sed dignitas sacerdotis: & ut appareret ueteris pontificatus abrogatio, & sub pontificatu legis quoque & ceremoniarum, prætermissa est mentio Leui & Aaron: & allegatus est ritus sacerdotis, qui ante legem & prophetas sacra faciebat Deo cœli. hic uerò in Salem regnabat, quæ postea dicta est Hierusalē: & Abraæ ex cæde regum ex Pentapoli reuertēti bene precatus est, & panē ac uinum obtulit. cui & decimas omnium quæ possidebat, dedit Abraam patriarcha. Melchisedech,

quo

quod tamen melius nosti, interpretatur rex iustitiæ. Rex autem Salem, est rex pacis. sacerdotium eius non sanguine & dilanatione pecorum exercebatur, sed iuuandis mortalibus cibo faustisq; orationibus, quæ omnia mirifice in sacerdotium Christi congruunt. huic se sacerdoti summittit Abraâ, pater non tam Iudæorum, quàm omnium credentium, & sibi ab illo foeliciter precari magni beneficij loco ducit, decimasq; bonorum suorum suo & posteritatis suæ nomine illi impartitur. & Abraam fidei ac pietatis exordium, sacerdotem alium nec nouisse legitur, nec esse ueneratus præter hunc, in quo supremi ac unici sacerdotis adoraret imaginem, explicatam postea uerbis Psalmistæ. De Christi etiam sacerdotio sunt illa apud Malachiam: Et scietis, quod misi ad uos mandatum hoc, ut esset pactum meum cum Levi, dicit Dominus exercituum. Diligenter ea quæ subdantur animaduertito: intelliges non ad carnalem legem referri, sed ad spiritalem. non enim in nationem Leuitarum competunt hæc: Pactum meum fuit cum eo uitæ & pacis, dedi q; eas illi propter timorem, & timuit me, & à facie timoris mei contritus est. Lex ueritatis fuit in ore eius, & iniquitas non est inuenta in labijs eius. In pace & æquitate ambulabit mecum, & multos auertit ab iniquitate. Labia enim sacerdotis custodiunt scientiam, & legem requirunt



quirent ex ore eius, quia angelus Domini exercituum est. Hæc Malachias. quæ nec de Aaron dici possunt, nec de Phinees filio eius: nec ullo unquam tempore tam sancta fuit familia sacerdotalis, ut magnitudo huius sententiæ in eam conueniret. Nec solum sacerdos est Messias noster, sed etiam doctor, ut Ioëlis 2. Filiæ Sion exultate, et letamini in domino Deo uestro, quia dedit uobis doctorem iustitiæ. Sed ad Christi diuinitatem reuertamur. Psalmum 44. non dubito quin sæpe recites: uideris enim mihi esse religiosus. Illius singulas non modo sententias, uerum etiam uerba uelim expendas. est enim et ad regem, et de rege, hoc est de Messia: ad quem sunt uerba illa, Sedes tua Deus in sempiternum, uirga æquitatis est uirga regni tui. Quod autem de Messia dicatur illa, hoc est de alio quàm de Deo patre, nihil potest esse manifestius, ex sequenti uersu: Dilexisti iustitiam, et odisti iniquitatem, propterea unxit te dominus Deus tuus oleo letitiæ præ participibus tuis. Vides hic apertissime duas diuinitates expressas, alteram sedentis et regnantis in æternum, alteram ungentis hunc regem. et quinto uersu post: Concupiscet rex decorem tuum, quoniam ipse est dominus Deus tuus, inflecte te illi. Et Esaia 9. Paruulus natus est nobis, et filius datus est nobis, et erit principatus super humerum eius, et uocabitur nomen eius admirabilis, consiliarius, Deus fortis, pater

16      sempi-

sempiternus, princeps pacis. IVD. Sumitur quandoq; Deus in sacris literis pro principe, uel iudice, uel duce: sicut in illis locis, Aaron erit Deus tuus, Deus sedit in synagoga deorum, & dijs non detrahes. CH. Vides aperte grauem obscuritatem & densas tenebras lingue uestrae, ut opus sit ingenti ac fulgentissima luce mentis ac iudicij. nam nisi rationem adhibeamus ducem ac magistrum, quomodo scietur, quando per Deum intelligendus sit Deus uerus coeli & terrae conditor, quando homo princeps uel iudex? quando per Isaacem Iacob filius Isaac, quando eius progenies, quando decem tribus, quando electi & Ecclesia sancta? alias etiam Israel est Christus, sicut Dauid: & est filius Iesse, & est Christus ipse promissus. sicut saepenumero in Psalmis & prophetis. Quis haec & similia distinguet sine lumine iudicij? & quidem quoad eius fieri potest per purgato, & quam proxime admoto? Queramus ergo in uaticinio Esaie, intelligendumne sit de Deo summo & eterno, an de homine principe. nam si de principe Propheta loquitur, quid magnum de Messia dicit, quod est tam multis commune? Quid, quod additur Fortis, ad differentiam aliorum, qui sunt infirmi atque imbecilles. ideo & Fortis pro Deo omnipotenti in sacris literis sumitur. ut in psalmo: Sicut iurauit Domino, uotum uouit forti Israelis. IVD. Sunt certe quaedam sacrae literae, quibus

bus nomē ipsum ueri Dei & summi scribitur, nec aliud ullū quā quod à uobis tetragramaton dicitur, à nobis autem semhamphoras. CH. Non est istud perpetuum. sed & periti uestre lingue sic scribi in loco illo Esaiæ affirmant: quemadmodum Hieremiæ 35. Hoc est nomen quod uocabitur Deus noster. IV. Non habetur Vocabitur, sed uocabit. CH. Nullus est sensus in uerbo actiuo. & uestri aiunt, posse ac solere impersonaliter uerti, eumq; in modum sunt interpretati. & Targum Chaldaicū apud Esaiam sic legit: Vocabitur nomē eius de ante admirabilis, consiliarius, Deus fortis, permanens in secula seculorū Messias. IV D. Sunt ex nostris qui illud ad Ezechiam referunt. CH. Referetis uel ad mulos & asinos, modo ne quid in Christum nostrum sinatis congruere. Quomodo potest Ezechie accommodari id quod sequitur, Multiplicabitur principatus eius, & pacis non erit finis. Super solium Dauid, & super regnum eius sedebit, ut confirmet illud & corroboret in iudicio et iustitia, iam nunc usque in sempiternum. & 45. cap. eiusdem prophete: In compedibus transibunt, & tibi incuruabunt se, teq; deprecabuntur: tantum in te est Deus, nec est alibi quā in te. Vere tu es Deus latens, Deus seruator Israelis. Quis uero est Deus iste se abscondens? an non Deus olim satis se proferebat, magnisq; & uarijs signis testificabatur Deum esse se? & paulò antea dixerat, Ut

sciant ab ortu solis usq; ad occasum, quòd non est  
 prater me. ego Dominus, & non est amplius. Chri-  
 stus autem noster Deus est oculis corporum abditus,  
 nec inueniri alius potest, in quem dictum illud con-  
 gruat. Porro ad tollendam sensuum persuasionem  
 confirmat propheta dicens, Vere tu es Deus. Et què  
 admodū Esaias uocat illū patrem sempiternū, sic Mi-  
 cheas egressum eius esse dicit ab initio à diebus eter-  
 nitatis. Et Esaias 48. loquēs de purgatione et sancti-  
 ficatione Israël, attentionē ingentē postulat: Audi-  
 te me Iacob serue, et Israël uocatus à me. Manus mea  
 fundauit terram, & dextera mea mensa est cœlos:  
 uoco eos, stabunt simul. congregate uos omnes, &  
 audite, quis inter eos annunciabit ista? appropin-  
 quate ad me, audite hos. Non à principio in abscon-  
 dito locutus sum, à tempore quo fuit ipsa prophetia  
 ibi eram: & nunc dominus Deus misit me, & spiri-  
 tus eius. Quis est hic missus, qui fuit à tempore pro-  
 phetiæ? non Israël: nam nec fuit, nec missus est, sed  
 ad eum mittuntur prophetae. Surgens, inquit, de ma-  
 ne mittebam prophetas meos ad illos. Duplex autē  
 natura Christi exposita est à Daniele, dicente: Vi-  
 debam in uisione noctis, & ecce in nubibus cœli tan-  
 quam filius hominis ueniebat, & usq; ad antiquum  
 dierum peruenit, & coram eo appropinquare fece-  
 runt eum, & dedit ei potestatem & gloriam, & re-  
 gnum, & omnes populi tribus, & linguae seruiant  
 ei.



ei. Potestas eius potestas aeterna. et regnū eius quod non corrumpetur. Non potest hoc ullo modo intelligi de eo qui sit solum Deus, nec qui sit solum homo: sed aperte duo designantur, quorum alter planē sit Deus, alter ex humanitate & diuinitate constans. quem ideo tanquam filium hominis uocat. IVD. Quid ergo, essent multi dii? CH. Non essent, sed unus tantum. Nam qui gignit, & qui genitus est, diuersi sunt non essentia & natura, sed persona. Et huius sempiternae generationis nec ignari fuerunt sancti patres, nec eam tacuerunt. In psalmo enim 2. dicitur: Narrabo fœdus Domini mecum: Dominus dixit mihi, Filius meus es tu, ego hodie genui te. in quo significatur naturalis generatio, non adoptionis. filius enim qui adoptatur, non procreatus à patre, asciscitur in iura familiae: qui autem à patre genitus est, naturalis est. Nec aliud significare uoluit propheta, quàm hunc cui Dominus sit locutus, filium esse: sed longè alia ratione, q̃ alios sanctos homines, qui gratia & fauore Dei facti sunt filij illius, hic autem generatione. Rursum in psalmo. 72. Perseuerabit nomen eius in aeternum, ante solem filius est nomen eius. Vertunt alij genitus, alij nascēs. simile est quod Zacharias ait: Ecce ego adducā seruum meū orientem, siue germinantem. Accedit huc, quòd sanctum illud nomen tetragrammaton significat esse, uel essentiā. ut in Exod. ad Moysen: Ego sum ens,

siue Ego sum quod est, & Quod est misit me ad uos-  
 cum etiam generationem. in Parabolis quoq; Solo-  
 monis, quod nomen est eius, & quod nomen filij si no-  
 sti: per quod ostendit, appellationem filij Dei esse  
 ineffabile, hoc est humanis mentibus impossibile co-  
 gnitionem essentiae illius. nomen enim cuiusq; rei ue-  
 rum & accommodatum est, per quod cuiusq; rei na-  
 tura & ingenium explicatur. sicut in Genesi: Addu-  
 xit Deus omnem beluam ad Adam, ut singulis nomi-  
 na imponeret. & ut quicque ille appellauit, ita est  
 nomen eius. Aliorū autem filiorum Dei, qui plurimi  
 sunt approbatione uirtutis, nec nomen, nec essetia,  
 nec qualitates incognoscibiles sunt. Multitudinem  
 autem essentiae Dei attribui, non debet uideri tibi  
 uel impium, uel nouum, qui tam es diligenter in sa-  
 crorum librorum uersatus lectione. In Genesi enim  
 dicitur, In principio creauerunt dij coelum et terrā:  
 quum constet, uniuersa esse à solo Deo summo & o-  
 mnipotente condita, impiumq; esset aliter existima-  
 re. sicut in psalmo 32. dicitur: Verbo Domini caeli  
 fundati sunt, & spiritu oris eius omnis uirtus eorū.  
 & in eodem libro Geneseos: Faciamus hominem ad  
 imaginem & similitudinem nostram. de quo paulo  
 post, Et formauit Deus hominem è puluere terrae.  
 I V D. Mos est loquendi regum, ut plurali numero  
 utantur quum de uno loquuntur. C H. Est quidem,  
 ut dicis, mos principum, sed longè post Moysen reper-  
 tus

tus & introductus. neque enim in Pentateu-  
cho, aut in reliquis sacris uoluminibus, quæ om-  
nia post Moſen fuerunt ſcripta, eam tu ſermonis for-  
mam inuenies. Sed alia adijciam his loca. Malachie  
primo: Si Domini ego ſum, ubi eſt timor mei? & in  
pſalmo 135. Conſitemini dominis dominorum. Et ad-  
duco hæc tibi, non quemadmodum uerterūt noſtri,  
ſed ſicut uos in Hebræo legitis. & apud Hieremiam  
capite tertio & uigeſimo: Peruertitiſtis uerba deorū  
uiuentium, domini exercituum Dei noſtri. & 2. Re-  
gum: Quæ eſt gens ut populus Iſraël, propter quam  
iuerunt dii ut redimeret ſibi populum. & in Deut.  
Scito hodie, & cum animo tuo reputa (qua præpa-  
ratione uerborum grande aliquod myſterium prola-  
turum ſe ſignificat, quod eſſet oculis ſolum mentis  
cernendum, nempe quod ſequitur) quod Dominus  
ipſe eſt dii in cœlo ſuprà, & in terra inſrà, & non  
eſt alius. Peto abs te, ut iterū atq; iterū conſideres,  
quid illud ſibi uelit Genefis 18. quod quum Domi-  
nus Abraham apparuiſſet, ille tres uiros uidit, & tan-  
quam unum adorauit, & unitatis numero compella-  
uit, Domine. Idem patriarcha miſſurus præfectum  
domus ſuæ ad capiendam uxorem Iſaac filio ſuo: Po-  
ne, inquit, manum tuam ſuper femur meum, et adiu-  
rabo te per Dominum cœli, & Deum terræ. Quid  
hic audimus? diuinū aliquid eſt in femore Abraham,  
ut id tangentes, tanquam ſi arcam teneāt fœderis,

iurent per Deum, non quemuis, sed dominum cœli  
 & Deum terræ. si hoc ad fidem & sanctimoniam re-  
 fertur uiri Dei, cur non potius tangitur manus dex-  
 tera, uel pectus sedes cordis, uel ipsum caput? Nihil  
 tale: sed id tangitur, unde origo est Messie, in quo  
 est Deus terræ, & Dominus cœli. non iurando nomi-  
 natur aut demonstratur, nisi Deus, uel id in quo  
 Deus habitare pro certo habetur: alioqui nefas est,  
 & genus idololatriæ. In Esaia. cantio Seraphinorū  
 erat: Sanctus, sanctus, sanctus, dominus exercituum,  
 plena est omnis terra maiestatis illius. trinitas san-  
 cta expressa est, & dominus exercituum est Chri-  
 stus, cœlestium & terrestrium copiarum caput &  
 dux. in quibus uerbis nisi grande atq; inæstimabile  
 mysterium fuisset conclusum, non fuisset uox Sera-  
 phinorum, ordinis cœlestium spirituum supremi.  
 Quid, quod nomen illud Semhamphoras, siue te-  
 tragrammaton, Rabini uestri accurata & recondi-  
 ta religione dignis tantum discipulis explicant per  
 nomina duodecim & quadraginta literarum, quod  
 sic expositum significat patrem, filium & spiritum  
 sanctum: & adhuc clarius & apertius, per nomina-  
 tiones quadraginta duarum literarum, quæ sensum  
 hunc consciunt, pater deus, filius deus, spiritus san-  
 ctus deus, unitas in trinitate. trinitas in unitate. IV.  
 Nouum est hoc omnino mihi, & inauditum. CH.  
 Quære · doctissimis uestrorum rabinorum. &



nostri qui hæc de intimis uestris monumentis depramunt, affirmant esse peruetus, obseruatum antequam omnia deprauaretis rabie & acerbitate odij erga nos. Vos autem nunc esse ferè antiquitatum non alienarum modò, ut aliàs semper, sed uestrarum quoque ignaros constat. Si Iesus negasset se esse Deum, uos asseuerassetis Mesiam debere esse Deum, & dicta hæc à me citata, aliàq; numero amplissimo colligissetis. Sed quia ille Deum se esse dixit, abominatur hoc odium uestrum, & Mesia diuinitatem omnino tollitis.

QVOMODO IESVS IM-  
pleuit fidem uaticiniorum  
de Mesia.

**S**ed percurramus iam breuiter Christi uitam, et conferamus cum uaticinijs quæ erant de ipso. liquidum profecto fiet, fuisse illum Mesiam, qui omnia ut erant promissa præstiterit. **IV D.** Si talis fuit Christus, qualem Euangelistæ uestri referunt, pluri-  
ma indubiè uatum nostrorum oracula in illum competunt. sed nos historiam illam Euangelistarum uelut falsam reijcimus, uel ab ipsis pro arbitrio confictam. **CH.** Vestri rabini antiqui non negant uera fuisse, quæ traduntur à nostris de Christo, sed in illis non congruere prophetias contendunt. Arguere autem euangelistas uanitatis, recentior est, crescente odij aduersum nos rabie. quæ opinio si non est anti-  
li s qua,

qua, unde potuerunt uestri isti diuinare, falsam esse ab euangelistis contextā narrationē de Iesu? Quid, quod euangelistis non fuisset integrum quæ uellent confingere, uiuentibus etiam tum compluribus & Iudeis & gentilibus, qui nouerant Iesum, à quibus potuissent coargui. ita tota fabula, uelut ridicula, fuisset explosa. Nec pro re falsa & ficta uoluissent subire damna, contumelias, infamiā, tormenta, mortem. Quod si fingere illis erat in animo, non eum finxissent, in quem uaticinia quadrarent, alia oblique, alia obscure: sed in quem recte omnia, apertò, manifestò, ut nullus uel contradictioni relinqueretur locus, uel dubitationi. IVD. Audiamus quæso, quas habes pro te prophetias? CHR. Primum omnium, Deus foemina cōcluditur: de quo est Hieremie 31. Nouum creauit Deus super terram, foemina circumdabit uirum. si non de uiro illo magno atque admirabili, qui in se diuinitatem continet, intelligitur, quid poterat dici ineptius, aut puerilius? num non uir omnis de foemina nascitur, & à foemina nouem mensibus gestatur? & prodit uir ille non cōmuni more de foemina ex uiri li semine, sed de uirgine, spiritu Dei autore. Hoc erat imagine quadā expressum in Ezechiele ca. quarto et quadragesimo: Et redire fecit me (inquit) ad uiam portæ sanctuarij exterioris, quæ spectat ad orientē, & erat clausa. & dixit ad me Dominus: Porta hæc clausa

clausa erit, nō aperietur, et uir non ingreditur per eā, quoniam Dominus Deus Israël ingreſſus eſt per eā. Cedo iā, quis alius eſt Deus Israël ingreſſus per portam clauſam, quā Ieſus Chriſtus? Deus enim in aeterna illa ſua & omnipotenti eſſentia ac natura nec ingreditur, nec egreditur, ſpiritus immotus, implens & continens omnia. Hoc eſt quod Solomon ſibi dicit eſſe abſconditum, Prouerbiorum 30. Via uiri in uirgine ſua, quomodo in eam ingreſſus, quomodo ex ea egreſſus. Sed expreſſioribus uerbis Eſaie 7. Ecce uirgo concipiet & pariet filium, & uocabitur nomen eius Emanuel. I V D. Non eſt in Hebraeo uirgo, ſed aalma, quod eſt puella. CH. Periti linguae ueſtræ aalmam dicunt ſignificare uirginem adoleſcentulam abſconditam, & ſedula parentum cura cuſtoditam, nec uſquam in ſacris literis aalma de nupta dici. Sed quæ tandē erat puella hæc, aut quis ſenſus uaticiniij? I V. Fore ut puella quædam, quæ erat in palatio Achaz, ferret uterum, & pareret. CH. O ſenſum tanta prophetia dignum. quā uerum eſt illud, Iram & odium oculos non habere. modo alij noceat, ſibi non parcit. dum uultis uaticinia auertere à Chriſto, detruditis in cœnum & cloacas. Quæſo expendamus ordinem prophetiæ. Perrexit Deus loqui ad Achaz, dicens: Poſce tibi ſignum à Domino Deo tuo, ſiue attollens te ad excelsa, ſiue in inferiora demittens.

Et dixit Achaz: Non petam, et non tentabo Domi-  
 num. Et dixit: Audite ergo domus Dauid, nunquid  
 pro nihilo est uobis molestos esse hominibus, nisi e-  
 tiam molesti sitis et Deo meo? ideo Dominus ipse  
 dabit uobis signum. Animaduerte singula diligenter.  
 Dominus offert signum Achaz, siue in excelsis, si-  
 ue in imis. quumq; ille signū omne uel aspernaretur,  
 uel subterfugeret, conuocat propheta non unum a-  
 liquem de plebe infima, sed domum uniuersam Da-  
 uid, et eos ad audiendum atq; intelligendum horta-  
 tur et excitat. Et quando rex signum sibi non pe-  
 tierat, nec uolebat, affirmat Deum ipsum daturum  
 signum populo suo. rem grandem oportet subijci  
 post conuocatam domum Dauid, signum admirabi-  
 le quod Dominus ipse ultro daturus sit illis. quod tā-  
 dem est? prodeat. Ecce puella illa quam uidetis, con-  
 cipiet. et pariet filium. Imò uerò parturient montes,  
 et parient murem ridiculum. O clausulam tantis  
 prefationibus absurdam et inconcinnam, si is est  
 sensus, si non est, o uos Iudeos plusquam sacrilegos  
 et blasphemos, qui ita contaminatis sanctas scrip-  
 turas. Virginem concipere, et parere Messiam libe-  
 ratorem Israël, hoc est demū signum dignum Deo  
 dante, dignum ijs quibus dabatur, nempe domo Da-  
 uid, dignum quod precipuus propheta annuncia-  
 ret mundo uniuerso. Quid porro sequitur? Et uoca-  
 bitur nomē eius Emanuel, quod est nobiscum Deus.



Et hoc nomen periti uestra lingue dicunt esse scriptum literis illis, quibus nomen summi et ueri Dei consignatur. Additur: Butyrum et mel comedet, ut sciat reprobare malum, et eligere bonum. Et istud quorsum pertinet? quare per esum mellis et butyri sciet eligere bonum, et reprobare malum? an non omnes pueri illis uestuntur? IV D. Edet dulce et amarum, ut eligat dulce, reijciat amarum. CH. Vtrum horum est amarum? IV D. Butyrum. CH. Non certe in hac regione, nec usquam. sed de Domino est intelligendum, qui uocabitur Deus nobiscum conuersans, conuescens, agens. Et ut sciant omnes uerum esse hominem, uiuet non nouo et alieno et delicato quopiam more, aut coelesti, sed communi humano, et aletur puer eisdem alimentis, quibus reliqui pueri, melle et butyro. sine discrimine uersabitur, ut experimento rerumstrarum in se sumpto, depellat à nobis mala, adferat bona. Nam idem propheta capite 53. dicit, expertum illum esse infirmitates. Sed pergamus. Nascitur sub Herode, quod tempus erat prædictum Messie à Iacob moriente, Genesis 49. Non recedet sceptrum à Iuda, et legislator è medio pedum eius, donec ueniat qui mittendus est, et ad eum erit expectatio gentium. Herodes Ascolanita fauore ducum Romanorum transtulit in se regnum Iudeorum, quum esset exterus Idumæus. Herodes filius eius dictus Antipater, susceperat

Iu-

Iudeorum sanhedrim, hoc est ordinarios iudices populi, ac legis interpretes, & authoritatem puniendi legis transgressores, qui erant ferè de tribu Iuda. His temporibus natus est Dominus noster, felicitas summa, & qui erat promissus, & in eo gentes sperauerunt. Videtis enim quanta est multitudo gentium in nostram Ecclesiam ingreſſa. IV D. Atqui ante natum Iesum Macaba i tenuerunt res Iudaicas, qui fuerunt ex tribu Leui. CH. Ex materno genere fuerunt de Iuda. & non ignoras quod scriptum est quarto Regū, tribus regalem et sacerdotalem fuisse commistas. Quid quod legumlatoreſ & iudices, de quibus modò loquebar, non defuerunt usque ad Herodem, qui concilium LXX. prudentū sustulit, iam inde à Mose constitutum, qui erat uelut senatus principi additus: quod quum etiam in Babylonia captiuitate perseuerarit, ab Herode abolitum est. Idē Herodes post occisos pueros iussit occidi proceres omnes de familia Dauidis. Multis annis post Vespasiani pater ac filius, qui ex sanguine Dauidis restarent, omnes sustulerunt, ne quis superesset ex regia stirpe. Hebdomades Danielis 70. ad tempora Iesu Christi pertinent, & de Messia esse predicta ne uestri quidem dubitant. Prophetæ uerba hæc sunt, ex reuelatione Gabrielis: Hebdomadæ septuaginta de finitæ sunt super populum tuum, & super ciuitatem sanctam tuam, ad consummādum prauaricationem,

DE VER. FID. LIB. III. 511

onem, ad abolendum peccatum, & expiandum iniquitatem, & ad ducendam iustitiam sempiternam, & finiendam uisionem & prophetiam, & ungendum sanctum sanctorum. Hæc omnia tanta & tam magnifica non possunt nisi in Mesiam competere, & quidem in nostrum, non in uestrum. nos enim nostrum esse dicimus sanctum sanctorum, & illius fauore ac gratia apud Deum delicta expiari, inq; illo co finem accipere prophetarum oracula. Porro 70. hebdomadæ de annorum hebdomadis sunt intelligendæ, quemadmodū Ezechielis 4. & Leuitici 25. Numerabis septem hebdomadas annorum septies septem annos, & erunt tibi dies septem hebdomadarum annorum quadraginta nouem anni. Sed inter nos & eruditos uestros satis conuenit, de septenarijs annorum locutum esse Danielelem. Quomodo-  
cunque autem hebdomadæ istæ computentur, siue à Cyri, siue à Darij temporibus, ad tempora pertinent Christi nostri. Et quum tam multa prophetarum uaticinia in tempus illud congruerent, persuasissimum fuit Iudæis ætatis illius, Mesiam tum esse uenturum. & multi ex occasione temporis, Mesias se esse sunt professi: ut Iudas Galileus, Ioseph Benzara, qui sub Mesia nomine ausus est aduersus Adrianum Cæsarem rebellare, eumq; Iudæorum plerique sunt sequuti. hunc in Bithra Adrianus fregit, & Iudeos omnes repulit procul  
i conspe.

à conspectu Palestinae. instaurauit Hierosolymam;  
et de suo nomine uocauit Heliam. Fuit alter Barco  
zibas, dux rei militaris peritus, qui propter uictorias  
creditus est Messias. in qua opinione diu perseuera-  
tum est, quousq; illum Adrianus idem propter scele-  
ra puniuit. Habes etiam apud Iosephum uestrum de  
multis, qui sub specie Messiae seduxerunt populum,  
quos omnes Felix praeses Iudaeae deleuit. Idem autor  
gentis uestrae Iosephus scribit, etate illa repertum  
in sacris libris oraculum, quod illo tempore quidam  
ex Iudaea gente orbi esset dominaturus, cuius etiam  
uaticinij Suet. Tranquillus meminit. quod in alium  
competere non potest, quam in Iesum Christum.  
His tam multis tamq; euidentibus oraculis conuicti  
rabini uestri, ad figmenta sua confugiunt, natum  
quidem fuisse Christum sub Herode, sed propter pec-  
cata populi occultari: ut alij dicunt, in Sion cum an-  
gelis: ut alij, ultra montes Caspios: ut alij, per orbem  
mendicare, proditurum se, quum Deo erit uisum.  
Quod est, aut his mille annis fuit, tantum uestrum  
piaculum, ut propter illud Messias uester lateat: re-  
uolue memoriam omnem superiorem, nunquam in-  
uenies uos minus aduersus praescripta deliquisse le-  
gis Mosaicae, minus procliues fuisse ad cultum idolo-  
rum, magis zelatores fuisse legis, quam hisce annis  
mille. Si peccata uestra illum à uobis arcent, et iusti-  
tie sunt reducturae, iam pridem oportebat eum ue-  
nisse.



nisse. Ac ne in Christi tempora cōferatur prædictio  
Iacob de regno tribus Iudæ, confingitis regnum ha-  
bere uos ultra montes Cassios, septum undiq; mon-  
tibus arduissimis, qui transcendendi non possint. Facile  
est de ijs quæ nemo unquam uel uidit, uel audiuit,  
mentiri, nec est ullus qui impudentiam uestram pos-  
sit confutare. Sed ne tam licenter mendacia nobis  
obtruderetis, redarguunt uos prophætæ uestri. ut A-  
mos 9. cap. Ecce oculi Domini in regnum quod pec-  
cauit, & disperdam illud de superficie terræ: uerum  
tamen non delebo prorsum domum Iacob, dicit Do-  
minus. & Oseas cap. 3. Dies multos manebunt filij  
Israel absq; rege, & absq; principe, & sine sacrifi-  
cio, & sine idolo, & sine ephod & teraphim. po-  
stea reuertemur filij Israel, & querēt dominū Deū  
suum, & Dauid regem suum, & pauebūt Dominū,  
& reuertentur ad eum, & ad domum eius in nouis-  
simo dierum. Sic Oseas: quæ ad hæc referri tempora  
manifestum est. nam in Babylone nec multis annis  
manserunt, nec defuerunt eis principes. nunc uero  
neq; regem habetis, neq; principem, neq; sacrificiū,  
nec ornamenta pontificia, nec ornamenta sacerdo-  
talia, nec idololatriā, & in nouissimis temporibus  
conuertemini ad Deum & ad Mesīā eius. Fuerunt  
ex uestris qui eò dementiæ sunt prolapsi, ut Danie-  
lem prophetam uirum desideriorum tantæ sapien-  
tiæ & sanctitatis, cætera quidem bene dixisse affir-

Kk

ment,

ment, in hebdomadibus falsum esse. Hæcine est tanta uestra ueneratio erga legem & prophetas? Sed uos modò ne nobiscum consentiatis, parati estis ab his dissentire, qui uobis sunt sacrosancti: tanto uidelicet est odium uestrum erga nos acrius, quàm beneuolentia & pietas erga uestros. Quidam terminos omnes Messiae assignatos confessi sunt præterijisse, redemptionemque & liberationem Israël in sola poenitentia restare. Alij execrati sunt eos omnes, qui ad uentui Messiae terminos ponerent. quid facerent miserij? Magni & longi sunt errores eorum, qui quod nusquam est querunt, & uestigant. Veritatis uia uunica est, & simplex: falsum uero multiplex, uastum, infinitum. Ante Iesum Mariæ filium, nemo ausus est profiteri se Messiam esse: decus illud Iesu Christo seruatum est integrum. post illum uero multi dignitatem illam ausi sunt impudenter usurpare, quod cognoscere est promptum ex monumentis ueteris memoriae. Vel demon quidam innumeram uestrorum multitudinem in mare demersit, quos professus Messiam esse se, aiebat se è Creta in terram promissionis transferre. Quid quaeris? tertio ab hinc anno Carolus Caesar Iudeum quendam in Italia exussit, qui se constanter Messiam esse uestrum affirmaret. & inter uos quotidie est audire, natum esse Messiam, uel nescio qua in regione se patefecisse, uel aduentare, uel cogere magnam manum ad bellum gerendum. Sed reuer-

reuertamur ad institutam narrationem de uita Iesu Christi. Mater illius fuit e tribu Iudæ, & familia Davidis regis: ideo illa & Iosephus in censu illo uniuersali, qui sub Augusto factus est, uenerunt Bethleem, quæ ciuitas est Davidis, ad professionem nominis. Dauid enim erat promissus, idcirco & in Bethleem natus est, de quo Michea 5. Et tu Bethleem Ephrata, parū est ut sis e milibus Iudæ: ex te mihi egredietur, qui sit dominator Israel, & egressus eius ab initio a diebus æternitatis. Quæ uerba conferri non possunt in Dauidem, qui uixit multis annis antea: nec de illo dici potest, quod egressus eius sit a diebus æternitatis. Puer autem octauo die est circumcissus, & appellatus est Iesus, quasi seruator. & quemadmodum Iesus Naue populum Iudaicum in terram promissionis corporalem & temporalem introduxit, ita Iesus Christus pios omnes in æternā illam celestem, ut corpori respondeat imago. Sed in scripturis sepenumero Christus progenitorum suorum nomine signatur. nam & appellatur Dauid, & Israel, & Adam. Sicut quum dicimus, ex hoc Aenea multi Aeneæ nascuntur. & apud Vergilium: Si quis mihi paruulus aula Luderet Aeneas: quæ est loquendi phrasis linguis omnibus communis. IVD. Nomen hoc Iesu multi habuerunt ante filiū Mariæ, multi cū illo, & multi post illum. Atqui Esaias dicit, Vocabitur tibi nomen nouum, quod os Domini declarabit.

CH. Gaudeo aliquando tandem dictum esse abs te aliquid acute. Prætereo quod quidam uestre lingue eruditi affirmant, aliter scribi nomen Iesu Christi quàm Iesu Naue, aut Iesu Sydrach, aut Iesu sacerdotis, uel aliorum. Illud tamen conuenit in memoriam reducere, de quo non est meum disputare, qui Hebræe lingue sum prorsus ignarus, nomen cuique aptum & uerum esse, per quod illius essentia uel intimæ qualitates explicantur. Nomen quidem exterius præcipuæ Christi actionis est Iesus, hoc est seruator: sed centia illius appositissime declaratur, si quis dicat eum Dei omnipotentis filium, Deum & hominem: hoc nomen omnino nouum est, neque unquam antea est illo quisquam nominatus. & os Domini illud declarat, qui dicit, Filius meus es tu, ego hodie genui te: nec possumus tantum mysterium nisi Deo reuelante cognoscere. excedit enim captum mentium humanarum. Post dies autem quadraginta oblatum est templo, sicut Aggæus promiserat: Et ueniet desiderium omnium gentium, & implebo domum hanc gloria, dixit Dominus exercituum. maior erit gloria domus huius nouissimæ, quàm primæ. Velim dicas mihi, si non est molestum, qua in re est maior gloria templi huius, quàm prioris? IVD. Alij ex rabinnis nostris dicunt gloriam esse ampliorem, quòd decem annis plus durauerit, quàm alterum. alij, quòd melius esset ædificatum. CH. In utroque uero, per  
exigua



exigua est gloria. neque enim in gloria domus uel structura, uel ædificatio, sed qui eam inhabitant. Sed nec uerum est, melius fuisse constructum. nihil enim structura templi posterioris ad prioris diuitias & magnificentiam, quæ tanta fuit, ut prophanis legentibus penè uideatur impossibile. Et apud Esdram legitur, senes qui Babylone redeuntes prioris templi meminissent, quum structuras & operis totiusq; sacri instrumenti magnificentiā copiamq; inter se cōpararēt, illachrymasse atq; ingemuisse. Quod si spectetur autor, maior est prioris gloria, q̃ posterioris. illius enim fuit Solomō, huius autem Zorobabel, & Iesus filius Iosedech. Sin opes & tēpli uasa, nihil fuerunt posteriora omnia præ prioribus. Sacrificia autem in prima domo multo plura, & quod ad rem magis facit, sanctiora, & quæ signis euidentibus approbarentur, ut igne cœlitus misso ad consumptionē holocaustorum. Gloria igitur maior secundi templi, de qua Propheta loquitur, ad Mesiæ aduentum pertinet, q̃ præsentia sua amplius & augustius redidit templum, q̃ Solomon opulentia & miraculis. Abductus est puer à parentibus in Aegyptum, ad Herodis seuitiam deuitādam. illic mansit annis plus minus decem. & quemadmodum pueritia corporalis Israëlitis, hoc est populi Israëliti nascentis illic in Aegypto est transacta, sic & spiritalis Israëlitis trāfigeretur: & quemadmodum ex Aegypto uocatus

est Israël corporalis ad terram libertatis corporū,  
 uocaretur etiam Israël spiritalis ad libertatem ani-  
 morum. Oseas cap. undecimo inquit: Puer Israel, &  
 cum dilexi, & ex Aegypto uocaui filium meum. Si  
 dictū est de uero Israele, is est Christus: sin de carna-  
 li, figura est quæ uim habet prophetiæ, ut mox dice-  
 mus. Sed de Christo esse intelligendum, uerborum cō-  
 textus declarat, quem animaduertas quæso. Mane,  
 inquit, succidendo succisus est rex Israelis. Conque-  
 ritur Deus, quod Messias rex Israelis statim initia  
 pueritiæ suæ, hoc est in suo mane & aurora, quæ si-  
 tus sit ad cædem, & profligatus ex Iudæa. Iam hoc  
 facto meruerat Iudæa gens illum amittere. uerū Do-  
 minus non quid ipsi meruissent recordatus, sed quan-  
 tum gentem illam propter eius maiores semper dile-  
 xisset, reuocauit filium suum ex Aegypto & ex gē-  
 tibus, & in Iudæam reduxit: quem reditum sic op-  
 tat Esaias cap. 16. Mitte agnum dominatoris terræ,  
 de petra deserti ad montem filiæ Sion. Reuersus ue-  
 ro cum parentibus, habitauit cum illis in Nazareth  
 Galilææ, unde & Nazarenus appellatus est. in quo  
 Sampsonis imaginem expleuit, qui Sampson uita &  
 actibus suis Christū Iudææ genti represemabat. Hūc  
 angelus Domini ad eius parentes missus, priusquam  
 gigneretur, iussit esse Nazaræum Domini. & apud  
 Esaiam loco illo capituli 11. Et egredietur uirga de se-  
 mine Iesse, & ramus de radicibus eius crescet. pro ra-

mo seu flore aiunt uos in Hebræo legere, Nazareus de radicibus eius crescet. IVD. Est quod uelim tibi obijcere, antequam pergas ad reliqua. CH. Quid tandem? IVD. Quod non uidentur multa prophetarū oracula fidem accepisse in uestro Messia. nam Esaia 2. dicitur de Messia tempore: Et cōstabunt gladios suos in ligones, & lanceas suas in falces. non leuabit gens contra gentem gladium, & amplius belligerari non nitentur. quod ait futurum in nouissimis diebus. In eandem sententiam cap. 11. Hababit lupus cum agno, & pardus cum hœdo accubabit, & uitulus & catulus leonis, iumentum & bubalus simul, & puer paruulus ducet eos, & uacca & ursa pascuntur simul, accubabunt proles eorum, & leo sicut bos comedit paleam, & delectabitur lactens super foramen aspidis, & super cauernā reguli ablactatus manum suam extendet, non nocent, & non periment in uniuerso monte sancto eius, quia repleta est terra scientia Domini, sicut aque maris inundantis. In eandem sententiam Micheas 4. capite. Addit etiam Esaias, quod montes humiliabuntur, & ualles extollentur: quæ omnia non uidemus in Messia uestri aduentu esse completa. CH. Dicamus paulatim de singulis. Primum de tempore non ignoras illud, Anni mille in conspectu Domini sicut dies hesternæ quæ præterijt. Nouissimi autem dies de ætate mundi postrema intelliguntur,

tur, in qua nos sumus, non tam certa quadam & descripta annorum supputatione, quàm separatione rerum in tempore gestarum. Sic enim mundi etates distinguuntur. Sunt etiam apud prophetas dies nouissimi, extremum tempus generis & regni Iudaici in Palæstina. Erit ergo, inquit Esaias, in postremis diebus: nō mundani temporis. quid enim gratia profuisset tam diu dilata? certe paucissimis. sed in ultimis diebus prophetiæ & regni & sacerdotij, quæ tria cessauerūt post Iesum Christum. Reliqua autem de pace, de cōcordia beluarum, de montibus & uallibus, intelligis tu hæc omnia corporaliter, & non spiritaliter? IVD. Ego uero simpliciter, quemadmodum lego: & religio est mihi, in uerbis Dei ac prophetarum nimis esse curiosum. CH. Quid ego audio? putas ne per Messia aduentum mutatum iri hanc rerum naturam, ut leo ferociam suam & seuitiam deponat, basiliscus uenenum, nec futuros montes, neque ualles? quid ergo illud est quod in psalmo dicitur, Deferent montes pacem populo, & colles iustitiam. & Esaias idem: Mons Domini eleuabitur super montes. & in cap. 30. Erunt super omnem montem excelsum, & super omnem collem eleuatum riuus aquarum. Vides hic montes futuros & colles etiam in die illa, quum erit lux lunæ sicut lux solis, & lux solis septemcupla, in die qua alligauerit Dominus contritionem populi sui, & percussuram pla-



ge eius sanauerit. Esaiæ. 41. dicitur: Ecce posui te,  
 ut traham. uelut tribula noua habēs ora, triturbabis  
 mōtes, & comminues colles sicut quisquillas pares.  
 Vis ne hoc in sensu literali intelligere, sicut Amos 9.  
 Ecce dies uenit, dicit Dominus, & accedet arator  
 cum messore, & calcator uuarum, comportantes  
 semen, & stillabunt colles mustum, & omnes colles  
 liquefient. & Micheæ primo: Ecce Dominus egredi  
 etur de loco suo, & descendet, & calcabit super ex  
 celsa terræ, & liquefcent montes subtus eum, & ual  
 les scindent se sicut cera à facie ignis, sicut aquæ ef  
 fuse in præceps. & illud in psalmo: Flumina plau  
 dunt manu, simul montes exultabunt. Quantum uis  
 simplicitatem præ te feras, & obtendas religionem  
 intellectui sanctarum literarum, non arbitr or te ta  
 men adeò esse stupidum, ut hæc omnia eo sensu dicta  
 accipias à prophetis, qui sensus etiam mulierculis  
 & pueris esset ridiculus. sed simulas temporis gra  
 tia, quia mecum disputas, tanquam cum prophano.  
 inter tuos apertius sententiam tuam proferres. I V.  
 Quorsum igitur censes hæc pertinere? C H. Ad sig  
 nificandam æqualitatem, concordiam, & admirabi  
 lem sub Christi regno pacem. I V D. Atqui pax  
 non est sub uestro Messia perpetua. C H. Imò si a  
 nimum uelis aduertere, inuenies sub illius regno ma  
 iorem & præstantiorem, magisq; exoptandam om  
 ni hac pace corporum, quam regna inter se & nati

ones pactis & foederibus sanciant. nonne pax consensio est & conformitas? hæc autem uel corporum est, quum quiescunt, nec inuicem contratendunt: uel animorum, quum inter se non concordant, & bene uolunt. Vtram harum ueriores consensionem esse existimas? IV D. Posteriores hanc, quæ animorum est. nam altera illa corporum simulata res est, atque adumbrata. CH. Illam ergo ueram & germanam pacem multo est congruentius à Deo & peti, & dari. In ipsis porro animis nostris nunquam ne fando de affectibus & perturbationibus aliquid audiisti? IV D. Audiui non pauca. CH. Nulla est dissensio, nullum bellum grauius, nulla tempestas horribilior, quàm quum affectus illi in animo tumultuantur. Atrox est bellum inter uicinas nationes, atrocius inter ciuitates eiusdem prouinciæ ac gentis: superatur hoc immanitate ac crudelitate à bello in eadem & intra eosdē muros, quod est ciuile. Quid si intra eundem sit hominem, atq; intra eundem animum? appellatiōe caret tantæ atrocitati satis apta. Non exiguum adfert hominibus beneficium, qui illorum corporibus quietem inter se, & consensionem conciliat. maiorem autem pacem inducit, qui in humanis pectoribus reciprocum amorem indit. qui uero tranquillitatem affectibus importat, is pacem incredibilem & unicuique hominum cum semetipso infert, & hominibus inter se, quippe ex hisce animorum

rum motibus existunt diffensiones omnes, lites, iurgia, bella, cædes: ut merito pacē hanc Christus noster uocet, Pacem quā mundus dare non potest, sed solus Deus. Attulit igitur Christus pacē, quoniam amoris mutui legē in cordibus suorū inseruit, qui animos affectusq; nostros obtēperare supremæ rationi ac ueritati docuit, quibus ex seminibus pullulat pax et cōcordia inter homines firmiter multo atq; stabilior, quā pactis omnibus scientissime et cautiſſime præscriptis, et sanctiſſime iuratis. Idcirco Psalmista eam pacem sub Christo oriturā prædixit, quæ daret quoad auferatur luna. Non mutabit leo feritatem in genij sui in aduentum Meſiæ, non complanabuntur montes, neque ualles intumescunt: sed homines qui leonina sunt ferocia, audacia, crudelitate, si iugum Christi lene et molle super ceruices suas recipiant, hoc est Christi doctrinam admittant in sua pectora, exuent naturam, et mores leoninos, habitabunt quietē et concorditer cum ouibus, hoc est cum mansuetis et simplicibus: inductaq; per Christi doctrinam charitate mutua, montes, hoc est proceres populi superbia deposita infimis se patientur adæquari. quātu pacem excogitare posses ueriores, aut maiores ad quam ex prioribus signis denotandam natus est Dominus noster tempore pacis uniuersalis, quemadmodum ueteris memoriæ monimenta referunt. Quocirca quod Propheta dicit, Non exercebuntur ultra  
ad

ad prælium: manifestam habet intelligentiam. hoc est, ubicūq; Christus regnauerit, ibi uerus erit amor, qui dissensiones omnes & bella excludit. & in qua lege præcepta omnia atque admonitiones tendunt ad beneuolentiam, nullum cōueniebat esse de bello, aut belli exercitatione præceptum, quemadmodum sunt in lege uestra: ut Iudicum 3. capite. Cedò autē de regno Mesiæ quid uos semitis? IVD. Quid aliud quàm quod est in psalmo 72. Et adorabunt eum omnes reges, omnes gentes seruient ei. CHR. Quomodo ergo in alio psalmo dicitur, Dominare in medio inimicorum tuorum? Isthuc quoque an ad litteram, ut regnum Christi super omnes homines exteriore significatione se diffundat, & pareant ei omnes, quemadmodum populus Israël Davidi aut Solomoni fuit audiens dicto? quod Deo ipsi nondum contigit, cuius exterioribus iussis nunquam gentes omnes obedierunt. Ita maiorem regem faceret Deus Mesiam, quàm se ipsum. Sed dic mihi, quomodo tantum regnum Mesias parabit? IVD. Ingenti ui armorum, Deo adiuuante. CH. Mahumetes quoque de se dicit, missum se à Deo per uirtutem armorum, Christum uero missum per uirtutem signorum & miraculorum. Sed opus quod est multis commune, non creditur unius proprium: & quod affecuti sunt latrones atque homines scelestissimi, Deoq; inimicissimi, non est credibile esse id quod Deus charissi-  
mo



mo sibi homini tanquam peculiare & amplissimum donet munus. Vi armorum multos scimus ualuisse homines impuros ac impios, cursumq; uictoriarum illorum nunquam esse interruptum: uelut Alexandrum, Cæsarem, Achillem, Syllam, Dionysium. & humanis uiribus uideri posset assignandum esse tantum opus Dei, sicut de incrementis imperij Romani, quæ fuerunt maxima. & quantūcūq; Christus egisset ingentia miracula, semper ad posteros manasset suspicio, secutos illum homines fuisse uel metu tantæ potentie, uel spe maximarum utilitatū. Quid quòd bellum genus immanitatis omne ac seuitie superat. ea igitur re tam tetra atque atroci, credibile fit tibi Deum euecturum fuisse, quem unice haberet charum? Nam quòd gens olim uestra coelitus adiuta est bello, factum id est propter scelera illarum gentium ad quas transibat. Adde, quòd carnales & dubij & meticulosi Iudæi, nisi uires bellicas sui Dei sensissent, ad alios statim deos defecissent, quos existimassent magis bellaces, ac proinde potentiores: sicut fecit Achaz. Quanto ore intonatis uos, Deus sabaoth, Deus fortis in prælio? at nos dicimus, Deus pacis, Deus totius consolationis. Quanto uerius ostenditur opus & auxilium Dei, si, quod est illius propriū, ex rebus paruis magnas proferat, ex infirmis fortia, ex abiectis sublimia? quod in Christo est declaratum, quem ex tanta humilitate euexit ad reg-

num incredibile: ut libere in animis dominetur potius, quàm ut cogat corpora. Vtrum tu tandem existimas maius esse regnum, ac uerius, diuinoq; illi similius, in beluas, an in homines? IVD. In homines: quia sunt liberi. CH. Vtrum maius in corpora hominum, an in animos? IVD. Eadem ratione in animos. CH. Iurè. Nam arma cogunt corpora, animos non cogunt. quippe usu euenit plerunque, ut pareant corpora, animi sine auersissimi atque inimicissimi. amplius ergo & excellentius regnum tributum est Christo à patre, ut in liberas mentes dominetur, quàm esset uester Messias habiturus, aut Mahumetes habuit, commune cum tot latronibus. Dominatur ergo Christus noster in illorum mentibus, qui gratiæ illius fidunt. corporum etiam omnium est dominus, quemadmodum dæmonum, & malorum hominū qui illi aduersantur, per hereditatem quam à patre accepit. de hoc testificatur psalmus 2. Postula à me, & dabo tibi gentes hereditatem, & possessionem tuam terminos terræ. Nec solum in mentes omnes & humana corpora accepit imperium, sed in ipsas naturæ leges, quas mutauit, quoties fuit ei uisum, numerosa multitudine & uarietate miraculorum, quæ ille ad salutem omnium edidit, ut ostenderet se ad homines corpore & animo seruandos uenisse, & de exteriori beneficentia interiorem colligerent, amoreq; accenderentur erga Deum tam benignum

nignum. de quibus tam admirandis portentis prædixit Esaias: Dicite stultis corde, confortamini, ne timeatis, ecce Deus uester cum ultione ueniet, et uidebitis retributionem Dei. Ipse ueniet, et saluos faciet uos. tunc aperientur oculi cæcorum, et aures surdorum patebunt. Tunc saliet sicut ceruus, claudus, et laudabit lingua muti, quia scisse sunt in deserto aquæ, et torrètes in solitudine. Res omnes Christi et altæ sunt et profundæ, ut cælum: quod et si inferius uidetur esse sub nobis, ipsum tamen ex se ubique est excelsum. sic Christi sublimitas fuit non possidere pecuniam, non arma, non agros, nec familiam, neque domum, neque illis ullo modo indigere, sed uiuere a-nimum illum excelsissimum in se reductum, et seipso contentum. Multi ei contradixerunt, multi affecterunt conuicio, insidiati sunt: detraxerunt: in quibus omnibus declarabatur firmitas magnitudinis, quæ nullo moueri posset impulsu, et altiore esse illum quàm ut ad eum possent illa pertingere. Neque uero Dominus noster cursum uitæ suæ ad prophetarum oracula temperauit atque accommodauit. non enim sic uixit, et magna illa egit atque admirabilia, quia fuerunt de se à uatibus prædicta: contra potius prædicta fuerunt, quia ille erat acturus. Non seruit similitudini aut imagini ueritas, nec corpus umbræ, sed è contrario. Idcirco interdum discrepantia est aliqua inter prophetiam et actionem Christi, quan-

ta esse solet inter corpus & umbrā siue imaginem. Alia est igitur querenda ratio actorum Christi altior & prestabilior, quā quod ea essent de eo scripta. IVD. Non uenit unquam inter nostros in controuersiam, quo minus facile credant magna esse à Christo edita prodigia, ad persuadendū mundo rem adeo nouam & inusitatam, & tam pugnantem cū opinionibus receptissimis. CH. Quid tu de eiusmodi miraculis censes? nam ego libro quodam meo manifestissimis rationibus uideor edixisse, non ui atque ope malorum demonū esse acta, sed Dei. IVD. Quidam ex nostris doctoribus longe diuersam afferunt rationem & causam miraculorum Iesu. CH. Quam tandem? IVD. Vereor eloqui, ne tu mihi fortē irascaris. CH. Noua modestia. Dic omnia quantum uoles aperte. nam ueritas hominum commenta non reformidat. IVD. Alij asserunt magicas artes illum in Aegypto didicisse, quum esset puer. Alij narrāt, fuisse in tecto templi Solomonis margaritum quoddam ibi à Solomone collocatum, in quo rex arte & sapientia illa sua nomen Dei uerum insculpserit, quod legere quidem quisque poterat, sed addita erat in eum execratio qui exscripsisset aut didicisset. excubabant quoque leones duo pro templi foribus catenis alligati, quos ibi rex idem posuerat, obseruantes num aliquis edidicisset. quod si fecisset, ita rugiebant atrociter, ut ille expauesfactus obliuiscere



ceretur. sin uero exscripsisset, partim ex leonum rugitibus, partim ex grauissima detestatione rumpebatur ilico medius. Iesus autem ben Ioseph, & ben Maria, pro nihilo execrationem habens & leones, descripsit nomen illud in schedula, & ne ab scrutantibus inter uestimenta deprehenderetur, discidit scapellam aliquantulum ex pelle surae, ibiq; consuit. & quamuis in templi exitu supra solitum leones rugiret atque indignarentur, ille nihilominus magna usus animi constantia, euasit illorum uim atque ferociam, & deinceps ope diuini nominis adiutus admiranda illa perfecit. CH. Lepidissimam profecto fabellam narraſti. rogo te, tu credis hæc? IVD. Quid ego credam nihil attinet dicere, scripta sunt hæc quidem certe in libro magnæ authoritatis ac fidei. CH. In quo? IVD. In Thalmud. CH. Sed reuertamur ad calumniosas uestras suspensiones. Magiam dicitis Dominum nostrum in Aegypto didicisse, & ex ea cognitione esse miracula quæ egit. Crimen hoc magis in uestro Mose posset locum inuenire, quàm in nostro IESV, non quòd Mosem uirum Dei insimulare uelim, aut præstingere, quod esset nefas: sed de iniquitate uestra conqueror, & damno uecordiam, qui id nobis obijciatis, quod in uos potius competat. Multa facta sunt supra naturæ uires per manum Moſis, multa à Christo. Moſes conſcripſit ſua, ſcripſerūt de Christo ij qui uiderunt, quiq; ac

LI cepe

ceperunt ab ijs. qua igitur ratione Mosē Dei amicum creditis, non Christū? neq; enim certius habetis atq; euidentius argumentum eorum quæ Mosēs de se prodidit, quàm quæ sunt de Iesu memoriæ mandata. Quid quod Christus grandiora egit, & propinquiora diuinitati, & quident sine humana doctrina: quū Mosēs omni Aegyptiorū sapientia legatur institutus, & ab Aegyptijs insimulatus magiæ. quod facilius est credere de illo, qui in Aegypto natus, & educatus in regia, tēpus omne usq; ad ætatis maturitatem, quū à Domino uocatus est, in Aegypto trāsmiserit, quàm qui infans in Aegyptū ingressus, septimo ætatis suæ anno illinc discesserit. Confer utriusque & res gestas, & doctrinā inter se, propiorem inuenies magiæ Mosē quàm Iesum: tū etiā uitā innocentiorē, & puriorē doctrinā, ac magis cœlestē. I V D. At cōtradicit Mosi. C H. Nū nō satis lōgo sermone patefactū est, nō illū Mosi cōtradicare, sed Mosē approbare, sed spiritali legis illius declaratione augustiorem ac diuiniorem reddere? Expende autem, quemadmodum Dominus noster prodigia ediderit. nihil unquam fecit ut magus, non ex preparato, nō fictē & impostura oculis facta, nō quod magi solēt, ad auram popularem captandam, & ad proferendum nomen, uel ad quæstum aliquem pecuniæ. Omnia illius miracula ad utilitatem aliorum spectauerunt, & in rebus necessarijs fuerunt edita. Quod si  
Chri

Christus puer adhuc, annorum septem, eam magiā in Aegypto accepit, per quam tam stupenda opera proferret cur senes uniuerſa uita in studio Aegyptiacae ſapiētiae detriti, nihil illorū poterant praestare? Non Pythagoras, & Eudoxus, & Plato, & reliqui Graeci philosophi, qui Aegyptū institutiōis gratia penetrarūt: nō iidem ipsi Aegyptiorū numinū sacerdotes. Iam uerò Christi miracula ex magia sunt, quid apostolorum miracula, & martyrum, quorum iniri numerus non potest? nā illos quoq; grādia & admirāda patrasse opera necesse est, alioqui Christo digresso tota paulo pōst eius authoritas & praedicatio refrixisset. quomodo magia haec ab alijs ad alios tradita est quasi per manus? Quod porrò magiae genus hoc, aut quae utilitas, omnibus temporis momentis uenire propter Christum in periculum capitis & fortunarū, uitam per exquisitissimos cruciatus amittere? Quod si Christus hac fretus magia, uetere Moſis uia relicta nouam instituit, & semetipsum extulit ac celebrauit, cur non & martyres quoq; eandem peritiam nacti, ad se atque ad ſua cōmoda magiam hanc referebant? quin malebant ipsi beati uiuere, quā atrociter pro Christo interfici. Sed transitis ad opem nominis diuini: non potestis duo haec pariter uincere, ut per magicam artem, & per Dei nomen operetur. tametsi fabellam istam de nomine Dei, equidem non refutarem,

nisi legeretur in libro tantæ authoritatis, & proferretur sæpenumero à multis uestrorum contra nos, tanquam res uel certa, uel ingeniosè saltem ficta. Primum omnium quero ex uobis, quomodo tota hæc fabula nata est post Christi aduentum? cur antea tā præclarum margaritum ignorabatur? & leones adeo zelatores decoris ac maiestatis templi, rem ne tam grandem, tam inusitatam, tam publicam nullis esse unquam literis proditam? quid leones illi, erant ne immortales? tot annis potuerunt perdurare, quot inter Solomonem & Christum fluxerunt? quid illis factū est, quū caperetur Hierosolyma, ab Aegyptijs & Babylonijs? cur nō tūc rugiebāt ualidiſſime, quū Aegyptij, quum Aſſyrij, quum Macedones, quū Romani ingrederentur, & polluerent omnia, & quum sola relinqueretur Hierosolyma? an leones illi semper ante templum excubabant? Iam margaritum illud nulla ex tot templi illius direptionibus sublatum fuit? Sed quid erat, quod lector nominis illius facere poterat miracula: Solomon, qui tam probe nomen illud nouerat, nullum legatur edidisse? Imò contrā, de errasse ad postremum à recta pietate, & quam pater Dauid constanter fuerat secutus, ad idololatriā. Quæ autem erat inuidia Solomonis, prohibere, ne quis nomine Dei adiuuaretur, quum Deus uelit beneficia sua omnibus patere? An si Deus aliquid condidit in communem usum, non est is inuidus, & sceleratus,



stus, qui arcet alios? Quid incommodi nasceretur, si inuocatione diuinæ opis res admirandæ fierent? an non maior Dei apud homines authoritas & reuerentia, & auerterentur multi ab idololatria? Quod si extrâ non licebat nomen illud efferre, sed in templo legere, ibi certe miracula fuissent à quouis passim acta: quod non fuit ita. Iam si alijs rugitu leonum territis sacrum nomen excidebat, quod edidicerât, cur non & Christo? Si alijs crepabant medijs execratione illa, quin & Iesus? tanto peius usus illo nomine, quàm alijs omnes, nempe ad abrogationem legis diuinæ? Age uero, utrum Deus facit miracula propter nomen, an nomen propter Deum? est ne Deus nomini suo alligatus, ut inimico & hosti suo capitali faueat, uelit nolit, solum quia nomen illud pronunciauit, & mutet naturæ ordinem? ea uero incantatio esset, non inuocatio: si certis præscriptisq; sonis mouetur Deus, ut canis, uel equus, quo nihil est magis impium. Vides fabellam male concinnatam, seipsam dissoluere. IV D. Præstabit, ut arbitror, de sacris literis loqui, quæ nobis sunt uobiscum communes, quàm de ijs quæ sunt nobis peculiaris & propria. CH. Loquamur sanè. nam id malo. sed non sum tamen passus ignorare te qualia essent, quibus tanto applausu assentiremini. Cum miraculis Christi coniuncta est illius doctrina, uos Messiam uestrum non dicitis docturum. IV D. Non puto. CH. Vide-

licet nimium erit occupatus castrensi exercitatione, regno ordinando, iuri dicundo, & alijs quæ sunt regie potestatis. Sed de Messia tamē Esaias scribit: Spiritus Domini super me, eo quod unxerit Dominus me. Ad annunciantum mansuetis misit me, ut alligarem contritos corde, ut prædicarem captiuis libertatem, & uinctis apertionem carceris: ut prædicarem annum uolūtatis Domino, ut diem ultionis Deo uestro, ut consolarer omnes lugentes: ut ponerem lugentibus Sion, ut darem eis gloriam pro cinere, oleū gaudij pro luctu, pallium laudis pro spiritu stricto, & uocabuntur arbores iustitiæ, plantatio Domini, glorificer. Quid uero est euangelizare pauperibus, nisi afflictis & miseris, & a ueris illis ac sempiternis bonis inanibus adferre nuncium, uenisse redemptionem ac salutem, ut per fiduciam & amorem redemptoris iungantur cum Deo, & abundant ueris bonis ac maxime optabilibus: quanto hic nuncius melior, quàm ille, Redite Hierosolymam, affluetis auro & argento, tritico, uino, lacte, melle, multis pecoribus, quæ possitis & in templo mactare, & deuorare ad saturitatem. Pergo autem interrogare: Quis erit rerum status Messie uestri, quæ conditio uitæ? IVD. Beatissima, in omni abundantia, & copia earum rerum quæ desiderari possunt in uita, opibus, uoluptatibus, honore, potentia, de quo scriptum est in psalmo: Gloria & diuitiæ in domo

mo eius. CH. Iam sæpe de eo uos reprehendi, quòd nimis carnaliter omnia intelligitis. Agnoscetis ne illum quum uenerit? IVD. Etiam, & quidem letitia incredibili perfusi. CH. At psalmi & libri uestrorum prophetarum nihil ferè loquuntur aliud, quàm Messiam laborum atque ærumnarum omni genere afflictum iri: & quæ Dauid, Esaias, Hieremias, & prophete reliqui de mœstitijs, & calamitatibus dicunt, ad Christum referuntur omnia & de illo scribuntur sub persona, neque in illos ipsos qui dicunt possunt competere. sed sancti uiri ex zelo transferunt in seipsos, quæ uident passurum Christum: & tanquam ipsi eadem patiantur, sic scribunt. quod annotare est in multis psalmis Dauidis regis. Ex eodem zelo sunt execrationes illæ & ultiones, quas à Domino petunt de ijs qui tot afflictiones Messie erant adducturi. neque enim fuisset uel probitatis, uel mansuetudinis illorum, & potissimum Dauidis regis, qui de mansuetudine potissimum Deo placuit, ut inimicis & hostibus suis tam dira imprecarentur. Et quòd non sitis Messiam cognituri, uestri uates prænuunciarunt. ut Esaias: Cur ueni, & non erat qui spiram: uocaui, & non erat qui responderet. & Hieremie decimoquarto: Expectatio Israël seruator eius in tempore calamitatis, quare futurus es ueluti peregrinus in terra, & tanquam uiator qui declinat ad pernoctandū: quare futurus es ueluti uir attonitus,

tanquam fortis qui non potest saluum facere? Tota  
 eius uita inter pauperes, & homines simplici ac de-  
 misso corde transacta est. hoc est quod dicit Esaias:  
 Ad annunciaudum mansuetis misit me. illi enim gra-  
 tiores semper fuerunt Deo, hoc est, legibus & moni-  
 tis diuinis accipiendis aptiores, quam de opibus uel  
 potentia turgidis, uel de literis, aut ingenio. Appete-  
 te autem supplicij tempore, quod ei erat à patre  
 præscriptum, Hierosolymas est ingressus asello ue-  
 hens: cui obuiam processit uniuerſa multitudo, &  
 regia illum pompa excepit. de quo est illud Zachari-  
 æ: Exulta filia Sion, ecce rex tuus uenit tibi mansue-  
 tus, sedens super asinam. IVD. Cuiusuis erat id  
 facere, soluere asellum, qui pro porta castelli alliga-  
 tus erat in usum publicum, & insidentem in eo Hie-  
 rosolymam ingredi. CH. Si tam leue id tibi uide-  
 tur, & cuilibet factu facile, quid magnum aut ani-  
 maduertendum prænunciat Propheta? Est quidem  
 cuiusuis asino uehi, sed non cuiusuis ita mouere ani-  
 mos totius multitudinis, ut recipiatur more regio.  
 Et hoc est magnum illud quod in prophetia contine-  
 tur, quum filiæ Hierusalem promittitur rex suus mā-  
 suetus, asinæ insidens. Sed quum ille uiam ueræ pie-  
 tatis ostenderet, & humanum supercilium concute-  
 ret, multaq; in eos diceret qui pro diuinis legibus in-  
 uenta & traditiones suas populo seruandas propo-  
 nerent, exarsit in eum atrox illorum inuidia, qui po-  
 pulum



pulum prætectu religionis obnoxium sibi habebat, nempe sacerdotum, pontificum, scribarum & phariseorum. ab illis igitur captus est, & ad Pilatum præsidem adductus. Iosephus scriptor uester, decimo octauo Antiquitatū disertis uerbis scribit, inuidiam procerū synagoga caussam fuisse mortis Christi. IVD. Nulla ne fuerunt crimina? CH. Quænam uos dicitis fuisse? IVD. Hæc, quod se Dei filium faceret, patri æqualem. quod ad uenerationem alterius Dei homines hortabatur, & legem Mosi datam abrogabat, contradicebat patrum traditionibus, uiolabat sabbatum: in eo enim sanabat morbos, & quendam sanitati restitutū iussit grabbatū suū, in quo eger decubuerat, portare in sabbato. professus est posse templum Dei soluere, & triduo illud reædificare. CH. De diuina generatione satis disputauimus, dicamus sigillatim de reliquis. Primum quidem crimen graue, & morte dignum, si modo uerum. sed ipse semper eum à quo Moses legem accepisset, uerum atque unicum esse Deum constanter affirmauit, illum esse patrem suum, illum se uenerari & colere, illum esse ab omnibus & amandum, & colendum. Quid tu dicis de alio deo colendo, aut de lege Mosica antiquanda? esset hodie quisquam in uniuerso genere humano præter uos, qui legem uestram tam rigidam, asperam, immitem, & multis locis ad literam puerilem, adduci posset ut crederet esse à

Deo datam, nisi hoc Christus affirmasset? quem mē  
tiri nefas est. Non alium Deum docebat colere, sed  
hunc ipsum uestrum & nostrum rectē colere: non a  
liam legem obrogabat, sed huic isti uestre lumen &  
solem adferebat, ut Deum uere & ex animo colere  
tis, non intenti in hac uitae commoda, sed ad bona il  
la coelestia & sempiterna. In tota Euāgelij historia  
nusquam reperietis dictum, aut iussum, à Christo,  
ut aliquid quod in lege contineretur, quantumlibet  
leue, non obseruaretis. quin ad euitandam eiusmodi  
calumniam noluit ipse per se legem aduentu suo su  
persuam iam & mortuam abrogare, sed post ipsum  
coelo receptum apostoli eius docente spiritu sancto  
soluerunt genus humanum intolerabili iugo uestre  
legis. Traditiones uero patrum nec reiciebat, ne  
que infirmabat, sed querebatur & reprehendebat,  
quod homines illis magis tribuerent, quàm præce  
ptis ipsius Dei: & quod quū essent tā multa à Deo  
iussa, homines improbi atque importuni grauius ad  
derent onus ex suis inuentis, quæ inuenta non illi  
ad custodiam pietatis, sed ad gloriam & questum  
suum excogitassent. Tum demonstrabat, quum res  
posceret, non esse traditiones huiusmodi magnopere  
curandas. quæ spirituū puritati conuenirent, maio  
ris semper habenda momenti, quàm omnia corpora  
lia. De sabbato uelim mihi dicas, an sanare in eo sit  
sabbatum uiolare. quod enim opus potest in sabba-

to fieri excellentius, quàm hominis summæ necessitati opem ferre? an non tu edis in sabbato? IVD. Non possem aliter uiuere. CH. Facile posses uiuere cum in media unius diei. IVD. Fortassis adire periculum salutis & uitæ. CH. Maius adit periculum, & minus potest uiuere, nisi sanetur. quid, nõ deambulas? non uestiris? non loqueris in sabbato? an hæc sabbatum non uiolant, sine quibus uiuere & saluus esse potes? summam opem & salutem alicui adferre, uiolat? In sabbato ipso nõne tu egroto tuo & cibum & pharmacum porrigis ad morbum curandum? tibi hoc licet, & non licebit illi hunc totum morbum curare ac tollere? & tu id facis pharmacis & manuum opere, ille solo uerbo. IVD. At quidam in sabbato lectulum suum gestauit, illo iubente. CH. Tu fers ut Christus tantopere sit Deo gratus, ut naturæ leges iubente illo mutantur: & non feres, ut possit in sabbato aliquem iubere lectulum suum tollere. quid si tibi erepta fuisset toga, & restituere tur in sabbato, nõne reciperes & tolleres? non tu in sabbato admoues sellam mensæ ubi sedcas? & postquam pransus es, aut coenatus, surgis, & deponis? Sed puerilia sunt hæc, nec intelligitis quod sabbatū estis iussi tam diligenter obseruare, & qua sanctificatione: nempe requiem illam, qua post labores istos uitæ necessarios conquiescens animus & sedatus, assurgit ad Dei contemplationem & amorem. de  
quod

quo est illud in psalmo: Vacate & uidete, quoniam ego sum Dominus. Postremum crimen est, quod dixerit: Possum destruere templum hoc, & tribus diebus instaurare. Equidem non uideo quid atrocitatis aut inuidiæ habeat dictum illud, ut pro crimine possit arripi cruce dignum. quis unquam uerbi iactantiam, quæ sine Dei blasphemia, aut seditione dicere tur, capitaliter uindicauit? si præstare Christus poterat, quod promittebat, admirandum erat uerbum potius, quàm insectandam: si non poterat, irridendum. Iussissent uidelicet pontifices, & alij, quibus erat inuisus, ut minus aliquod templum extrueret anno uano. quod ni fecisset, triumphassent de illo inimici sui tanquam de homine uano & iactabundo, & omnem ei aduulgum authoritatem detraxissent, quo nihil erat illis magis in uotis. Sed uerbum illud quem in sensum diceretur, parum intellexerunt in præsentia qui audierunt. nam quum ingressus esset Iesus templum, & turpem illinc nundinationem eiecisset, rogarunt eum Iudei, ut signum aliquod præberet argumentum fiduciæ & potestatis suæ. Iesus more quum prophetarum omnium, tum suo, signum illis demonstrat non friuolum, non temporarium, aut humile, quale ipsi poscebant, sed magnum, admirandū, sempiternum, de resurrectione sui corporis futura triduo post eius mortem: quod quidem corpus uerius & appositius erat templum, quàm saxeum illud

Hiero



Hierosolymitanum, in quo corpore propius & præ  
 sentius numen habitabat. Hæc quidem ad crimina,  
 quæ inimici quidem eius requirebant diligenter. Sed  
 maximum & grauissimum erat crimen, excellentia  
 sanctitatis & doctrinæ, quibus & illorum coargue  
 bat uitam, & iniquam auctoritatem eleuabat. Sed  
 quum tantæ esset uulgo exsimationis, non temere  
 audebant in illum manus iniicere. Obseruata est oc  
 casio, qua id possit tute fieri. Vnus ex illius discipu  
 lis triginta argenteis illū prodidit. nec istud tacuerūt  
 oracula, Esaie undecimo: Et appenderunt mercedē  
 meam triginta argenteis. & dixit Dominus ad me:  
 Projice illos ad thesaurarium, ad magnificentiam  
 gloriæ qua preciatu sum ab eis. Captus autem, de  
 sertus est à suis omnibus. de quo Zacharias idem: O  
 gladiū suscitare super pastorem, & super uirum so  
 cium meum, dicit Dominus. Percutiam pastorem,  
 & dispergentur oues. Manifestum est, non de quoli  
 bet pastore dici, sed de Messia pastore maximo, &  
 Deo coniunctissimo. Ex lamētationibus Hieremie,  
 si hoc uacat animaduvertere, quod tanti est momen  
 ti, prima duo capita ad Ecclesiam uel animam perti  
 nent, tertium ad labores & erumnas Christi, cuius  
 exordium est: Ego uir uidi afflictionem in uirga af  
 flictionis eius. quam afflictionem humani generis  
 uir ille princeps uirorum miseratus, caput suum mo  
 lestijs & calamitatibus huiusmodi subiecit, & se pro  
 homi

hominibus, quorum esset caput, quasi uicarium tradidit. de quo dicit, Me duxit, & ire fecit in tenebras, & non in lucem. profecto contra me conuersus est, uerti t manum suam tota die, consumpsit carnem meam & pellem meam, confregit ossa mea: & quæ sequuntur, in nullum alium q̄ in Christum congruentia. inter quæ sunt, Fui subsannationi toti populo meo, canilena eorum tota die, dabit percutienti se maxillam, saturabitur opprobrijs. & in quarto capite describit excisionem Hierosolymitanam, quā lamētatur accidisse propter peccata prophetarum eius, & iniquitates sacerdotum eius, qui effuderunt in medijs Hierosolymis sanguinem iustorum: Mouerunt se, inquit, ut cæci in plateis, polluerunt se in sanguine, ut non possent qui tangere uoluissent, contingere uestimentum eorum. Istud de posteriore excidio intelligendum est. nam prius illud regis Babylonie, omnes ad unum fatentur contigisse propter idolatriam regum Iuda. Iste uero effusus cruor, quo se Iudæi polluerunt, Christi est, & apostolorum eius propter Christum. Itaque & clausula tantæ calamitatis hæc est: Spiritus oris nostri Christus dominus captus est in foveis eorum. de quo dixeramus, Sub umbra tua uiuamus inter gentes. uidelicet Iudæi ipsi exciderunt sibi maximam illam patrum omnium spem de salute Mesia, qua una ita confidebant, ut munimento illius nihil uideretur esse tam graue &  
atrox

atrox, quod formidarent. Christi & domini multi sunt, sed Christus dominus spiritus oris nostri unus est Deus, per quē unū uiuimus ac spiramus. De Osea intelligi non potest, qui captus non fuit. Zedechias autem non is erat, quem Hieremias propheta tam sanctus & tam liber, spiritum oris nostri uocasset. Denique de illo Christo propheta loquitur, quē in foueis populi Iudaici captum fuisse, caussa fuerit excisionis totius gentis. Post captiuitatem & carcerem secutæ sunt irrisiones, consputationes, alape, & contumeliæ, ac uexationes aliæ: de quibus est Esaia 50. Corpus meum dedi percutientibus, & genas meas uellentibus, faciem meam non abscondi contumelijs & spūto. De quo tandem hæc dicuntur? an de propheta ipso, qui nihil tale passus legitur, & harum uisionum tempore in magno erat honore apud reges Iudæ? Sed præcedentia testantur de illo esse, qui dicit, Cur ueni, & non erat quispiam: uocaui, & nō erat qui responderet. nunquid ad redimendum debilior facta est manus mea? aut non est in me potentia ad eruendum? Actus est in crucem. à ligno enim sepe extitit apud patres salus, imago & uaticinium ligni huius: ut in arca Noë, in arca fœderis, in uirga Moysis, & in ligno iniecto in aquam amarā. Eleuatus est, & quasi ostensus uniuersis gentibus, ad salutem intuentium & confidentium: quemadmodum Moses serpentem in deserto proposuit sublimem & conspicu-

spicuum uniuerso Israël, ad remedium eorum qui es-  
 sent à serpentibus letaliter sauciati. Tunc humanitas  
 Christi abiectissima uisa, & hominibus infimæ con-  
 ditionis inferior, ita ut absterriti & pudefacti fuge-  
 rēt propinqui ac necessarii. sicut in psalmo dicitur:  
 Fugasti à me notos meos, posuisti me abominatio-  
 nem illis. Procul auertisti à me amicum, & notos me-  
 os in tenebris. & formisissimus omnium uirorum a-  
 deò tempore illo gratiam pulchritudinis amisit, ut  
 esset illum cognoscere multo difficillimum. quemad-  
 modum Esaias prædixerat: Ecce intelliget seruus me-  
 us, exaltabitur, & eleuabitur, & sublimis erit ual-  
 de. Quemadmodum admirati sunt super te multi, sic  
 corruptus est præ uiro aspectus eius, & forma eius  
 præ filiis hominum. Sic asperget gentes multas, su-  
 per eum claudent reges os suum. quia ij quibus non  
 est narratum, uiderunt: & qui non audierunt, intel-  
 lexerunt. & paulo post: Non est ei forma, neque de-  
 cor: & uidimus eum, & non erat aspectus. despec-  
 tus est, & abiectus inter uiros. IVD. Vaticinium  
 hoc in Israël nostri conferunt, non in Mesiam.  
 CH. Confiungunt uestri & asseuerant quicquid est  
 collibitum. sed rationem & audiri & ualere equi-  
 us est, quam asseuerationem uestrorum quantumcū-  
 que acrem & pertinacem, de eo quod capite Esaiæ  
 tertio & quinquagesimo iam antea disputauī, sa-  
 tisq; multis uerbis, quod erat facillimum, demonstra-



ui, non posse illud ad gentem uestram conuenire. Ne  
 que istud alterum quod est Esaie 52. obscurius est.  
 quando enim admirati sunt multi Israëlem, hoc est  
 populum Iudaicum: imò semper inuasi & exosi fu-  
 istis cunctis nationibus, maximeq; omnium uicinis.  
 Quid grauius Aegyptij oderunt, quàm uos, quum il-  
 lic peregrinarenini? In deserto non minus Palaesti-  
 nae populis abominabiles atq; detestabiles, quàm ip-  
 si Deo. In Palaestina exosi, uexati, pressi à finitimis  
 ciuitatibus, deinceps magnarum nationum praeda  
 uilissima, contempti & irrisi ab omnibus. Reuolue  
 maiorum tuorum ueterem memoriam, nullum un-  
 quam inuenies tempus, in quo admirationi fueritis  
 non dico multis, ut est in uaticinio, sed uni aut alte-  
 ri homini. Sed neque uos unquam admirationem me-  
 ruiſtis. nūquam enim coluit Dominum Deum suum  
 ad præscriptum legis Mosaicae. Pontifices & princi-  
 pes populi magna conuicia & subsannationes iecerunt  
 in Iesum cruci affixum, sicut præuidit Oseas:  
 Ego redemi eos, & ipsi locuti sunt contra me men-  
 dacia. super triticum & mustum collegerunt se, re-  
 bellauerunt contra me: ego erudiui, roborauī bra-  
 chium eorum, & contra me cogitauerunt malum.  
 Reuertentur non ad altissimum, fuerunt tanquam  
 arcus dolosus. & Esaie 31. Quemadmodum rugiet  
 leo & catulus leonis super prædam suam, contra  
 quem clamatur à congregatione pastorum, à uoce

Mm corum

eorum non formidabit, & à multitudine eorum non demittit animum: sic descendet Dominus exercituū ad præliandum contra montem Sion, & contra collem eius. & in psalmo 34. Subsannauerunt me subsannatione, frenduerūt super me dētibus suis. De manibus autē Domini, & de latere lancea confixo Zacharias dixit: Effundam super domum David, & super habitatores Hierusalem spiritum gratiæ & precationis, & aspicient ad me quem confixerunt, & plangent super eum ueluti planctum super unigenitum. Nec aliter hunc Dominum quem confixerunt respiciet Iudæa gens, quā per spiritum gratiæ, quem Dominus illis impartiet, & ipsi precando augebunt non repugnantes monitis cœlestibus, sed faciles se præbentes diuinæ uocationi obsequendo. alio qui cæci sunt, nec unquam illum quem confixerunt, intuebuntur. Et plangent, inquit, super eum Iudæi in sua pertinacia & cæcitate. Christi mortem plangunt propter pœnam consecutam. qui uero ad frugem meliorem se receperunt, plangunt nefarium facinus maiorum suorum. Et in hoc Zachariæ uaticinio, si attentius libet animaduvertere, geminam Christi naturam, humanam & diuinam deprehendes. Qui enim loquitur, Dominus Deus est: qui uerò configitur, homo Iesus. Moriente autem illo, obductum est cœlum tenebris circiter meridiem: tanquam si sol deficeret, quum esset tamen luna quinta decima,  
hoc

hoc est plena. Tremuit ingenti motu terra, de quo Ioëlis 3. Sol & luna obtenebrati sunt, & stellæ splendorem suum retraxerunt, & Dominus de Sion rugiet, & ab Hierosolymis emittet uocem suam, & cōtremiscent cœli & terra. Hæc uero futura dicit propheta eo tempore, quo effundet Dominus spiritum super omnem carnem, & quo conuertet captiuitatem Iuda & Hierusalem. & Amos 8. Et erit in die illa, dixit dominus Deus, occumbere faciam solem in meridie, & tenebrescere faciam terram in die luminis. Si queris quo tempore id futurum sit, ex propheta ipso cognosce: qui ait euenturū hoc, quū uenerit finis super populum Israël, nec adiciet Dominus ut ultra per eum transeat: & quum conuertet festos dies uestros in luctum, & omnia cantica uestra in planctum. quod cœptum est fieri paucis diebus post Christi mortem, & adhuc uidetis perseuerare. Perpende etiam, an eodem posset referri, quod est Zachariæ quarto decimo: Et erit dies unus, ipse est notus Domino, non dies integer, neque nox integra, & erit in tempore ueris erit lux. Crucifixus est Dominus extra portam, quemadmodum hostia illa quæ ad purgationem & sanctificationem populi immolabatur, extra castra deducebatur à multitudine filiorum Israël, sicut scriptum est 16. capite Numerorum. Vacca enim ruffa in conspectu omnium mactabatur, ex cuius sanguine cineribus & a-

qua fiebant emundationes. lege diligenter caput, & inuenies ad hoc Christi sacrificium admirabiliter cōuenire. Est & altera figura, seu prophetia uerius, de celeritate supplicij domini Iesu, qui captus de nocte, & ad pont fices ductus, postridie mane raptus ad tribunal præsidis, sub meridiē cruci est affixus. Iubebantur filij Israël festum illum & salutarem agnum egressuri de Aegypto comedere stantes, & celeriter: nec est ouum (quod dicitur) tā ouo simile, quā agnus ille paschalis Seruatori nostro Iesu. erat enim masculus sine macula, & sanguine illius intima fores habitatorem à pla a tuebantur. nihil erat ex eo edendū crudū, nec aqua coctum, sed igne assū. nulla Dominici corporis pars non est ingenibus doloris facibus assa atque exusta. Vorauerunt eum filij Israël cum lactucis agrestibus, hoc est animo amarissimo, & immolatus est à cuncta multitudine filiorum Israël. quod factum est Hierosolymis consilio & uoluntate pontificum & procerum, id sine dubio factum uidetur ab uniuerso Israël. confixæ sunt clauis manus & pedes illius, latus uero hasta perforatum. Os tamen in eo confractum non est, nec uestitur ex agno isto immundus, & incircumcisus: sed circumcisus, id est animo purgatus, & receptus per fidem in familiam Domini. Postremo eodem die immolatus est, quo agnus ille solitus erat immolari, umbra & imago istius corporis. Et quemadmodum ag  
ni



ni illius sacrificium gratum fuit Domino, & post illud eductus est populus in Aegypto: ita per Christi sacrificium reconciliatum est Deo humanum genus, & ex diabolica captiuitate assertum in libertatem. Tantæ huius sanctificationis & pacificationis figuræ, seu uaticinia potius fuerunt sacrificium Noë, propter quod negauit Dominus perditurum se rursus ea quæ uiuerent in orbe: sacrificium Abrahe, propter quod constitutus est pater gentium innumrabiliū: & alia sacrificia quæ in lege continentur permulta, ad purgationem peccatorum, & repositionem in gratiam cum Deo. Depositus de cruce, situs est in sepulchro: de quo est in psalmo 87. Obruta est malis anima mea, & uita mea ad sepulchrum peruenit: Annumeratus sum ijs qui descendunt in lacum, fui sicut uir cui nulla est fortitudo, inter mortuos liber, quales sunt dormientes in sepulchris, & quorū amplius nō est memoria, qui à manu tua abscissi sūt. Posuisti me in lacu inferiore, in tenebris profundis. Et dum corpus exanime iacet in monumento, anima descēdit in eum locum ubi patres asseruabātur, liberandi per sacrificium mortis ipsius. Zacharias locutus de Christi māsuetudine, de pace illius addit: Etiam tu seruata es Hierusalem, in sanguine enim fœderis tui emisi uinctos tuos de lacu, in quo non erat aqua. Considera singula. Qui à Christo redempti & liberati sunt ante illum mortui, nonnulli quidem

ex nationibus fuerunt, sed plerique tamen omnes ex  
Israël. ideo dicit, Vincetis tuos filia Sion. & per san-  
guinē fœderis Christi sunt liberati, nō ui & armis,  
ut uos speratis. Et profunditas fœuæ siue ergastuli,  
in quo patres detinebantur, significatur, quum sub-  
dit, In quonon erat aqua: ut alteri us generis signifi-  
cet esse, quā nostra hæc subterranea, quæ horribi-  
liora sunt, quum tenebris accedit etiam aqua. Man-  
sit corpus Domini in sepulchro eam partē sexti diei,  
qua iam incipiebat esse sabbatum, uacatione ab ope-  
ribus in populo uestro, hinc sabbatum totum inte-  
grum. quo finito, multum mane resurrexit: ut mani-  
festum faceret, se Iudaicum sabbatum secum conse-  
peliuisse, & rediisse ad uitā in nouitate pietatis, &  
reconciliationis cum Deo, uetere synagoga relicta  
in sepulchro, & noua Ecclesia excitata constituta.  
Idcirco Dominus ante mortem suam non abrogauit  
legem Mosaicam, quum ob alias causas quas alibi at-  
tigi, tum quod nondū sabbatū detulerat secū in mor-  
tem & sepulturā. Quod autem nō esset in monumē-  
to diu mansurus, Dauid cecinerat in psalmo quinto  
decimo: Caro, inquit, mea fidēter cōquiescet, quoni-  
am non relinques animā meā apud inferos, nec per-  
mittes ut sanctus tuus uideat corruptionē. Quod ad  
Dauidē ipsum referri nō potest, qui est in sepulchro  
suo corruptus. Albescēte autē die prima sabbati, re-  
duxit semetipse in lucē & uitā, quæ fuit lux nostra,

Et resurrectio à morte sempiterna. Et ex persona ecclesie Christiane dicitur Osee 6. Venite, & reuertamur ad Dominum, quia ipse rapuit & sanabit nos, percussit & alligabit nos. Viuificabit nos post duos dies, die tertia suscitabit nos, & uiuemus in conspectu eius. efficiemur sapientes, ut sequamur & cognoscamus Dominum. Cõpatitur & condolet Ecclesia Christo, postmodum intelligit & prædicat salutem, quæ ex plagis, & morte illius orta est, simul eruditionem & scientiam ueræ pietatis, quæ est Dominum cognoscere & sequi. Historiam Ionæ inter prophetias computatis. uelim ex uobis discere, ecquod sit illic uaticinium aliud, quam simulachrum resurrectionis Messiae: nam exposuisse illum Niniuitis Domini mandata, prophetia non est, sed rei gestæ narratio: nec illa Niniuitis acciderunt quæ ipse denuntiabat, neque iam ad uos pertinebant, neque ad Messiam, nec ad tempora post futura: ut causa nulla sit prorsus, cur in prophetis habeatur, nisi quod à pisce esse illum absorptum, in cuius uentre diebus tribus, & tribus noctibus manserit, postea eiectus est à pisce in arenam, & cælo huic ac luci redditus. Expressima est adumbratio Christi, positi in monumento, & reduti in uitam. eaq; est prophetia, quæ Ionam efficit prophetam. Neque enim uaticinia & prædictiones prophetarum simplices semper atque uniusmodi fuerunt. plerunque enim illi uerbis quidem prænun-

ciabant euentura, sed interdum aliàs notis rerum ipsarum, partim in alijs. ut Hieremias iubetur abscondere lapides grandes in luto, capite tertio & quadragesimo. partim in semetipsis, ueluti quum Ezechiel radit capillum ad barbam, quum Oseas ducit moecham. Et si quis prophetarum uerba acutè perpendat, intelliget nimirum in solo signo aut imagine sitam esse prophetiam. nam quod additur, explicatio est potius uaticinij, quàm uaticinium. uidelicet prophetia uisio est, quæ in rebus potius uersari solet quàm in uerbis. Sed qui uisiones suas explicant, solis nonnunquam utuntur uerbis, quibus interpretantur quorsum rerum illarum spectaculum pertinebat. Teneamus ergo, quod res ipsa nos manifestò docet, prophetias & uerbis exponi, & figuris, umbris, notis rerum futurarum. Ne tu sis admiratus, quum historiam & rem apud patres gestã audis, quæ pro uaticinio à nostris hominibus adducitur. pleraque enim illorum ad Mesiam alludebant, & umbræ ac simula chra erant Mesiae, qui fuit uelut corpus illorum omnium. quã enim in rem par erat referri acta illa patrum. quàm ad summã, præstãtissimam: nempe non Israël modo, sed hominũ uniuersorũ salutẽ sempiternã? IVD. Nõ usque adeò uidetur imago illa de Iona cū corpore suo cõgruere. Ionas enim tribus diebus & tribus noctibus māsit in uētre ceti: nõ itẽ Iesus uester in suo monumẽto, sed tanũ uespere parasceues



ſceues die ſabbati, & parte exigua primæ ſabbati.

IV D. Quidam ex noſtris perhibent, corpus Ieſu ſurreptum ab apoſtoliſ e ſepulchro fuiſſe, & in herba proximi prati occultatum, repertum paulo poſt ab exploratoribus, quos pontifices miſerunt. CH. Nō coherent artes mēdacij male conficti. ſepulchrū enim erat obſignatum, & militaris cuſtodia à præſi de miſſa pro ſepulchro excubabat. Iam uero cur pōtifices cadauer non ſuspendebant in foro? abolita fuiſſent ſtatim omnia. Sed fabulam hanc quo modo eſt à recentibus rabinis ueſtris inuenta, nec ullus eam ueterum ſcriptorum tradidit? Quod ſi priſci authores, & illius memoriæ æquales nihil de hoc mandarunt literis, quomodo poſt mille & trecētos annos eſt primum nata? manifeſtò apparet, totam eſſe commentitiam, & ab odij acerbitate confictam. Velim porrò mihi dicas, an cenſes uel Chriſti apoſtolos. uel ullos omnino homines eò dementiæ ac furoris poſſe delabi, ut à patrijs moribus, à diuinis ritibus ac legibus recedant? Labores, afflictiones, ærumnas, cruciatus, mortem acerbiffimā atque inimiciffimam magno atq; inuicto animo perferant, pro fide reſurrectiōis ac uitæ illius, cuius ipſi haberēt cadauer? Quadageſimo poſt ſuam reſurrectionem die reuerſus eſt in cœlum ad patrem ſuum, ad cuius dextram ſedet in omnes æternitates, unde ad diſcipulos ſuos & in-

sequentem deinceps Ecclesiam misit spiritum sanctum magistrum & gubernatorem. de qua ascensione Psalmista dicit in psalmo 67. Ascendisti in sublimia, triumphasti de captiuitate nostra, accepisti dona pro hominibus. De sessione autem idem Psalmista: Dixit dominus domino meo, sede à dextris meis. Dextera autem patris, sunt præcipua illius bona, beatitudo, clemētia, bonitas, munificētia, in quibus Christus sedet dispensator & distributor, & regnū illius & liberalitas tantorum bonorū super sanctas & beatas mentes, angelicas & humanas. de quo in psalmo quintodecimo: Dominus pars hereditatis meae & calicis mei, tu es qui hereditatem meā tueris mihi: hereditatem nactus sum in præclarissimis, & hereditas mea pulcherrima est mihi. Spiritus quidem sanctus perpetuò apud Ecclesiā manet inuisibilis, sed ad apostolos decimo die post ascensionem Domini missus est cōspicius in linguis igneis. Hic spiritus & apostolis, & deinceps uniuersæ Ecclesiæ reducit in memoriam, quæ Christus ipse docuit. idem explanat atque interpretatur ex illis quæ uidentur intellectu difficiliora, & controuersiam possunt aliquam parere. De spiritu hoc præuidit Ioël propheta, inquit: Et erit post hoc, id est postquam acceperit Israël doctorem iustitiæ, ut quæ ille docuerit & recordentur homines, & intelligant: Effundam spiritum meum super omnem carnem, & prophetabunt filij nostri

uestri, & filiae uestrae: senes uestri somnia somnia-  
 bunt, iuuenes uestri uisiones uidebunt. Ita scilicet factum  
 est, super omnem carnem effusus est spiritus Do-  
 mini, non singulatim, sed generatim, super Iudeos, gen-  
 tiles, senes, iuuenes, uiros, foeminas, seruos, liberos,  
 rudes, eruditos. neque enim uos putatis futurum, ut  
 quotquot in Palestina fuerint Israelitae, Messiae tem-  
 poribus habeant spiritum Dei, & donum uaticinan-  
 di: sed erit, quemadmodum Esaias inquit, qui relictus  
 fuerit nationi, & residuus in Hierusalem, sanctus  
 uocabitur. omnis utique qui scriptus est in uitam in  
 Hierusalem. Nam quod idem propheta dicit, Erunt  
 omnes docti à Deo: de illa doctrina manifestò intelli-  
 gitur, quam consequi ab humanis magistris nunquā  
 ualuissemus, Deus ipse per se nobis illam tradidit.  
 Itaque non docebit ulterius unusquisque fratrem su-  
 um dicendo, Cognosce dominum. Omnes enim cog-  
 noscent me à minimo eorum usque ad maximum, ait  
 Dominus. Olim homo homini faciebat se authorem,  
 ducem, magistrum pietatis, ut inter philosophos na-  
 tionum: nunc uero & si homo hominem docet cul-  
 tum diuinitatis, non suam, sed diuinam esse doctri-  
 nam profitetur. & nemo est baptizatus in nomi-  
 ne Christi, qui quidem per aetatem & ingenij  
 captum possit consequi, qui ignoret caput & me-  
 tam uniuersae philosophiae, nempe quis sit hominis  
 finis, quae sit uera beatitudo, quam expetit quomo-  
 do

ad consequetur, & quorsum pietas omnis pertineat, quod in gentibus nullus penè sciebat, in uestro autem populo paucissimi. quæ maior aut præstabilior institutio, quàm hæc? aut etiã efficacior? neque enim docturus erat suos Dominus, quæ essent elementorũ qualitates & commistiones, non tropos & figuras rhetoricas, nõ denique uel disciplinam ad agendum aliquam, uel artẽ quæ exerceatur manibus: sed quod est summum & caput uitæ uniuersæ, & sine quo salui esse non possumus, quod nec ignorarunt gentium sapientes, quorum eruditionis summa ad fines bonorum & malorum referebatur.

DE HIS QVÆ POST CHRISTVM.

**P**ERcurrimus breuiter uitam & mortem Iesu Christi, adiunximus singulis partibus uaticinia pro facultate & copia non rei ipsius, quæ est amplissima & uberrima, sed ingenij nostri atque eruditiõis in sacris literis. Sequitur deinde Ecclesiæ decursus in peregrinatiõe hac, qua ad Dominũ tendit. De discipulis Domini, & horũ sectatoribus, Esaias uerbis Christi prædixit: Ecce ego & pueri quos dedit mihi Dominus, ut sint signa & portenta in Israel, à Domino exercituũ, qui habitat in monte Sion. Quod portentum maius, aut signum euidentius, quàm apostoli, & eorum opera? paucissimi numero imbelles, imbecilli, atque imperiti, & alia quæ de illorum infirmitate exaggerari possunt: ediderunt miracula stupen



stupenda, & conuerterunt ad se ac suam pietatem  
 ora atque ingenia hominum. hi sunt filij qui Eccle-  
 siæ dati sunt pro antiquis patribus; sicut Psalmista  
 inquit: Pro patribus tuis erunt tibi filij, constitues  
 eos principes in uniuersa terra. Ecclesia autem ta-  
 met si patres primosq; extructores habuit ex Iudaïs-  
 mo, ipsa tamen potissimum ex gentibus congregata  
 est, ex grege illo sterili prorsus ac inutili, de quo Esa-  
 ias 54. Lauda sterilis quæ es ut mulier quando pepe-  
 rit, decanta laudem, exulta quæ es ut mulier quæ  
 non parturiuit, quia plures sunt filij desolatæ, quàm  
 filij maritatæ, dixit Dominus. Dilata locum taber-  
 naculi tui, & cortinas tabernaculorum tuorum ex-  
 tendent, ne prohibeas, elonga funiculos tuos, & cla-  
 uos tuos cõsolidas. ad meridiem enim & aquilonem  
 dilatabis te, & semen tuum gentes hereditate acci-  
 pient, & ciuitates desolatas inhabitare facient. hæc  
 Esaias. Idẽ uero cap. sexagesimo: Pro eo quod fuisti  
 derelicta & exosa, & non erat qui transiret, ponã  
 te in gloriam perpetuam, gaudium generatiõis &  
 generationis. Parua familia erit in die illa, & parua  
 familia erit in gentem fortem. Ego Dominus, in tem-  
 pore suo accelerare faciam illud. Synagoga uestre,  
 & sterilis huius quæ Ecclesiam Christi suo foetu au-  
 xit, figuram habetis non obscuram in duabus uxori-  
 bus Helcanæ, Phenennæ & Anna. Phenennæ, quæ de  
 fecunditate insolenter gloriabatur, & sterilitatem  
 Anna

Annæ opprobrabat, liberi extincti sunt ignobiles, & clausus est eius uterus: Annæ autē sterili nati sunt filij, & uixerunt, quorum primogenitus fuit propheta & iudex in Israël. Istud uero de duabus mulieribus quorsum pertineat, in cantico Annæ, quæ est uetustæ ætatis uaticiniū, non perplexè declaratur: Nolite, inquit, loqui magnifica, & ueteres sermones discedant ex ore uestro, quia Deus scientiarum est Dominus, & ipsi cognitæ sunt cogitationes. arcus fortium confractus est, debiles autem accincti sunt robore. qui saturi solebant esse, pro pane deinceps locauerunt suas operas: famelici autem saturati sunt, quoad sterilis peperit plurimos, & fecunda filiorum red-dita est effœta: Suscitatur e puluere pauperem, & de luto extollit mendicum. De his autem uestris & Ecclesiæ nostræ temporibus, uaticinium est hoc apud Esaiam. Nam posteaquam ruinam calamitatemq; populi Israëlitiçi descripsisset ingentē, addit, Et apprehendent septem mulieres uirum unum in illa die dicentes, Panem nostrum comedemus, & indumentis nostris amiciemur, tantum inuocetur nomen tuum super nos, aufer opprobrium nostrum. quo dicto dedecus & opprobrium grande significatur uestre gentis. At uero inter hanc uestram calamitatem quid futurum prænunciat? Erit, inquit, germen Domini in decore & gloria, & fructus terræ sublimis in gloriam assertori Israël. Duplicem hic uides Israelem:  
alte

alterum carnalem, qui adeò erat oppressus & afflic-  
 ctus, ut septem mulieres apprehēdant uirum unum:  
 alterum spiritalem, qui liberatur & seruatur à ger-  
 mine Domini. In quo annotabis obiter, Mesiam ap-  
 pellari germen Domini, & fructum terræ, iuxta u-  
 tranque generationem. Targum Chaldaicum pro  
 germine Domini, uertit Mesia. De uobis autem idem  
 propheta capite nono, Excidit Dominus ab Israël ca-  
 put & caudam, ramum & iūcum die una. senex &  
 honorabilis uultu ipse est caput, & propheta qui do-  
 cet mendacium ipse est cauda, & erunt qui beatum  
 dicunt hūc populum, ipsi errorem inducent, & per-  
 dent eum quem beatum dicent. Vos autem cæci estis  
 non solū superstitiōe, sed odio & rabie contra nos.  
 inde execrationes illæ & diræ uestre in nos acerbis-  
 simæ, quæ sunt à bonis & pijs uiris multo alienissi-  
 mæ, & ab ingenio Dei, quem uos existimatis solos  
 uos colere. qui per Hieremiam iussit olim patres ue-  
 stros, migrantes Babylonem, ut pro pace illius gen-  
 tis rogarent. Quāto nos aliter? qui pro salute & re-  
 demptione uestra precamur Deum nostrum, quum  
 uos habitetis in regnis nostris: nec ignoremus, quid  
 de nobis & sentiatis, & loquamini, quid scriptis  
 mandetis, quid liberos uestros doceatis de Christo  
 & uniuerso nomine Christiano. In superstitione au-  
 tem, esset ne inuenire furiosos, mente captos, uin-  
 ctos, qui in uiolentia furoris talia excogitarent? O  
 Christe

Christe Iesu, habemus tibi gratiam, qui nos ab hac tanta cæcitate ac insania liberaſti. An non ista satis arguunt, non relictos modò, sed repulſos uos eſſe penitus à Deo, homines qui hæc de Deo loquuntur & aſſeuerant? Vos ne talibus à pueritia opinionibus imbuti & immerſi, Meſſiam agnoſceretis. ſi rediret? Etiam ſi alius ueniat, qualem uos Meſſiam expectatis? oracula ueſtra ſunt, à gentibus receptum iri, à plerisque ueſtrum non cognitum, reiectum, abominatum. Et ad illum conuerſio gentium, prædixit Iacob: quod iam factum eſt in Chriſto Mariæ filio. ad illum enim conuerſa eſt multitudo gentium. & in eo ſperauit, quantam uos ad Meſſiam ueſtrum non putatis conuenturam. Ad Mahumetem uerò non facta eſt conuerſio, ſed cæca attractio, & uiolenta: qualis ad ueſtrum Meſſiam fieret, ſi talis ueniret aliquis, qualem uos depingitis & ſperatis. Hodie quoque omnes qui aliquid de Ieſu audiuerunt, præter uos, bene illi cupiunt, & illum uenerantur: Agareni, hæretici, idololatræ, exleges. Nec ullus poterit uenire, in quem tam conueniant prophetarum uaticinia, quàm noſter. Quòd ſi eſt ille à uobis ignoratus & repulſus, eundem in modum reſpueretis, quemcunque Deus mitteret. qua de re Amos dicit: Væ deſiderantibus diem Domini. ut quid hoc uobis, dies Domini? hæc tenebræ, & non lux. Et addit cauſſam: Quia replebit eos pavor & confuſione, & erit eis  
petra



petra scandali: quomodo si fugiat uir à facie leonis,  
& occurrat ei ursus, & ingrediatur domum, & in-  
nitatur manu sua parieti, & mordeat eum coluber,  
nōne tenebræ est dies Domini, & non lux? & ca-  
liginosa, & nō est splendor ei? quod ad caliginem &  
tenebras mentis pertinet, de ijs qui non agnoscunt  
diem uisitacionis & beneficij Domini, quum filium  
suum misit ad salutem cunctorum nam ijs qui rece-  
perunt Dei liberalitatem, dies ille splendor est, ac læ-  
titia. Dic quæso, quid displicet uobis in Messia no-  
stro, quo minus & uos eum amplectamini, & uene-  
remini? Imò quid in illo est, quod non sit dignissimū  
illo nomine & maiestate & promissione Dei? Pri-  
mum natus est ex uobis, inter uos altus atque educa-  
tus: sanctitas uitæ, etiam inuidiæ omnem calumnie  
occasionem captati inculpabilis: dignitas & autho-  
ritas in sermone ac præceptis: potestas multo maior  
quàm uos etiam fingendo Messie uestro tribuitis. o-  
stendit enim se dominum elementorum & naturæ,  
miraculis tot, tam uarijs, tam stupēdis. Legis uestre  
non abrogatio, sed illustratio: ut ex tenebrosa fieret  
lucida, ex uili præstans, ex aspera leuissima. Doctri-  
na omnis Deo congruens, precium religionis homi-  
ni optabilissimum. Gentes & nationes omnes ad il-  
lum conuersæ, uestra lex chara illis & sacrosancta  
propter Christum nostrum: quid tandem annotatis  
in eo Messia indignum? nihil certe, nisi quod non est

Nn      similis

*similis uestri, auarus, ambitiosus, uoluptarius, quod non splendebat bysso, serico, auro, argento, gemmis, quod non comitabantur eum satellites & ministri purpurati, quod non promittebat delicias, & oblectamenta corporis. At quanto amplius est quod ille promisit? Sed ne speretis uenurum à Deo aliquem, qualē uos fingitis. Nam Deus spiritus est merus, & spiritalibus delectatur bonis. corporalia ista, quae brutis magis congruunt, quam homini, negligit, auersatur. Exemplo sint uobis prophetae uestri, qui missi uobis à Deo in excellentia mentis, & humilitate carnis, ea ipsa de causa offenderūt animos maiorum uestrorum, & ab eis male accepti multatīq; sunt, quorum factum an non uos reprehenditis, atque abominamini? uidelicet non ignoratis, mitti à Deo homines fastus & instructionis uitae huius ac corporis contemptores, similes illius à quo sume missi. Sed in potentia etiam corporeis oculis conspiciua ueniet in fine seculorum, iudicatum uniuersos homines. Solomō in Ecclesiasta, quum saepe siue sua, siue aliena personae questus esset, omnia in uita hac esse permista & confusa, nec quicquam inter bonū & malum, inter sapientem & insipientem, pium atque impium inuicē esse, omnia omnibus similiter euenire, satisfacit huic querele, quod nunc tēpora sunt uariarum rerum uaria, futurum aliquando tempus unum rerum omnium, quo censebuntur à Deo hu-*

*manā*

mana opera & actiões. & libri clausula est, Occulta quidem nobis esse hic omnia, Dominum uerò adducturum omne humanū opus ad censurā suam, & quæ nos latēt resecturum, siue bona seu mala. Esaias autem capite tertio, duo ponit Dei iudicia: Stat ad iudicandum Dominus, & stat ad iudicandum populos. hoc est iudicium quotidianum uniuscuiusq; à morte sua, quod diuinitatis est: ideo dicit, Stat. Sequitur autem quod erit humanitatis Christi, Dominus ad iudicium ueniet cum senibus populi sui, & principibus suis. Assessores enim dantur Christo propheta & sancti, ad pudefaciendam & frangendam contumaciam malorum. diuinitati autem assessores dare, fas non est. Et quia prius iudicium quotidie exercetur, idcirco propheta dicit, Stat: posterius, quia semel aliquando cōtinget, dicit Veniet. Terribilem diem illum futurū, propheta idem significat, dicēs: Ululate, quia propè est dies Domini, ueluti præda ab omnipotēti ueniet, ecce dies Domini uenit crudelis, & indignatio & ira furoris, ut ponat terram in solitudinem, & peccatores eius disperdat ex ea. Quoniam stellæ cœlorum & orion eorum non lucere facient lumen eorum. Obscurabitur sol quando egredietur, & luna non splendere faciet lumen suum. & uisitato super orbem malū, & super impios iniquitatem eorum, & cessare faciam superbiam superbiorum, & superbiam fortium humiliare faciam. Precio

Nō a siorem

siorem faciam hominem magis quàm obrizum. &  
 hominem magis quàm aurum Ophir. Idcirco cælum  
 moue. faciam, & contremiscet terra de loco suo  
 propter iram Domini exercituū, & propter diem  
 iræ furoris eius. Hæc ille. Vides quàm inuite prophe-  
 tias uestras ad Mesiam quem uos fingitis uenire in-  
 uitas, ad nostrum uero quadrare. Quòd si quis non  
 adducitur, ut Iesum esse credat Christū promissum  
 in lege, nisi ei uideat scripturas omnes aperte & ex-  
 acte in illum conuenire, in tanta obscuritate & per-  
 plexitate illarum literarum, nihil prorsum ex lege  
 Iudaica credat necesse est, nec Deum esse qui illa ora-  
 cula dictarit, nec euenisse, aut euenturum quicquam  
 ex his quæ propheta prænunderint. Caterū ex ma-  
 nifestis sumat de obscurioribus coniecturam, ratio-  
 nis luce ac iudicij adhibita. Iterum admonebo te eius  
 quod in principio posui, ne signum aliquod aut alte-  
 rum, aut etiam tria uel quatuor ex sacris literis lo-  
 ca, quæ non ita sunt à nobis tractata, ut tu cuperes,  
 nec tibi satisfaciunt, ne protinus disputationem om-  
 nem reijcias, in qua non tam singula spectandæ &  
 perpendendæ sunt partes, quàm summa ipsa rei toti-  
 us. quā nolim ex hac sola auditione censcas, ad eam  
 uel abijciendam uel approbandā: sed quod in re tan-  
 ti momenti fieri par est, eam totam ad subtile  
 ac exactum iudicij examen crebro  
 reuocato.

IOAN.



IOAN. LODOVICI  
VIVIS DE VERITATE FIDEI  
Christianæ Liber I I I I. contra  
sectam Mahumetis.

P R A E F A T I O.



**T**ANTA pars generis hūani stultitiæ Mahumeticorum somniorū est addicta, ut nihil sit rem attenti-  
us perpēdēti miserabilius, quodq;  
sit magis mirandum, seu miseran-  
dum uerius. Ea sunt illis persuasa, quæ uel sola con-  
futantur relatione. ipsa enim semetipsam contundit,  
et confringit: neq; nos adeò cum ea pugnamus, ut  
ipsa secum. Utinam tam facile uelint auscultare,  
quàm facile coarguerentur.

CHRISTIANVS, ALFAQVINVS.

**Q**uam tibi uisæ sunt hæ deambulatiunculæ in-  
cūda? quàm gratum huius fluuioli murmur  
inter scrupulos placide decurrētis? AL. Iam olim  
nullo aspectu sum æquè recreatus. ô admirabilē cœ-  
li faciem, et admirabilem picturam soli. CH. Nem-  
pe admirabilis opificis opus. AL. Indubiè. CH.  
Quanto arbitrare tu illum præstabiliorem hoc suo  
opificio? AL. Quamū æstimare nemo potest. CH.  
Quid tu tantum esse authorem illum rerum omni-

um censes? A L. Ego uero, nisi me iudiciū fallit, maius esse, amplius, melius deū esse reor, quā quod cōprehendere ualeat humana mens. C H. Si ita est, oportet illū infinitū esse, & esētia & potentia. A L. Ita planē. C H. Et optimū & sapiētissimū & beatissimū, & hæc omnia supra quā cogitari possit. A L. Est ille profectō isthæc omnia. quid an tu non idē de illo iudicas? C H. Ego uero nihil me tenere uerius aut certius cēseo. sententiā tamen tuā audire uolui, quā facito ut in sequēti collocutiōe memineris ac teneas, nec ab ea ullo prorsum modo discedas. A L. Nihil erit periculi. Sūt enim ista animo meo iā inde à pueritia impressa & infixa. quæ à magistro quodā meo accepi, homine multæ ac uariæ peritiæ, quiq; nō nostris modo, uerū etiā uestris, & Iudaicis erat imbutus. C H. Quod est sanē inter uos perrarum. Sed tu probè facis, & nō leuiter gaudeo te aliquid foris uidisse. De homine uero ipso quid sentis? A L. Idē ille meus institutor referebat, Abdallā quendā è nostris sapientē interrogatū, quid maxime uidisset mirabile? respōdisse, maximū in orbe miraculū uisum sibi esse hominē. In eo esse præcipuā partem mētem, siue rationē, tū affectus, hinc corpus. hoc esse animæ uel instrumentum, uel habitaculum, uel ut sapientibus quibusdam ex antiquis sit uisum, carcerem. Affectus seu perturbatiōes animi cōmunes nobis esse cū bellis: quæ nisi regātur à ratione, nihil inter hominē & bellu-

belluā interesse, degenerare hominē in mille species ferarū. CH. Oportet magistrū illū tuū egregie fuisse in cognitiōe naturæ rerū philosophatū. Quid porrò dicebat esse in mente? AL. Voltuatē dominā omnī, ex cuius actibus uel boni dicamur, uel mali: intelligentiā, qua quid in re quaq; uel uerū sit, uel falsum, bonū aut malū prouideamus. hinc memoriā tanquā thesaurū omnīū, quæ res antè actas respiciat. CH. Perge porrò. nā mirifice me sermo iste tuus delectat. Quid de morte ipsius hominis sentiebat? utrū uim illam & facultatē adeò excelsam & planè diuinā, interire unā cū corpore affirmabat, an uiuere corpore relicto? AL. Tunc demū uiuere, & esse immortalē. CH. Quā ob causam, & quē finem existimabat hominem esse à Deo conditum? AL. Ut bene illi esset per obedientiam diuinæ legis. CH. Ut bene illi esset hic, an in futura immortalitate? AL. In altera. nam in ista permixta & confusa esse omnia, & bonis & malis tum bona tum mala eueniunt. CH. Probè dicis. nam & hominis immortalis bonum conuenit esse immortale, id autem esse nisi in immortalitate nō potest. Sed ad immortalem hanc beatitatem qua tandem uia licebit peruenire? AL. Cultu Dei, & obseruatione legis illius. CH. Ecquæ tandem est lex illius? nam nos Christianam esse dicimus, Iudæi Mosaicam, uos Mahumeticam. Quid dicebat præceptor tuus? AL. Ille uero Mahumeticam probabat, & ue

tabat nos ex iussis Mahumetis ipsius quicquam de illa disputare, aut inquirere, sed tenere firmiter traditiones patrum, nec ab illis uel latum unguem esse de flectendū. Pater meus fuit Mahumeticus, ego illum sequar. CH. Si existimarem te hominem esse ingenio uel tardo, uel iacenti, quales sunt plerique omnes uestrae sectae, uerbum unum dictis non adderem, ne tempus et operam inaniter consumerem. Sed quum te et acutum esse hominem animaduerto, et non omnino eorum quae sunt in uita et natura rudem atque imperitum, non grauabor paulo diffusius tantis de rebus tecum colloqui.

#### QVOD SIT DISPVTANDVM

##### De Religione.

**A**ssideamus quæso in hac herbula, sub hac diffusa arbore. AL. Id quidem pro arbitratu tuo. Sed me in disputationem de lege nostra ne uoces, quod uehementer legislator noster uetuit fieri. CH. Nolo disputare ego nunc tecum de secta uestra, quandoquidem (ut ais) tam accuratè, tam minaciter est uobis à uestro legislatore prohibitum. tantū abs te peto, ut communiter quæramus rationem, cur ille uobis disputationi omni tam diligenter interdixerit. nā non est credibile, sine causa eū id fecisse. AL. Indubie, non sine causa. CH. Quā tandem esse illā existimari cōuenit? AL. Quia sunt in populo per multi, ac plerique potius imperiti, tardi, excordes,  
à qui



à quibus si ratio exposceretur rerū adeò sublimiū,  
 perturbarentur, & iniiceretur eis scrupulus, face-  
 rētq; pietatis suæ iacturā. An nō uos etiā uetatis de  
 fide uestra disputari? CH. Non est profectò quod  
 negem periculosum esse, rudes atque ignaros homi-  
 nes de mysterijs religionis differere. sed id eruditi  
 & prudentiores & cordatiores in populo sine pe-  
 riculo tum possunt facere, tum etiam debent. AL.  
 Quis esse tam doctus & tam cordatus potest, qui  
 consilia Dei & arcanas illius actiones norit? CH.  
 Dic mihi, in pingendo, in suendo, in extruendo, nōn  
 ne ingenium hominis quædam assequitur, alia restāt  
 ad quæ non pertingit? AL. Etiam. CH. In domo  
 & familia, in ciuitate gubernanda alij plus, alij mi-  
 nus usu & experientis sibi compararūt, nemo per-  
 uenit ad summum. AL. Ita est. CH. Quid natu-  
 ræ opera nonne sacra sunt & recondita? cursus cœ-  
 lorum & siderum, mutationes elementorum uitæ,  
 uires plantarum & animantium, aliæq; innumera.  
 exercet se in ijs ingenium humanum. progreditur  
 quantum potest, quæ abstrusiora sunt dimittit. eun-  
 dem in modū contingit in omni arte, disciplina, pru-  
 dentia, cognitione. AL. Ita uidetur. CH. Et quum  
 ratio uel petitur ab ingenio, uel redditur, ea est quā  
 uis mentis optimam & purissimam potest exculpe-  
 re. Sic omnino de religione quum ratio illius postu-  
 latur, non id petitur quod certissimum est atq; abso-  
 lutissi

lutissimum, sed quod humana ualeat solertia conse-  
 qui. Cedò uero, nōne sunt multa quæ primo aspe-  
 ctu animus non uidet: intentione autem, diligencia,  
 usu, tandem perspicit? A L. Etiam. C H. Quæro  
 ex te, magna attentione & diligenti, & collatione  
 rationū quid excuditur, uerum an falsum? A L. Dic  
 explicatius. C H. Si oculus in uidendo, & auris in  
 audiendo remissius agant & segnius, an non in mul-  
 tis fallentur, ut uel uidisse se uel audiuisse credant,  
 quæ nec uiderunt, nec audiuerunt, uel non tantum,  
 uel non tale? A L. Sæpenumero. C H. Sin uero ex  
 pergiscantur, & attentè uel intueantur uel auscul-  
 tent, nōne omnia uidebunt & audient certius, mi-  
 nimeq; patientur? A L. Non est dubium. C H. At-  
 tentio igitur & inquisitio ad inueniendam uerita-  
 tem ualet, mendacium uero in segnitie ac negligetia  
 subrepat. fit ergo ut ingenium si remittas, si de re qua  
 piam non inquiras, nec scruteris, facile subeat dece-  
 ptio: sin speculeris, & rationes causasq; inquiras ac  
 conseras, ut ueritas sese proferat enucleata tanquam  
 detractis putaminibus. Quòd si quis nouū aliquod  
 inuentum adferret ac ostenderet tibi, iuberet tamen  
 te illud cōuenientibus oculis aspicere, imò propè clau-  
 sis & obturatis auribus audire, quid tu de commen-  
 to illo posses suspicari? an non fraudem subesse ali-  
 quam? A L. Magna esset suspicio. C H. Quid si ad-  
 ferens leges ac uiuendi formam, rationemq; colendi

numinis nouam, atque à superioribus diuersam, nihil dicat aliud, nisi hæc sunt uera, credite, Deus iubet : quemadmodū Mahumetus facit in Alcorano loquentem ad se Deum, Si quis tecum uoluerit disputare, dic te faciem tuam ad Deum, eiusq; sequaces conuertisse, quod agendo tam periti legum quàm ignari bonam legem sequentur. Hæc uero quis impostor aut scurra non posset dicere, & asseuerare, si id solum sufficit? A L. Atqui sunt ex Deo, idcirco ratio non est petenda. C H. Quomodo cōstat esse ex Deo? non rationes admittit, non fulcit miraculis, non signis efficacibus, quæ nulla egit, & se non missum cū potestate prodigiorum fatetur. Quis est qui ad omnia sua figmenta non possit addere, hoc est uerum, certū, ex Deo est, nolite dubitare. nolite inquirere. Tutissimum mentiendi genus est, nolle rationem eorum quæ dicas reddere, & ueritatem dictorum ad Deum referre authorem, quem nemo de ueritate possit interrogare. A L. Putas tu tam proteruum atq; impium hominem fuisse Mahumetem, ut mendaciū sub Dei persona poneret? an nō metueret graue pro tali noxa supplicium? præsertim quum dicat, Quis mortalium uel nequior uel peior, quàm qui Deo mendacium attribuit, et se nuncium esse ab eo missum cōfirmat, qui missus non sit? an non aperte ostendit se à tali mendacio abhorrere? & alijs in locis mendaces maxime detestatur. C H. Nimum es simplex,  
 si mo-

si modo ex animo loqueris : uel rusticus potius. Quid nam aliud dicunt mēdaces omnes, quā se esse ueracissimos, & abominātur mendacium, & grauius conuicijs mendaces impetunt? pœnam autem sceleris tanti uel nullam credebant futuram, uel nolebant in mentem reuocare. leuissimorum commodorum gratia plurimi in uobis ac nobis facinora capitalia suscipiūt, & se inexplicabilibus delictis inuoluunt. Quid Mahumetes ageret regni causa, pro quo solo uiolandum esse ius quidam dixerunt? Vtinam nostris temporibus non haberemus tam multa & seu exempla. Ad intelligēda omnia quæ à Deo sunt condita, quatenus quidem nobis conducit, attributa est homini à Deo, quod & tu dudum præclare dicebas, lux ingenij, & facultas cognitionis, tum præsentium rerum, tum præteritarum. hisce muneribus homo instructus, multa in his inferioribus assequitur, & ex inferioribus ad superiora se sustollit: sicut uideamus in cursu ipso studiorum & uitæ totius, ut exercitatio ingenij perducatur à paruis ad magna, ab humilibus ad sublimia, ab apertis dilucidisq; ad obscura & recondita. Qui ergo ueritate sua fidit, nihil reformidat examen ingenij: imò aduocat. & quantum potest exacuit. Vester autem legislator cōscius quā legem ferret, quam uitæ ac pietatis formulam induceret, nō solum à cogitatione & cōsideratione uos arcuit, sed mutos & cecos & saxeos effecisset, si po-



potuisset . Ille uos de legibus non patitur differere,  
aut quid & quamobrem quicq; dicatur expendere.  
procures sectæ uestræ à literis uos & omni genero-  
sa speculatione arcet , nec memoriam rerū gestarū  
concedunt , tanquam mutæ essetis animantes , sine  
mente, sine memoria . Sed Mahumetes idem magna  
uti solet inconstantia. alio in loco dicit : Omnes ho-  
mines, præter malos, honestis uerbis disputādo sem-  
per alloquere. disputationem igitur non omnino re-  
spuit. Velim autem ex te audire, quandoquidem non  
es prorsum expers sapientiæ, quid esse exstimes ocu-  
lo gratissimum & congruentissimum? A L. Intueri  
uiuidos, uarios, eleganter compositos colores. CH.  
Quid auri? A L. Audire sonorum concentum, ap-  
tum & concinnum. CH. Habet ergo unaquaq; a-  
nimantis facultas certū aliquid, maxime naturæ suæ  
conforme ac consentaneū, quo unice capiatur. A L.  
Habet. CH. Quid dicemus habere memoriā. A L.  
Res gestas. CH. Quid ingenium? A L. Veritatē  
in quaq; re. CH. Cur ergo & memoriam in rebus  
superioribus non exercetis , & ingenium in rerum  
perscrutatione? Sed nimirum intelligunt principes  
uestri, & præcipui Alfaqinorum, historiam, artes,  
disciplinas, omnem deniq; cultum ingenij Alcorano  
uestro esse cōtraria atq; inimica. ideo procul uos ab  
illis abducunt. Nostræ religioni nulla ars, nulla cog-  
nitio contraria est, amica est potius, utilis, accommo-  
da:

da: quoniam ueritas ueritati nunquam aduersatur, conseruit semper, & subseruit. uestrum autem mendacium ab omni ueritate oppugnatur. quo fit, ut eruditissimi in nobis sint religiosissimi: in uobis autem si qui paululum literas & peritiam rerum aliquam degustarunt, ij cont inuo à recepta in uobis persuasione desciscunt.

## DE MAHVME TE.

**E**Xcutiamus primum dignitatem legislatoris, inde enim prima authoritas legibus: ut facile intelligatur, missus sit à Deo institutor, magisterq; uitæ mortalium, an à se ipso potentia atq; imperij audus affectator. Prima ætate Mahumetes fuit pauper, & exercuit latrocinia. tum nactus opulentas nuptias, militauit sub Heraclio Imperatore, inter populares suos Arabes. in ea militia occasionem principatus ac potentia inuenit. Nam quum Arabes irati Heraclio, discessionem ab eo fecissent, hic se ordinibus iratorum militum admiscuit, eorumq; animos aduersus imperatorem exacuit, & in defectione confirmauit. Tum creatus est à parte quadam militum dux Mahumetes, quemadmodum ij solent in omni seditione extolli, qui praua multitudinis consilia comprobant, potentesq; & principes insectantur. Humilitatem generis & uitæ prioris sordes multi in nouo duce aspernabatur. ipse, ut ab illo se contemptu uindicaret, quod est apud stolidam plebem facillimum atq; effecacissi-

cacissimum, diuinitatem suis actibus prætendit: non iam se ducem & principem ferens militari fauore electum, sed prophetam & nuncium Dei omnipotentis, ut obtentu diuinitatis omnes haberet dicto audientes. quis enim audeat contrauenire consilijs, & uoluntati Dei, & illi quem fabricator cœli ac terræ dignum duxerit sua legatione? Vetus ea ars est, exercuerunt eam Minos, Lycurgus, Numa, Scipio, Sertorius. A L. Nihil horum norat Mahumetes. CH.

Facile credo, & quidem iniurato. non ergo ex illorum arte commētum sumpsit, sed quod nebulonibus & latronibus, quando aliud deest quo se tueantur, nihil est æquè promptum. Aetate nostra uidimus in Hispania duces seditionum, qui se diuinitus ad id missos confirmarent, & agi diuinis præceptis, nihilq; non ex Dei præscripto aggredi. Sed istis inuicem cessit infelicitur, Mahumeti felicius. Caput uero negotij erat, Deum misisse primò humano generi Moysen, hinc Christum Iesum, instructos facultate prodigiorum. homines illis non se præbuisse obsequentes. statuisse, Mahumetem mittere sine miraculis, armatum. ut quos nō mouissent miracula, cogerent arma, se esse postremum nuncium. nec futurum postea alium, prædictum à Christo in Euangelio, prænunciatum luce admirabili, quæ ab Eua per successionem generis in omnes mulieres transferit usq; ad matrem suam. nonne hæc sunt in Alcorano? A L. Sunt, & qui,

quidem uerissima omnia & sancta. CH. Alia deinceps paulatim attingemus, nunc de istis.

## DE ARMIS.

**A** Rma quorsum pertinent? A L. Ad uim, & ad cogendum. CH. Quòd si Deus aliquem uult cogere, quid illi opus est armis? an non qui condidit & sustentat, flectere & cogere potest, quomodo docunq; fuerit collibitum? Vtrum est præstabilius, adducere animos in suã sententiã persuasione, an cogere corpora? A L. Persuadere. CH. Lex cui datur, corpori an animo? A L. Animo. CH. Et ex animo cui parti? memoriæ ne, an intelligentiæ, an uolitioni? A L. Huic terciæ. CH. An uero possunt arma aut ullæ uires humanæ cogere? A L. Minime. CH. Quomodo ergo adducitur? A L. Monendo, suadendo, rationibus, signis. CH. Nihil potest dici eruditius. est ergo Dei legem statuentis, non uiolentiæ armorum cogere corpora, sed miraculis & suasionibus adducere animos. Hoc fecerunt Moses & Christus. Nam quòd Mahumetes dicit homines illis non obediuisse, manifestissimum est mendacium: quippe & Mosi dicto audientes fuerunt Iudæi, & totus pene orbis Christo, ut nunc plurimæ adhuc gentes, & quum Mahumetes uiueret, pleræq; nationes. Rogate quomodo manifestius poterat demonstrare à Deo esse missum se, quàm si ea ageret quæ solus potest Deus, quæq; illis solis tribuit quos ipse ad salutem hominum



minum mittit? Nam quod ait, incredulis nulla miracula prodesse: se ipse non intelligit, ut in alijs suis dictis. Quos enim uocat incredulos? si illos qui nullo modo sunt credituri, ad istos non modo miracula, sed nec arma quicquid profecerint. sin increduli sunt qui non credunt, aut quibus difficile persuadetur, istis certe efficaciora fuerint miracula quam arma: Et mundus ad mirabilia Christi atque apostolorum opera respicit, non ad uictorias Persarum aut Romanorum. Sed Mahumetes conscius sibi non habere donum illud coeleste, efficiendi quae naturae uires superarēt, quod erat in proptu, missum esse dixit se ferro munitum. Atqui armatus hic uictus est aliquando, Et luculem uulnus in ore accepit, unde molares aliquot Et dentes amisit, Et in fossam est deiectus, Et uictus turpiter, Et quidem quum pridie uictoriam sibi Et suis ex coelesti oraculo promississet. quin etiam quum adhuc esset latro, casus saepe est à Drianitis, quorum camelos inuadebat Mecha redeuntes. Et ciuitas illa quae nunc eum adorat, capitis eum aliquando damnauit, ut latronem perniciosum: Et praemium proposuit, si quis in potestatem uel uiuum uel mortuum redigeret. Hic est miles ille Dei, latro primum, mox sediciosus miles, Et transfuga, tum imperator exercitus defectoris. Sed fac fuisse inuictum: quid plus habet quam Alexander, uel Iulius Caesar, uel alij multi duces inuicti? quorum tamen gloriam militare Et

præclara facinora Mahumetes, qui arma ex cælo acceperat, nunquam æquauit. Quid, quod in armis se penumero uidemus accidere, ut peior caussa uincat meliorem? ut intelligas non esse diuinæ æquitatis bella, sed humanæ maliciæ. Verum non ignorauit Mahumetes, mansuetudinem, clemētiam, humanitatem esse potius diuina arma, quàm ista ferrea & chalybea, fabrorum manibus conflata. idcirco ait: Missus sum à Deo ad homines cum pietate & misericordia. Item persuasionem esse potius diuinitatis, quàm uiolentiam, & coactionem. idcirco alio in loco inquit: Nulla uiolentia est in fide. & rursum: Vim nequaquam propter legem inferatis, quum recta prauaq; uia patefactæ sint. Sed nimirum si hoc ipse obseruasset. inualidum fuisset regnum prophetæ, & desertus principatus. persuasione enim nemo esset unquam ad assēniendum sectæ inductus, tam absurde ac puerili. At ferri quis fuisset usus, si nemo cogeretur: & res non esset gladijs gerenda, sed rationibus? Idcirco tanq̃ sui oblitus, alibi dicit: Nisi meam scripturam receperis, & credideris cœlitus eam esse ad me missam, meq; confessus fueris prophetam esse Dei legatum, diripiam substantiam tuam omnem, uxorem & liberos tuos captiuos abducam, teq; ipsum interficiam. & item: Viri boni, quid uobis est cum illis incredulis commercij? cum nemine illorum contrahatis uel negocium, uel societatem, uel amicitiam, nisi prius recta

us recta Dei uia pugnatum aut prædatum uobiscū  
 exeat. quod si facere recusarit, eos si fieri possit, ubi  
 cunq; inueneritis occidite. Hæc ille. Quid potest di-  
 ci uel Deo uel prophetæ cōgruentius? Ideoq; lingua  
 uestra eo nomine appellatis eos, qui uobis se adiun-  
 gunt, quo denotatur, illos se ac rem suam & famili-  
 am conseruasse Mahumeticæ legis professione. Sed  
 quid si non possit pugnare aut prædari, senex aut in-  
 ualidus? quid si nolit & abhorreat à sanguine &  
 cæde? nō in illius arbitrio id ponitur ut faciat, sed in  
 uestro, ut cogatis eum facere. hæc est illa securitas  
 & negligentia, qua negat se quenquam trahere inui-  
 tum, omnia relegat ad authoritatem uoluntatemq;  
 illius à quo sit missus. non intelligis, non solum uer-  
 ba cum factis pugnare, sed etiam cum ipsis uerbis:  
 ut nec in loquēdo, quod est facilius, seruare cōstanti-  
 am potuerit. Missurus rex nuncium aut legatum ali-  
 quem, non ne eum deligit potissimum ex suis omni-  
 bus, qui maxime sit ex sua dignitate? A L. Planè.  
 C H. Quem ergo conuenit mitti à Deo, nisi qui Dei  
 sit simillimus sanctitate, innocentia uitæ, sapientia,  
 & alijs uirtutibus, quæ in Deo sunt eximie & infi-  
 nitæ? qualis fuit Moses. & Mose melior Christus, uel  
 uestri legislatoris testimonio. Mahumetes ipse ante-  
 quam ad legationem Dei nomine obeūdam ueniret,  
 pessimus: in legatione ipsa peior fuit. Ipse homo aper-  
 tus & simplex proficitur quæ negare non poterat,

quum tot haberet conscios & testes suorum flagiti-  
orum, peccatorem se à primo fuisse, & hominem faci-  
norosum, sed cōdonata sibi esse à Deo peccata. Quæ  
tandem fuerunt priora illa scelera? erat prædo, rap-  
tor uiolentus, homicida, adulter impurus. eadem illa  
postquam è cœlis descendit, obtinuit, nec quicquam  
mutauit de solita impuritate ac crudelitate. deniq;  
talis fuit, qualem tu filium tuū esse nolles. Quis cre-  
dat à Deo esse electum aliquem ad munus tantum,  
nec ab eo esse meliorem redditum? potest quicquam  
tanta bonitas coningere, quin bonū faciat? potest  
tanta puritas, quin purget? At uerò ne quis scelera  
& flagitia, quæ palam propheta designabat, aude-  
ret carpere aut uituperare, auctoritatem diuinam  
omnibus interposuit, & se à Deo iussu id facere  
confirmauit: bella, cædes, rapinas, adulteria. nec sa-  
tis illi fuit malum & scelerosum esse, nisi etiam ne-  
quitia ac scelerum suorum authorem caussamq; De-  
um faceret, patrem bonitatis & iustitiæ, osorem ui-  
tiorum. Mouet bella, agit, rapit, occidit, ait se cum  
potētia bellica à Deo missum, incestat, adulteratur,  
polluit uirgines & maritas, facit Deum lenonem su-  
um, & ait sibi datam à Deo uim generandi quantū  
hominibus quadraginta. quid potest dici obscœnius?  
quorsum hæc generandi tam immanis potestas, nisi  
ut non solum impune ac licenter, sed cum aliquapiā  
religionis cogitatione à muliebri simplicitate & su-  
per



perstitutione admitteretur ad concubitus, sinente marito aut patre, atq; etiam auctoritatem numinis reuerente, à quo esset illi tale munus concessum? A L. Furari non ne tu turpe ducis? C H. Etiam. A L. At Deus filius Israël id permisit, quum ex Aegypto egrederentur. Potuit igitur & Mahumeti in libidine indulgere. C H. Multum inter furtum & uenerem interest, quæ semper habet immūdiem, et si in muliere est aliena & obscœnissima. & hæc auri atq; argenti surreptio in aliquem usum digniorem concedebatur, nempe ut illinc tabernaculum construeretur Domino. Immodica autem illa Mahumetis libido, & effrenatissima, quem erat fructum habitura, præsertim quum nihil unquam præter filiola genuerit? Et erat furti illius significatio sublimior, ut qui ab Aegypto ad terram promissionis, hoc est à carne traduntur ad spiritum, spolient carnē ijs omnibus quæ deseruire ac prodesse possūt spiritui. Quod si à Deo munus illud concessum est Mahumeti, tanto nūcio ac propheta, cur nulli unquam aliorum prophetarum non dico tantum, sed nihil omnino est permisum tale? Quod si donum est hoc & Deo dante & propheta accipiente dignum, nemo non deberet expetere, & se in coenum illud foedissimum immergere. Quod si uos diuinæ naturæ atq; ingenij uel minimam ac tenuissimam particulam mentis ac cogitatione comprehendissetis, agnosceretis continuò, qua-

lis esset uester iste diuinus nuncius, qui uim illam & facultatem tantæ turpitudinis, & licentiam adeò peccuinam ac effrenem à Deo se accepisse gloriaretur. Si tam propinquus, tam acceptus, tam charus erat Deo, impartitus illi fuisset Deus nō cupidinē opum, non uoluptatum, non rapinarum, sed de sua excellentia uirtutum, quemadmodum Mosi, Christo, Ioanni, & alijs, quos uos ipsi charos fuisse Deo perhibetis. A L. Non negant quidam nostrum, nequam & perditum hominem fuisse nostrum nuncium. Sed Deus eligit quos uult, non est ab eo ratio eorum quæ agit repositenda. C H. Absit. sed certe tanta cum angelis & cum Deo familiaritas, tam crebra colloquia, lex ipsa cœlitus ipsi missa, fecissent eum sanctiorē. Quale autem est, formulam recte uiuendi, pietatis, sanctitatis dare Deum hominibus, per hominem ab illis uirtutibus alienissimum, ut nihil magis à norma illa discreparet, quàm uita legati? Quid uero potest esse æquius, quàm ut homines ad exemplum se illius cōponant, quem uideant admitti ad consortia angelorum, ad colloquia Dei, præfici mundo à Deo ipso, ad leges uitæ & sanctitatis condendas? Cuius tandem uitam & mores imitabuntur homines, si hunc respuunt, & contemnunt? Quàm stulta autem & impia est fabella illa de luce: quæ si in Alcorano contineretur, multis à me confutaretur uerbis. sed quia inuentum est quorundam ex uestris, breuiter attin-

gam. Narrant lucem conditam esse in Adam incredibilem, semen atque originem Mahumetis. hanc, quum esset genitus Seth, transisse in Euam, ab hac in Seth. ab illo in uxorem, concepto illo qui propagaturus esset genus, ita deinceps ordine per genitores usque ad Mahumetem: & hanc lucem tantam fuisse, ut omnes animantes eam sint admiratæ. oportet igitur maiorem fuisse, quàm lucem solis. nam hunc solarem splendorem non admirantur brutæ animantes. quis unquam rei tam inusitatæ, tamq; stupendæ meminit? uidelicet prætermisisset tam grande miraculum Moses, qui de patribus etiam minutissima persequitur. prætermisissent scriptores alij penè infiniti, qui à condito orbe fuerunt ad ortum Mahumetis. Quid uerò luce opus fuit ad Mahumetē declarādū? quasi Moses & Christus nūcij Dei non fuerint, & sine luce. Quū autē uentū est ad Abraā, nō ad Isaac migravit splendor ille per Sarā, sed ad Ismaelē per Agar. Atqui soboli Saræ factæ sunt promissiones, nō generi Agar: & ex Sara per Isaac traxerunt originē Moses & Christus, quos Mahūctes ipse maiores se & sanctiores fuisse cōfitemur. Tandē lux hæc peruenit ad matrē Mahumetis, à qua in Mahumetē prorsum demigravit, ibiq; cōquicuit. Si hæc lux à parētibus fuit Mahūctis, quomodo puer fuit idolatra & grassator? quin potius à conceptu ipso sanctus & uenerabilis? quis non illum adorabat, ut cœlitus demis-

sum, in quo tam admirabile signum conspiciebat fa-  
 uoris diuini? quid opus illi fuit alijs miraculis, aut a-  
 lijs argumentis diuinæ legationis? Negat se instru-  
 ctum diuinitus potestate miraculorum: quod mira-  
 culum isto maius, aut euidentius? Sed de luce hac sa-  
 tis: quod adeo est puerile ac absurdum, ut non dubi-  
 tem, quin plerisque uestrū attentius rem perpen-  
 dentibus tale uideatur. Venio ad id quod dicitis, pro-  
 missum fuisse à Christo Mahumetem, id uero crasum  
 à nostris. nam illo loci, quo dicitur, Et mittam uobis  
 spiritum consolationis: Mahumetem erat adscriptū,  
 deletum autem à nobis, odio uestri. Quæro ante om-  
 nia, qui nam craserunt? priores Mahumete, an poste-  
 riores? Prioribus nulla erat caussa: nesciebant enim  
 quis aut qualis Mahumetes erat futurus, imò credi-  
 turi erant optimum & diuinum prophetam futurū,  
 qui esset à Christo non solū commendatus, sed iussus  
 expectari. Posteriores non fecerunt: nā Mahumetes  
 ipse iam de eo conqueritur. Quid, quod extant Euā-  
 gelia scripta ante Mahumetis ætatem, nec ulla est in  
 eis mentio Mahumetis, nec ulla eo loci erasio. Tot  
 scriptores Christiani præceßerunt Mahumetē, tam  
 diuersi opinionibus, sectis, affectibus, quis unquam  
 illorum meminit Mahumetis? Quod si Mahumetem  
 Iesus Christus iussisset expectari, tantum nobis fuisset  
 nefas, illum priusquam ueniret non expectare, &  
 postquam uenisset non recipere, quā Christum ip-  
 sum



sum abnegare. Magnum & atrox uideo esse inter uestram gentem & nostram odium. alteri alteris non sumus pro hominibus, sed pro canibus, exuta omni humanitate. Idem nobis & Iudeis contingit, idem Iudeis & uobis. Mahumetes ait Mosē missum esse à Deo, Iesum uero uerbum Dei natum ex Maria uirgine. putaret aliquis uestrum fas sibi esse aliter sentire, aut loqui? A L. Imò grande nefas. C H. Vtiq; non amore nostri, aut Christi, sed propter testimonium uestri prophetæ. A L. Ita est. nam si propheta noster non esset testificatus, nihil tale crederemus. C H. Idem ipsum de nobis existimare te par est. Nos ueteris instrumenti libros legimus, ueneramur, oracula esse Dei omnipotentis pro certo habemus. Mosē uirum Dei, prophetas sanctos homines fuisse credimus ex testimonio Iesu: qui si Mahumetem nobis commendasset, sanctior etiam nobis esset illis omnibus. quemadmodum Ioannes baptista, de quo elogium fuit Christi: Inter natos è mulieribus non surrexisset maiore. nec aliter expectatus & desideratus fuisset à nostris Mahumetes, quàm spiritus ille consolationis ab apostolis, qui decimo post Christi ascensionem die diuinis muneribus apostolos repleuit.

QVOD CHRISTVM CONVENIEBAT uenire postremum.

**V**os dicitis, postremum Dei nuncium fuisse Mahumetem, nec post eum alium futurum, illud

attulisse pietatis formulā consummatam & uniuer-  
salem: nihil in posterum ei addetur, aut detrahatur.  
non ne? A L. Ita est. C H. Est ergo legatio Mahume-  
tis ut postrema, ita præcipua & cōsummata. A L.  
Est planè. C H. Quæso te, in omni prudentia & u-  
su uitæ, iudicio, ratione, præstantissimam legationē  
cui conuenit tribui, nisi præstantissimo legato? Quæ-  
res est absoluenda ingens & maximi momenti, &  
ad summam regni pertinens, quis mittitur, nisi regi  
proximus & intimus? uel interdum rex ipse uenit in  
colloquium cum ijs quibus cum agitur. primū enim  
res per inferiores tractatur: ad ultimum uerò, ut ple-  
na sit in consummatione authoritas, per eū qui sum-  
mæ sit aūthoritatis. Conferamus iam Christum cum  
Mahumete, non ex nostra prædicatione, sed ex Alco-  
rano & secta uestra. Christus uerbum Dei, Mahu-  
metes homo merus. Christus Meßias, promissus pa-  
tribus, nunciatus ab angelo uirgini excellentissimæ:  
Mahumetes obscurus, & ignobilis. Christus semper  
sanctus: Mahūetes aliquādo orphanus, & erro, &  
latro, & idolorum cultor. Christus doctor sapien-  
tissimus, Mahumetes omnis eruditionis prorsum ex-  
pers, nec suum ipsius Alcoranum intelligens. Chri-  
stus de se & de suis certus: Mahumetes incertus, ut  
ipse in Alcorano confitetur. Christus uiuens, uel ut  
uos dicitis, raptus in cœlum à Deo: uel ut nos, redu-  
ctus in uitam: Mahumetes mortuus & computres-  
sus.

Etus. Denique nec Mahumetes negat, multo se esse  
 inferiorem Iesu Christo. Vtri ergo par erat postre-  
 mam legationem mandari, in qua sigillum esset ad-  
 dendum normæ pietatis & uitæ totius? conueniebat  
 profectò uel Mahumetem, si nuncius esset Dei, cum  
 reliquis prophetis uenisse ante Iesum, uel post Iesum  
 neminem mitti. Accedit his, quòd Christus ad diuinæ  
 uæ legis cõfirmationem ea adferebat, quæ uidetes  
 dubitare non possent diuinitus fieri, & facultatem  
 naturæ omnem superare. Vos enim de illo testifica-  
 mini, quòd reddiderit lumen cæcis, sanitatem lepro-  
 sis, surdis auditum, mortuis lucem & uitam, & alia  
 innumera. propheta uester nulla se ait miracula fe-  
 ciisse, quum id tamen sit præcipuum diuinitatis sig-  
 num: nempe ostendere uel se, uel eum à quo sit missus,  
 maiorem & potiozem esse naturæ legibus. quod &  
 uos quantumcunq; ignari, etiam inconsiderantes,  
 satis tamen assequimini, qui prophete uestro, utcunq;  
 neget se miracula edidisse, aut sibi eam uim à Deo cõ-  
 cessam, miracula nihilominus aliqua attribuitis, sed  
 absurda aut inepta, quæ satis appareat esse confi-  
 cta: ut fractam aliquando fuisse lunam, & partem  
 eius decidisse in manicam Mahumetis, ipsum uero  
 eam partem cœlo reddidisse, & lunam integrasse:  
 & quòd camelum fœminam loqui fecerit, & quidẽ  
 noctu, quem in usum? lupum quendam ex ululatu co-  
 gnouit principem esse aliorum luporum. quis posset  
 ad

ad hæc risum continere? AL. At post Christum dicitis uos missum esse spiritum sanctum, alius ergo uenit post eum. CH. Non est hic alius, sed idem Christi spiritus. Et hic uenit non ut Mahumetes, statim post discessurus: sed qui perpetuò maneret in Ecclesia doctor et consolator, suppleretq; absentiam humanitatis Christi. Itaq; longè alia est spiritus paraleti ratio, q̃ Mahumetis. id enim præstat nobis ille spiritus, quod præstare Mahumetes non quiuisset.

## DE ALCORANO.

**V**Eniamus ad legē quam sibi dicit cœlitus traditam, ut communicaret hominibus, in qua est mira eius inconstantia. aliàs enim dicit se gentem habere peculiarem, cui sit missus: et neminem intellegendum suum Alcoranum, nisi sit Arabs, aut sciat arabicè. aliàs dicit, omnibus se gentibus ferre leges. AL. An non Iesus uester dicebat se non uenisse, nisi ad filios Israël? CH. Simia uoluit esse Mahumetes Christi Iesu, quia hoc ille dixerat. Et Mahumetes gentem sibi peculiarem sumpsit: Christus uenit ad filios Israël, quia ipsis promissus merito progenitorum Abraam, Isaac, Iacob, Dauidis: et quia unica gens erat in orbe terrarum, quæ Deum nossent. ad Arabes autem quo merito ueniret peculiaris nuntius Dei? Et Christus, quod dixit, præstitit: nullis prædicauit nisi Israëlitis, discipulos autem misit per uniuersum humanum genus. Vide autem quantum in-



ter Euāgelium nostrum, & Alcoranum uestrum interfit. Vestrū obscurum, difficile, intricatum, nemo intelliget nisi Arabs: nostrum uero planum, facile, nihil fieri potest in quacumq; lingua dilucidius, ut ea philosophia aperta esset omnibus, quæ salutem omnium euulgabatur. Quid quod & ipse idem Mahumetes ait se non totum Alcoranum intelligere, nec aliū præterquam Deum intellecturum. quis ergo est futurus usus eius hominibus, quod homines non intelligunt? Rogo te, quum uir sapiēs loquitur rudioribus, & præcipit ut aliquid agant, accommodat ne ad suam excellentem intelligentiam quæ dicit, an potius ad captum eorum quibus loquitur? A L. Nimirum ad captum istorum, ut par est. C H. Deum ergo, quum hominibus loquitur, quomodo censes & uerba & dicta usurpare? utrum ea quæ congruentia infinitæ suæ sapientiæ nemo sit intellecturus, an quæ apta & conuenientia sint humanis ingenijs? A L. An tu causas intelliges diuini cōsiliij, & cur quicque à Deo fiat assequeris? C H. Aliud est multo, in causas diuinorum operum penetrare mētis nostræ uim: aliud, quæ ille nobis dicat, intelligere. Quod si de causis & ratione qua quicque à Deo fiat, scriberet Mahumetes, quis eum ita loquentem intellexisset? sed id non est Alcorani proprium. in omni naturæ actione atque opere quis potest causas exculpere de cœlis, de elementis, de animantibus, de nostris corpore.

corporibus. Verum Mahumetes nihil pensi habet  
quid loquatur, aut quomodo: quemadmodum proce-  
dente sermone fiet tibi liquidum.

DE CORRUPTIONE VTRIVS  
que Testamenti.

**A**L. Non est mirandum discordare Alcora-  
nū à uestris libris, quos uos corrupistis &  
deprauastis. CH. Quis hoc dicit? an Mahumetes?  
AL. Non ille quidem, sed nos deprehendimus post  
eum. CH. Videlicet hoc argumento: Alcoranum  
& utrunq; testamentum inter se dissemiunt: Alcora-  
num necesse est esse uerum, integrum, sincerum: u-  
trunq; ergo testamentum necesse est esse depraua-  
tum & inuersum. AL. Argumento nimirum in-  
uincibili. CH. Quin potius in contrariū reflecte-  
batis: Alcoranum & utrunq; testamentum discre-  
pant inter se: utrunq; testamentum deductum à pri-  
mis originibus, manet integrū atq; inuiolatū, ac pro-  
inde uerum: Alcoranum igitur est deprauatum, de-  
tortū, falsum. AL. Nefas est nos sic colligere. CH.  
Nefas est uobis sic colligere, & nefas est alijs sic col-  
lectum admittere. AL. Agareni alios non curāt.  
CH. Non ergo ueritatis uia deducit uos in eam per-  
suasionem, sed uestra superstitio. Verum ad rem ac-  
cedamus. Dicitis utrunq; instrumentum esse deprau-  
atum. loquamur prius de Euangelio. Dominus no-  
ster nihil ipse scripsit: quæ inter homines gessit, man-  
darunt

darunt literis non unus aliquis, sed quatuor, diuersis & temporibus & locis: quæro an ab istis corruptum est Euangelium? Isti non potuerunt corrumpere, quoniam ab ipsis manauit, & ipsi authores fuerunt. alioqui ubi est istud Euangelium, quod Mahumetes uocat librū uitæ salutis directionis? neq; enim ante hunc librum Euangelij alius fuit, ut possit dici hunc esse deprauatum, illum uero alterum fuisse librum salutis. Adde quòd scripta sunt hæc Euangelia uiuentibus adhuc permultis, eorum qui Dominum nostrum nouissent, essentq; cum eo uersati, nec in deprauationem potuerunt consentire, tot, tam uarijs locis & temporibus scribes. Quid, quòd Euangelia hæc scripta sunt & approbata ab ijs uiris quos Mahumetes commendat, dicens: Iudæos fuisse erga Christum incredulos, uiros tamen quosdam in albis uestibus secutos fuisse illū in nomine Domini: de apostolis sentiens, & Petri, & Iacobi, & Iudæ epistolis, qui ex uiris illis fuerunt candidatis, & cū quatuor Euangelij consensunt. Quod si ante Mahumetem corruptum est utrūque testamentum, cur ad testimonium suorum dictorum remittit uos ipse ad legem & Euangelium? cur non certiores redderet suos, corruptos haberi eos libros? & admoneret, cauere, ne illorū fraude caperentur? Post Mahumetem autem non potuerunt corrumpi. nam omnia quæ ante Mahumetem à nostris sunt scriptoribus

bus prodita, conformia sunt huic Euangelio, quod nunc habemus: nec tanta librorum multitudo, tot locis dispersa, potuit uno consensu uiciari. Quid quod Euangelia extant etiamnum, scripta ante Mahumetem linguis plurimis, græce, latine, chaldaice, syriace, persice, etiam arabice, ne elemento quidem uno ab ijs discrepantia, quibus nunc utimur, quod quidem ad rei summam pertineat, & ad sententias fidei necessarias. uel in ijs regionibus quæ iam inde à Mahumete sub imperio & ditione gētis uestræ fuerunt, reperiuntur uetustissima Euāgelia, qualia sunt hæc nostra quæ uersantur in manibus. Ne existimetis Mahumetem adeò uel negligentem fuisse, uel uerecundum, ut si corruptum censuisset utrumq; testamentum, fuisset id silētio præteriturus, quod ad rem suam tantopere conueniret. Quod si Euangelium nos uerum nō habemus, ubi est liber hic directionis & salutis, tantopere à propheta uestro commendatus? A L. In Alcorano. CH. Quomodo ergo eos qui Alcorano fidem non haberent, remittit Mahumetes ad testimonium Iudeorum & Christianorū? Vides rem à seipsa confringi: & quoniam pietas nostra inimica est prorsum regno ac potestati diabolica, semper hostis noster quibuscūq; artibus potuit, oppugnavit eā atque infestauit. multas inter nos seuit dissensiones ac discordias, suscitauit sectas, & absurdissimas de fide opinationes. qui has tuebātur, odio



dio & rabie plusquā capitali ferebantur in eos qui rectius sentirent, & argumenta omnia conquirebāt ad fulciendam sectam. nemo illorum obiecit nobis, Euangelium esse corruptum: de sensu uerborum fuit controuersia, non de uerbis ipsis. & si una secta aliquid uiciasset, parati erant aduersarij, qui illos falsarios esse criminarentur. Iam uerō deprauandi Euangelij quæ potuit esse causa, quis fructus? an scientes & prudentes deprauassent illi eam scripturam, pro cuius unoquolibet dicto, unaqualibet sententiola sanguinem & uitam erant parati profundere? quod si erant aliquid mutaturi, ea mutassent potissimum, quibus ipsi uel commodius agerent, uel facilius alios in suam sententiam pellexissent: nempe laxiorem uiuendi rationem, magisq; ad oblectamenta & uoluptates appositam statuendo: uel ea dicendo de Christo quæ minus hominum aures offenderent, & magis pronis auribus reciperentur. Vos uero è contrario in ijs maxime arguitis nos Euangelium deprauasse, quæ & nobis maius odiū hominū conciliarēt, & pluriū animos à religiōe nostra auerterēt: nempe de diuinitate & morte Christi mutassent ea, in quibus uidetur inter se Euangelistæ dissentire, uel à sententia ueteris testamenti, quæ fuit inimicis nostris materia insectandi nostri. Sed ea ipsa quasi dissonantia, ualidius argumentum est, integra, sincera, intacta esse Euangelia, per ætates omnes iam inde à pri

mis originibus ad nos perducta, magnâq; religionis obseruatione omnia esse integra & immutabilia conseruata.

DE HISTORIIS ALCORAN I.

**N**Ec minus securè infinita mendacia in Alcorano confingit, partim ex Thalmut Iudeorum, quæ tamen ipse magis corrumpit, ut de Adam, de Cain & Abel, de prædicatione Noe, de morte Moſis, de Pharaone, qui iussit sibi ædificium usq; ad cœlum extrui, ut uideret Deum Moſis: de Solomone, quòd haberet exercitum hominum demonum & auium ipsum glorificantium. de Dauide, cui montes & aues obediebant. Iam quæ sunt apertè planis uerbis in uetere testamento explicata, ipse deprauat, & narrat falsò, ut de Moſe, de Pharaone, de Gedeone & Saule, de Noe & arca, de Abraam & Loth, de Ioseph. de quo relaturus historiam, ita præfatur, & quidem uerbis Dei: Nunc omnium uerborum tibi missorum pulcherrimū enarrabo. quid ad ipsum quid dicat? fundit sine mēte sonum. Cur hoc reliquis est pulchrius? quid habet pulchrius quàm illa admirabilia quæ egit Deus, quum educeret populum de Aegypto? De nouo autem testamento narrat falsò natalem Domini, & de Ioanne Baptista. Dixit (inquit) Deus ad Zachariam, habebis filium nomine nunquam antea cuiquam imposito. id falsum esse, si quid in sacris literis legisti, satis intelligis. & addit,  
super

super Ioannem sedisse salutem Domini in die natiuitatis, mortis, & resurrectionis eius. Quando quæso Ioannes resurrexit? Nec solum de utroque testamento tam licenter mentitur, sed de historijs gentium. Alexandro ait tributam à Deo scientiam rerum omnium. quis unquam id tradidit inter tot latinos scriptores & græcos, qui illius uitam & res gestas memorie mandarunt? Fieri profectò non potest, ut Mahumetes legerit utrunq; testamentum. Nam & si ego de illo pessime sentio, non tamen arbitror fuisse tam excordē, ut sic aperte mutaret & detorqueret quæ nihil ipsi oberat integra relinquere. in quibus etiam si fuisset error, non tamen erat is tanti, ut diuina correctione indigeret. Sed de utroq; testamento partim ipse fando audiuerat nonnulla, quæ prauè retinuerat: partim Christiani & Iudæi persuaferāt sic habere. Itaq; ea scripsit, per quæ manifestò uanitas & imperitia illius se patefaceret, & ueritas esset ad percipiendum non difficilis. nec ipse quid sit Euangelium nouerat, quanq̃ sepe dicit Christo' esse datū librum euangelium à Deo: an putat ita Deum Christo dedisse Euangelium, ut ego tibi trado hūc flosculū? Nullū librū Deus dedit Christo, nec ipse Euangelium scripsit, sed lætissimum nuncium attulit generi humano, reconciliationem fieri hominis cum Deo, & placatam iram Dei, cessare ultionem, reditum ad gratiam patēre: quo nullus est nuncius melior. Euā-

gelium enim bona est annunciatio. Eiusdem notæ est  
 & illud, quod ait Dauidi missum esse Psalterij librū:  
 quum ille sigillatim psalmos composuerit, & cecine-  
 rit Domino. At quo ore, quanta impudentia, quasi  
 nihil mutasset: Si quid (inquit) dubitatis in his, quæ  
 rite ab ijs qui librū legerunt ante nos, quærite ab ijs  
 qui legem & euangelium legerunt, hoc est à iudeis  
 & Christianis. Hunc tu putes uel frontem habuisse,  
 uel cor? Necesse est uel illū nihil legisse, sed quæ acce-  
 pissent ab alijs, habuisse pro indubitatis, in quo eius  
 tarditas & socordia ostenditur: uel si quid legit &  
 nouit, non proiectæ solum & profligatæ, sed demen-  
 tissimæ est impudentiæ, eos pro se testes adducere,  
 quorum testimonio sciat se condemnatum iri. Profe-  
 ctò alterum necesse est, uel ipsum beluam fuisse, uel  
 eos quibus loquebatur habuisse pro beluis.

## DE DEO.

**V**ideamus iam qualem facit Mahumetes Deū,  
 quàm absurdum, quàm non solum alienum  
 ab eo qui ipse est, sed omnino diuersum & contrari-  
 um. Primum facit corporalem, quod est contra ratio-  
 nem omnem, & philosophiam. nam dicit eum habe-  
 re manum, & uectari ab octo angelis in sella gesta-  
 toria. Manu ait se à Deo tactum, quæ erat frigidissi-  
 ma. atqui satius fuisset, eam calidissimam dicere. De-  
 us enim in coelis, in lumine, in charitate, citius fuerit  
 calidus quàm frigidus: & in sacris literis dicitur, De-



us noster ignis consumens est. Iam quemadmodum Plutarchus scribit, Pythagoram ex proportionem pedis Herculis ad alios pedes, deprehendisse quanto esset Hercules maior quam reliqui homines, & stadium quod decurrisset stadiis alijs longius: ita si Deus habet manum, ex ea colliget, quantum sit reliquum eius corpus: quantumcunque autem fuerit, non erit infinitum: finitus ergo erit Deus. cuius contrarium, si recte meministi, initio posuimus. Finitum quoque esse, ex angelis qui illum baiulant, potest colligi. Nam & si magni sunt angeli illi, uasti, immanes, finiti sunt tamen. quod si finiti, & finitum esse illud necesse est quod ipsi possunt portare. nam inter finitum & infinitum, nulla est neque uirium, neque magnitudinis, nec ullius mensurae proportio. de Deo autem uerbum Mahumetis est sacrosanctum, & quasi tetragrammaton illud Iudeorum, ut mirum sit non diffundi lapides et montes, quoties profertur ab ore duntaxat alicuius in religione uestra precipui: Non est Deus nisi Deus. quid potest fingi ineptius? quis hoc nescit? quis Iudeus, quis Christianus, quis gentilis non idem diceret & fateretur? imò uero nec est homo nisi homo, nec asinus nisi asinus. At quicquid animo Mahumetis est collibitum, id ad Deum authorem & iussorem refert, bella sua, rapinas, libidines, incestus, uiolentas: ut non uideatur alium in usum habere Deum, quam ad praetextum flagitiorum suorum ac scelerum, quæ

admodū regem puerū aut dementem rector & ad  
 ministrator regi improbus. Et Deū hūc, cui censet  
 impijsimū dare sociū, inducit loquētem sæpe nume  
 ro plurali, diximus, iussimus. A L. Est mos loquēdi  
 aregū. E H. Si Mahumetes hæc scripsisset, foret ali  
 qua excusatio. nūc Deus scripsit hæc, quē decet ma  
 xime proprie loqui. nā numerus hic pluralis mode  
 stie caussa ponitur à regib. & priuatis. Nec potest  
 de Deo & angelis intelligi. sunt enim quædam quæ  
 ad solū conueniunt: ut, Diximus angelis ut adorarēt  
 Adā, nos creauimus coelū & terrā, & iustificamus  
 impiū, & misimus Iesum Christū Mariæ filium. At  
 qualē huic Deo suo affectum tribuit? nimirū qualem  
 ipse idem gerebat, sæuum & sanguinarium. Infideli  
 um, inquit, non nisi lapsum & præcipitiū diligit De  
 us. Quāto aliter Paulus noster, & bonitati diuinæ  
 cōgruentius: Deus uult omnes homines saluos esse,  
 & ad agnitionē uenire ueritatis? Quod si infideliū  
 nō nisi præcipitiū diligit, cur nūcios suos ad illos mit  
 tit? & Mahumetus idē præceptū sibi esse ait, ut legē  
 suam prædicet infidelibus. Et de remissione delicto  
 rū, eius est sententia: Deum grauiā peccata homini  
 bus nō condonare. audierat uidelicet de cōmisso in  
 spiritum sanctū, de quo dicit Dominus noster, quòd  
 nec in hoc sæculo, nec in altero condonatur. Querē  
 dum ex eo restat, quæ tandē uocat grauiā peccata,  
 quod ipse nunquā definiret, atqui homicidia, rapi

*ne, incestus, adulteria, periuria, idololatriæ, omnia sunt plurimis hominū à Deo remissa, ut patet ex sacris libris: nec Mahūetes negat, qui ait in se esse expertū. Que sunt ergo ista delicta grauiā, ueniæ omnis exptia? Atqui Mahūetes ipse alio dicit loco: Gēs que nefāda peccata perpetravit, ne desperet. Sed huic homini nihil uidetur fuisse suauius, q̄ asserere pugnātia. Et in mysticis literis habetur, Deū, quū iurando amicis suis uellet nōnulla cōfirmare, quod nihil esset eo maius aut sacratius per quod iuraret, per semetipsum iurasse, ut Abraæ. At Deus Mahumeticus iurat per uētos, & angelos, & montem Sina, & per stellā matutinā, quēadmodū dij gētiles iurabant per Stygiā paludem, Dij cuius iurare timēt & fallere numen: & Aegyptij per canes, & catos.*

## DE CHRISTO.

**N**egat Christū esse dei filiū, & Deū. Nihil, inquit, præter opinionē suam sequūtur, dicentes Deū sumpsisse sibi filiū, quo nō indiguit. an habēt rationes quibus id possint euincere? an Deo quod ne sciūt imponūt? sic ille. Argumentū hoc in uniuersum Alcoranū potest reijci? an habet Mahumetes rationes, quibus tot & tam manifesta mendacia non dico demonstrare possit, sed tueri? Verū audiamus ipsius acumen dialecticum. Filius Deo tribui nō potest: neq; enim habet Deus uxorem, ut possit procreare. & in hoc argumento mirifice sibi placet, tanquam id sit ad quod ne hiscere quidem nos possimus, quū

nihil uel ineptius dici queat, uel puerilius. A L. An non tibi satis recte uidetur dici, gignere neminē posse nisi qui habeat uxorem? C H. Quid si sit cœlebs, non progignet? A L. Etiam, sed non sine fœmina. per uxorem autem intelligas oportet omnem fœminam: sed honestius uxor dicitur, quum de Deo loquimur. C H. O hominem in loquendo educatum, & circumspēctum, Mahumetem. atqui tam prudentis educationis obliuiscitur, quum Deum lenonem suū facit. Sed ad rem. Quis dedit uiro & fœminæ uim generandi? an non Deus ipse? A L. Ipse idem. C H. Quod ergo ille dedit alijs, nō habet ipse quum uult? Quod si potest fœmina ex uiro gignere, propter eam uim & facultatem quam à Deo accepit, tum uir gignere in fœmina ob eandem ipsam, poterit certe & Deus ipse in fœmina gignere quod uolet, sine uiro, & ex uiro sine fœmina, & sine utroq; quum ei collibitum. nihil ergo necessaria est fœminæ applicatio Deo, ut gignat. Non ne sine uiro & fœmina Adamū creauit, & Euam absq; fœmina ex solo uiro, & Christum (ut uos fatemini) ex sola fœmina citra uirum? Quanquam Mahumeti non esset admodum contendendum, Deum carere uxore, qui facit eum corporeum, & homini prorsum similem. Nam si manum habet & pedes & caput, consequens est ut habeat etiam collum & thoracem: & si sedet, habet nates, & crura, & uentrem, & quod est in imo uētre,



tre, & usum horum omnium: nec uideri debet Deus ab ea uoluptate abhorrere, quam præcipuam in cœlis largiturus est amicis suis, & qui illius simillimi fuerint. Sed Mahumetes homo carneus, nihil prorsum habens mentis, non intellexit rationem gignendi in Deo, proportionem conformitatemq; habere cum illius natura & essentia. hoc si in Deo non assequebatur, nec crassa illius ac terrena mens eò assurgebat, at ex ijs naturis deprehēdisset, inter quas uersamur, si modo animum sustinuisset applicare. sed homini militari, & in gerendo bello occupatissimo, minime ad alia oculos conuertere uacabat. homo & animæ quadrupedes ex cōmisione uiri & fœminæ propagant sobolem: mures partim ex eadem ipsa, partim ex putrefactione. pisces multi nō egent mare, ipsi oua intra se concipiunt, unde pisces formæ eiusdē generantur. muscæ & culices & pulices non habent sexum. apes incognita homini ratione sufficiunt prolem. & Deus horum omniū est caussa & effector. Si ergo unaquæque natura iuxta facultatem, uim, ingenium sibi à Deo attributum, producit fœtus, an non par erat Mahumetem cogitare, Deum si generaturus sit, non iuxta hominis aut equi aut tauri cōditionem, sed iuxta diuinam rationem summam, ineffabilem, admirandam generaturum? Verum homo simplex, & ex disciplina illa castrensi modum unicuique generandi nouit, quo ipse utitur sæpe ac mul-

tum, seu tentat uerius, sed parum foeliciter. Gignit ergo Deus deum, mens rationem & sapientiam, eternus eternū. & qui ad agendū adiutorio nullius omnino rei indiget, per se absque admistiōe alterius gignit filium illū adeò sibi similem, ut eadem prorsum sit essentia. Addit aliud argumentū non minus inuincibile quàm prius. Si Deus haberet filiū, totus mundus esset in periculo. In quo tandem periculo? A L. Ne cupidine regnādi dissiderent, & fieret seditio inter angelos & homines. C H. Meritò metuit Mahumetes, ne mundo accidat, quod uidit in exercitu Heraclij accidere. & ipse probè cauit sibi, qui filiū non habuit, ne ut seditione creuerat, alia inter ipsum & filium seditione dominatū amitteret. Si talem tu facis Deū, & eius filium, quales estis tu & Heraclius, metuenda est indubiè seditio. sed si tu talem Dei filium statuis, qualem ipsum esse Deum omnis recta ratio nos docet, non potest in tanta conformitate uoluntatis existere dissensio: imò uerò non est conformitas, sed una atq; eadē uoluntas, sicut una essentia, nec aliter possunt Deus & filius eius dissidere, quàm mens & sua cogitatio. Sed argumentū hoc, ne nihil putemus Mahumetem audiuisse, ex gentilium fabulis arripuit, quas audiuit fortasse quum adhuc esset idololatra. Iouem cepisse arma ferūt aduersus Saturnum patrem, & eum de coelo depulisse. & à Saturno exectum patrem Vranum. & Iouē deuitasse concubi-

cubitus cum Thetide, quòd in fati esset fore illius filium patre maiorem. Quod si talem Deus haberet filium, qualem genuit Saturnus, timebat Mahumetes ne inter se cum ingenti totius uniuersitatis discrimine mouerent bellū, nec ipse homo iustissimus & inusitata religionis satis sciret utras partes sequeretur, utri Alcoranum suum acceptum ferret. Sed Christū tamen esse Deum, multis Euangelij & apostolorum dictis colligitur. Nec caussa erat cur Christiani Deum esse Christum affirmassent, nisi ad hoc essent inducti traditione quū euangelistarū atque apostolorū, tum Christi ipsius: adde etiā rationibus maximis atq; euidentissimis, quarū nōnullas opere quodā meo attigi. ex eo sumemus illas quum uoles. Quid enim consequatur cōmodi uiri Christiani, si Deū esse predicassēt, quē Deū esse nescirēt? primò magnū fuisset nefas, diuinitatē ei attribuere, qui Deus nō esset, nec se religiosissimos omniū mortaliū tā nefario scelere passi essēt alligari, q̄ uitā libēter amittebāt, ne qd uel facerēt uel dicerēt seq; ac Deo indignū. Quid, quòd fauorabilius fuisset ad Iudeos & natiōes omnes, nullā distinctionē, nullas personas in Deo ponere: sed ueritas pro quā moriebātur, cogebat eos id asseuerare. A L. Christus nusquā se esse Deum dixit. C H. Quis hoc ait? A L. Mahumetes. C H. Si proferamus loca ex Euāgelio, dicetis nos illa deprauasse. Erit ergo Mahumetes idem testis, actor, iudex: & quod

quod ille contra nos dixerit, absque ulla contradic-  
tione uerum erit. quæ potest esse maior licentia fingē  
di quicquid libuerit, quàm ubi contradictio non sit  
locum habitura? Quid ais tu, Christus nunquam se  
affirmauit Deum esse? Cedò, istud quomodo exami-  
nabitur, si dicis, Satis est me hoc dicere, quid opus  
est pluribus? Si aliqua restat discutiendi uia, uidea-  
mus quæ nam sit. Christus iam conueniri atque in-  
terrogari à nobis non potest: eorum qui illum audie-  
rūt, nemo iam olim uiuit: restat unicū refugium, me-  
moriam antiquitatis consignata literis. ea uero si nō  
est apud Euangelistas & Apostolos illius, ubi tādē  
erit? unde illam Mahumetes hausit? quō nam remit-  
tit eos qui fidem non sint sibi habituri? Sed fac Chri-  
stum nunquam dixisse se esse Deum, quid erat opus  
illi prædicatione de semetipso, ubi opera id apertissi-  
me declarabant, quæ nemo edere poterat, nisi esset  
Deus? Itaque si qua est adhuc apud uos fides Euan-  
gelio, quam esse magnam Mahumetes ipse est uobis  
author, & operibus Christi, & sua ipsius prædica-  
tione Deum illū esse docemini. Dicitis uerbum Dei  
esse Christum, & uerbo Dei omnia esse condita. Si  
quis Mahametē ipsum de hoc interrogaret, subtilius  
nō magis se ex eo suo dicto posset extricare, quàm  
ex alijs permultis, quæ ponit absurda & puerilia.  
Quod uerbum est Christus, utrum corporale, quod  
prolatum dissipatur & transiit: an mentale, quod cō-  
ceptum



ceptū in animo, ibi imprimitur ac manet? Corpora  
 le uerbum non potest esse Christus, qui est natura  
 permanens: nec Deo est attribuendum tale uerbum.  
 Negatis enim uos Deum habere filium, quod non ha  
 beat uxorem. multominus habebit uerbum & spiri  
 tum, qui non habet pulmonem, collum, fauces. Quid  
 quod si corporale est, ex Deo, & Dei substantia pro  
 diit. Quid autem est in Dei substantia, quod non sit  
 idem Deus? An etiam Deum compingetis ex rebus  
 diuersissimis, atque inter se contrarijs, ut hominem,  
 uel capram? Quod si spiritale est uerbū, & mētale,  
 apparet profectō, & semper in mēte manere patris,  
 nec aliud esse quā naturam eandem atque essenti  
 am, quæ est pater. A L. Christus est uerbum Dei,  
 quia per uerbum ab eo productus. CH. Acuta in  
 terpretatio. Erit ergo sella hæc ascia & dolabra,  
 quia per illa instrumenta effecta est à fabro. & pi  
 ctura erit penicillus. Quod si uerbum Dei est Chri  
 stus, quia per illud genitus, & pisces & arbores  
 & lapides eandem habebunt dignitatem. Omnia e  
 nim per uerbum Domini sunt condita, sicut sacræ li  
 teræ testantur. A L. Quomodo poterat esse Deus,  
 qui edebat, bibebat, dormiebat? CH. Leue est telū  
 istud, & obtusum. qua parte erat Deus, nec edebat,  
 nec bibebat, nec dormiebat, sed qua homo. sicut nec  
 rationalis est, qua parte edit ac bibit: sed quia cor  
 pus id facit, totus homo dicitur id facere, actionibus

& qualitatibus à parte ad totū. uel à parte ad partē  
 uel à toto ad partem loquēdi more translatis. A L.  
 Non est credibile, tantū uirum, quo maior in genere  
 humano fuit nullus, cruciatus illos & mortē acerbā  
 quā uos dicitis, & ignominiosam uoluisse perferre  
 à Iudæis, hominū genere deterrimo. C H. Quid de  
 hoc sentit uester Mahumetus? A L. Nihil eū esse ta  
 le perpeſſū, sed ludificatū Iudæorū odiū & malitiā,  
 substituisse aliū loco suo, ipsum uero in cælum se sub  
 duxisse: alterū uero illū paſſū esse omnia illa, quæ uos  
 de Iesu Christo traditis, & Iudæos falsos ſeuitiā suā  
 in supposititiū illū exercuisse. C H. Nimirū Mahume  
 tes, cui omnia erāt posita in corpore & rebus uitæ  
 huius, si labores & ærūnas tribuiſſet Christo, quem  
 tantopere laudibus euehebat, & si infra meritū, nō  
 satis uisus sibi eſſet constare. Nam si illū, quem Dei  
 nuncium fuiſſe affirmabat, & quidem ex prima &  
 ſuprema nota exercitum perhibuiſſet afflictionibus  
 & tormētis, admirati fuiſſent alij, cur ipse alios per  
 ſequeretur ac interficeret, & non potius tolerantia  
 am māſuetudinēq; illius imitaretur & præstaret.  
 Non uult aliquid eſſe paſſum incōmodi, quia tā cha  
 rus & proximuserat Deo. Cur ergo prophetis &  
 ſanctis uiris alijs, tametsi non tam Deo propinquis,  
 multa tamen acciderunt aſpera & dura? Quod ſi  
 nec percuſſus nec occiſus eſt, quia non id talem dece  
 bat uirū, tota eius erit uita retextenda, certe nec de  
 cebat

cebat eū esurire, nec delaſari, nec ſitire, nec alia natura incommoda, quæ Euangelij narratione continentur, non eſſe, non bibere, non uentrem aut ueſicam exonerare, non dormire: quæ ſunt omnia non excellentiæ, ſed infirmitatis humanæ. Mortem autē illius cur tantopere Mahumetes abominatur, quum illū dicat in fine ſeculorum moriturum, non ut obedi at patri, non ut peragat redemptionem: non ut adſer at ſimul & exemplum & ſolatum, quemadmodū olim: ſed ut poſſit Deus gloriari, ſe tanquam crudelē carnificem nihil reliquiſſe uiuum. Quid autem eſt mortis illius ignominia præ gloria & magnitudine reſurrectionis? quid deinceps fuit amplius, præſtabilius, ſacratius morte illa? Age uerò quum homines & Chriſtiani & prophani Chriſtum illa fuiſſe perpeſſum, & in cruce extinctum ſemper crediderint, quomodo de repente Mahumetus extitit, qui illud uanum eſſe commentum affirmaret? AL. Deus illi patefecit. CH. Cur illi tandem poſt annos ſexcentos, & non prius? nō alicui ex ijs qui ſunt Chriſtū in cādidis uestibus ſimpliciter in nomine Domini ſecuti, ut ipſe dicit Mahūetes? Quid, quòd Deus quæ agit in nobis, non propter ſe agit, ſed propter nos: ille nihileorū indiget, nos indigemus. Quod ſi Deus Ieſum Chriſtū tormētis & neci ſubtraxit, nec tamē id fuit cognitum, perinde eſt ac ſi non fuiſſet factū, nec ullus ad nos redijt fructus ex tanto Dei nuncio.

Nam

Nam ubi ex persuasione nascitur Dei cultus & omnis pietas, nihil refert generis humani, sit ne aliquid factū, an credatur: imò plus est in eo quod creditur.

#### DE RERV M NATVRA.

**I**N ijs autem quæ sunt naturæ rerum, ita loquitur, ut appareat eum non missum à domino naturæ, sed ad focum à largiore cœna inter puellas sedentem fabellas ridiculas narrare. Vetas nos uesti suilla, cedo causam? Quoniam, inquit, quum animætes omnes essent in arca Noe, elephante excreuit, inde natus est porcus, qui rostro repando uertebat sterco. unde natus est mus, qui stupas quibus tabulæ navis erant cōpactæ arrodebat: hinc terror ingēs Noë. à quo Dominus cōsultus, attulit remediū iā propè deploratis rebus. iussit ut Noe feriret leonem in fronte. ex leone concitato felis profiliit per nares, is murem uenatus est, & liberauit genus humanum tanto discrimine. non sunt ergo felis & porcus animantium formæ de principio à Deo conditæ, sed casu extiterunt, & quidem porcus ex stercore elephanti. Mirum est, eos qui alunt elephantos, non percipere ex illorum stercore eam utilitatem, nec ullum postea porcum esse sic natum. Vnde autem tam subitæ inimicitie inter felem & murem? quid porro fele erat opus? an non aliæ animantes potuissent murem interficere, ac etiam deuorare. ut leo ipse, uel mustela? nam & caniculū uidi ipse Louanij muricipem. De  
homi-



homine prætereo, quod in libris Temporum uestro-  
rum scribitur, Deum quum uellet Adamū condere,  
collegisse pugno suo puluerem multicolorem: unde  
factum sit, ut alij homines sint albi, alij nigri, alij fus-  
ci, alij rufi, alij boni, alij mali, alij acuti, alij tardi  
& segnes. Quæso an non te dixisse hæc puderet? Pri-  
mum incorporeus est Deus, nec pugnum habet. Cor-  
porum autem colores ex habitu sunt cœli cuiusque  
regionis, ut Aethiopes esse nigros, & Germanos al-  
bos: uel ex infectione atque intinctu materiæ, qui ne-  
que est pro cœli habitu, nec pro similitudine gigen-  
tium. qualitates autem animi uel ex corporis ratio-  
ne, uel ex assuefactionis & morum finguntur. Sed  
ipse uester legislator, quomodo hanc rationem ex-  
plicet, audiamus. Creauit (inquit) Deus Adam de li-  
mo, limus aut erat de spuma, spuma de procellis, pro-  
cella de mari, mare de tenebris, tenebræ de luce, lux  
de uerbo, uerbū de cogitatione, cogitatio de hyacin-  
tho, hyacinthus de præcepto. Aptissima sunt hæc ad  
risum mouendum. Hæc uidentur citius congesta, ut  
figura quadam dicantur, quàm ut quid aut quomo-  
do diceretur expensum. Limus, inquit, de spuma e-  
rat: imò potius spuma esse ex limo solet. Mare cur di-  
catur de tenebris, tu uideris: quum aqua ad ea refe-  
ratur corpora, quæ sunt pellucida. Terram tu poti-  
us dixeris tenebrosam: nam aqua splendorem facile  
& recipit, & transmittit. Tenebræ autem cur poti-

Qq us sint

us sint de luce, quàm lux de tenebris? quemadmodum in principio sacrarum literarum dicitur, quod creaverit Deus cœlum & terram, terra autem erat uasta atque incompressa, & tenebræ erant super faciem profunditatis illius, quam iussit Dominus lucem existere. Sed nihil hoc ad rem: neque enim tenebræ ex luce nascuntur, ut ex sua origine: nec lux ex tenebris, utique non magis quàm uel bonum ex malo, uel malum ex bono, uel cæcitas ex lumine, aut lumen ex cæcitate. Nisi forte consecutio uicissitudinis intelligatur. quo pacto non minus ex tenebris nascitur lux, quàm ex luce tenebræ: sicut dies ex nocte, & nox ex die. Hic autem de origine, & quasi manatione, tanquam ex fonte, aut elementis. Sed quid hæc ad uos, aut uestrum legislatorē? Tu quidem homo ingeniosus, & aliqua luce doctrinæ perfusus, uides uerè hæc à me dici: ille autem uester risisset hæc omnia, & clausico interpellasset sermonem tam odiosum. Cogitatio, inquit, de hyacintho, hyacinthus de præcepto. Dixit ille hæc quidem, uos querite qualia sint. Sed nec nostra refert inquirere. sint reliquis illius lusibus similia. Audi alia. Ait Iudæus, Quid post hæc operatus est Deus? respondit, Tabulam & calamum. ait, Quam tabulam, & quem calamum? respondit, Tabulam in qua scriptum est, quicquid fuit, est, & erit in cœlo & in terra. Codex est rei familiaris, qualem habere solent diligentes patres familias, ne quid eos fallat.

fallat. prudenter facit, frugi est: sed molestum est tot folia & flores subinde asscribere & expungere. Calamum uerum de luce clarissima. ait, Quae longitudo calami? respondit, Itineris quingentorum annorum, latitudo uero itineris octoginta annorum. Cui? periti, an equiti? ueredario, an spaciatorio? parum diligens interrogator erat Abdias Iudeus, & si Mahumeti non parum saepenumero molestus. Sed pergit insanire. Qui calamus octoginta dentes habet, qui non cessabunt scribere quicquid fit in mundo, usque in diem iudicii. ait, Et tabulae unde? respondit, De smaragdo. uerbum eius de margaritis, dorsum eius de pietate. Talia narrant uetulae pueris, quum uolunt eis somnum inducere. Si talem mente concepisses Deum, Mahumetes qualis est, quantum quidem captus est humane mentis, nihil uidiesses huic opus esse tot calamis & pugillaribus. memoria illi aeterna atque immensa instar est omnium chartarum, & omnium calamorum. Ait iudeus, Coelum istud uestrum dic unde creatum est? respondit: Primum de aqua uiridi, secundum de aqua clara, tertium de smaragdo, quartum de auro purissimo, quintum de hyacintho, sextum de nebula lucida, septimum de splendore ignis. Ait, Quid super caelos septem? respondit, Mare uiuificum. ait, Et deinceps quid? respondit, Mare nebulosum. ait, Prosequere per ordinem usque ad summum. respondit, Procedit de super mare aeriū, de super

mare lapideū, desuper mare tenebrosum, desuper mare solatij, desuper luna, desuper sol, desuper nomen Dei, desuper supplicatio, desuper Gabriel, desuper pergamenū rasiū, desuper mare plēnū, desuper septuaginta interualla lucis, desuper septuaginta milia interualla uirtutis, desuper septuaginta milia motuum, desuper mille spacia, in unoquoq; septuaginta milia turbæ, in unaqua; turba quinq; milia angelorum nūquam cessantium laudare Deū, desuper interualla de margaritis, desuper interualla gratiæ, desuper interualla potētiae, desuper interualla deitatis, desuper interualla dispensationis, desuper scabellū, desuper solū, desuper domus uniuersitatis. Hæc neq; potest quisquā dicere scribē, nec audire. sicut illud, Vbi sol: respondit: In fovea calido, fons calidus in colubro, coluber in interuallo, interuallum in monte Caff. Caff autem in manu angeli tenentis mundum usq; in diem iudicij. Iam et illud, Dic deinde quis modus deferentium sedem Dei: respondit: Capita eorum sub sede Dei, pedes sub throno. Tanta siquidē ceruicis amplitudine sunt, ut si cōtinue uolaret auis, uix mille annis ab una aure perueniret ad aliam. Cornua sunt capiti eorum implicata: quorum prima acies, cuius dimidium nix, dimidium ignis. non tamen ignis niuem consumit, uel nix ignem extinguit. Secunda acies, cuius dimidiū tonitruus, dimidium fulgur: immixta tertia, cuius dimidium gleba, dimidi-



midium unda, non tamen uel unda glebam diluit, uel undam ebibit gleba. Quarta, cuius dimidiū uentus, dimidium imber, incommota ibi ad inuicem. Quinta, cuius dimidium ferrum, dimidium ignis, inconfusa ad inuicem. Sexta, cuius dimidium aurum, dimidium argentum. Septima, cuius dimidium laus, dimidium gloria. Octaua, de fulgētissimo splendore. Dic quid infrā? respondit, Terra. ait, Quod ei nomen? respondit, Vuile. ait, Quid sub ea? respondit, Mare. ait, Quod ei nomen? respōdit, Allia son. ait, Et quid infrā, ut omnia per ordinem edisseras? respōdit, Terra Alioulem, infrā mare Zeyt, infrā terra Heribet, infrā alia terra nomine Agiba, alba ut lag, redolens ut muscus, mollis ut crocus, lucida ut luna. super hanc congregabit Deus omnes iustos. infrā hanc mare Albimlia, infrā piscis nomine Albelibijt, cuius caput in oriente, cauda in occidente: suprā cuius dorsum terræ & maria, tenebræ, aer & montes usque in finem seculorū. Infrā piscē uentus piscē sustinēs, infrā mōs, infrā tonitruus, infrā fulgur, sub his mare sanguineū. Infrā infernus cōfusus, infrā mare igneū, infrā opacū, infrā mare potentiæ, infrā mare nebulo sum, infrā laudes, infrā glorificatio, infrā solium, infrā tabula, infrā calamus, infrā maius nomē Dei. ait, Et quid infrā? respondit, Infinita querendo prosequeris Abdia. quis ultrā potest, præter quod æqualis est undique uersum omnipotentia Dei? A L. An

non similia sunt permulta in prophetis, & Apocalypsi uestra? CH. Sunt quidem, sed dissimiliter posita. illi enim uisiones referebant, uester autē descriptionē naturæ rerū exponit. illi res sibi ostensas narrabant: hic uero naturam, originem, sitū, faciē rerum profert, & quasi depingit. iam quas formas, quas uastitates atq; enormitates angelorū ostendit: monstra sunt hæc, non angeli. & tamen hæc quæ sunt absurdissima, & exsomniae stoliditatis, citius inueniunt fidem apud rudē plebeculā, quā ipsa ueritas naturæ. Multitudo enim, ut affectibus ducitur. & mentis principatū parum habet acré ac uigentē, iudicio est adprehendendā ueritatē inualido. & ut de principibus uiris, de sapientibus, de angelis, de Deo sentiunt uti par est magnificē, omnia illorū existimant esse immodica, inusitata, immania. si quid de illis narres moderatū, & ab humanarū rerum uel forma uel cursu non abhorrens, sordet hoc illis, nec uerū esse rētur, tanquā dignitate & maiestate illorū inferius. sin ea quæ omnē rationē modūq; & fidē excedant, quæq; fieri non possint, ea demū amplectuntur tanq̃ opiniononi de illis suæ apta & congruentia, ijs demū amplitudinē eorū existimant impleri, illam quā sibi animo cōfinxerunt: quū eos in illa ipsa uana & fictitia magnitudine angustissimos sibi proponāt. neq; enim inde eos contemplantur & censent, unde magni ingētesq; sunt: sed eam sibi fingūt magnitudinē, quam

quam solā norunt uel ex mole corporis, uel ex pecunia, uel ex familia, ex robore & uiribus, celeritate, pugnis, uictorijs, regno. A L. Vis tu populū esse sapientē? C H. Vellē equidem, fieri si posset: sed certe uos populi præsides, legislatorē ipsum & Dei nunciū, uelim. Addit aliud sui simile, quod Deus seuocato Adamo tradiderit rerum omnium uocabula, tunc prouocauit angelos ad disputandum cum eo. cui cū pares nō essent, iussit eos reuereri atq; adorare illū. quod fecerunt quidem omnes, Beelzebud autem reuinit, & defecit à Deo. Quā paucis uerbis quā multa flagitia? Est uidelicet Deo contentio aliqua cū suis angelis, aut factio, qui docuit Adamū? Deus summus & æternus, an nō idē angelos edocuit, quorū omniū & author est, & parens? quid habet homo quod à Deo nō acceperit? quid angelus quod nō ab eodē? & hoc utriq; libenter agnoscūt, ac prae se ferunt. Naturā uerò angelicā quis ignorat tanto esset humana uel dignitate uel sapientia & cognitione rerū excellentiorē, quāto est hūana quā belluina præstantior, idq; etiam Dei munere? Poterat Mahūetes admoneri dicto psalmistæ, si modo psalmum ullū unquā legit: Quid est homo, quod memor es eius, aut filius hominis, quoniam memor es eius? minuiisti eum paulo minus ab angelis, gloria & honore coronasti eū. nec conueniebat, ut quē Deus ipse excellentiorē condidisset, subijceret postea naturæ inferiori absq;

ulla caussa. Sed fortasse audierat Paulum scripsisse ad Hebræos, Et quū iterū introducit primogenitum in orbē terræ, dicit, Adorēt cum omnes angeli eius: existimauit Mahumetes primogenitum introductū in orbem terræ esse Adam: quæ dici ab Apostolo de Christo, manifestius est quàm differi debeat. ea enim quæ præcedūt, & quæ sequuntur, liquidò id docēt. Iam illud q̄ impium, quòd Deus uelut gloriosulus quidam prædagogus & magister, instruit alumnū suū ad certamen, ut inde ad eum honor aliquis redeat.

DE IIS QVIBVS PERSVASIT  
sectam suam.

**I**Nter eos quorū erat dux, alij erant idolorū cultores: & quicquid quiuīs de uno Deo dixisset, uerisimilius esset uisum & decentius, quàm idololatria. quemadmodum in istis nouis Insulis, leui ostensa probabilitate transit, & quidem populariter, à uano illo cultu simulachrorū, ad pietatē unius Dei. Alij erant intincti tantum & imbuti leuiter Christianismo, qui ut discesserāt à Romano imperatore, in odium illius nihil fuit illis promptius, quàm renūciare etiam pietati, quam ille tueretur. A L. Quid etiam si gerebatur bellum cum homine, decebat ne continuo geri cum Deo? C H. Minime omnium decebat quidem: sed ita fit sæpe, quum odium exacerbatur. ut quum artem fabrilem in odium fabri alicuius, aut philosophiam offensi philosopho odimus: quod



quod usu uidemus quotidie euenire . Tribus Israelis  
quum defecissent à domo Dauidis ad Roboam , pa-  
ternam item legem spreuerunt, & à cultu Dei uni-  
us ad inuocationem demonum transierunt . Afizi-  
ni quoq; in Asia, quum pietatem nostram & baptis-  
mum recepissent , miserunt Hierosolymam legatos  
ad patriarcham , qui eos de fide exactius institue-  
ret. in reditu, quum legati essent spoliati & uiolati à  
Christiano quodam, in eam iram exarserunt, ut pie-  
tati & baptismo renunciarent propter unius Chri-  
ani iniuriam. Deniq; eos habuit Mahumetes audito-  
res rudes & crassos , qui de bello & armis facilius  
iudicarent, quàm de lege & mysterijs Dei, de uerita-  
te, de sapientia , de iustitia . Si qui inter eos fuerunt  
paulo cordatiores, commento perspecto, à Mahume-  
te discesserunt: quod tradūt illius ætatis scriptores.  
Sed nihil necesse habemus uetera citare testimonia.  
hodie quoq; prudentiores inter uos, qui paulum mo-  
dò legem uestram accuratius expendunt, parum re-  
cte de illa sentiunt : nulliq; sunt pertinaciores in se-  
ctâ, quàm cæci & surdi, qui nihil omnino neq; audi-  
re uolunt, nec uidere. Nec solum tales nactus est ille  
auditores. tam dociles & idoneos suis figmentis, sed  
in tēpora incidit ipsi apposita , nobis infelicissima.  
Erat ætas illa, & fuit deinceps post illum, plena in-  
scitiæ, extincta luce omni literarū, Christianorū ar-  
mis afflictis & implicatis bello grauissimo, aut pror

sum quiescentibus & consopitis, ut in Hispania ex longa pace ac desuetudine inualuit ille sine repugnantia ingeniorum & lacertorum.

## DE SOCIIS EIVS.

**I**Psē homo illiteratus prorsum, habuit magistros & consultores Christianos duos, Sergium Arianum, & Ioannem Nestorianum: quibus postea superuenit Iudæus Thalmudista. unusquisq; horum ubi uidit materiam in Mahumete, plurimos mortaliū traducendi in suam opinionem, instillauit ei suam sectam: nec aliud quisque eorum existimauit Mahumetem traditurum suis, quàm quod quisque admonuisset: Sergius pertinaciam Arianam, Ioannes Nestorianam, Iudæus commenta Thalmudica. Ipse ratus se non solum socijs gratificaturum, sed pelleturum facilius ad se omnes nationes, omnia est complexus. Ita ex Iudæo tradidit circumcisionem, ex Christianis frequentes ablutiones, & quasi baptis-mata, & Christum negauit esse Deum, & si Dei uerbum esse fateatur. Et quoniā à Mose & Christo discebat, quod circumcisionem tamen statueret, legē suam uocauit legem Abraæ. non est ergo lex cœlitus data Mahumeti, sed lex Abraæ. Quid ad ipsum quomodo loquatur? lex ergo est Abraæ propter circuncisionem. sit itidem lex Mosis, quod à porco abstine-tis: & lex Nazarenorum, quia a uino: & cuius-cumq;

cunq; erit præceptum aliquod, illius nominetur uniuerſa lex. Quid, quòd nec legem obſeruatis circuncifionis, quæ data eſt Abraæ? cui dictum eſt, ut octauo die amputaretur præputiũ pueri. A L. Nos circũcidimus anno decimo quarto, quoniã ea ætate circuncifus eſt pater noſter Iſmael. CH. Quàm ſtulte hoc, ut cætera. Lex de octauo die ſancita eſt: Iſmael autem non potuit circuncidi octauo die, quoniã quatuordecim erat annorum, quum præceptum à Deo datum eſt patri eius Abraæ. ſi fuiſſet octo dierum, tunc eſſet circuncifus. quoniam uerò lex deprehendit eum anno decimo quarto, ea ætate circuncifus eſt, ſine derogatione legis. nec enim factum illius tollebat uim legis: citius dubitari poterat, an ipſe eſſet legitimè circuncifus, quàm ut eius anno decimo quarto circuncifio infirmaret legem, quæ diſertis uerbis de octauo die iubebat. Sed Mahumetes ueſter, qui legem ferebat ijs qui nihil eſſent inquiſituri, nihil in contrarium audituri, ſecurus de iſtis omnibus loquebatur.

## DE LEGIBVS ET VITA

Sarracenorum.

**I**Am inſpiciamus, ſi lubet, quas leges dixit ſibi datus, & quidem à Deo ipſo ſummo, potentiſſimo, iuſtiſſimo, beneficiſſimo ac benigniſſimo, quas uniuerſo generi humano ſanctas & perpetuas eſſe uellet?

uellet? Ipse uero eas tulit, quibus maxime gratificatur desiderijs eorum apud quos captabat principatum, nempe Arabum. Hominibus egenis. & rapto uiuere assuetis, rapinas permisit, & ultionem etiam lege sanxit. Inferentem, inquit, uobis iniurias & molestias, consimilibus malis afficite. Atqui non solum sacra & mansueta pietas, sed philosophi ipsi gentium docent, melius esse ac sanctius ladi quam ledere, iniuriam accipere quam facere. qualis author pacis & concordie, quam Dei similis? quo nihil fieri potest clementius. Quando ergo finis retaliandi, aut inimicitarum & uindictæ modus, si cuique permittitur, ut dolorem suum ulciscatur, quem unusquisque semper maximum grauissimumque esse iudicat: quo fit, ut iudex esse illius æquus non possit, ad reponendam iniuriam. Multas uxores permisit, more Africæ totius peructere: & diuortium leui de causa, & reditorem domum perfacilem. De uxoribus leges ciuiles quod est ipsis uisum statuerunt. Romulus Romæ uoluit, uiro licere omnia, mulieri nihil: Germani uxores suas habent pro ancillis. Dei uero nuncium non decebat spectare quid maiorum consuetudine, quid legibus tanta in re esset receptum, sed quid decorum ac pium postularet, quid uniuerso humano generi conueniret: quoniam quidem leges uniuersis ferebat Dei nomine, cui uir & fœmina pares sunt: utriusque iustitia, est ei ex æquo grata, & ingrata iniquitas, qui



qui Deus est pacis. AL. An non tibi scite ac prudenter cautum uidetur istud de uxoribus, primum ut plures sint uni uiro? unus enim multas potest implere, quod fructuosius est quam perire semē. Tum, si qua sit parum morigera, aut commoda in conuiuiu, non retinetur inuita ab inuito, sed lege diuortij pellitur domo. Iam si illa ad meliorem se frugem postea recepit, aut impetu animi eiecta est à uiro, patet ad reconciliationē uia. quid potest dici aptius? CH. Nihil quidem in caupona, non tamen domi, atque in re familiari. AL. Ede ergo causas, quibus tam commodam institutionem non probas. CH. Faciam equidem lubens ut cætera, & meminero me non cum sue aliquo, hoc est homine usus omnis & doctrinæ experte loqui, sed cum eo qui iudicio est præditus, nec rerum usu omnino caret. Tu qui initio sermonis huius tam scienter hominem exponebas, ignorare non potes, homini esse appetitus quosdam qua parte est animal, alios uero qua est homo. & animales illos longe esse humanis inferiores ac debiliores, inter quos est appetitus sobolis procreandæ. de quo sapienter dixit quidam è gentilibus, interrogatus quādo esset coeundum: Quum uoles (inquit) fieri te inferior. & in hoc quidem appetitu uel delectatio tantum spectatur, uel ipse finis, qui est propagatio generis. Delectationi, utpote belluinæ, nullus est modus, nec ratio. huic non solū quatuor aut quinque aut de

cem non suffecerint, sed ne mille quidem, aut decem  
 millia. Ex humanis expetitionibus est societas con-  
 uictus, ad beneuolentiam & opem mutuā. in quo ge-  
 nere primum locum obtinet coniugium, sicut à Mo-  
 se scriptum est in Genesi, dixisse Dominum, non con-  
 uenire Adamū solū agere, quærendam illi coadiuuā  
 ipsi similē. Tam appetitus hic uitæ communionis,  
 quàm ille alter propagandi generis, ostendit manife-  
 stò, uni uiro unā fœminam connubio debere iungi,  
 & uni fœminæ uirū unum. Primū forma ipsa con-  
 iunctionis ad procreandū, admonet duos tantū esse,  
 nec tertium aut quartū posse interuenire. Quòd si ita  
 uisum esset regi uniuerſitatis, ut uiris singulis qua-  
 ternæ aut quinæ & denæ & uicenæ associarentur  
 fœminæ, eam in natura legem tulisset, ut longe fœmi-  
 narū maior esset quàm uirorū prouentus, & nume-  
 rus fœminarū summā uirorū sescuplo atque etiā de-  
 cuplo excederet, quod non uidemus euenire. Socie-  
 tas aut tum beneuolentiæ, tum auxiliij & ministerij  
 mutui, uerissima ac certissima est duorū: maximasq;  
 & fidiſſimas amicitias inter duos semper consistere  
 & audiuiſmus, & usus uitæ nos docuit. Atqui legisla-  
 tor uester etiam quieti domus uoluit prospicere.  
 Tot (inquit) habebitis uxores, quot poteritis alere,  
 ac tueri facultatibus, & manu regere ac coërcere.  
 Concordiam uidelicet sancit in domo, sine qua uita  
 omnis & publica & priuata miserrima est. Sed quæ  
 potest

potest esse intra eos parietes cōcordia, in quibus sit inuidia & zelus, & inde rixæ perpetuæ? Duorū inter se amor optimus & tranquillissimus est. duorum aut, aut pluriū ad unū, æmulatione non caret. Et in amicitia pluriū unusquisque unumquemq; uel quisq; alios omnes respicit, & eorū singulos, non omnes unū, tanquā dominū famuli, sed quasi in rep. cōmunionē quadā iuris & uitæ usus. duos uero aut tres ad unum spectare, ea uero non amicitia est æqualis, sed riualitas aut dominium alicuius in multos: unde inuidētia solet existere, & similitates, quum quod euenire est necesse, uel fauor à multis expetitus, uel certe fauoris signum magis unam aliquam in partem inclināt. Mulier in quam maritus uidetur animo propensior, tanquam uictrix aliarum, insolefcit atque insultat eis, nec habet pro socijs, sed pro ancillis. ea uero cui non tam fauetur, inuidet alteri. etiam si æqualiter omnibus bene uelit uir, omnes tueatur, curet, omnibus beneficiat, quod est tamen factu perdifficile, non potest tamē id persuaderi illis. Non solum uxores, sed nec famuli qui agūt sub eodē domino, nec filij sub eodem patre, ut maxime tractentur æqualiter, non tamen se æqualiter tractari credunt: ut est quisq; in seipsum quā in alterum propensior. hinc odiū inter ipsas, & rabies, quæ in caput quoq; mariti ipsius redūdat. nec rē familiārē, nec liberos curabit mulier œstro illo zeli percita, quasiq; furijs & intemperijs

tē perijs agitata. nec priuignos uolet nouerca alere  
aut educare, sed illis quantū poterit incōmodabit: at  
que eo magis uiuente matre, quam habebit non pro  
socia, sed pro pellice. Quòd si exemplum & tanquā  
naturalem constitutionem quærimus, in exordio ge  
neris humani, uni uiro unam fœminam Dominus ap  
plicauit, Euam Adæ: quem morē deinceps infecuta  
gentes omnes seruauerunt, præter Afros. Et de Eua  
dixit Adā, Ecce nunc os ex osibus meis, & caro de  
carne mea: hæc uocabitur uirago, quia de uiro sump  
ta est. propter hoc relinquet homo patrem & ma  
trem, & adhærebit uxori suæ, & erunt duo in car  
ne una. Quæso animaduertas. in hisce uerbis, quæ  
sunt ueluti lex coniugiorū in orbis primordio lata,  
non habetur, tres aut quatuor fore in carne una, sed  
duos tantū: & sicut Adæ una est data Eua, ita Noë,  
& ijs qui arcam illam sunt ingressi ad reparationē  
humani generis, singulis singulæ sunt uxores attri  
butæ, ut in Genesi Mosis legitur. AL. Quid olim  
patres, Abraam, Iacob, Dauid, Solomon, & alij,  
hos an non habuisse plures legimus? CH. Habue  
runt ex eis nonnulli parum sanctē, ut Solomon: qui  
ad exemplum uocandi non sunt, quoniam eorum fā  
ctum improbat. de alijs, quorum sanctitas specta  
ta, credimus nihil egisse intemperanter, sed sine ali  
quo præstantiore quā humano. Abraam promissæ  
stirpi seruebat: Iacob multiplicationi electæ gētis:

Dauid



David ut familia esset illa quàm numerosissima, quæ  
 & ad regnum gentis esset delecta, & ad Mesiaë ge-  
 nerationem. AL. Quid diuortium? an ne in offi-  
 cio continet fœminas? CH. Id uero non minores  
 adfert & rei familiari clades, & uitæ tranquillitati,  
 quàm uxorū multitudo. Vxor non est seruitij no-  
 men, sed societatis & amoris. Diuortium efficit, ut  
 uir seruilem in modū uxore abutatur, minitans sub-  
 inde quod minari solemus famulo, se illam domo exa-  
 cturum. qui amor potest coalescere inter eum qui ita  
 despicit, & quæ ita despicitur? quòd si non contem-  
 nat, suspicax est genus fœminarum, omnia in tristio-  
 rem partem deflectit. Olim dixit quidam de genti-  
 bus, Ama ut osurus: quod à sapientibus alijs uehemē-  
 ter est reprehensum. tolli enim aiebant eo dicto bene-  
 uolentiā, omnemq; usum & societatem ē uita. nam  
 quem tandem diligam bona fide, si cogitem posse il-  
 lum mihi fieri inimicum? Ita est in diuortio conu-  
 bii, quem uere & ex animo amabit maritum uxor,  
 si illud reputet secum, posse se rixula aliqua, aut ma-  
 riti animo perturbato pelli ē penatibus, nec amplius  
 illum maritum sibi futurum? Sed neque rem ipsam fa-  
 miliarem tanquam suam tuebitur, nec liberos ut su-  
 os educabit, quæ omnia relinquenda sint illi, simul  
 primum marito collibuerit. iam quot ei cereretur im-  
 meritæ, uiris aut à sua libidine, aut à praua aliqua  
 animi perturbatione concitatis & impulsis? Nec so-

Et lum

lum hæc quæ sunt in re familiari ac uniuerso uitæ u-  
 su ex repudio commoda, sed ipsa coniugij apud om-  
 nes genes ratio omnem aduersus diuortium aditum  
 uidetur præsepire. Primum consensione uoluntatū,  
 qua efficitur peculiariter in connubio quod futurū  
 Adā prædixit, ut sint duo in carne una, hoc est in ho-  
 mine uno, iuxta morem loquendi Hebræum. Sequi-  
 tur quod uidemus omnes, complexus maritalis, qui  
 penè ob oculos repræsentat unitatem illā hominis,  
 tum communio rerum ac fortunarū uitæ uniuerse.  
 postremò pignora liberorum: quæ ita rursum coniū-  
 gunt & conglutinant parentes, ut nullo prorsum  
 modo patiantur diuelli. quomodo enim discinduntur  
 filij, si parentes disiungantur? A L. Patrem sequi-  
 tur soboles. CH. Etiam iure civili, sed non iure na-  
 turæ, non æquitate ipsa & iustitia. ex duobus pari-  
 ter genitus est infans, duorum est pariter. A L. At  
 multa paria non sunt apte ad gignendum compo-  
 sita. CH. Non spectant leges paucitatem, sed uni-  
 uersitatem & quemadmodum prudens quidam di-  
 xit, nulla lex satis commoda omnibus est. Nec matri-  
 monium pro meta sua & tanquam albo præstituit  
 sibi generationem, sed uitæ amicam atq; indissolubi-  
 lem societatem. de qua dictum est à Deo: Non est bo-  
 num solum agere Adam, faciamus ipsi socium ipsi si-  
 mile. A L. At fructuosius est non perire semen il-  
 lud. CH. Habes tu domi equū uectorem, & equū  
 admissa

admissarium. admissarium cupis esse quàm fecundissimum. quid, de uectore es ne adeò sollicitus? A L. Non perinde. C H. Quid in hoc curas potissimum? A L. Vt sit ad uehendum maxime idoneus. C H. Quid ut progeneret? A L. Si id contingat, non ægrè feram. C H. Sed non ea erit tua cura. A L. Imò interdum, atq; adeò plerunq; à generando arcebo illū, ut melius me uehat. C H. Quid in uiro? quid spectabis, quid curabis? utrum ut quàm plurimas fœminas impleat: an ut sit prudēs, moderatus, sapiens, doctus, pius? A L. Hæc nimirū quæ sunt hominis propria. C H. Si gignat liberos, non aspernaberis: si nō gignet, feres facile. imò ut de equo dicebas, à danda liberis opera sæpe abduces, ut melius hominis muneribus fungatur. Nam probitatem, modestiam, pudorem, pudicitiam, deniq; uirtutē omnem frangi ac debilitari necesse est in tam profusa libidine. nec de pietate & sanctimonia & ulla re summa atq; excelsa cogitare potest is, cui tantus uxorū & ancillarū numerus sit & curandus, & quod obscœnissimum est, implendus. Sed uide quæso quantum ad multiplicationem generis attinet, quàm estis in hac uxorū multitudine decepti. frequentiores sunt eæ regiones, in quibus coniugia sunt duorum, quàm uestre: ut Europa, q̃ Africa uel Asia. atq; adeò Asia ipsa, quæ nunc est Turcia, minus est urbibus & cultoribus celebris, posteaq; senas & septenas uxores quisq; acci-

R 2 pit,

pit, quàm olim quum singulis erant contenti. A L. At multorum coniugia uidemus male cohærere ob diuersitatem ingeniorũ & morum, non uis illis succurri separatione, nullum relinquis remediũ? C H. Legislator noster Christus uult suos modestiæ ac moderationi assuescere, tum magnitudini animi, qua facile si quid molestiæ incidat in uitam, deuorent, ac transmittant. non finit eos esse querulos & morosos, quiq; passim inueniant spinas quibus pungantur, & lapides in quos impingant. instruit eos mutua beneuolentia, quæ est magnanima & patientissima, nec sentit quaslibet offensiones. istis tolerabile fit ac leue, quod alijs uidetur grauiissimũ. Iubet nos Deus noster esse mites, & inuicẽ offensas facile cõdonare, & ad parua errata conuiuere. tum quæ uidentur esse grauias, facere nobis leuia charitate uel hominis, uel certe Dei. Non ergo assuefacit nos ad leuissimã quamq; offensiunculam resilire, & nodum beneuolentiæ rescindere, quod facit uester: sed ferre, & animum incommodis illis assuefacere, quæ ferẽdo multum indies amittunt de odio atq; asperitate sua, & merces laboris magna est remunerante Deo. A L. Quid si ea sit discordia & dissensio uoluntatũ inter coniuges, ut animi tranquillitas perturbetur penitus, & pietas detrimentum accipiat? C H. Rebus tam afflictis remedium est ab Ecclesia paratum politicis constitutionibus. At de uestra reconciliatio-



ne, quum coniuges dissociati decreuerunt in gratiā redire, nolo quicquam loqui, ne pudeas. quid enim potuit cogitari spurcius? te quidem puderet: illum, ut qui ageret inter beluas, respectumq; exuisset Dei atq; hominum, nihil pudebat. Transcamus ad ieiunium, quod uester legislator quum statuit, aperte ostēdit se, ut nec reliqua omnia, sic nōq; ieiunium scire quid esset, aut in quem finem paratum. Quæso quid est ieiunium. AL. Abstinētia à cibo. CH. Nihil responderi potuit simplicius, aut naturalius. sed hanc statō tempore à cibis abstinentiā quo fine indixit Deus hominibus? an ut medicus, quia utile est non nisi hac aut illa hora uesci: an ut magister animorum, quia expedit bonæ menti hoc aut illo tempore nihil sumere? AL. Istud crediderim potius. CH. Alimentum autem qua parte officit menti? an qua alit & uegetat corpus? AL. Minime uerò hac: imò & mentē ipsam exhilarat, ac fulcit. CH. Qua ergo ratione? AL. Qua uel immodicus ac redundans, uel qualitate sua corpus afficiens mentē obtundit ac perturbat, ne possit de Deo, de cultu eius, de pietate & uirtute omni cogitare. CH. Erit ergo ieiunium animis nostris conducens, ab ijs se incommodis homines abstinere. AL. Nimirum. CH. Et hoc indicere, nūcio & propheta Dei est dignū: quomodo ergo legislator uester ad crapulā uos & ingluuiem quasi adhortatur & instruit? Primum iu

bet cibus abstinere usq; ad serum, uespere autem quasi detractis frenis & sublati repagulis emittit edendi audios ad præsepe belluinum. Edite, inquit, & bibite usq; ad auroram. quid potest dici immoderatus, aut magis pecunium, quam stratos mensis accubere à sole occidente ad orientem? hæc non est ieiunij lex, sed saginæ magisterium & officina. A L. Quid inter uos non sunt similia? C H. Fiunt quidem plura quam conueniret. sed nos hic non querimus quid nostri faciant, aut uestri, sed quid legislator iusserit. nam quod nostri homines legi non obtemperant, culpa est eorum, non legis. quod uerò facitis uos, ex præscripto legis facitis, ut culpa iam legis sit, seu legislatoris potius, non uestra, nisi quod malæ ac impuræ legi paretis, sine ulla mente. At ebrietatem uitat, uinum detrahit suis. cuius causam producit quidam, quod ipse aliquando uino madens ea designarit facinora, quorum postea per uitam uniuersam poenituerit. Sed addit more suo fabellam sanè quàm lepidam. Ait Abdias Iudæus: Quum in paradiso uinum esse describas, quid operis ibi habet, si uinum illicitum est? Si autem licitum, cur in hoc seculo prohibes uinum? respondit: Tam argute quæris, ut una interrogatione geminam necessariò responsionem extorqueas. Vtrumq; ergo exponam, & illic esse licitum, & hic illicitum. Erant enim angeli Dei duo, Horroth & Maroth, missi olim à Deo de cœlis in terram,

terram, gubernando & instruendo generi humano  
 tributis, his interdictis, ne occiderent, aut iniuste iu-  
 dicarent, nec uinum biberent. Multo itaq; tempore  
 sic habiti, quum noti essent iudices uniuerso orbe, ue-  
 nit ad eos quadam die mulier præ cunctis foeminis.  
 omnimode pulcherrima, causam habens aduersus  
 maritum. quæ ut causæ suæ accommodaret iudices,  
 quadam die inuitauit eos ad prandium: quibus epu-  
 lantibus, ipsa epulas & pocula uini apponit, astat  
 ministrans, offert crebro, instat ut sumant. quid plu-  
 ra? Vicerunt blanditiæ mulieris. Inebriati poculis in  
 hospitam formosam incaluerunt, uicti accubitus  
 petierunt. Spondet conditione, dummodo alter uer-  
 bum doceat per quod ascendebant in cælum, alter  
 uerbum per quod descēdebant. placet conditio. quū  
 ergo didicisset, eleuata est subito, & ascendit in cœ-  
 los. quod quum uidisset Deus, explorata causa. posu-  
 it eam Luciferum, ita pulcherrimam inter stellas, ut  
 fuerat inter mulieres. Illis in iudicium euocatis, pro-  
 posuit eis Deus, ut eligerent inter pœnas seculi hu-  
 ius, & alterius. elegerunt hanc. Suspensi sunt ergo  
 per catenas ferreas, demissis capitibus in puteo Be-  
 hil, usq; in diem iudicij. Quid ergo Abdia, nōne suf-  
 ficiens uidetur causa, cur in paradiso licitum sit ui-  
 num, & hic illicitum? ait, Vera satis, & meritò.  
 sic ille. Quid primum aut potissimum ex tam mul-  
 tis flagitijs ac insanijs reprehendam? defessus sum se

riò refutandis ijs quæ per ludicrum dicta uideri pos-  
sunt. quis enim non existimet hæc fabellas esse ad tra-  
hendum tempus & risum mouendum conficta? An-  
gelos dicit regendo humano generi præfectos: & ut  
sciatis illum rem certam & exploratam adferre, eti-  
am addit nomina. quis unquam hæc scripsit, quis di-  
xit, quando auditum aut lectum? res tanta quomodo  
potuit obliuionis tenebris tam diu obrui, & deleri  
nomina prætorum generis humani; quum hominũ  
regum, imperatorum, consulum, prætorum unius cu-  
iuspiam ciuitatis omnium nomina memoriæ sunt mã-  
data? iam uerò edunt angeli, & bibunt, & quidem  
re uenerea utuntur: agunt ergo hæc eadem in cœlis?  
Quod si illic non agunt, nec possunt agere, quæ con-  
ditio mutauit eos, ut hic agerent quod esset contra  
illorum habitum naturalem? nescio quid Mahume-  
tes responderet, qui ait nullum oblectamenti genus  
in cœlo defuturum. Habent ergo & illi suas dapes,  
& sua conuiuia, & suos concubitus, & alij sunt ui-  
ri, alij sceminae & uirgines: nisi fortè ad nostras scem-  
inas ueniunt, & eam iniuriam faciunt uiris homi-  
nibus. Apage impiam obscœnitatem, quam nec Ma-  
humetes quidem posuisset. quũ nihil omitteret, quod  
cunq; somniasset. Sed quid sequitur? Capti sunt ui-  
no, & exarserunt: uinum ergo prohibendum. quid  
potest fingi acutius? etiam capti sunt forma mulie-  
ris: uetanda igitur. Placet ne usu omni interdicare  
eius



eius rei, quæcunq; aliquo modo potest lædere? nihil relinquetur: panis, lac, caseus, carnes, fructus, aqua, omnia possunt nocere, & nocent summentibus modo ac tēpore quo non expedit. Vinum modicū utile est, immodicum lædit, ut panis, ut alia omnia. Quid maiora attulit damna hominibus quàm aurum in caussa, & ferrum in effectu? cur aurum expetis, & ferro uteris? Sed quid opus est in loco immorari adeò noto omnibus? quis ignorat, non protinus rem aliquam damnari debere ac tolli, quòd eius usus possit esse noxius? rectus usus demonstrandus est, non res auferenda. Quòd si uino interdici, quòd angeli inebriati sunt, cur non etiam mulieribus interdici, & maiore de caussa, quia propter mulierem id contigit? Sed Mahumetes mulierosus erat, non uinosus: & ipsi & Arabibus leuius fuisset à uino abstinere, quàm à mulieribus. Et factum hoc quum ante Mosē contigisse fingatur, cur non uetuit Moses uinū in lege, cur non Christus in Euangelio? Ebrietatem uterq; prohibuit, uinum reliquit ad multa non solum utile, sed nonnunquam etiam necessarium. Quale autem illud, quòd certis prolatis uerbis putat angelos inter cælum & terram ultro & citro comēare, quasi non uinaturæ suæ ascendant & descendant, sed carmine aliquo tanquam incantatiuncula: & Deus tam inscius est eorum quæ geruntur in mundo, ut illi inopinanti obtulerit se in cælo mulier derepēte.

## DE DIE IVDICII.

**E**X narrationibus prauè & auditis & intellectis, collegit diem iudicij, quo nihil inculcat crebrius. facit hoc enim ad incutiendam animis religionem. de hac audiamus fabellam more solio. Ait Iudæus, Diem iudicij oro planè describas. respondit: De illo mādabit Deus angelo mortis, ut omnem creaturam spiritum habentem interimat, tam angelos omnes quàm omnes diabolos, omnesq; homines, oues, pisces, belluas & pecora. sic enim ait in Alcoran: Omnia mortua præter Deum. Post hæc uocabit angelum mortis, dicens: O Adriel, est ne quid superstes ex omni creatura mea? dicet, Nihil domine mi, præter me seruum tuum imbecillem. Tunc dicet ei: Quoniam omnem creaturam meā occidisti, abi hinc inter paradysum & infernum, & postremò occide te ipsum, & morere. Abibit infelix, atq; in præscripto interuallo proiectus humi, alis suis inuolutus suffocabit seipsum, cum tanto mugitu, quo & cœlestes spiritus, & terrena animalia si uiuerent exanimaret. stabitq; totus mundus uacuuus per quadraginta annos. Post hæc cœlum & terram pugno conimens dicet Deus, Vbi nunc reges, principes, & potentes seculi huius? cuius est regnum, imperium, & rerum potentia? dicite, si ueridici estis. & his uerbis ter repetitis, Seraphuelē suscitabit, dicetq; ei: Accipe tubam hanc, & descende in Hierusalem, & clange.

Tunc

Tunc Seraphuel accepta tuba, cuius longitudo itineris quingentorū annorum, stans in Hierusalem insufflabit tubam, & efflabit ex intus omnes animas iustas, quæ euolantes in omnem terram, quæq; ad corpora sua ubicunq; sint dispergentur, atq; ad primum hunc sonitum omnia ossa congregabuntur. Trā factis quadraginta annis iterum sonabit, ad quem sonitum ossa carnem assument. atq; inde post quadraginta annos, quum tertio sonuerit, omnes animæ suo corpore induentur. Sic facto, ignis ab occidente succensus omnes creaturas Hierosolymam agitabit. quò quum omnes peruenerint, cessabit. hic ergo quū per quadraginta annos in sudore suo natauerint, expectantes iudicium, tot tandem miserijs affecti, appellabunt Adam, dicentes: Pater Adam, ad quid nos genuisti huiusmodi tormentis atq; miserijs? Itā ne pater filios sub incerto inter spem & metum fluctuare pateris? Planè interpella Deum, ut planè finiat de nobis, quicquid inter paradysum & infernum facturus est. Respondebit Adam: O filij, scitis quòd suadē te diabolo, Dei præcepto inobediens fui. idcirco ite ad Noë. Conuersi ad Noë dicent: Intercede pro nobis electe Dei pater Noë. respondebit, Feci quod potui, saluauī uos in diluuio, hic mihi nihil superest officij, sed ite ad Abraam. Appellabunt ergo Abraam, dicentes: Pater fidei & sanctitatis Abraam, respice uos miseros, & miserere. Quibus Abraam: Quid me

petitis?

petitis? Non recolitis, quòd diu uagabundus idololatra incircuncisus errauerim? Non sufficio, sed appella te Mosen. Appellabunt Mosen, dicentes: Dilecte Dei nuncie & propheta, famule Dei audi nos. respo debet, Quem appellatis? Nónne uobis legem dedi, miraculis confirmaui, nec tamē credidistis? Si mihi credidissetis, facerem quod postulatis. sed ite ad Iesum Christum. Conuersi ad Christum dicent: Iesu Christe, spiritus, uerbum & uirtus Dei, moueat te pietas tua, & intercede pro nobis. Tunc dicet eis: Quod à me petitis, ipsi amisistis. Missus quidem uobis fui in uirtute Dei, & uerbo ueritatis, & aberrastis, & me plusquam ego prædicauerim uobis, Deum uestrū fecistis. hic itaq; beneficium meum amisistis. Sed ite ad ultimū prophetarū, hunc significans cum quo loqueris, ô Abdia. Ad quem conuersi dicent: O nuncie fidelis & amice Dei, quàm male quidē peccauimus, & ideo quòd tibi non credidimus, exaudi nos pie propheta, spes una superstes. nam post te non est in quo sperabimus. exaudi nos potentia tibi à Deo collata. Aderit itaq; Gabriel, nec impotentem sinet amicum suum: procedent socij ante faciem Dei, dicetq; eis Deus: Scio ad quid uenitis. Absit itaq;, ut fidelis nuncij mei uotum in aliquo cassē. Hic ergo ponte factō super infernum aderit statera, qua libratīs unus cuiusq; factis ambulabunt super pontem. Sancti ergo transibunt, damnati in infernum decident. Attingamus



gamus breuiter nonnulla. Mandabit Deus angelo mortis, ut omnem creaturam spiritum habentem interimat. quid opus est morte animarum & angelorum, qui immortales sunt conditi? Sed audierat Paulum dicere, morituros omnes, idcirco & angelos, & ea quæ sunt à Deo cōdita immortalia, morte una inuoluit. quemadmodum quòd de tuba Paulus fecisset mentionem, tubam dedit angelo immanem, qualem horreant facile imperiti, docti derideant. & facit angelum mortis, ut habeat Deus suum carnificem, quæ admodū prætores nostri. Quid opus est angelo mortis, quum nullus sit angelus procreationis? & maiore de causa deberet esse generationis, quàm interitus. Naturæ legibus nascitur quicq; adolescit, senescit, interit, non admiscetur angelorum ministerium, nisi si quid à Deo fit priuatim extra naturæ cursus. & hoc de angelo mortis & Mose, est narratiuncula aptissima ad terrendum puerulum aliquem proteruum. Moses, inquit, quum solus per desertum uagaretur, fortè sepulchrum inuenit apertum & uacuum, recte ad quantitatem suam effosum, quod admirans cœpit ad propriam staturam metiri. Interea angelus mortis uenit ad interficiendum Mosen. quæ quum cognouisset Moses, quæsiuit, Ad quid uenisti? respōdit, Missus sum pro anima tua. cui Moses, Quo modo ergo putas eam eripere? per os enim non poteris, quo locutus sum cum Deo; neque per aures, quibus

bus uocem Dei audiui: neque per oculos, quibus faciem Dei uidi: neque per manus, quibus donum Dei recepi: neque per pedes, quibus montem Sinai ascendi. habes iustas causas, ob quas per membra illa non posset mors irrumperere. Sed si miser Moses odorem aliquem præstantem & ex illis diuinis esset odoratus, non habuisset mors qua in illum penetrasset. His ergo auditis, abiit angelus Domini: formaq; mutata, attulit pomum de paradiso. quod quum olfaciendo porrigeret, recepit Moses. quumq; naribus apponeret, arripuit eum angelus tanquam bubalum per nares, per quas tanquam emungens animam eius extorsit. sic mansit corpus eius in sepulchro nunquam reperto. Sed mirandum est odorem sacri suffitus in sacrificijs non illi esse opitulatum, nec odorem fumii resiliens ab igne, in quo Dominus descenderat in Sina. Quòd si ille quibus partibus cū Deo esset uersatus, mortem non poterat recipere: quomodo mortuus est Mahumetus, qui uidit, audiuit, allocutus est Dominum, & quidem tetigit eum Dominus? qui tactus, non morbum debuit illi importare, ut uos dicitis, & cerebri debilitatem, quod est Deo indignum: sed quod uita & salute omnium fas est credi, salutē atque immortalitatem. Sed ad iudicium reuertamur, & interitum rerum cunctarum. Et tanquam ingenti edito facinore, inducit gloriantem Deū, Vbi sunt reges & principes & potentes seculi huius? quasi

quasi prius fuissent, & exuti corporibus adhuc in regno & principatu perseveret: aut quasi non plus sit illa omnia condere & conservare, quàm interire. quòd si tantum est facinus abolere, etiam ad angelum mortis aliqua pars gloriationis pertinebit, uelut ministrum tanti operis. Quid uero necesse erat Deo iactabunda illa exprobratione uti, quasi sit aliquis qui nesciat, id Deum posse facere quoties uelit? Sed nimirum Mahumetes, quod ipse in praelio fecisset existimauit facturum Deum. & bellum semper somniabat, in quo pulchrum & decorum habetur interfecisse quàm plurimos. Quàm uerò egregia ratio reparandi animas, & Deo digna, exsufflari eas ab angelo tanquam plumas per tubam? Qui nam uero sunt isti qui expetunt iam tandem diem iudicij? non uidentur esse boni, sed mali. nam ita res ostenditur eis à Mose & Christo tanquam malis, & qui adduci ad credendum nequiuerunt. quomodo ergo rigorem sententiæ isti expetent, quibus satius esset in suo sudore natare? Sed Moses & Christus non exaudirentur pro incredulis, exauditus est Mahumetes tãquam uir melior, quem imparem Mose & Christo bonitate & coniunctione cum Deo neque uos negatis. Ceterum cur Moses & Christus denegant suam operam? utrum propter suam indignitatem, an propter duriciem cordium aliorum? A L. Propter hæc ipsam duriciem. C H. Quid? etiam Mahumeti defuerunt,

fuerunt, qui fidem non haberent. quòd si incredulitas & prauitas aliorum Moſen & Chriſtum quaſi confringebant, ne Deum interpellarent, quid cauſe quin etiam Mahumetem? Sed nimirum non apud Deum uolebat eſſe Mahumetes fauorabilior quàm Chriſtus, ſed apud ſuos exercitus quàm Heraclius. Surgent omnes in ſtatura Adæ, in forma Ieſu Chriſti, inquit. Audierat Paulum dicere de plenitudine ætatis Chriſti, addidit ipſe de ſua ſimilitudinem Adæ. Sed quomodo iſtuc? nam ipſe narrat diſcipulos rogaffe Chriſtum, ut narraret ſibi de arca. etenim ait: Nam Ieſus Chriſtus dum rogaretur à diſcipulis, ut modũ arce Noë habitumq; ſuperſtitis in ea generis humani exponeret, rogantes audiens, formulam ex luto inter manus ſuas conſectam proiecit humi, & ait: Surge in nomine patris mei, & ſurrexit homo canus. Cui Chriſtus, Tu quis es? reſpondit, Ego ſum Iaphet filius Noë. cui Ieſus: Itã ne canus mortuus eſ? reſpondit: Nequaquam, ſed in ipſa hora putans me ad diem iudicij ſurgere, metu canus effectus ſum. Si ille metu falſo incanuit, quid alij facient uero? Dabitur liber cuique de ſuis actis, & iudicium durabit quinq; millibus annorum. Si ea examinatio cuiuſq; criminum debet fieri illic, quæ in noſtris foris, non eſt mirum durare iudiciũ non dico quinque, ſed quingentis millibus annorum. At quomodo placat iram iudicis? Tunc, inquit, Mahumetes dicet Deo: Domine,



ne, omnes isti recta facie librum hunc accipere pro-  
perarūt. quasi uero nesciat, aut oblitus sit Deus qui  
sint iusti, admonetur à Mahumete tanquam assesso-  
re. Sed captat gratiam suo libro, tanquam clipeo for-  
tissimo aduersus iratum Deū. Postremo, inquit, mu-  
tabitur mors in arietem; adduceturq; inter paradi-  
sum & infernū. Quid hoc puerilius? & quod popu-  
lus paradisi, metu mortis optabit morti interitum:  
quasi uero de sua immortalitate illi non essent certi-  
iam, & securi.

## DE BEATITVDINE.

**E**Am beatitudinem posuit, quæ magis porco  
quàm homini conuenit. Paradisi, inquit, solum  
aureum smaragdis & hyacinthis crebro interposi-  
tis est distinctum, omni fructifera consitum arbore,  
decurentibus per amœna fluentis: quorum alia qui-  
dem lac, alia mel album, alia uinum purissimum fun-  
dunt. Nescio qua naturæ parte statuat paradisum.  
nam hæc de cœlo dicta absurdissima sunt. Dies, in-  
quit, eius erit mille annorum, annus quadraginta mil-  
lium annorum. quæ proportio inter diem & annū  
tam docta, & ex astronomorum regulis desumpta,  
ut non amplius quàm quadragies maior sit annus  
die. Sed quæ potest in cœlis esse nox, ubi semper splē-  
deat sol, nec se unquam illinc aufert uel recondit? di-  
es autem si solis est præsentia, semper est in cœlo di-  
es: sin conuersio cœli naturalis, horis quatuor & ui-  
Ss ginti

ginti conficitur. Addit: Vestientur illic omni colore, præterquam nigro. primus missus in mensa erit iecur piscis albisbus: credo quòd palato Mahumetis erat gratissimus sed non est omnibus idem palatum, nec idē sapor. Quid illis fiet qui à pisce omni abhorrēt? quid uerò opus est alimento ijs, qui sunt immortales? quid re uenerea ijs qui non progignunt? & uoluptates illæ gustus tactusq; in uicio sunt, nempe intemperantia, nisi ad necessitatem referantur propagande uel uitæ, uel sobolis. eamq; ob rem inditæ sunt illæ nobis à natura, ita ut delectatiōes gustus tactusq; non sint actionibus sensuum illorum finis, sed contrā potius actiones sunt delectationum metæ, & quasi scopi. non enim ut oblectemur, gustum & tactum fabricata est natura in animante, sed delectationem ingenuit, ut uelit ea agere, quibus ipsum se sustentet, & simile progeneret. Quanto acutius Epicurus? qui quum beatitudinem in delectationem posuisset corporis, animam fecit mortalem. uidit enim eiusmodi uoluptates locum non habere in immortalitate. Sed nimirum ista placebant crassis illis militibus, & talia post mortem optabant, & homines stultissimi quænam aliæ possent esse delectationes, non assequerantur. Quid porrò? nullus ne erit edendi & bibendi & amplexandi fœminas finis aut modus? nunquā erunt saturi, semper noui & appetētes accumbent? an crūt saturi, & fastidient aliquando, & erunt crudi, &

di, & languebūt? Quomodo autem concoquent & excernent? ubi erunt foricae, ubi feces? Mahūctes medicus solers prospexit huic labori: Per sudorem, inquit, emittentur excrementa. quantum illic sudabitur? & periculum est ne quis à sudore algeat, si se denudarit. Iam uerò si uiris erit beatitudo ex multitudine uirguncularum, quæ erit foeminis? nisi fortè foeminae quæ Alcorano paruerint, non sint futuræ beatæ. Quòd si ista sunt beatitudinis cœlestis, cur prohibetur in hac uita? quin mores æui huius, quantum præstari potest, ad illos immortalitatis accommodamus? Quid potest dici melius aut præstabilius, quàm cœlestem uitam exprimere, & per similitudinem illius ad eā peruenire? atqui tu ipse ea perhibes in uita hac tanquam flagitiosa, quorum maximam copiam esse in altera uita doces. Ergo Christus, & Diua uirgo, & prophetae, & sancti omnes qui sobrii, moderati, casti fuerunt in hac uitæ huius uilitate atque imperfectione, in illa cœlesti perfectione erunt ebrii, & libidinosi, & intemperantes, alioqui non futuri beati. & qui hic uixerunt innixi mente, illic erit eis à mente descendendum ad corpus, & à qualicunq; hominis perfectione transibunt ad imperfectionem. At dicit, nullum oblectamenti genus illic defuturum. Quid ergo, etiam iaculabuntur multi, & ludent aleam, & erunt illic balnea & funambuli & petauristæ? nam his multi delectantur. Musi

cæ autem est oblitus, cuius non est delectatio postrema. sed fortassis ipse, & Arabes, homines militares & crassi, non capiebatur musica: ut rex ille Scytharum, qui hinnitum equi malle se audire dixit, quam citharædum Philippi regis. Quid, quod etiam illic erunt textores? nam uestiètur panno. & infectores: nam omni colore præterquã nigro. quid, omnes? ne lanceo, an etiam serico & byssino? & alij alijs inuidebunt uel colorem, uel texturam, uel materiã. Quid potest dici anilius? Indumentum repertum est aduersus iniuriam cœli æstus aut rigoris, uel ad uelanda ea quæ patefacta pudorem incutiunt. illic nullus erit pudor, nec rigor, aut feruor. Quid opus erit in illa beatitudine indumentis, quæ terræ sunt, nõ cœli: & infirmitatis nostræ, non illius perfectionis? uidelicet nec Adam & Eua antequã peccassent induti erant, sed peccatum quod pudorem & debilitatem atque infirmitatem attulit, & omnifariam miseriam, uelamenta dedit corporibus. Et homo consultissimus naturæ rerum in cœlis dicit, dies futuros mille annorum, & annos quadraginta millium annorum: quasi uerò illic sit nox. Quod si dies est una cœli cōuersio, annus autem cursus solis, nec maior nec minor erit dies aut annus in cœlo, quàm in terra. quadragēcupla solum proportionem maiorem facit annum quàm diem. Quid autem hic curat quid loquatur? eodem loci erant illis quattuor quo quadraginta. At  
quasi



quasi homo totus esset corpus sine mente, nihil reliquit menti, in qua una sunt præcipue delectationes in homine dignæ, solidæ, puræ, perpetuæ. Nullum genus oblectamenti aberit. ita planè, si ad mentem referes uoluptates. eæ sunt enim in mente delectationes, quæ instar sint omnium quæcunque uel expeti uel cogitari possint. Et uestri sapientes, Auerrois atq; Auicenna, confessi sunt meliorem ac ueriores beatitudinem tradi ab Aristotele gentili, quàm à uestro legum latore: nempe mentis actionem circa res maximas & pulcherrimas. Nam in eo quod est in homine optimū, par est statui illud quo nihil est homini melius, nempe fœlicitatem: non in parte fœda & brutali, & qua homo nihil differt à bellua. A L. At Christus etiam de sempiterna fœlicitate uerba faciens, de corporis oblectamenti loquitur. C H. Primum nunquam de rebus ueneris, quas semper in uicio ponit, præter coniugales, quæ uitæ huic seruiūt. de quibus dicit, quod in cœlo homines non contrahunt matrimonia, sed abolita lege sexuū erunt sicut angeli Dei. Ciborū autem abstinentiam & sobrietatem omnem quum ipse præstitit seuerissime, tum discipulis suis indixit. De mēsa uero regni cœlestis meminit interdum, ex recepta apud Iudæos consuetudine, qui per esum illum spirituales ac sempiternas delicias significabant. Ipse tamen loqui se figuratè, sæpe est testatus: & illo potissimum loco, Multa habeo

quæ uobis dicam , sed eorum non estis in præ-  
sentia capaces , spiritus autem paracletus docebit  
uos omnia. ita post receptum ab apostolis spiritum  
sanctum, omnia fuerunt explicatoria . tunc intelle-  
ctum est , per cibum in uerbis Domini intelligi eum  
fructum, quem quisque ex operibus suis colligit . ad  
quem nos ipse hortatur : Operamini cibum qui non  
perit. & , Ego alium cibum habeo edere , quem uos  
ignoratis. Vester autem Mahumetes sine translatio-  
nibus, sine figuris , simpliciter & naturaliter refert  
omnia se ita habere, tanquam qui rei historiam con-  
textit . Nec mirum est eum talem finxisse beatitudi-  
nem, qui cœlum facit ut aulam magni alicuius prin-  
cipis, in quo omnia gerantur more humanæ conditi-  
onis. Dicit demones olim solitos cœlum conscende-  
re, exploratum quid ageretur in consilio Dei . Deū  
uero quum aliquoties patefacta sentiret hostibus sua  
arcana, iratum deprehendisse fraudem. tunc appo-  
suisse custodes & ianitores diligentes , qui excuba-  
rent, ne quis demon posset in posterum fallere . &  
creasse stellam lucidissimam, quæ exploratores dæ-  
mones patefacit & persequitur. Quid fingi crassius  
potuit, & minus Deo conueniens ? quasi falli possit  
Deus ratione ulla, aut ignoret quid angeli & homi-  
nes cogitent, non solum agant ? aut ianitoribus ille in-  
digeat, aut demones in cœlum conscendant post ca-  
sum: aut Deus ita de rebus agendis consultet, ut qua  
de re

de re deliberet, aut quid statuerit, cognosci possit. Sed illud ad risum mouendum perfestitum, reputare quemadmodum insidiatores demones cælum clāculū ascendāt, suspensoq; uestigio ingrediātur, quo modo fallant custodes: alia ex parte Deum iratum, & dubitantem, & quærentem intra se, num quos habeat in consilio parum fidos. Aliam quoq; narrat fabellam more suo. Ait quippe iudæus: Vbi est quem Deus euocabit post diem iudicij? respondit: In medio inferni est uallis, in ualle gurgēs, in gurgite puteus, in puteo arca, in arca uinctus catenis, adstrictus compede suo, qui stans per mille annos incessanter Dei misericordiam appellabit. ait, Quid ergo faciet ei Deus? respondit, Post mille annos faciet eum sibi adduci, dicetq; ei: Quid tibi uis miser, qui aures meas inquietare non sinis? quæ te fiducia ducit? quo merito speras? Respondebit gemens: Domine Deus meus, ego non habeo præter te, qui misereatur mei. Tu satis habes præter me ubi uindices iram tuā. Miserere mei domine, miserere mei. Sed Deus iubebit eum reddi inferno. Abducetur ergo, nec adhuc misericordiam Dei inuocare cessabit. Misertus tandem Deus, eripi eum præcipiet. Quumq; pice nigrior infernalis eum tingat color, interrogabunt angeli qualiter paradisi incolis misceri possit. Tunc lauari eum præcipiet Deus in fonte æthero, fietq; albus totus, præter maculā in fronte. Mūdatus ergo incedet per

paradisum, in publico conspectu omnibus notabilis. Hic ergo assignabunt eum inuicem omnes uidentes, ereptumq; inferno quasi impropere hinc inde murmurabunt. Ille uerecundans in tantum pudore uincetur, quousq; dicat, mellem reddi inferno, quam huiusmodi probra longius ferre. Dicit itaq; Deus angelis, ut iterum illum quinquies lauent in fonte eodem. quo facto, tolletur macula, reddeturq; paradiso, & cessabit opprobrium. Vides hic sanctos illos spiritus factos à Mahumete tuo irrisores & inuidos & superbos, quales nec boni uiri sunt inter nos, & quod flagitiosius est, damnantes consilium & uoluntatem & misericordiam Dei ac domini sui. Iam quid opus erat fonte ad eum abluendū? aut ubi est is fons in cœlo? quàm uero apte rogat: Mortuus ego non habeo præter te, qui misereatur mei. tu satis habes præter me, ubi uindices iram tuam. quasi in hoc sit intentus Deus, tanquam sæuus latro, aut tyrannus carnifex, ut iram suam expleat ultionibus. Sed si hæc ceperimus expendere, nullum exitum inueniet oratio. Plenus est istis Alchoranus.

## DE ALCHORANO.

**D**E quo loquar nunc paucis, postquã ostendi qualia cōtineret. Hic est uester Alchoranus, cuius uel caput unum negat Mahumetes posse ab hominum uniuersorum & demonum ingenio confici, etiam si cuncti pariter conspirarent. & prouocat omnes



omnes Dei uerbis, ut id faciant. Sed quis nam erit iudex? tuus ensis. Tametsi non dubito quin uerum sit quod dicit. Nemo enim adeò insulsum falsum & sibi repugnantem librum conscriberet. Planè non est humanæ sapientiæ talem librum componere, sed stultitiæ & impudentiæ. A L. Atqui dicit, Adfer te librū meliorem isto, & beneuole sequar. C H. Quis erit iudex? ipse uult se esse iudicem, & reum, & actorem. Si homines non admittitis, saltem sit ratio naturalis iudex, & effectum est. non adferemus Euangelium, nec eo dedecore illud afficiemus, sed minimum cuiuslibet gentilis philosophi opusculum. Pergit porro, & quidem ut solet uerbis Dei. Si librum hunc super montem aliquem misissemus, uidisses eum flecti præ deuotione. Atqui hoc nec de Euangelio, nec de Vetere instrumento, aut Psalmis est unquam dictū. Cur uero id non faciebat? ingentem sibi parasset auctoritatem. & addit: Si mendaciū unū in eo inueniretur, aperte ostendi nō esse à Deo. Atqui nos quàm multa esse in eo ostendimus. quot repugnantes locos? nimirum mendacem oportet esse memorem. Sed audi egregiam clausulam: si hic liber à Deo nō esset, quàm multas contrarietates contineret? quasi uero scribi liber sine cōtrarietalibus nō possit, nisi à Deo sit missus. ingenij est, diligentia, attentionis, solertia, sibi non contrariuenire. Nec fuerunt adeò fatui omnes uestri Alfaqimi, ut non intelligerent esse fal-

sa multa & pugnantia, idq; confessi sunt. Et Mahumete mortuo, Agareni à secta desciiuerunt, tanquam friuola. retenti sunt tamen armis successorum: qui facere ad stabiliendam potentiam suam sunt rati, si eum principatum populi crederent institutum fuisse à nuncio Dei omnipotentis. Quid, quod Alcoranū correctum est, & mutata in eo multa à sequētibus? Liber enim ille cœptus est à Sergio monacho, continuatus à Iudæis, postea ab ipsis eisdem Iudæis mutatus sub Hali filio Abitalib. ita plenus est fabularū similitum Thalmudicis: & inducitur disputans Iudæus cum Mahumete, omnia concedens, etiam stultissima, de Deo, de angelis, de rerum natura, & ad postremum quòd Iesus Mariæ filius sit Messias. quod etiam si est maxime uerum, non fuit tamen à Iudæo admittendum. alioqui quid caussæ erat, quin Iudæus ille efficeretur continuò Christianus, si agnosceret Iesum esse Messiam à lege & uatibus promissum? At uero, si mutata esse in Alcorano multa confitemini, ubi est liber ueritatis, missus à Deo ad salutē hominū?

#### QVOD HOMINES POSSVNT

in quaque lege seruari.

**S**ed ut suos in opinione sua confirmaret, deuiter autem molestias disputationum, & questionum ab alienis, ait unumquemq; posse in lege sua seruari, præterquam si ab Alcorano desciscat ad aliam legem. Sciendū esse illud, inquit, quòd in uniuersum  
omnis

omnis recte uiuens, siue Iudæus, siue Christianus, seu lege sua relictâ in aliam transiens, indubiè diuinam charitatem assequitur. & ut Christianis sacerdotibus utatur sibi facilioribus, dicit, Christianorum sacerdotes ac præsules non indignantes aut arrogantes, quum uerbum audiunt positum super prophetas, ueritatemq; cognoscunt, lachrymantur, & dicunt: ô Deus, nos cum illis bonis hominibus credemes, te nos illis associaturos summè speramus. hoc autè uerbo paradysum merentur. sic ille. Si Christiani scirent uerbum Domini factum super Mahumetē, quæ causa esset indignatiōis? num in Deum stomacharētur, & illius iudicium ac uoluntatem reprehenderent? Indignantur autem, quia Mahumetes id fingit, & mendacia spargit sub Dei titulo. Iam uerò si Alcoranum est sola ueritas, si ueritatem cognoscant, non Christiani erunt, sed Agareni. Quid uero est illud, Nos cum illis bonis hominibus credentes? si credūt id quod uos, an non Mahumetici sunt ut uos? non ergo beneficio suæ legis ingrediuntur paradysum, sed uestre. Quid, quòd dicitis alias omnes leges esse deprauatas, uos solos habere legem puram & integram? Quomodo autem potest quisquam seruari, nisi in uero Dei cultu? uerus autem Dei cultus quomodo esse potest, nisi in ueritate, ut ita de Deo & rebus diuinis sentias, quemadmodum res habet? Si enim alium ego esse Deum existimo, quàm ut est, quomodo

modo potero eum rite colere? atqui nos & uos contraria de Deo sentimus. non potest ergo utrunq; esse uerum. quod si alterutri uersamur in mendacio de Deo, quomodo rite & uere eum colemus? Iam nos & uos quantum à gentiliū sententia, ritu, sacrificijs distamus? quomodo possumus omnes bene colere numen, quod nos unū credimus, illi multa? Quod si omnes naturaliter seruamur, qui sunt isti, qui in iudicio extremo condemnabuntur? quid opus fuit legibus, institutis, sacrificijs? Quid Mose, quid Christo, quid Mahumete & Alcorano? Nam si id non est aliquid certi & ueri & explorati, esse oportet in diuino cultu, cuius beneficio ad immortalitatem reuolemus. Sed hæc eò tendunt omnia, ut nec Iudeus aut Christianus negotium facessat Agareno: nec Agarenius de meliore pietate sollicitus sit, securus de sua, & alij homines uelut cōmuni bono applaudāt. Tametsi in hoc eadē est quæ in alijs incōstantia, seu uerius dissensio. nā alijs locis ait, uiros legibus imbutos & fide, non posse ad perfectionē peruenire, nisi testamenti & Euangelij & Alcorani præceptis obtēperent: tū filios Israël ob duriciē animi repulsos à Dei beneuolentia, sicuti testificatus est Deus per linguam Dauidis regis, & Christi Mariæ filij. quasi uero de Iudeorū repulsa nō plura Esaias & Hieremias dixerint, quàm Christus & Dauid. Sed quàm ista sint conformia superioribus, ipse iudicato.



## MVLTIVAGARENI.

**H**Aeccine potuerunt capere ac detinere tantā portionem generis humani, & quidem post ostensum lumē? profectō oportet fuisse ultionem scelerum, quōd homines relictī sunt suae sententiā, quēadmodū in gentilitate: sicut Paulus inquit, Qui in priscis temporibus passus est gentes ingredi vias suas. Quid aliud quā exclaimemus cū eodem Paulo, O altitudo diuitiarum sapientiā & scientiā Dei, quā incomprehensibilia sunt iudicia eius, & viā illius non inuestigabiles. **AL.** Atqui uides sectae nostrae incrementa admirabilia. ut appareat eam diuina ope esse auctam. **CH.** Multitudo non arguit bonitatem, plures fuerunt olim gētiles. absurdiora quā doq; genus humanū uniuersum credidit. & in insulis istis nouis, quas ab Hispanis quotidie inueniri audis: & quod magis admireris, decem tribus Israëlīs post receptā à Deo legem, & cognitionē unius Dei, ad quam alioqui satis propendet ingeniū humanū, odio regis Iudaici ad cultū demonū & rerū insansimarū transijt, uocante rege Roboā, & multis post annis plurimi Iudeorū coacti armis Antiochi à patria lege defecerunt. Inter ipsos gentiles, inter Christianos, inter uos Agarenos, quanto sunt boni quā mali pauciores? Merito quidā ē gētilibus sapiēs dixit, nunquā tā bene agi cū rebus humanis, ut meliora plu-

ra pluribus placeant. Et in uestra secta alij tenentur errore quodam tradito per manus à maioribus, & ignorantia meliorum: alij metu, alij cupiditate opū, alij illeſtamentis uoluptatum. Sunt enim omnia quæ ille præcipit eiusmodi, ut homines nec pœnis legum poſſint ab eis auerti ac coërceri, ut mirandum non ſit craffos illos & rudes ad id ſe quod ſuadet libido adiūxiſſe. Et quæadmodū imperiū ui atq; armis retinetur, ita etiam ſecta. Quod præuidēs uester legiſlator, dixiſſe fertur, tã diu legē ſuam duraturã, quàm diu uictoriam ſuorum. Scilicet conſcius erat ſibi, nō in recti perſuaſione illam eſſe ſitam, ſed in uiolētia. Idcirco qualem ferret legem perpendens, quatuor illam uallis ſepiuit, ne aditus patēret ad eam ſubuertēdam. Primum, quod iubet eos interfici qui Alcorano contradicerent. Alterum, quod uetat cum hominibus diuerſæ ſectæ diſputatione congregari. Tertium, ne credant cuiquam niſi Agareno. Quartum, ut ſegregent ſe prorſum ab alijs, & dicāt: Mihi lex mea, tibi tua: uos ab eo quod ipſe operor eſtis liberi, ego inuicem ab eo quod uos operamini. Quibus munimentis tuta erit cuiuslibet ſcurræ, aut lenonis, aut tyranni inſtitutio.

LIBRI IIII. FINIS.

IOAN-

IOANNIS LO/  
DOVICI VIVIS DE  
Veritate fidei Christianæ Liber Quin-  
tus, qui est de præstantia do-  
ctrinæ CHRISTI-  
ANÆ.



ULTI, quum genus hominū, tot  
dissectum opinionibus sententijsq;  
de religione contemplantur, attoni-  
ti ac dubij exclamāt, quid nam ho-  
rum est uerū, quid sequendū? Sunt  
qui in discordia contraria sententiū coarctati, qua-  
siq; in magnas adducti difficultates, dum non ferunt  
pondus aliquod cogitationis & considerationis, ut  
cognoscant quid in quaque insit opinione ueri, dam-  
nant omnia, nullū ritū colendi numinis uerū esse, &  
pietate ipsam fictū esse nomen pronunciant, absque  
re ulla: & eos qui rationē aliquā pietatis tradiderūt  
hominibus, uafros fuisse homines atque impostores,  
ut Mosē, Iesum, & Mahumetē. Mosē fucū fecisse fi-  
lijs Israhēlīs, Christū nobis, Mahumetē Arabibus. nec  
populos regi posse, & quò uelis adduci, nisi specie  
quadā religiōis: cuius rei plurima sunt exēpla, uelut  
Minois, Lycurgi, Sertorij, Africani maioris: eamq;  
ad rem utilē esse formam religionis aliquā. ad quod  
dictum

dictum non ratione impelluntur ulla, sed rabie quadam & odio aduersus cultum omnem diuinitatis. De Mahumete paulo post. Certe Moses non tam per desertum continuuit populū illum contumacem religionis obtentu, quam illi toties spernebant, quā ui & admirabilitate prodigiorū. Quod si Moses ac Iesus Christus impostores fuerunt, omnes ergo quotquot ad religionis rationem aliquam homines sunt adhortati, eodem concludentur uicio: quoniam religio nihil est, nec Deus curat res humanas. Itaque philosophi omnes deceptores, tum & ij quoque qui uirtutē docent, animosq; formant ad rectū & ad humanitatem. quippe amota pietate, & quod ad eā sequitur Dei prouidentia, quæ potest uirtus post rectū superesse: imò nec animus ipse est aliquid: & si quid habemus ingenij, id totum consumendum est in conquirendis corpori utilitatibus & uoluptatibus. Legum lattores igitur, parentes, educatores, magistri, non impostores modò, sed sæui ac crudeles, qui libidines animi coërcent, & unūquemq; ita formant fingūtq;, ut publico bono magis seruiat, quā proprio. Sed quid homines ad æstimationem reuocamus? Deus ipse primus deceptor, & maximus, qui religionis cupiditatem respectumq; humanis mentibus indidit. Sed istis ut religio & mens nihil sunt, ita nescio an aliquod sit numen. Qui nam igitur restant uere sapientes, laude omni digni, quibusq; humanum genus nūquam



quam sit soluendo, duces ad omne bonum? Apicius uidelicet, qui de cupedijs scripsit: Ouidius, qui amatoria: M. Ambinius, & Menas Licinius, tum C. Mutius, quibus studium fuit, ut inquit Columella, pistoris & coqui, nec minus cellarij diligentiam suis praeceptis instruere. Adde his mimos, surras, seruos atque administros cupiditatum corporis. hoc boues dicerent & sues, & isti qui se non alio ducunt loco quam boum & suum. At Mahumetes obtentu religionis Arabas suos sefellit. quid tum? An quia uir malus bonum est aliqua in re æmulatus, imitatio protinus mali uiri bonum uirum malum reddet? Pharmacia utitur bonus medicus ad salutem ægri, eisdem utitur malus ad perniciem. num ea res uicio uertetur bono medico? citius tu Mahumetem bonum feceris, quia in re aliqua bonum Christum effinxit, & si dissimillime: quam Christum malum, quia illum Mahumetes malus uoluit imitari. Non æmulatur ueritas mendacium, aut uicium probitas, sed contra potius uicium & mendacium probitatem & ueritatem: non filium pater, sed est conuerso. prior est enim filio pater, & falsitate ueritas, & probitas uicio. Nec dicimus, ueritas metitur fallaciam, sed fallacia ueritatem. quod sit in uniuersum dictum de omni bonorum ac malorum similitudine. Nam quod aut, non aliter gubernari populos & gentes religionis specie, quam equos freno & calcaribus, eumque in usum conducibile esse religionem: hoc uero religionis uim & naturam non tollit, sed confirmat.

Tt      osten-

ostendit enim, adeò esse religionis respectū humanis pectoribus insitū, ut uel sola religionis specie homines ducantur sicut facie uirtutis, & arte prudētiæ. Quòd si quis dicat, sine prudentia regi cœtus hominum & contineri nō posse, quid cōsequitur? an ideo prudentiam esse omnino nihil? quis sic colligat? imò potius, prudentiam esse magnā ingenij humani uim, lucem, facultatem. Itaque naturalis est homini pietas: sed hūana ignorātia, ut rectæ prudentiæ alijsq; artibus aliquid admiscet prauī, quo uiciantur, ita & religioni, quo illa in superstitionem saepe degenerat. Sed pergit impius quærere, & putat se urgere grauius. Iudæi asseuerant ritus illos suos esse à Deo: Agareni, maior pars humani generis, suos præferūt: uos Christiani in uestra sola pietate salutem esse sitam, alij alia iactant. quod tandem istorum est uerum? cui accedam? Si mēs uestra suslinere posset exitium cogitationis ac reputationis laborem, non fieret uobis quæstio hæc adeò difficilis. Quid ageretis si inter accusatorem & reum sederetis iudices? an suspensam teneret sententiam uestram, quòd actor affirmaret, negaret reus? & tanquam in angustias reducti exclamaretis, hic ait factum, hic negat factum, quid tenebo? quò me uertam? p. quo pronūciabo? Demens audi, considera, confer, perpende rationes utriusque, tum inuenies uerum facile, & recte iudicandi facultatem. Ad eundem modum in dissensione senten-

sententiarum de pietate, uide quas tandem rationes pro se adferant Iudæi, quas Agareni, quas Christiani: & si iudicium uolueris adhibere, non erit operosum profectò, quid uerissimillimū sit inuenire. Nam huic parti facile nos superioribus libris satisfecisse confidimus.

## EPILOGVS SUPERIORVM.

**E**T si libris superioribus quatuor, satis aduersus peregrinas doctrinas est à nobis disputatū, illarumq; sententiæ atque opiniones confutata: posita autem est nostra, & constabilita, tamen uolumine hoc operis huius postremo quedam ex ante dictis, ueluti epilogo quodam in memoriam reducemus Lectori, adiectis nonnullis quæ pertinere uidebuntur ad rem propositam. Itaque considerare conuenit ante alia omnia, qualis sit Dei natura & uirtus. Esse illum qui præsit mūdo optimum, maximū, æternum, infinitum, beatissimum, ita est humanis animis insitum atque informatum, ut non à magistro ullo & doctrina acceperit, sed id secum eduxerit ex matris utero, insculptum à natura ipsa in corde unicuiusq;. Secundum hoc considerandum est, qui nos simus: hoc est quæ res tandē sit homo ipse, constans ex corpore & animo. potiorē illius partem esse animum, ideoq; ad huius cultum & curam præcipuas eius cogitationes debere referri. Animum autem immortalem esse, diuinæ beatitudinis capacem, ad quā

Et      conse-

consequendam omnes nervos viresq; debet intendere. Assequi autem eam non potest, nisi cum Deo ita iungatur, ut quodam modo fiat Deus. Coniunctionem hanc nullum glutinum potest prestare, nisi solus Dei amor. Quod si religio vera ad coniunctionem cum Deo debet tota spectare, ut homo per eam uelut Deus quidam fiat, & beatitudine diuina fruatur æuo sempiterno: fieri non potest aliter, quin religio vera uniuersa, qua rectè qua obliquè, ad Dei amorē pertineat: nec quenquam posse uiam hanc religionis tradere, hoc est colendi numinis, & se illi applicandi & coniungendi, nisi is qui probe & hominē norit & Deum, & sciat quo nodo possint connecti, qualis est solus Deus: nec quenquam posse æterna illa bona polliceri homini, qui sit locuples satisfactor, nisi Deum. Idcirco Deum ipsum amore nostri adductum uenisse ad nos, ut esset tanti boni magister: & legem amoris tulit charitatem resonantem, charitatem spirantem, charitate accensam & inflammata. & quo uerius & meliore fide amaremus Deū, ostendit Christus se & patrem suum mitissimos ac lenissimos, non potentes, non ultores, ut in lege Moysis: non uult terreri nos, quia scit quanta animorum pestis sit odium Dei, ut in demonibus & damnatis. At uero quia tantum amorem nullus habet mortaliū, qui ad coniunctionem cum Deo sit satis, Christus miseratus hominum genus uenit, ut amorem illum



lum suppleret in ijs, qui in ipso uere considerent. Finis autem amoris huius tanti non est temperarium aliquod in uitæ huius celeritate præmium, sed summum in coelis, atque immortale. Hæc est pietatis nostræ summa.

## DE RELIQUIS DOCTRINIS.

**R**eliquæ autem doctrinæ qualem faciunt Deū? Transeo illos qui nullū ponunt, ut quos Græci uocant ἀθέους: tum & illos qui talem faciunt, ut præstitisset in totum tollere, uelut Epicuræos. Plinius post multas de dijs cauillationes, ad extremum ita concludit: Deus est, mortalem mortale iuuare. Mihi ser Plini, qua tandem re potest mortalis mortali prodesse, ut meritò sit illi pro deo? potest dare ingeniū, uirtutem, sanitatē, uires, ea denique quæ sunt potissimum expetenda? Quid aliud potest dare, quàm pecuniam, aut præficere prouinciæ, quod tibi Vespasianus contulit? si id sensit uir doctissimus, quid sceleratius? si dixit, ut imperatoribus suis blandiretur, quid in homine (ut ferunt) graui, turpius & flagitiosius? Egregiam nimirum uitæ & gubernandi formā imperatoribus suis tradebat. si illos in hanc adducebat opinionem, esse ipsos deos, nec ullos habere alios supra se. Cicero tolerabilius, in Officijs: Quum uero iurato dicenda sit sententia, meminerit se Deum adhibere testem: id est, ut arbitror, mentem suā, qua nihil homini dedit ipse Deus diuinius. Quid erat ne

cesse reuerentiā iuris iurandi & totius pietatis trās  
 ferre illū à Deo ad mētē uniuscuiusque, id est ad unū  
 quēq; ? quasi uero magis seipsum sit homo reueritu-  
 rus ne peccet, quā Deū iudicē & ultorē. Alij sapiē-  
 tia scrutatores Deū fingūt plenū hūanis affectibus,  
 seuū ultorē, sanguinariū, horribilē: ex quo metu fa-  
 cile in odiū transitur in quo genere sunt Iudæi. Alij  
 septū necessitate ineuitabili, ut Aristoteles. Recte,  
 qui dixit, Aristotelis doctrinā facere impios, Plato-  
 nis uero superstitiosos & daemoniacos. Nos Deum  
 omnipotentē esse dicimus, & ultro ac uoluntate sua  
 talē largitorē bonorū omniū. Sūt qui ab eo opes &  
 fortuita expetāt, & expectent: uirtutē, bonā memē  
 & alia in homine præstātissima, nō à Deo, sed à se-  
 metipsis. ut qui dixit: Fortunā Iuppiter, uirtutem e-  
 gomet mihi ipse parabo. Et Scipio Africanus, respō-  
 dēs legato Antiochi regis, sententiā ponit & cōtume-  
 liosam in deos, & homine in illis ritibus perquā  
 religioso indignā. Romani, inquit, ex ijs quæ in deo-  
 rum immortalium potestate erant, ea habemus quæ  
 dii dederunt: animos, qui nostræ mentis sunt, eosdē  
 in omni fortuna gessimus, gerimusq;. Sed quid mirū  
 eos talia dicere, quū Tullius (ut Augustinus inquit)  
 philosophaster, posuerit in tertio libro de Natura  
 deorum: Quis agit Ioui gratias quod sit bonus? hoc  
 enim sibi debet. Quomodo de Deo suo poterant sen-  
 tire abiectius, qui illum facerent uelut œconomum  
 fortune,

fortune, distribuentem res uiles & despicabiles: maximas autem & præcipuas unumquemque sibi parare, ac debere, non illi principi domino rectori uersorum? O cæci, quid magis conueniebat illius beneficijs acceptum referre? Contrà enim fuisset satius dicere, fortuita illum negligere, magna & excelsa largiri. hoc certe fuisset Deo dignius. Sed cedò, unde habes corpus? an non ab illo? unde animum, unde mentem? nōne ab illo? unde pronitatem ad bonum, unde facultatem? An non uidere ab eo habes, qui est oculos in te fabricatus? Eundem in modum usus uiri um animi illius est, à quo mentem accepisti. Sed quē admodum uidere debes naturæ, non uidere autem quum libet, tibi ipsi: ita etiam uirtutem & sapientiam, & alia quæ per animi facultates assequeris, Deo debes, à quo sunt illæ facultates: non uti autem illis, aut præue uti, tibi ipsi. quod nec isti ignorant. Nam qui dixit, Fortunam Iuppiter: idem ipse alio loco, uelut sui oblitus, dicit,

Orandum est, ut sit mens sana in corpore sano.  
& idem Cicero: Eam illi mētem dederunt dii. quod frequens est apud Homerum, ut seruis dimidium mētis Iouem eripuisse. Sed Plato in Memnone expressius ait, uirtutem nec parari exercitatione, nec disciplina, sed Dei dono. Nos à Deo expectamus felicitatem æternam, rem & dante & accipiente dignam. alij ob corporis commodā Deum colunt, ut appare

at eos ea ipsa commoda chariora habere, quàm Deum: sicut propter opes & copias uitæ, principes affectantur & colunt.

CHRISTVS ATTVLIT LVCEM.

**H**Aec & multa alia absurdiora dicuntur ab impijs, & dicebantur longe plura ante aduentum Christi. Sed Christus, ut sol, non modo hemisphaerium suum compleuit luce, hoc est Ecclesiam suam, sed partem alterius, hoc est homines aliarum sectarum. Poeta enim post Christum pudefacti ineptijs & dementijs superiorum poetarum, ad altiores sensus conati sunt illorum nugas traducere. De Platonicijs hæc dicit Aeneas quidam illorum affectator. Postiores Platonici multum à mente & sententia Platonis discesserunt, & quæ uident absurde esse dicta à Platone, uelut de transitu animarum ex corporibus in corpora, uelut interpretationibus, & aliquid sacratius latere docent, nomina mouentes, sensus miscentes, ueteres autem nihil mutauerunt. sic ille. Veteres uocat, qui ante Christum fuerunt. Itaque dicunt iam & gentiles & Iudei, quæ nūquam illorum maiores ne somniarant quidem: ut de animæ immortalitate, quod unus sit Deus princeps omnium, quod illi curæ sunt omnia, homines potissimum, quod is optime colitur puritate animi & sanctimonia, quod præmium pietatis sit uita sempiterna. Philosophorum ueterum quàm perplexa sunt omnia, & solis acutis  
atque



atque exercitatis hominibus congruentia, & præter hæc etiam obscura, dubia, incerta? nunc reconditissima mysteria scitu digna & necessaria melius nostræ mulierculæ intelligunt, quàm maximi olim philosophi. Quæ sapientia potest esse maior quàm ea, quæ sic tum res abditissimas exposuit, tum mentes reddidit ad maxima & sublimissima capienda perdociles? non longo tempore & cum maxima difficultate, sed facile, sed breuiter, sed confestim. Quid, quòd lex ipsa naturæ adhuc ignoraretur: propter corruptissimos mores, qui erant apud nationes omnes recepti: Christus eam ipsam legem repurgauit, spectandamq; præbuit omnibus. Erzj quam prius multum & diu quæsitam non inueniamus, purā & sinceram nunc oblatam oculis agnoscunt omnes, atque amplectuntur: ingrati aduersus authorem tanti beneficii. Non docuit nos Christus singula per se, sed prolato in uniuersa splendore suo, omnia sumus conuitti. Sapientes ex seculo alij a'ia tradiderunt de cursu cœlorum & siderum, de causis in natura occultis & latentibus de uiribus herbarum & lapidū, de morbis, de ædificijs, de emendo, uendendo, contrahendo, de arando & serendo, de sutoria & textoria, deq; alijs quæ sunt encyclopædiæ. Magister cœlestis sapientiæ ad ea sola tradenda uenit, sine quibus extrema in miseria maximisq; malis uiueremus: quem admodum uidelicet ad æterna illa rediremus bona,

Tt , unde

unde decideramus. hoc solum decebat illum exhibere. cetera humiliora, quæ ad uitæ huius decursum pertinerent, humani ingenij solertia reliquit.

DE IIS QVÆ SVNT IN ANIMO.

**C**ontulimus ea quæ à nostris, quæq; ab alienis sentiuntur dicimurq; de maiestate numinis, & sine bonorum. descendamus nunc ad singula hominis, ac uitæ. De mente Aristoteles dicit, pluris æstimare nos si quid sumus in altissimis aut recõditis rebus affecuti, quàm in istis obuijs atque expofitis. Quæ igitur contemplationes æquari possunt ijs quæ habentur de Deo, de rebus diuinis, maximis ac sempiternis: iam alij alias artes ac scientias reiiciunt, ut Epicurus dialecticam & mathematicas. Aggeri prohibet disputari de suis placitis. nobis sciẽtiæ omnes sunt apertæ, omnes licet \* propterea quòd quum uerum sciamus nos tenere, nullum aliud uerũ reformidamus. uerum enim uero non est contrariũ. Sunt ex impijs qui obijciant nobis, fuisse in religione nostra uiros complures ingenijs & doctrina præcellentes, per quos nostra omnia ualidis sint rationibus fundata & cõmunita. id uerò nos libet agnoscimus atque amplexamur, fuisse permulta magna & præstantia ingenia tũ naturæ acuminẽ, tum doctrinis exculta & prædita, quæ pietatem nostram sint uenerata. Ecquod argumentum efficacius, nostra esse ueriora? & in alijs sectis ac religionibus,

quo

quo quis uel ingenij acumine, uel beneficio peritiæ longius cernit quàm alij, eo minus religioni suæ tribuit: in nostra uerò, ut quisque est illius callentissimus, ita & Christianissimus. Et post fidem nostram auditam & propagatam, eruditio omnis & excellentia ingeniorum ad nostros homines demigrarunt. qui enim ex nostris fuerunt doctissimi, ijdem fuerunt totius humani generis, sua utique ætate. Iam uerò quid maius aut amplius dici potest pro nostra ueritate, quàm firmam omnē & ualidam rationem cum ea consentire? Post ingeniorum cultum affectus sequuntur, magnæ humani animi & atroces tempestates: quas idcō Stoici conati sunt prorsum reuellerē. sed hi hominē ab homine tentabant separare. Nulla potest res affectiones tollere, nisi illa quæ hominē extra humanam conditionem ponat, nempe dementia aliqua, uel stupor animi perpetuus. Ast alij quàm uarijs rationibus occurrebant hisce motibus, ne seuirent? quot adhibebant remedia morbo tam multiplici, tã multis locis tã uarie uexanti atq; erūpentis sed dū singulis nitūtur mederi, res facta est infinita, ac proinde desperata. Si quis aut inter affectus existat affectus potētissimus, is cohibet sub se reliquos omnes, ac continet. si is sit bonus, sub bona erunt gubernatiōe cæteri: sin malus, sub mala. Qui ergo affectum hunc animo immiserit bonum, is nimirum certam expeditamq; medicinam tot morbis semel attulerit.

lerit. Quæramus igitur qui sit affectus ualidiſſimus, quiq; maximæ in animo uires obtineat, & regnum firmiſſimū. Cõſtat inter ſcrutatores animi atq; ingenij, omnium animantiū hunc eſſe amorem, qui alios ex ſe omnes parit, ad ſe trahit, in ſe continet, moderatur, regit. Quis autem amor, Dei amore fortior, aut firmior? aliarum enim rerum dilutus eſſe poteſt: quippe in unaquaq; eſt aliquid quod poſſit diſplicere, & illius diluere charitatē. In Deo autem omnes amandi inſunt cauſſæ, & quo plus noris, magis atq; ardentius amabis, nec ullus eſſe poteſt ex illo amandi finis. Amore autē Dei quid ſanctius, purius, rectius, compositius? qui eſt ueritatis & ſapientiæ & rectitudinis cultus ac dilectio? Pietas igitur Chriſtiana, quæ amorem hunc inſerit humanis pectoribus, ea proſectò affectibus medetur omnibus, eoſq; in recto & legitimo officio continet. Cui erit ergo unice charus Deus, in eo erunt illi deliciæ omnes & bona conſtituta, omniaq; quæ expeti poſſunt: nec in animū poterit ſubire aliquid quo ſollicitetur aut perturbetur, ſed mira erit quies & tranquillitas, quæ uera eſt εὐθυμία. Nam illa quam ueteres philoſophi nominabant magis quàm præſtabant, ex hoc ſolo amore, nec aliunde poteſt naſci. nec ulla eſt uirtus, niſi in amore hoc. Virtus enim coli non poteſt bona fide ab homine, quem reſpectus aliquis numinis non tangit. Enimvero ſeipſum & conſcientiam ſuam non re  
uerebĩ



uerebitur, qui deos & homines nō curat. Ideoq; inefficaces sunt philosophorū praeceptiones de uirtute, quod nō firmis solidisq; fundamentis innitantur. Et haec medicina animorum hoc studium sapientiae, non ijs praeceptionibus traditur, ad quas paucissimi possunt pertingere: sed ita explicate & commode, ita ad humani ingenij naturam uimq; apte & apposite, ut in promptu sit non uiris modò, sed pueris & mulierculis, largissime ex hoc haurire fonte uberimò, & quantum uelint philosophari.

## DE OPIBUS.

**O**Pes sunt agri, uillae, domus, serui, aedificia, metalla, uestes, gemmae. haec omnia Iudaei & Agareni mirifice consecretantur, & quaerunt: philosophi nationum spreuerunt, tanquam inutilia sectatori sapientiae. Sed nec hi, nec illi facti sui possent rationem causamq; probabilem reddere: quippe qui certum fixumq; scopum non habeant, in quem dirigāt cogitationes coniecturasq; animi sui. Quamū enim ad philosophos attinet, multi egregie sunt in studijs literarum uersati, probe opulenti & numosi, ut Aristoteles, Seneca, Cicero, Plinius. Multis uicissim obfuit inopia. Sed ut philosophis fortasse sint ista impedimento, non erunt certe hominibus politicis. Iudaei autem & Agareni ita uersantur in uitae huius commodis, tanquam corpus solum habeant, non animā: adeò extrema est, uel nulla potius, eorū quae ad mentem

tem pertinent cura. Nos autem pietas sancta edocuit, homini, quod esset corporatus, corporalia hæc esse à Deo condita & tributa, ut eis utatur: hominem autem in uita hac siue peregrinari, siue exulare, tendentem semper ad uitam alteram, hoc est ad patriam. Idcirco non aliter debere nos quæ sint huic uitæ utilia sumere, quàm quæ sunt uiæ, necessarium uidelicet usum. reliqua uel prætermittenda omnino, uel neglectim possidenda: ut in domum quidem admittas, non in animum. nec sic illis implicemur atque irretiamur, ut à recta nos uia & à cura reuersionis in patriam abducant. quemadmodum nos hortatur Paulus: Dereliquo fratres, tempus breue est, superest ut qui habent uxores, sint tanquam qui non habent: & qui plorant, tanquam qui non plorant: & qui utuntur mundo hoc, tanquam qui non utuntur. Quàm laudatur illud quod Catoni seni adscribit M. Tullius? Ego, inquit, sic ex eo è uita, tãquam è diuersorio. non addit tamen, quod erat maius, & ad sciendum conducibilius, quò tenderet. Quanto sapientius noster Paulus? Non habemus hic ciuitatem manentem, sed futuram inquirimus. Nos ergo soli his rebus uitæ recte utimur, qui quorsum pertineant nouimus: quod ignorant profani. Iudæi & Agareni nobis obijciunt, quum hæc omnia propter hominem sint creata, quorsum attineat repudiari? Nos uero non repudiamus, sed recte utimur. sumimus ad necessitatem,

non

non admittimus in affectum. Imò addam aliud, quod illi magis admirentur: nos qui usum illarum rerum capimus, magis illis frui, & suauius, quàm qui anxie quærūt & complectuntur. torquentur enim illi, non fruuntur: & sollicitus semper animus & intentus uel in quæstum, uel in custodiam, non potest gustare quæ sit in utendo iucunditas. Nec nos possessiones nostras uel ad uanitatem conuertimus, uel ad superbiam, uel ad obscenas uoluptates: quod qui faciunt, rectum usum corrumpunt eorum quæ Deus est homini largitus. Sed nec in quantitate opulentie sita est illarū utilitas. usus enim naturales exigui sunt, facile naturæ satisfit, ut opinioni ægerrimè. Mea nihil refert, si quum ego pane uno indigeam, sumam ex panario ubi duo sint panes, an ubi sexcenti: uno certe est opus.

## DE PROSPERIS ET ADVERSIS.

**E**T hæc quidem ad eas necessitates pertinent, quas imposuit natura. Sunt necessitates aliæ, quas ipsi consinximus, genus, dignitas, honor, potentia, gloria: quæ alij simul admirantur uehementius, simul expetunt auidius, quàm necessaria naturæ. Aduersus hæc multa dixerunt sapientes nationum, & conati sunt aures suorū ad uoces has populi tanquā ad cantus Sirenarum obturare, sicut Vlysses fecit, Sed quorsum hæc deuitantur omnia, si nihil est præter hanc uitam? Dicunt, ut hic uiuas quietius. Quid si cum

si cum his uiuam quietè? doce tu me in tranquillitate animi uiuere, reliqua erūt facilia, siue caream, siue possideam. Dolor corporis grauius omnes percellit ac commouet. hunc quàm frigide adorsi sint philosophi lenire, dici non potest. Tertius est Tusculanarum quæstionum Ciceronis, in quo ille ueterum remedia collegit ad sedandum dolorem, quod citius certe ex officinis medicorum perfecisset, quàm philosophorum. adfert enim ea quæ neminem possint iuuare. Ad curam nos honesti reuocat, non esse uiri gemere, aut affligere se in dolore: quasi in cura honoris & decoris uersari possit animus, quum acerbis dolorum facies admoventur corpori. Ferre autem dolorem grauius aut patienter, non ex præceptis est aut monitis philosophiæ, sed ex corporis uiribus, uel diuturna assuefactione. Ita ut urgens cruciatus in corpore imbecillo ac tenero facile in desperationem ageret animum, nihil altius quàm hæc humana reputantem. ut minus mirandum sit, fuisse in gentibus tam multos, qui uitæ renunciarent ex dolorum impatientia, ut sibi manus uiolentas intulerint. Nos autem, quos Christus noster intentos semper esse in patriam, hoc est in Deum iubet, prospera uitæ omnia tanquam superflua nihili pendimus. quid potest accidere in hac peregrinatione uitæ, quod nobis uel attollat animos, uel deiciat, modo de reditu ad immortalitatē bona & firma sit spes in nostris pectoribus?



ribus? Prospera & aduersa illi habent, qui affectus in rebus æui huius defixerunt: nobis talia esse neque unt, qui animos gerimus alibi fixos & constitutos, nempe in Deo, re firma, stabili, & sempiterna, & de qua malum nuncium audire non possumus, qui animos nostros conturbet, nisi nos ipsi ultro faciamus. In doloribus autem quod lenimentum, quanta consolatio, immitti eos à sinente Deo, patre nostro indulgentissimo, interdum quoque approbante & iubente, ad nostras utilitates ingentes, ut corpore & uita hac despecta, atque etiā inuisa, de altera cogitemus crebro, eamq; optare consuecamus. Plurimos terrent incerta futurorum, ita ut alij ad magos & chaldaeos ceterosq; diuimaculos confugiant, alij angoribus conficiantur suspensi noctes & dies, intentiq; in exitū suarū rerum, aut eorū quos habent charos. Nos uero magister & legislator noster iubet diligētes quidem & assiduos esse in rebus præsentibus, & nauare quam possumus operam: sed curam eorum quæ euentura sint, ad se unum remittere. nam in nobis uana esset, & superuacanea: se unum uētura cognoscere, & posse qualia uelit præstare: nosq; peculiari sibi esse curæ, à quo sumus in hanc corporis animiq; præstantiam educti. Quod si tantæ sumus curæ parentibus, qui corpus hoc genuere: quanto illi oportet nos maiori esse, qui eam parentibus facultatē tribuit, & corpus ipsum formauit, & indidit ani-

mum, qui alit quotidie, qui sustinet, cuiusq; ope uitā propagamus? Dicat mihi iā aliquis, in qua tandē philosophia, in qua religionis specie tam excellētia sint ad uirtutem omnem præcepta exhibita, tam ualide consolationes in aduersis, tam præsentia morbis remedia, tam certa, efficacia, expedita ad summi boni consecutionem consilia.

## DE MORTE.

**S**Eduita exitus grauissimè omnes perterrefacit: nec quicquam est homini horribilius, quàm è uita discedere. eaq; de caussa innumera sunt à philosophis excogitata munimenta, quibus nos aduersus tantos terrores sepirent: sed omnia tamen, mea sententia, infirma & ruinosa. qua de re quoniam maximi est momenti, uolo paulo quàm in cæteris, diutius immorari. & diffusius locum hunc tractare. Nam si de alijs uitæ commodis aut incommodis longe profanos omnes recte præcipiendo superamus, in hac certe consolatione maximis eos interuallis à tergo relinquimus. Sic ergo illi disputant, & has adferunt consolationes. Primum ex hac uita, quòd morbos & cruciatus uel iā urgentes, uel certe impendētes per mortē effugimus, tum senectutē, quæ & ipsa non iniuria morbus nominatur, & in quam uelut in se itinam defluit quicquid potest in corpore incommodorum excogitari, affligi uoletudinem, debilitari. sensus, tolli memoriam, hebetari iudicium, frangere uires,

uires, denique nō secus concuti hominem totū quā  
infirmam domum, si ingenti sit tormento icta. hinc  
morositatem nasci, & continuas querelas, odiumq;  
aliorum, & suimetipsius, ut omnibus sit & ipse sibi  
intolerabilis. An non, inquiunt, eripi tantæ imminē-  
ti tempestati, & in portum subito transferri, ingen-  
tis beneficij loco reponendum est? Addūt humanos  
casus, qui in longam uitam incurrunt, egestatem, in-  
famiam, odium, luctus suorum, seruitutem, exilium,  
carcerem, metus. In ipsa quoque uita quamlibet iucū-  
da, docent quā multo sint plura amara quā dul-  
cia, ut momentaneæ sunt uoluptates, ac diuturnæ æ-  
gritudines corporis & animi. Iam quærūt quid mor-  
iens metuat, an ea quæ ante mortē, an quæ post mor-  
tem. Ante mortem est uita, in morte leuis est uelut  
obdormitio: ut multi sint in uita maiores cruciatus,  
quā mors ipsa. Post mortem uero est æternitas in  
qua si omnia cadant simul cum corpore, infelices  
non sumus futuri, nec aliud erimus quā eramus an-  
tequam nasceremur, nec aliter illa sentiemus quā  
profundum aliquem sine insomnijs somnum. sin ani-  
mus immortalis sumptus origine immortalis perseue-  
rat, magna nos & expetēda manet foelicitas, ad quā  
celerrimo esset cursu properandum. Hæc illi. quæ di-  
latant, amplificant, exornant, repetunt, retractāt,  
infigunt: sed hæc tamen summa est omnium, quæ am-  
l is uoluminibus sunt à maximis ingenijs cum sum-

ma facundia tradita. Sed illi quòd procul à uero ab-  
essent lumine, coniecturas quæsierunt in tenebris,  
quæ nihil essent magis ualiturae, quàm ut in affectū  
cuiusque animum incidissent: & tantum haberent  
ponderis, quantum quisque apud se habere patere-  
tur. Excutiamus, si placet, singula. Non esse refugi-  
endam mortem ais, quòd morbis & corporis dolo-  
ribus subducit. Quid dices ei qui bene ualet, qui est  
iuuenis solido & firmo corpore? Is certe responde-  
bit tibi: Atqui sine me uiuere quàm diu hoc in me ro-  
bur manet, quoad hoc corpus, hic animus uiget: mor-  
bis ingressis cedam lubens è uita. Senectutem autem  
quum appetentem è proximo uidero, si tantum est  
quantum prædicas malum, lubens morte commuta-  
ro. Quanquam quid est quod senectutem tantopere  
extimescamus, quum in ea uideamus complures in-  
tegris & uegentibus fuisse corporibus? non proferā  
tibi magnos illos, Gorgiam, Isocratem, Sophoclem,  
Catonem: non ipsum eundem Socratem, qui apud  
Xenophontem libenter se de uita exire dixit, ut in-  
commodis senectutis subtraheretur: ibiq; ea percen-  
set multa sanè & horribilia, sed quorum senex ipse  
septuagesimum prætergressus annum nullum sense-  
rat adhuc. De uulgo in urbibus, in uicis, uillisq;, o-  
stendam tibi octogenarios permultos tam integro  
corpore, quàm quum uicesimum agerēt annum. An  
non celebre est apud nos illud Gorgiæ, credo, dictū?  
à quo



à quo quum esset quæsitum, cur tam diu uellet uiuere: Nihil habeo, inquit, quod senectutem incusem. ne iubeas me propter senectutis incommoda senectutē morte commutare: doce potius sobriè ac temperanter uiuere, quo minus in illas senectutis molestias & uoragines incurram. nam intemperans iuuenta corpus tradit effœtum senectuti. Libellus est M. Tullij, qui Cato inscribitur, in quo senex ille apud adolētes Scipionem & Lælium causam senectutis defendit: tam refertus bonarum rerum, ut Græcis uisum sit illum in suam linguam uertere. itaque græce nūc habetur. Eum librum si quis legit, satis sibi uidetur aduersus mala senectutis armatus. Quid, quòd natura eo singula artificio composuit, ne quid in contraria subito transiliret, nec ullam admisit repentinam rerum mutationem. non ignem aquæ admouit, sed medium interiecit aërem, ita descendentem ab igne ut sensim fiat aqua, ita ascendentem ad ignem ut sensim fiat ignis. Nec decembrem sequitur statim iunius, sed uer est medium: cuius prima pars hyemi est simillima, postrema æstati, media ex utroque est uelut commista & temperata. Sic in uita hac nostra non transitur à uirore illo iuuentæ ad ariditatem senectutis, uno gradu: sed ita senescimus, ut senuisse nos intelligamus, non sentiamus senescere. Itaque extrema pueritia assuefacit nos primæ adolescentiæ, hæc mediæ, media ultimæ, tum hæc firmæ ætati: pau-

latim ad senectutem progredimur tanta similitudine uicinitatis, ut quæcunq; duo coniuncta non duo esse uideantur, sed unum. Quum ergo tam faciles sint, mollesq; gradus, priora semper sunt adminiculo sequentibus, ut illis assuefacti minus hæc dura sentiamus. Accidentia uero senectutis eleuauit copiose Cicero, & quas secum utilitates adferret exposuit. Itaque cum caussa illa perorata sit à tanto patrono, & qui dem assignata Catonis personæ, ego liberatum me hoc onere existimare debeo senectutis defendendæ. Liber enim est in omnium manibus. Casus nobis humani ob oculos proponuntur. Quid facias illis qui procul à ciuitatum inuidia & fauore in agris & solitudine uiuunt, suo acquiescentes, eoq; minimo? quiq;, ut Vergilius inquit,

Nec doluit miserans inopem, nec inuidit habenti.  
Sed ut metu istorum accidentium mortem non reformidet is, quem uos adhortamini, oportet efficiatis, ut hæc illi graua & propè intolerabilia uideantur. Ergo frustra consumpta est uobis tanta oratio, dum persuadere omni ingeniorum ui contēditis, hæc mala non esse, & recipienda à sapiente si eueniant, & non solum æquis perferenda esse animis, uerum etiā letis atque alacribus. quod si fecerit, & ita animo & corpore assueuerit, non plus iam hæc uestra posterior oratio perfecerit, quàm si conemini persuadere ne mortem expauescat, quod illa eum liberabit à  
deambus

deambulatione uel sessione neque enim homini oratione uestra persuaso & permoto, alio erunt loco mala illa, quàm sedere uel ambulare. inter media enim posuistis. Certe qui mala dixerunt, ferenda uoluerunt esse magno animo & libenti. nec ab ea sententia Epicuræi discrepant, milites uoluptatis. Age uerò, an non meministis totam hominum uitam spe fulciri, uelut fundamento quodam? ruituram protinus, si spes detrahatur. Metuenda est egestas, at speranda etiam opes times infamiam spera decus. formidini exilij, carceris, orbitatis, seruitutis: oppone fiduciam dignitatis, in patria, uitæ tuorum, libertatis. Quorum est dictum illud, an non à uobis profectus? Senex diu uiuendo multa uidet quæ non uult. At & multa quæ uult. Hic audio exempla eorum quos longa ætas uertenti fortunæ tradidit. Priamus commemoratur, Cyrus, Pompeius, Crassus. quasi uero non in utrunque sint infinita exempla eorū, & qui in senectæ ex fortunatis facti sunt infœlices, & qui rursum ex infimis abiectisq; ad fortunæ culmē sunt euecti. Marius post exilium & paludes consul Romæ fuit, & proscriptor postquam proscriptus. Sylla itidem proscriptus proscripsit. Augusti fœlicissima fuit senectæ, post tot in ipsum coniurationes. Tyberius à Rhodiensi exilio ad imperium uenit. Claudius aule ludibrium, princeps fuit orbis. Vespasianus post Neronis inimicitias, imò contemptum, im-

perauit. Sic uisum est res humanas temperare illi, qui  
 quum nihil sine maximo faciat consilio, nos tamen  
 Fortunā nominamus, quòd consilia non assequimur.  
 Non ergo immeritò exclamat Tragicus ille,

Nemo confidat nimium secundis,

Nemo desperet meliora lapsis:

Miscet hæc illis, prohibetq; Clotho

Stare Fortunam, uersat omne Fatum.

Iam uerò qui est fortunatus, istis tuis ad mortem ex  
 hortationibus illud unum respōsum opponat: Quæ  
 nunc habeo bona uideo. sentio, fruor, & maiora spe  
 ro, certe puto hæc me conseruaturum: illa quæ tu o  
 stendis mihi mala, in incerto. cur iubes me certa &  
 præsentia deferere metu incertorum, & quæ fortas  
 sis nunquam contingent? An non est ignauus miles,  
 qui prædam relinquat incerto metu hostium, quum  
 adhuc nullum uideat, nec speculator aduenire nun  
 ciarit, sed tantum uulgarit rumor posse uenire? adde  
 etiam si tibi hoc placet, solere? Ego ne ut metu incō  
 modi spem commodorū abijciam? & metu ne sim in  
 foelix, ut certam & præsentem foelicitatem uidens  
 prudensq; deponam, & moriar metu mortis? uideā  
 saltem hostes, satis tunc fugiam in tempore, quum  
 pugnare cœperimus, quum nullam prospiciam reli  
 quam spem salutis. nā illa quæ tu mihi horrenda pro  
 ponis mala, quorum euitandi gratia iubes me alacri  
 & fidenti animo mortem oppetere, si quo uel fortu



ne beneficio, uel consilio, uel arte humana detur ef-  
fugere, ista ipsa uelut condimenta suauioremi mihi in  
posterum reddent fœlicitatem, ut cœli serenitas post  
nubila & tempestates tetras longe gratior est. Hæc  
si quis illis respondeat, quid poterunt ipsi adijcere,  
nisi hominem hunc esse uoluptarium, non satis for-  
tem, insipientem? Sed pergunt nos confirmare: quid  
times, quod ante mortem? Ego uero id non timeo,  
imò amplector & amo. Mortem ipsam timeo, &  
magis quod mortem sequitur, quomodo metum mi-  
hi hunc eximitis? Mortem uelut obdormitionem ef-  
se dicitis. Nescio, non credo, abominor. intolerabi-  
les uideo esse cruciatus, quum anima ab una aliqua  
corporis parte separatur: quanto acerbiores esse o-  
portet, quum tota à toto corpore diuellitur? Quòd  
si in sene fortassis leuis est dissolutio, quia naturalis:  
in iuvene uerò non potest non esse atrocissima. quem  
uos ipsi confitemini sic mori. quomodo poma uiridia  
adhuc & immatura, ui quadam ex arbore euellun-  
tur: quum matura, hoc est senes ipsi, decidant spon-  
te sua. Iam post mortem magno me iubetis esse ani-  
mo. hoc dilemmate: Aut senties aliquid, animusq; im-  
mortalis erit: aut penitus cum corpore extinguetur,  
ut simul sensus omnis intereat. Miror homines adeò  
ingeniosos & doctos, hoc esse dilemma magno con-  
sensu amplexatos. nihil ne est tertium, ut aliquādiu  
post corpus maneat, & morti sit obnoxius? quod

Stoicis uideo placere. ut si iungat se cœlo purus, sit  
 immortalis: sin impurus, & scelere maculatus, aërē  
 hunc perrumpere non possit, det pœnas, postea mo-  
 riatur. hanc secundam mortem magis adhuc timeo,  
 quàm priorem. Iam quid si nihil sentiam? non eris in-  
 fœlix, non magis quàm antequam nascere. Hoc di-  
 cere homines sapientiæ professores? Antequam nas-  
 cerer, nullū habebam uitæ sensum: nūc posteaquàm  
 sum natus, expertus sum non solum uitam, sed ea qui-  
 bus uos ipsi affirmatis nihil esse maius aut presta-  
 bilius, sensus, mentem, rationem, iudicium, hanc mū-  
 di uarietatem & pulchritudinem sum contempla-  
 tus, hoc admirandum naturæ theatrum uidi, tetigi,  
 mente & ratione multa sum consecutus, & conse-  
 quor: istis me orbari tantis bonis, hoc uero ita mihi  
 uidetur malum, ut nullam inueniam consolationem.  
 Pucro, uel dementi, ijs denique qui uita solum corpo-  
 rea usurpant, & uoluptatibus dediti uiuunt, fortassis  
 non molestū fuerit eodem esse loco post mortē, quo  
 ante uitam fuerint. mihi uerò, qui ratione, qui iudi-  
 cio innixus uiuo, intolerabile. non quòd tū post mor-  
 tem, uelim nolim, si nullus est sensus, alia futurus sim  
 conditione: sed quòd nūc mihi reputanti nullum po-  
 test solatiū adhiberi, nisi saltē in uita manere quàm  
 diu licet, & bono isto tā simili diuinæ naturæ quàm  
 diutissime perfrui. An nescitis duriores esse egesta-  
 tem ei qui aliquando fuerit diues? nunc uitæ dulcedi-  
 nem

nem experto, quam sapientes maiorem percipiunt  
quàm stulti, miserrimum uidetur in illas incidere te-  
nebras. in quibus bonis istis omnibus priuer, imò ni-  
hil futurus sim repente ex tanto & tam admirabili.  
cogito quid tandem illud futurum sit, quū nihil senti-  
am. Chaos uidetur mihi esse horribile: non assequor,  
terretur animus, uel solam cogitationem refugit ac  
reformidat, nec pati potest. quanto magis aditū? At  
somni species est suauissimi sine insomnijs, à quo ne-  
mo uellet libens excitari. Quis id dicit? Socrates. Mi-  
ror, ubi? in foro, ad iudices. Credo. quanto aliter in  
carcere ad discipulos, homines sapientiæ studiosos,  
quàm ad profanam & uoluptariam plebem? Quis  
enim sapienti laudaret longum somnum, & quidem  
sine uisis ullis atque insomnijs, qui sciat & persua-  
sissimum habeat, uitam uigiliam esse, & quo diuti-  
us uigilet, hoc se magis uiuere? somnum abhorrere,  
uelut morti simillimum. ut in uita homines sint sapi-  
entes, Deo proximi: in somno nihil distet ab stirpe,  
aut saxo. Negat Cicero esse ullum qui Endymionis  
uitam uelit uiuere, uidelicet quòd actionem tanquā  
rem iucundissimam amplexamur, perpetuam illam  
& eternam quietem non secus ac maximum quod-  
dam malum refugimus. An Socrates ipse quatuor di-  
es sic uoluisset dormire suauiter sine insomnijs: qui  
etiam eo in ipso foro uitam se ea lege accepturū ne-  
gat, si sibi quiescendum sit, nec instituendum ciuita-  
tem?

tem? Verum quid si sentiam, & immortalis sit mens, maxima proposita gaudia, non uides te ad æternam quandam beatitudinem migrare. Nulla est in hoc dubitatio? an non sunt ijs qui pessime uixerunt, supplicia? Non dissimularunt esse, sed ita tradiderunt, ut hæc fabulosa sint eorum sapiētibus uisa. Ixion, & Sisyphus, & Theseus, & Phlegias poētis sunt relictæ, à philosophis reiecta & irrita: nec inuenerunt fidem, quæ Plato & alij quidam philosophi de præmijs uirtutis, de poënis scelerum balbutierunt. Ipsi enim iidem non satis suis ipsorum uerbis & doctrinæ assentiebantur. Cur Cicero inter tot consolationes nunquam illa sua utitur sententia, è sexto d: Republica: Omnibus qui patriam conseruauerint, adiuerint, auxerint, certum esse & definitum in cœlis locum, ubi beati sempiterno æuo fruuntur? quia uide licet, ut alia permulta, dixerat ore, non pectore. De clamatum est à magnis oratoribus ætate Senecæ, an Cicero roget ab Antonio uitā. omnes sunt in hoc toti, ne faciat: & proponūt ei ob oculos gloriā. Quid homini, qui duos libros de Gloria scripsit, seu potius contra gloriam, cū gloria? Cur nullus eorū ex suis Ciceronis uerbis Ciceronem ad uitæ contemptū, & alteram uitam expetendam erigit & confirmat, omnibus qui patriam conseruarint, adiuerint, auxerint? Quocirca relictæ est cōsolatio philosophorū de morte, latroni grata, bono uiro suspecta. Quid enim



nim magis gaudeat homo nefarius, quàm per mortē uel adimi sensum sceleratæ uitæ, uel facinoribus suis paratam fœlicitatem sempiternam? bonus uero uir quū dubiè uidet proponi dilemma. & sub conditio- ne, nō tam de propositis præmijs lætatur, quàm de suspiciōe interitus animi sui sollicitus est, ac mœstus. Ergo istorum sapientum consolatio aptior est homi ni sceleroso, ad eum in facinorosa uita confirmandū, quàm probo uiro ad solatium exitus de uita. Quid enim aliud latroni & parricidæ dicas, quàm si eum nutantem uideris, parantem ad meliorem se frugem recipere metu supplicij: Quid tu homo ignauissime supplicium times? quod te uel liberabit à maximis malis, si totus moreris: uel ad incredibilia bona trās feret, si tui melior pars remanserit. Quemadmodum ferunt Dionysium Syracusanum, quum uideret bo- uem à coquo suo mactari, & tã celeriter extingui, dixisse: Propter rem adeò breuem ut est mors, depo- nemus tam pulchrum imperium & regnum? Nulla est ergo uera & certa bonis consolatio, nisi quæ su mitur ex spe alterius uitæ: quòd Deus mundi præses & iudex omnium afficiet præmijs immortalibus uir tutem, supplicijs autem uicium. Itaq; illa Pauli ad Thessalonicenses est uera & sapientissima consola- tio: Fratres, nolumus uos ignorare de dormientibus. si enim credimus, quod Iesus mortuus est & resur- rexit, ita & Deus eos qui dormierunt per Iesum ad ducet

ducat cum eo. Hæc una tam brevis, tam simpliciter  
 proposita, omnia omnium philosophorum tam acu-  
 te excogitata & inuenta superat. Quum autem ad  
 mortem uentum est, quam solatiū, quæ tranquilla-  
 tio animi, quum recordamur Christum pro nobis de-  
 pendisse, illum esse interpretē & deprecatores no-  
 strum apud patrem efficacissimum, illius fultos uera  
 fiducia ad eternitatem & patriam nostram nos re-  
 uerti? Quid adferent uniuersæ philosophorum scho-  
 læ, non dico huic simile, sed quod ulla sit ex parte cō-  
 parandum? Ergo quod scimus pijs hominibus sempi-  
 ternæ beatitudinis locum esse in cœlis paratum, nō  
 quidem uitam odimus, aut reijcimus, sed non auide  
 amplectimur ac retinemus, desiderantes coniuncti-  
 onem cum Deo. Hæc demum est una maxima con-  
 solatio in egestate, in exilio, in carcere, in morbo, in  
 cruciatibus, in grauescente per senium corpore.

#### DE REPUBLICA.

**O** Per æ precium est expendere, quàm de rebus  
 nostris homines impij non modo & ratione,  
 sed stomacho pronunciant. Nam quum eos mores  
 lex nostra in animos hominū inuehat, quos descrip-  
 simus, ipsi tamen ineptos aiunt esse nos ad rempu-  
 blicam, hoc est ad cœtus & congregationes celebrā-  
 das & colendas. Alij grande in nos maledictum ren-  
 tur se iacere, quod idoneos esse negent bellis gerēdis:  
 quia nostra lex nihil iubeat accuratius quàm amorē

&

Et patientiam, prohibeat odia atq; ultiones. perinde ac si dicant, nos parū esse ad exercenda latrocinia accommodos. quid enim aliud est bellū, si res examinetur subtilius? Sed quæstionem hanc in præsentia omitto, quòd non est instituti huius. loquar de ciuitatibus, hoc est, de hominū consociatione. Cuius originem progressus exitusq; si quis animaduertat, nihil aptius uidebit illi posse excogitari, quàm legem nostram, Et homines nostra lege doctos instructosq;. Non congregantur homines propter uitæ necessitates, ut est à philosophis animaduersum præclare, sed quòd homo est à Deo conditus animal societati aptissimum. idq; duabus potissimum rebus declaratur, beneuolentia Et sermone. Deinde congregati iam, Et domicilijs collatis, quoniam affectus in animo tumultuantur, prauæq; cupiditates corda exagitant, necessaria fuit iustitia, quæ omnibus in commune cōsuleret, motus illos animorū temere concitados cohiberet, Et parère cogeret rectæ rationi. Iustitia autem Et legibus est explicata, Et prudenti alicui ac bono uiro commendata est, ut illam adhibitis publicis uiribus ac potestate tueretur. Atq; ut maximum ciuitatis bonū est pax Et concordia, ita maximum est malum dissensio, Et odia publica Et priuata. unde nascuntur simultates, inimiciæ, lites, iurgia, Et illatio manuum ad pugnam, Et cædes. Odia autem nascuntur uel ex superbia Et inuidentia, uel

ex praua rerum cupiditate. Quæro iam, qui nam erunt ad uicia hæc procliuiiores? ij ne qui solutos habent affectus ab imperio rectæ rationis, extimulatos autē immodico amore suimet ipsorū, & infinita cupiditate rerum omnium: an ij qui ex lege sua peregrinos se esse in uita meminerunt: & reputant, cupiditatesq; habent uel omnino nullas, uel perexiguas, intenti semper & incumbentes in reditum ad patriam? Quid uero ij qui reliquis omnibus hominibus conglutinati sunt beneuolentia? Christus in amore Dei & hominum dicit legem suam uniuersam esse sitā, iubet nos Deū plus amare quā nosmetipsos, homines uero ut nosipsos, nec solum amicos redamare, sed diligere etiam & bene cupere inimicis, quiq; in nos infestissimo sunt animo. & opera exhibet quæ ad possunt malefica. Hoc est præceptū cui maxime repugnat caro & reluctatur, seq; uelut indignissimis deuinciri compedibus clamat: Ego ne illum, qui me infestat, urget, lædit, placide ut aspiciam, & non referam gratiam quando possim, aut saltem pessime cupienti non male uelim? adeo ut quidam contra naturam omnem esse præceptum illud causificentur. Sed certe naturalissimū est, reductum à Christo Domino. & reparatum cū natura ipsa. Quid enim est in quod fertur nostra mens, & quo fit præstantior atq; excellentior? an non lux & cognitio? quid quod uoluntas, an non amor? nam odium carnificina est illius, &



lius, & tyrannus. Tam ad naturam est uoluntatis amor, & odium contra naturam, quàm intelligentiæ nostræ cognitio & ueritas, tenebræ autē & falsitas contra naturam. Videtur ergo tibi naturæ esse consentiens ac conforme, uelle me in ignorantiam et caliginem incidere, quòd aliquis alius incidit? an imperfectionem mentis meæ in sua ignoratione tollet aut excusabit aliena ignorantia? uicium alterius nō diluit meum, nec purgat: qui odit in uicio, in morbo est uoluntatis. An nō contra naturam est uelle ægrotare, quòd inimicus meus ægrotat? & quoniā is qui mihi male uult, abijcit perfectionem suæ mentis, tanquam ita mihi satisfiat, abijcere me etiam meam? Furor est hic potius, quàm ultio: uel uoluntas praua, infligere te tibi ipsi magnam plagam, quia id uoluit alius facere: & cupere te miserum esse, quia sit tuus inimicus. Ergo uocat nos Christus, seu reuocat uerius, ad integritatem naturæ nostræ, ad similitudinem patris sui & nostri Dei: quem & si oderunt demones, atq; hominum multi, ipse tamen nihil odit, omnia diligit, rebusq; omnibus quantum per ipsas licet benefacit. Charitate hac tam diffusa, tamq; late patenti stabilita inter homines, quæ leges erunt opus in cœtu omni & communicatione uitæ? Recte Boëtius: Quis legem dat amātibus? maior lex amor est sibi. Matri nullæ sunt humanæ leges aduersus filium, quoniā natura indidit eius pectori talem amo-

ris legem, ut reliquæ omnes sint superuacaneæ. Cupiditatibus, inuidiæ, iracundiæ, superbiæ, rapacitati, ambitioni hominum iniecti sunt legum freni. ubi-  
cūq; amor uiget, absunt hæc omnia: quo fit, ut leges sint minime necessarie. Quis irascitur ei cui bene uult ex animo? quis postulet ei antecellere, quis ul-  
ci se de illo, cuius bona & mala pro suis ducat? quis ab eo rapere, quis iudicio repetere quod dicat suum esse, quum omnia quæ possidet putet esse illius, nec minus credat esse apud se quæ apud illū, quàm quæ habet domi, & in arcis clausa: ut iam ea non uideatur esse ciuitas, sed domus una, fratrum optime consentientium. Optabat Plato, quo firmitus in ciuitate constabiliretur concordia, ut duo illa uerba ex usu uitæ tollerentur penitus, Meum & tuum. hoc non perficient unquam leges, aut humana solertia, amor perficiet: quem indit animis non præcepta & uoces philosophiæ inanes, quia fundamēto carent, nec quid aut quamobrem sequamur ostendunt. sed præceptum Christi, quod & naturale id esse docet, & propter Deum fieri iubet, maximumq; esse propositum præmium demonstrat. Videlicet Epicuræi erūt meliores societati, qui nec Deos reuerentur, ac ne habent quidē, & omnia ad uoluptatē & ad sua cōmoda referunt. Quo magis miror fuisse olim plurimos qui id genus philosophiæ ac uitæ profiterentur cum gloria, nec esse ab hominum coetib. & communitati-  
bus

bus eiectos. quæ enim iustitia potest esse in ijs, qui amicitias, pietates omnes, qui sanctum omne ac iustum ad utilitates & delectationes referrent, haud quidem suorum animorum, sed corporum? Qui ergo aptiores ad societatem & cōmunicationem, quam qui nec nocebunt ijs quos oderunt, & proderūt ijs quos amabunt? est enim amor animo & frenum, ne uelit malefacere: & stimulus, ut adiuuet ac subueniat. Erunt quidem leges in hac repub. & uita, nō quibus cohibeatur malicia, quæ nulla erit: sed quibus interdum gubernetur ignorantia. Hoc est uerè seculū aureum, non illud Saturno rege. existit enim hoc nō ex abundantia & soluta rerum omnium licentia, ut olim fabulantur: sed ex animis puris, candidis, pulcherrima flamma incensis ad concordiam, pacem, hilaritatem gratificationē, & beneficentiam. Hæc, uel ridicula uidebuntur, uel difficilia plerisq; mortaliū, ut nunc sunt mores hominibus frigidissimis, quos nulla unquam sancti amoris scintilla calsecit. Non dubito quin multi sint admirati, cur in Christianis ciuitatibus non est inuenire concordiam istam, & mutuam beneuolentiam, aliasq; eximias uirtutes, quas nos tantopere ex lege nostra prædicamus: ut uideatur nostra respublica esse similis Platonice, quæ tota sita est in legibus & præceptis, non in re & usu uitæ. Scio dubitatione hac multorum animos uehementer angere. Nos quidem nō de his moribus atq;

hiscē hominibus loquimur, sed de illis moribus quos  
lex Christi in animos inuehit, & de ijs hominibus  
qui se legi prębēt obsequentes, quales multi sunt in  
unaquaq; ciuitate, & si minus apparent in tāta ma-  
lorum turba & multitudine: quales etiam fuerunt  
in prima illa nascente Christianitate, quum in pecto-  
ribus piorum ferueret adhuc sanguis Domini, de qui-  
bus est in Actibus apostolorum quod credentiū erat  
cor unū. Gliscente autem ecclesia, & populatim re-  
cepta pietate, magna hominum sex est admissa, qui  
secum uicia gentilitatis in cōtus religiosos importa-  
runt, quę non solum retinuerunt atq; exercuerunt  
ipsi, sed in alios quoq; quasi contagie transmiserūt.  
Et lex quę animis datur, facilius uiolatur, quā  
quę sita est in certis cōstitutisq; actiōibus externis.  
Animos enim habemus magis contumaces, minusq;  
obsequentes imperio rationis, quā actiones & o-  
peras: minoreq; negotio assuefacimus corpus ad  
quodcūq; est collibitū, quā animū ferocem, turbu-  
lentum, plenum motibus temerarijs. ideoq; humanis  
legibus, quę exteriores actus indicunt, citius diuti-  
usq; obtemperamus, quā diuinę, quę regimen in-  
ducit in turbas illas affectuū. Accedit huc quod mag-  
na & diligenti procuratione demonum efficitur, ut  
mores Christianorum sint & publice & priuatim  
prauī ac corruptissimi, impiorum autem integri, &  
laudabiles: ut si quis communitatem uitę, totamq;  
consoci



*confociationem multarum ciuitatum hominum pro  
 fanorum conferat cum nostris, sceleratissimi omnium  
 mortalium, maximeq; immanes atq; inhumani præ  
 illis censebimur. quod est annotare quum in coetib.  
 & congregationibus olim gentilium, tum hac etiam  
 ætate inter Agarenos, & insulas illas, continentēq;  
 huius Noui orbis. Sed demon, qui est hostis Dei &  
 hominum, illud præcipuè laborat, ut homines ab a-  
 micitia & coniunctione Dei quàm longissime amo-  
 ueat. quumq; nulla sit maior hominis & Dei disiun-  
 ctio, quàm impietas, cuius caput est Deum uerū nō  
 agnoscere & colere: hunc potissimum errorem cu-  
 pit demon hominum animis iniectum. idq; si perse-  
 cerit, non est de reliquis uicijs & scelerib. admodū  
 sollicitus. quoniam quidem hoc erroris iactō funda-  
 mento, quicquid proborum morum uirtutumq; su-  
 perstruxeris, nihil prorsum ad immortalem beatitu-  
 dinem confert. Itaq; finit eos bonis naturæ uti, imò  
 adiuuat sæpenumero: quemadmodū è contrario im-  
 pedit nos atq; interturbat, ut profanorum moribus  
 totaq; uitæ ratione cum nostra collata, ubi conspici-  
 tur illos antecellere, & nostri offendantur, iniicia-  
 turq; eorum animis scrupulus de lege nostra: & alie-  
 ni nos despiciant atq; abominentur, confirmenturq;  
 in sua superstitione atq; impietate, nostram uero  
 religionem tanquam uanam & inutilem respuant,  
 quæ professores sui non possit meliores efficere. Sed*

profitemur nos quidem, quod non possum sine graui dolore dicere, profiteremur Christi legem, nō præstamus. quæ lex in quibus animis obsequiū inuenit, efficit eos quales declarauimus. Nec solum sic se inter seipsos gerunt homines uerè Christiani, in eadē ciuitate & consociatione, sed erga homines alios cuiuscunq; gentis beneuolentiam exercent, & opera benefica. Olim uidebamur, homines ex patria contrahere inimicitias naturales, ut Asianus cum Europico, Græcus cum Barbaro, Iudæus cū gentili, inter quos non uidebatur posse interuenire reconciliatio: imò fas & pium erat inter illos odisse mutuò, nefas conuersari, conuiuere, colloqui. Christus lege sua distinctiones istas omnes sustulit, & septa quibus gentes separabantur diruit, hominem quemcunq; cuiuscunq; alteri coniunxit & conglutinauit bona uoluntate: docens fratres illos esse omnes inter se, qui filij essent eiusdem patris Dei. Inter Socratis oracula illud refertur, quòd interrogatus cuius esset, non Atheniensem se esse responderit, sed mundanum: quod indignum duceret, hominem sapientē, mundi ciuem, mœnibus ciuitatis unius includi: humanæ menti mundum ipsum esse patriam, per quem uagatur libere tãquam per suam ciuitatem, seu potius domum. homo Christianus mundanum se esse existimat, non contemptu ciuitatis suæ tanquam exiguæ, sed amore peccatoris sui in cūctos se homines diffundēte. Ante Christum

stum quàm molestæ disputationes de comparatione honesti ac utilis, quàm operosa deliberatio: propterea quòd nec honestum norant, nec quod uerò esset utile. quàm uarij ac incerti fines bonorum, qui humanas mentes dislinebant ambiguas? Omnia expedit atq; explicauit Christus. nouimus iam uerum finem, scimus quæ uia ad illum ducat, quid honestum sit, quid utile, quid damnosum: deliberationes aperte sunt, perspicuæ, facillimæ.

## DE FVNDAMENTO FIDEI

Christianæ.

**H**Aec est fides nostra, certissima atq; indubitabilis, quia certissimū atq; infallibile habet fundamentum, nempe bonitatē, sapientiam, & potētiam Dei: tum nostrorū animorū excellentiam, quibus nihil est neq; uerius, nec humanis mētibus certius. Atqui uirtutibus illis Dei fides nostra innititur, & reputatione ad res nos esse factos nō caducas & uiles, sed diuinas & sempiternas. Nam si sapientia est in Deo, & bonitas, prospicit humanis rebus: si prospicit, est cultus illius aliquis in humanis animis, & religio: si religio, hæc nostra. nulla enim alia inueniri potest aptior & congruentior, quæ uiam & finem statuit religionis maxime, & religioni aptos, & homini cōducentes. Si enim Deus beatus est & bonus, uult nos participes esse suæ beatitudinis, & nos illius sumus idonei ac capaces. Si autem uult, dat

modum optimum, quem ipse nouit solus. Non est autem excogitare modum meliorem hoc, quæ tot rationibus atque argumentis declarauimus. iste est igitur: et in diuersum res quoque idem efficit. Si hunc non uult, nec est alius hoc melior, et Deo dignior: nullum uult ergo, nec nos beatos. quo fit, ut uel nesciat modum, quod est insipientiæ: uel nolit nos beatos, quod non est bonitatis, nec amoris: uel non potest, quod est infirmitatis. quæ omnia quum à diuina illa maiestate procul absint, necesse est profecto et scire illud, et uelle, et posse, unde nascitur, ut et fiant quoque, et fieri tam sit uerum, certum, indubitatum, quam illa quæ prius dicebam, sapientiam, bonitatem, et potentiam esse in Deo, et præstantiam animi humani. Itaque complicata et connexa est fides nostra cum ijs quæ dubitari non possint ab homine, nisi exuerit humanitatem. Iam ex uita ipsa Christiana potest sumi argumentum ad constituendam et stabiliendam fidem. est autem ea uita, purgatio animi ad capiendum atque amandum Deum. quo quum sit nihil sublimius, nec Deo propinquius, à falso uenire non potest: quippe falsum est à Deo alienissimum, nec Deus per fallaciam induceret in humanos animos tale et tam excellens uite genus, nec fraudi ac mendacio faueret aduersos bonos, simplices, ipsique simillimos, et quatenus fieri potest proximos. Quo quis Christianior, hoc Deo similior, ac proinde melior ac diuiniior, optimus ergo et



go & diuinus Christus, caput illius, author, exemplar. Hæc fides talis est, ut quemadmodum expedit generi humano Deū qui mundo præest esse optimū, sapientissimū, potentissimū, & optabile est esse talē, etiam si quis crederet non esse ita, & fidem nostrā utilissimum est humano generi esse ueram: atq; etiā si de illius ueritate aliquis ambigeret, optare tamen deberet ut esset uera. Alioqui enim miserrimū est humanū genus, quòd ad finem qui est se indignissimus sit conditum. O cæci & dememes, uult uobis Deus diuitias bonitatis & sapientiæ suæ ostendere ac cōmunicare, uos reiicitis. Sine Christo, uniuersa uanitas est omnis homo uiuēs, ut inquit Psalter. per Christum, nec infans ūnius horæ cadit in terram, tanquā tener flos à Borea deiectus. is enim cui mens talis cōtigit, nihil ut à bruto differat, seruatur tamen per Christum. Quanta uera omnium consolatio, quæ quiescatio animi, quum uentum est ad exitum uitæ? quum reputamus etatē in uicijs, in flagitijs, in sceleribus transactam, seruari tamen & fieri compotem felicitatis sempiternæ, per fiduciam in illum qui pro nobis omnibus dependit, & patri satisfecit. Hoc tantū munus reiiciat aliquis, nisi insanus? hoc non amplectatur? saltem uoto hoc non optet esse uerissimū ac certissimum? Quòd si expedit omnibus, profecto factum est ab illo potentissimo & optimo, qui bonitate sua nobis omnibus bene cupit.

Post rationes quæ factæ sunt de fide, qui iã creditur  
 quum scrupulus subibit aliquis de ijs quæ sunt habē  
 da pro certissimis, ne laboret passim adhiberi ratio-  
 nem, & quasi punctiōni quantulacūq; malagma-  
 ta apponere: quod esset quum infinitum, tum eti-  
 am periculosissimum. propterea quod hostis noster  
 astutissimus est, & callidissimus, nec unquam quies-  
 cit, quiq; non solum intentus est ac immūet semper  
 suæ occasiōni, quū nos illā damus, sed facit ipse sibi  
 occasiōnes mille modis per singula tēporis puncta.  
 Huius ars est, eiusmodi dubitationes crebro excita-  
 re, ut subinde cum eo in discrimen certaminis uenia-  
 mus. sperat enim, ut si sæpe prælietur, uincat aliquā  
 do. Quocirca receptæ iam & confirmatæ sententiæ  
 acquiescendum, & standum firmiter: proponenda  
 ob oculos, quæ fas est unūquēq; sentire de Deo &  
 homine, quod est fidei nostræ stabilissimū fundamē-  
 tum. cogitandum etiam, bona omnia esse à Deo. Et  
 si alia ex illius bonitate ac munificentia nobis con-  
 tingūt, quanto hoc magis rectæ persuasiōnis, tantū,  
 tā excellēs, tam homini necessariū? Itaq; ad eū cōsu-  
 giendum est, & rogandū, ut largiatur hoc donū, &  
 conseruet, & in tentatione (quod instar est prælij)  
 ut adsit & tueatur, illustretq; mentes nostras luce  
 illa sua, quæ nos fulcit & firmiores efficit, quàm ra-  
 tiones humanæ qualescūq;. Nam non raro accidit,  
 ut qui rationibus de pietate assenitur, postea de illa

rum ipsarum ui & firmitate dubitet . à Deo est opẽ  
implorandum: quod fecerunt Apostoli, qui post cœ-  
lestis magistri doctrinã , & tam stupẽda prodigia,  
petunt tamen, Domine adauge nobis fidem. Hęc  
aut scripta sunt nobis, ut fidẽ Christinã sciamus ue-  
rã esse, & uelimus à Deo petere , qui dat omnibus  
abūdãter, nec unquã exprobrat, ut Iacobus inquit.

Maximas attulimus rationes, quæ omnes perpen-  
dendæ sunt, & considerandæ. Nam quemadmodum  
Deus ex collatione multarũ rerũ ab eo conditarũ fa-  
cilius cognoscitur, uelut ex ordine toto uniuersi, ex  
decursu anni, & eiusmodi: ita ueritas Christianæ fi-  
dei, non ex uno aliquo est loco, sed ex ipsa tota eliciẽ-  
da partibus inter se collatis: & Christi diuinitas ex  
ordine uitæ illius, & Ecclesiæ. Sed quantumuis per-  
spicuas & ualidas rationes attulerimus, non deerũt  
à quibus fidem non impetrabimus, partim inuetera-  
ta consuetudine audiẽdi & credendi contraria, par-  
tim stupore cordis, & mentis hebetudine: tum uicijs  
in diuersum torquentibus. de quibus dicitur in psal-  
mo: Vir insipiẽs non cognoscet, & stultus nõ intelli-  
get hęc Dei opera admirabilia. Hi sunt, in quos par-  
illa dominatur, quæ est nobis communis cũ brutis:  
quos Paulus animales homines nũcupat, nec intelli-  
gere ea quæ sunt spiritus Dei, esse enim illis stultitiã.  
Mira dictu res, quũ tot habeat ratio argumẽta pro  
ueritate, ut obliuiscatur omnium una leuißima con-  
iectura

iecturula tentationis uidelicet inuisam habet rationem affectus: ideo nihil est tam paruum, quin sufficiat ad concitationem eius aduersus rationem. ut in bello ciuili quiuis constituitur dux, modo contra aduersarios aliquid loquatur. Illudq; est in rebus pietatis miserrimū, & quod magna arte curat noster hostis, ut ijs qui si quid quacunq; de re loquantur, ridebunt omnes, de coelis, de elementis, de moribus, de ciuitate, sine literis, sine ingenio & iudicio omnia inepta & stulta, si quid dicant aduersus pietatem, auscultant multi, & scrupulis se torquent. Alij magnā sapientiæ opinionem captant, nihil credendo. alij filij huius seculi in rebus uitæ acuti, in religione nihil cernentes, quam alij eis tribuunt de ingenio existimationem in rebus uitæ, tribuunt in rebus pietatis. De nulla re audet pronunciare, nisi doctus, exercitatus, prudens: de pietate quilibet, qui nec habet exercitium, nec spiritum. Alij nollent audire: qui, sicuti est in libro Iob, dicunt Deo, Recede à nobis, scientiam uiarum tuarum nolumus. Sunt, quibus Deus huius mundi per præstigias suas & dolos fascinauit corda, & odio sanctæ religionis, quam rationem in alijs rebus erubescerent petere, efflagitant in mysterijs diuinis. Vtcunq; res se habeant, nos, quantum fuit facultatis nostræ, lucem protulimus. Si qui uel claudant oculos, uel non proferent, quo minus sit illis usui, nec nostra fuerit culpa, nec ipsius lucis:



*non tamen sine dolore nostro. Dominus IESVS,  
qui cæcorum oculos aperuit, dignetur sanare oculos  
omnium, atq; aperire, ut sanctam suam & salu-  
berrimam intueamur lucem.*

LIBRI QVINTI ET VLT-  
mi de ueritate fidei Christianæ,  
FINIS.

ERRATA INTER EXCV-  
dendum commissa, sic emendabis.

Pag. 9. uers. 16. enim 21. 9. beneficio 34. 20. im-  
pellantur 61. 1. scientiam 67. 2. omnium 69. 2.  
Melitense 73. 17. nec quiescit 126. antepenult.  
quaesierim 135. penult. si nullus esset 140. ult. na-  
turis 141. 5. coniunctione 147. 8. renunciandum  
152. 22. iuris 159. 11. magnam 181. 2. quidem 197.  
19. bella 246. 1. obtenebratur Ead. 18. cum in ea-  
dem 255. 12. fortè, aboleuit 277. 11. euangelicæ  
287. 11. summum Ead. 24. aut non satis & 26.  
Homerus 303. 9. gratiam se atq; adoptionem 312.  
23. Dei filium 314. 18. absens & 19. edendi 419.  
17. cæcitatem 451. 24. recolito 461. penult. Fœli-  
cis & Festi 468. 17. peculiarem 477. 24. pro-  
phetabimus 516. 11. essentia 526. 9. sint 530. 6. qui-  
dem 561. ult. in eo 581. 5. filijs 598. 5. loquendi re-  
gum 641. 20. unus crit 675. ult. amplius 677.  
23. iuuentæ 679. penult. Claudius post  
700. penult. claudent

BASILEAE, EX OFFICI-  
NA IOANNIS OPORINI, ANNO  
Salutis M. D. XLIIII. Men-  
se Iunio.